

HIKAYAT PUTROE BAREN 2 — Ramli Harun

Milik Departemen P dan K
Tidak diperdagangkan
Untuk umum

Hikayat Putroe Baren 2


Ramli Harun





Departemen Pendidikan dan Kebudayaan

Hikayat PUTROE BAREN

2



Dialihaksarakan oleh
RAMLI HARUN



Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1983

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

PERPUSTAKAAN DIT. SEJARAH & NILAI TRADISIONAL	
Nomor Induk	: 6033/1986
Tanggal terima	: 20-11-1985
Tanggal catat	: 13-1-1986
Penyediaan dari	: Pro. Pen. Buku & Sastra Daerah
Nomor buku	:
Op. ke	: 1

KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalan karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahannya pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seiring dengan pertimbangan tersebut di atas, kami sajikan pada kesempatan ini suatu karya sastra daerah Aceh, yang berasal dari Museum Negeri Banda Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1983

Proyek Penerbitan Buku Sastra
Indonesia dan Daerah

RINGKASAN HIKAYAT PUTRI BAREN Jilid II

Setelah tiga tahun Bangta Sulotan memerintah di negeri Mekah baginda Raja Baren Nasi mangkat. Raja muda memimpin rakyatnya dengan adil disertai dengan sifatnya yang pemurah. Hanya ada satu sifatnya yang tidak menyenangkan isterinya, yaitu ia sering keluar meninggalkan istana berkelana mencari pengalaman. Putri Sunoe yang berwatak keras diam-diam pergi berlayar bersama dengan beberapa orang pengantar. Baru keesokan harinya Putri Baren mengetahui hal itu, seraya memberitahukan Bangta Sulotan bahwa Putri Sunoe sedang mengalami kecelakaan di laut. Kapal yang ditumpangnya karam.

Setelah beberapa hari terapung-apung di laut Putri Sunoe terdampar di sebuah pulau. Di pulau kecil itu terdapat sebatang kayu yang besar yang didiami oleh burung garuda. Ketika Putri Sunoe memanjat pohon itu tiba-tiba burung garuda pulang, lalu ia tertidur. Putri Sunoe bersembunyi dalam lobang telinga burung raksasa itu. Karena terasa ada sesuatu dalam telinganya burung garuda terbangun dan terbang jauh. Di sebuah gunung bernama Salban ia turun dan tidur lagi. Saat itulah Putri Sunoe keluar dari lobang telinga dan lari masuk hutan.

Sepeninggal isterinya Bangta Sulotan selalu tidak tenang. Tiap hari ia pergi ke tepi pantai kalau-kalau isterinya terdampar di sana. Melalui ilmu gaibnya Putri Baren memberitahukan Bangta Sulotan bahwa Putri Sunoe sedang berada dalam hutan rimba di negeri Habsyah.

Dalam perjalanan sekitar gunung Salban Putri Sunoe sempat mendamaikan dua orang raja yang sedang berperang. Keduanya terdiri dari bangsa manusia kecil yang tingginya selutut manusia biasa. Di tempat lain Putri Sunoe ditawan oleh bangsa manusia raksasa. Ia dimasukkan ke dalam periuk tetapi tiga hari kemudian dapat meloloskan diri. Berbagai kesulitan dialami Putri Sunoe selama Dalam pengembaraan. Menyesal rasanya ia meninggalkan istana tetapi hendak pulang ia merasa malu. Tidak ada jalan lain

kecuali menyerahkan nasibnya kepada Tuhan Yang Maha Kuasa. Sesudah bertahun-tahun dalam pengembaraan akhirnya ia sampai di tepi pantai. Karena melihat lambaian tangannya sebuah kapal menepi. Putri Sunoe naik ke kapal itu. Pada mulanya semua penumpang menyangka penumpang baru itu seorang lelaki karena ia selalu memakai pakaian seperti seorang pahlawan. Tetapi setelah melihat rambutnya yang terurai taulah mereka bahwa ia seorang putri cantik. Ketika kapal mulai berlayar nakhodanya mulai membujuk Putri Sunoe supaya bersedia melayaninya. Karena Putri Sunoe tetap menolak semua anak buah kapal turut memaksanya supaya menuruti kehendak nakhoda. Dalam keadaan terdesak Putri Sunoe melakukan sembahyang dua rakaat. Ia memohon do'a kepada Tuhan agar terlepas dari bahaya. Sebentar kemudian cuaca menjadi gelap gulita. Hujan dan badai melanda kapal itu. Nakhoda bersama semua anak buahnya ketika hendak menurunkan layar terpelanting ke laut.

Putri Sunoe mengemudikan sendiri kapal itu tanpa tujuan dan tak lama sampai di sebuah negeri yang diperintah oleh seorang raja penyembah berhala, Peuranggi namanya. Putri Sunoe yang menyamar sebagai seorang pemuda diterima dengan hormat oleh Raja Peuranggi. Ia membujuk Raja Peuranggi untuk memeluk agama Islam dengan memperkenalkan dirinya sebagai seorang putri dan bersedia menjadi isterinya. Meskipun Raja Peuranggi terpesona dengan kecantikan Putri Sunoe namun ia tidak bersedia meninggalkan agama berhalanya, bahkan ia menghina Nabi Muhammad. Timbullah pertengkaran antara keduanya yang berlanjut dengan perkelahian dengan pedang. Ternyata Raja Peuranggi kebal besi. Akhirnya Putri Sunoe mengamalkan suatu ilmunya. Dengan seketika Raja Peuranggi dan seisi istana tertidur. Putri Sunoe melarikan diri dengan seekor kuda sambil membawa sebilah pedang. Ketika terbangun Raja Peuranggi melihat Putri Sunoe sudah tidak ada lagi berikut pedang dan kudanya. Ia mencarinya ke segala jurusan.

Putri Sunoe yang sedang beristirahat di bawah sebatang kayu dikelung oleh Raja Peuranggi bersama rakyatnya. Mereka mencoba menangkapnya, namun dengan ilmu yang dimilikinya ia

dapat mengalahkan siapa saja yang mendekatinya. Peuranggi langsung berhadapan dengan Putri Sunoe. Dalam suatu perkelahian seru akhirnya Peuranggi dapat ditewaskan. Kemudian ia membakar istana Peuranggi. Setelah itu ia menuju tepi sungai dan di sana ia tertidur selama tiga hari. Dalam keadaan tidur itulah putra Raja Peuranggi datang dan memenggal lehernya. Mayatnya di buang ke sungai.

Putri Sunoe sebenarnya tidak mati. Ia diselamatkan oleh Tuhan Yang Maha Kuasa dengan menjelma sebagai seorang bayi dalam perut seekor ikan yang besar. Ketika ikan itu terdampar di pantai seorang nakhoda menemukannya. Melihat ada kelainan pada ikan itu lalu ia membedah perutnya. Alangkah heran bermacam senang nakhoda Male menemukan seorang bayi perempuan dalam perut ikan. Bayi itu dibawanya pulang dan dipeliharanya seperti anaknya sendiri. Dalam waktu yang tidak lama bayi itu sudah dewasa. Ia menceritakan riwayat dan pengalamannya kepada nakhoda Male sejak ia dibunuh oleh anak Raja Peuranggi sampai ia hidup dalam perut ikan. Dikatakannya juga bahwa ia sudah menikah dengan penguasa Mekah. Demikianlah Putri Sunoe tinggal beberapa waktu lamanya bersama nakhoda Male di negeri Isfahan.

Berita tentang seorang putri cantik yang berasal dari perut ikan di negeri Isfahan lama kelamaan sampai ke telinga Bangta Sulotan di Mekah. Bangta ingin menyaksikan kebenaran berita tersebut. Bersama rakyatnya yang banyak ia berangkat menuju Isfahan. Keberangkatannya diketahui oleh Putri Sunoe melalui ilmunya dan menyampaikannya kepada nakhoda Male. Sesampai di istana, Bangta Sulotan disambut dengan segala kebesaran oleh Nakhoda Male, dan Putroe Sunoe.

Alangkah terharunya Bangta Sulotan mendengar cerita mengenai diri isterinya. Atas permintaan Nakhoda Male suami isteri itu menetap di Isfahan, bahkan kemudian Bangta Sulotan diangkat menjadi khalifah di negeri tersebut. Di bawah pimpinannya Isfahan menjadi negeri yang aman dan makmur.

Adapun Raja Abdullah bersama Putri Baren berangkat menuju Rum untuk melihat putra bungsunya yang sudah menjadi

raja di sana dengan gelar Raja Muda. Di sana mereka disambut dengan upacara kebesaran. Raja Muda meminta supaya kedua orang tuanya tetap tinggal di negeri Rum.

Tersebut pula rakyat negeri Peuranggi yang sedang dalam keadaan serba kekurangan akibat kemarau panjang. Putra Raja Peuranggi bersama rakyatnya meninggalkan negeri Peuranggi untuk mencari bahan makanan. Akhirnya mereka sampai di Isfahan. Raja Peuranggi menyatakan maksudnya kepada Bangta Sulotan bahwa kedatangannya selain untuk menuntut ilmu dan memeluk agama Islam, juga untuk memohon bantuan bahan makanan. Ia juga menyatakan keinginannya untuk berdagang di negeri Isfahan. Bangta Sulotan diakui sebagai saudaranya. Bangta Sulotan menyambut baik keinginan Raja Peuranggi, tetapi Putri Sunoe tidak menyetujuinya. Ia mengetahui bahwa apa yang diucapkan oleh Raja Peuranggi hanya sebagai siasat belaka. Ketika diundang ke istana Raja Peuranggi membawa hadiah berupa emas intan untuk Putri Sunoe.

Pada suatu hari Bangta Sulotan diajak memancing ikan di laut. Putri Sunoe melarang suaminya menerima ajakan Raja Peuranggi. Namun Bangta Sulotan tetap menerimanya karena Raja Peuranggi sudah dianggap sebagai saudara kandungnya. Ketika sedang asyik memancing ia ditikam oleh Raja Peuranggi, tetapi ia tidak mempan ditikam, dan dalam keadaan pingsan akibat guna-guna ia didorong ke laut hingga tenggelam. Dengan lenyapnya Bangta Sulotan terbukalah jalan baginya untuk memiliki Putri Sunoe. Karena tidak ada jalan lain untuk menolak, Putri Sunoe meminta supaya disediakan sebuah peti kaca. Ke dalam peti kaca itulah ia masuk dan menguncinya dari dalam. Raja Peuranggi membawa pulang peti kaca itu ke negerinya. Di sana pun ia tidak dapat membujuk Putri Sunoe, karena ia mengancam akan membunuh diri jika peti kaca itu dipecahkan.

Putri Sunoe berada dalam peti kaca beberapa waktu lamanya. Ketika ia sedang membawa Quran terbayang di ruang matanya Bangta Sulotan sedang terapung-apung di laut. Ia mencari akal untuk ke luar dari peti kaca tanpa gangguan dari Raja Peuranggi. Dengan berpura-pura sakit ia dikeluarkan, seraya nujum-nujum di-

panggil untuk mengobatinya. Ternyata tidak seorang nujumpun yang sanggup mengobatinya. Menurut Putri Sunoe yang dapat menghilangkan penyakitnya itu ialah ibunya sendiri. Putri Sunoe diantarkan pulang ke Isfahan dengan janji apabila sudah sembuh akan dijemput lagi oleh Raja Peuranggi.

Beberapa hari sesudah Putri Sunoe bertemu dengan ibunya, Bangta Sulotan diketemukan di tepi pantai dalam keadaan lemas. Sebulan kemudian Raja Peuranggi pergi ke Isfahan sesuai dengan janjinya. Di sana ia disambut oleh Bangta Sulotan dengan pedang. Raja yang kebal besi ini lari ke negerinya. Tetapi tiada berapa lama kemudian ia kembali lagi bersama rakyatnya menyerang Isfahan. Serangan itu dapat dipatahkan oleh Bangta Sulotan. Raja Peuranggi tidak putus asa. Ia mempersiapkan pasukannya yang lebih banyak di negerinya. Bangta Sulotan dan isterinya tidak sabar lagi. Mereka memacu kuda mencari Raja Peuranggi. Di sana kedua suami isteri itu mengamuk. Siapa saja yang ditemui diserangnya. Banyak rakyat yang menjadi korban. Melihat keadaan demikian, Raja Peuranggi melarikan diri ke negeri Mureh mencari bantuan.

Negeri Peuranggi dikuasai sepenuhnya oleh Bangta Sulotan. Menurut keterangan ahli nujum di Mureh, tidak ada orang yang dapat mengalahkan Bangta Sulotan dan Putri Sunoe kecuali dua orang suami isteri yang berkuasa di negeri Rum. Yang dimaksud tidak lain dari Raja Abdullah dan isterinya Putri Baren.

Sebuah perutusan membawa surat Raja Peuranggi kepada Raja Rum. Permohonan Raja Peuranggi diterima Raja Abdullah dengan perjanjian apabila musuhnya dapat dikalahkan Raja Peuranggi akan menyerahkan sebagian negerinya kepada raja Rum. Dengan tidak menyelidiki terlebih dahulu berangkatlah Raja Abdullah bersama isterinya putri Baren ke negeri Peuranggi dan langsung berhadapan dengan Bangta Sulotan dan Putri Sunoe yang tidak mereka kenal. Pertempuran seru antar saudara terjadi. Pertarungan yang seimbang itu berlangsung lama. Tidak ada tanda-tanda suatu pihak akan menang. Dalam suatu usaha memenangkan perkelahian, sambil memuji-muji kebesaran Tuhan, Putri Baren memohon sempena dan tuah kedua orang tuanya. Sebutan nama Baren Nasi dan Meureudum Rakna terdengar oleh Bangta

Sulotan. Ketika ia mengetahui bahwa Putri Baren yang mengucapkannya dengan segera pertarungan terhenti. Mereka sadar sudah berperang sesama sendiri, akibat tidak menyelidiki terlebih dahulu. Kedua pihak meminta maaf atas kekeliruan yang mereka perbuat. Putri Baren dan Raja Abdullah bersembah sujud di hadapan Bangta Sulotan dan Putri Sunoe.


Raja Peuranggi sudah memeluk agama Islam dan seluruh kekuasaannya diserahkan kepada Raja Abdullah dan Bangta Sulotan. Yang menjalankan pemerintahan ialah Bangta Sulotan. Tempat tempat belajar dan rumah-rumah ibadat dibangun. Rakyat diwajibkan belajar dan menjalankan ibadah sehingga negeri menjadi aman. Empat bulan kemudian, sesudah Bangta Sulotan berpesan kepada Raja Peuranggi untuk menjaga keselamatan negeri yang baru dibangun itu, kedua pasang raja muda itu pulang ke Mekah.

Tersebutlah seorang raja yang belum beragama bernama Jabarah. Ia mendengar berita tentang kecantikan dua orang putri di negeri Mekah. Sejumlah utusan dengan membawa hadiah berupa perhiasan dikirim ke Mekah. Di sana mereka diterima oleh Raja Abdullah. Keinginan mereka untuk menyaksikan kedua putri dikabulkan. Putri Baren dan Putri Sunoe disuruh memakai pakaian yang serba indah. Para utusan masing-masing diberikan sebilah pisau dan buah mangga. Ketika mereka sedang mengupas mangga, kedua putri keluar. Karena asyik memandang kecantikan Putri Baren dan Putri Sunoe, tidak terasa tangan mereka tersayat pisau. Melihat suasana di Mekah dengan serta merta mereka memeluk agama Islam. Kemudian mereka pulang menyampaikan apa yang mereka saksikan di Mekah kepada Raja Jabarah.

Mendengar cerita tentang kecantikan dua orang putri di Mekah, Raja Jabarah mempersiapkan angkatan perangnya yang besar. Ia tidak sabar lagi untuk memiliki kedua putri itu. Negeri Mekah diperangnya. Serangan Raja Jabarah dihadapi oleh Raja Abdullah dan Bangta Sulotan. Kedua orang raja ini akhirnya kewalahan menghadapi lawan yang amat banyak itu. Keduanya bersembunyi di pintu sebuah gua, tetapi tak lama diketemukan oleh pasukan Raja Jabarah. Keduanya diikat dengan rantai besi dan dijaga ketat. Ketika Putri Baren dan Putri Sunoe mengetahui

bahwa suami mereka dalam bahaya, mereka segera turun ke gelanggang perang dengan memakai pakaian lelaki. Sesudah bertempur mati-matian melawan musuh yang tidak seimbang, akhirnya mereka juga harus menyingkir ke istana. Di istana Putri Baren meminta bantuan Raja Jin Pari untuk menjemput ketiga orang putranya.

Tiada berapa lama kemudian, ketiga orang putra putri Baren tiba di negeri Mekah dan langsung berhadapan dengan musuh. Ketiga raja muda inipun akhirnya merasa lelah juga menghadapi lawan yang sangat banyak. Mereka meninggalkan medan perang. Pada saat itulah Putri Baren dan Putri Sunoe keluar dari persembunyian dengan pakaian sebagai putri. Keduanya kembali bertempur dengan gigih. Raja Jabarah memerintahkan pasukannya untuk menangkap kedua putri itu. Keduanya lari meninggalkan medan perang. Semua pasukan mengejar termasuk pasukan yang menjaga Raja Abdullah dan Bangta Sulotan. Kesempatan itu digunakan oleh ketiga raja muda untuk membebaskan orang tua mereka. Pertempuran berlangsung lagi. Ketujuh orang pahlawan bertempur dengan gigih menghadapi pasukan musuh yang tiada terkira banyaknya. Akhirnya Raja Jabarah harus mengakui kekuatan tujuh orang keluarga pahlawan itu. Dengan sejumlah rakyatnya yang masih tersisa Raja Jabarah mundur ke negerinya. Negeri Mekah aman kembali di bawah pimpinan Bangta Sulotan.



Hikayat
PUTROE BAREN
2

**HIKAYAT
PUTROE BAREN
II**

BISMILLAHIRRAHMANIRRAHIM

Tango lon kisah Bangta Sulotan
Neukeurajeuen Makah mulia
Umu lhee thon teutap keurajeuen
Mata yoh nyan duneu raja

Lheueh nyan Bangta sinan teutap
Meusyeuhu that sigala donya
Hukom seunang ban kheun kitab
Han tom rakyat neunenaya

Areuta makmu tangan murah
Neubri seudeukah soe nyang teuka
Rakyat meukatoe ireng sajan
Bangta Sulotan gundah raya

Dalam keurajeuen han tom neuduek
Dawok neujak-jak neudiwana
Neukeumeung jak sigala nanggro
Muda samlakoe gundah raya

Amma bakdu teuma dudoe
Putroe Sunoe lon calitra
Putroe marit deungon judo
Tuanku ho neukeumeung bungka

Pakon han neuduek dalam keurajeuen
Dalam ngon mideuen bek binasa
Laman tuanku tan di sinoe
Teuboh nanggro po meukuta

Jampang na hukom peurdawaan
Pat putosan meutan meukuta
Teuma marit Bangta Sulotan
Neupeugah ban bak judonya

Di lon kujak ho nyang napsu
Pakon tuanku gundah raya
Kujak barangho ban nyang kheundak
Pakon cangklak gata sangka

Han kujinoh keurajeuen sinoe
Kuwoe u nanggroe ayah bunda
Meuhan neukeurajaeuen hak naggroe nyoe
Jayeh kamoe po meukuta

Di lonpi kueh bak nanggroe nyoe
Kujak jinoo ho langkah ba
Ban nyang untong Po tallah bri
Jikalee matepi kurela

Bangta Sulotan neudeungo meunan
Beungeh yoh nyan hu ngon mata
Kajakkeu le ho nyang hajat
Meunan narit Bangta muda

Ban putroe deungo haba meunan
Weuehneu yoh nyan hana tara
Bukon le hina lon nyoe sidroe
Bah kuboh droe kee bak fana

Bahkeu lon jak seutot langkah
Kalee na tuah meubahgia
Sangkira han pakri kubah
Kheundak Allah ateueh donya

Putroe Sunoe weueh that ate
Ile mata ile limpah dada
Putroe Sunoe pi that jantan
Rasa jilawan Bangta muda

Ate weueh that putroe bangsawan
Nyang di dalam amat beurcinta
Putroe ek le u meuligoe
Neucok peutoe saboh nyang raya

Neuboh keunan alat keurajeuen
Neupeutren u leuen peutoe raya
Teuma neuyue me peutoe saboh
Rakyat tujoh ploh jicok sigra

Rakyat ili troh u laot
Putroe di likot sajan sireuta
Hana soe thee putroe beurjalan
Bangta Sulotan neuwoe hana

Ka padum trep han tom neuwoe
Ubak Putroe Sunoe muda
Teukeudi Allah geutren putroe
Bungka jinoo ho langkah ba

Peuturot napsu saket ate
Nyan neutren le lam istana
Han sidroe thee rakyat lam nanggroe
Kareuna putroe le bicara

Tuan putroe beuet saboh hekeumat
Teungeut rakyat sigala donya
Nyang na nyawong dum lat batat
Keunong hekeumat putroe muda

Baren Miga Raja Abdullah
Teungeut mayoh dalam istana
Abeh teungeut bandum pangsan
Bangta Sulotán meunan juga

Nyandum areh Putroe Sunoe
Rakyat lam nanggroe neuboh mintra
Teuma neutren lam meuligoe
Tuan putroe lanja neubungka

Sira neujak neungieng u likot
Ie mata sret meulumba-lumba
Neukalon istana ngon meuligoe
Kareuna droe ka neubungka

Troh u Jeudah beungoh uroe
Neupioh putroe di kuala
Na sikeujap trohneu keunan
Tueng ie seumbahyang sigra-sigra

'O sare' lheueh seumbahyang suboh
Teuma neubeudoh putroe muda
Neuseumbahyang dua raka'at
Seumbahyang hajat neulakee do'a

Neumeuinseuen ubak Tuhan
Putroe bangsawan meusempeuna
Ya Ilahi wa ya Rabbi
Poku neubri ban kupinta

Jikalee na untong nasib
Sangkira han got bahle fana
Ubak gata ulon pasrah droe
Neukalon kamoe ya Rabbana

Lheueh neukheun nyan tuan putroe
Neuek jinoe sampan tinda
Lalu neukayoh rijang-rjiang
Troh le tuan ubak bahtra

Teuma neuek putroe keunan
Lam kapai nyan sigra-sigra
Teuma marit tuan putroe
Tango kamoe dumteu rata

Bek lale le dum geutanyoe
Tateubiet jinoe nak tabungka
Ban jideungo haba meunan
Beudoh yoh nyan rakyat dumna

Saoh jibet layeue jiboh
Beude jicoh meugeumpita
Lheueh nyan putroe peulayaran
Angen jitren reumbang pasa

Jiboh layeue tumbok kurong
Kapai jamprong u laot raya
Umu siuroe peulayaran
Putroe intan peupuleh mintra

Sare puleh rakyat lam nanggroe
tuan putroe laju neubungka
Amma bakdu teuma dudoe
Lon kisah jinoe Baren Miga

Putroe Baren marit yoh nyan
Deungon aduen Bangta muda
Tango kamoe aduen teungku droe
Teumuda sidroe ka neubungka

Teumuda neujak hana tathee
Keunong tipee geutanyoe dumna
Pakri padan ngon tajak tueng
Teumuda neutimpong nibak gata

Han kujak tueng adoe meutuah
Teumuda gata sah darohaka
Jijak adoe han jipeugah
Pakri kubah adoe raja

Sireuta neukheun haba sipatah
Ie mata limpah sret bak dada
Allah Allah Putroe Sunoe
Bungka jinoe ho langkah ba

Gata tabungka tinggai kamoe
Bit putroe nyoe darohaka
Baren Migapi ka neuwoe
Putroe Sunoe han meuho ka

Putroe Baren eelia Allah
Neueu deuh leumah u laot raya
Sajan neutilek dalam buseutan
Leumah neupandang kapai raya

Na siuroe peulayaran
Jarak ninan ngon kuala
Meunan teukeudi nibak Tuhan
Abéh dukaan bansineuna

Amma bakdu teuma dudoe
Putroe Sunoe di laot raya
Kapai neusaoh nyan di sinan
Teukedi Tuhan teuka bala

Angenpi tan bakatpi han
Kapai raya nyan ka binasa
Kapai ka lham dam laot
Jinoe lon seubot putroe muda

Putroe Sunoe meumat bak tihang
Teukeudi Tuhan Po Nyang Esa
Lheueh nyan timue papeuen siblah
Karonya Allah Po Rabbana

Kareuna putroe leubeh 'idat
Ngon keuramat hana tara
Nyankeu ureueng gaseh Tuhan
Neubri papan saboh nyang raya

Sinan bandum alat keurajauen
Ateueh papeuen Tuhan karonya
Teukeudi Allah meuleuha kudrat
Kuasa that Po Nyang Esa

Neubri labang uleh Tuhan
Ateueh papeuen nyan hade di sana
Putroe Sunoe duek ateueh papeuen nyan
Peulayaran u laot raya

Ateueh papeuen nyan peulayaran
Kaonya Tuhan ho langkah ba
Rakyat laen abeh seulamat
Teungoh u darat dumjih rata

Hana matepi meusidro
Keuramat Putroe Sunoe muda
Lom ngon keuramat Putroe Baren
Ureueng laen han binasa

Teukeudi Allah tuhan Rahman
Hanyot papeuen nyan u laot raya
Geulumbang poh rieuek tampoe
Tuan putroe ro ie mata

Miyup manyang geulumbang tatang
Ulee mumang putroe muda
Meuteumeung kayee yoh nyan sibak
Jroh that rampak hana tara

Kayee jimeunan pawoh tinggi
Dheuen bube-be bak u dara
Luah saboh dheuen saboh yok umong
Meunan meuteumeung bak calitra

Teukeudi Allah Khalikon 'Alam
Neubri eleuham dalam dada
Teusyawe lam ate Putroe Sunoe
Kuek kayee nyoe laman sigra

Neucok labang neupateng kayee
Allah bri thee dalam dada
Labang tujoh ploh neupateng kayee
Neuek dilee putroe muda

Droe cit ka ngon teukeudi Tuhan
Ujong kayee nyan umpung geureuda
Masa putroe ek u cong kayee nyan
Hana sinan inong geureuda

Yoh masa nyan geureuda jiwoe
Teukeujot Putroe Sunoe muda
Ban neukalon geureuda jiwoe
Teumakot putroe hana tara

Pakriku untong lon nyoe sidroe
Saleh uroe nyoe lon troh masa
Bukon that gundah tuan putroe
Meutaloe-taloe ro ie mata

Putroe pasrah droe bak Hadarat
Beuseulamat nibak bahya
Beubek jithee geureuda pindoe
Neusom kamoe ya Rabbana

Raya geureuda deungo lon kheun proe
Reului nanggroe siblah donya
Sion-on bulee nyan geupeugah
Panyang nam blah hah bak calitra

Uram bulee raya sangat
Adat tasipat be bak u dara
Teukeudi Allah peurintah Tuhan
Geureuda pangsang teungeut indra

Putroe Sunoe sangat teumakot
Nyum rasa sret lam laot raya
Droe cit ka ngon teukeudi Tuhan
Tren eleuham dalam dada

Teuma teusyawé dalam ate
Laju neuk le cong kayee raya
Sare leupah neuk u manyang
Neulop yoh nyan dalam teulinga

Neuduek sinan that meucakap
Ateneu rab dalam dada
Neumeumat 'oh kong tuan putroe
Geureuda pindoe teuma jaga

Jideungo gram-grum lam geulunyueng
Teukeujot yoh nyan binatang mareuga
Teuma jipo geureuda sinan
Cong kayee nyan lam laot raya

Jiasek ulee wie ngon uneun
Jipo yoh nyan lam antara
Jipo u manyang jingieng u miyup
Hangap-hangeup putroe muda

Neutakot srèt dalam laot
Putroe teumakot yo anggeeta
Geureuda po siuroe simalam
Rot u manyang dalam hawa

Suara sayeuep jipo meuhuet-huet
Tamse geuyup sangkaikala
Na ban guroh teuka ujeuen
Tamse tupheuen rieuëk keunong sa

Meunan suara that meudeungong
Na tamse gong nyang that raya
Teukeudi Allah lhee uroe lhee malam
Troh u gunong rimba raya

Gunong nyan jarak that ngon nanggroë
Han tom soe lumpoe manusia
Padum ngon cureh kareueng teudong-dong
Hayut tapandang miseue suda

Geureuda sujud di cong gunong nyan
Neuteubiet yoh nyan putroe muda
Neuteubiet lam geulunyueng geureuda pindoe
Hana jitupeue le geureuda

Masa teungeut geureuda pangsang
Yoh masa nyan neuteubiet sigra
Leupah u lua tuan putroe
Neujak sidroe dalam rimba

Jak han meuhö tueng han meupeue
Sayang taeu meuraba-raba
Neujak laju dalam gunong
Putroe arong rimba raya

Jeuep-jeuep gunong neubeurawang
Abeh neujeumeurang lam-lam rimba
Neuteungoh gle neutren paloh
Ngon peunajoh han sapeue na

Tuan putroe that bit payah
Neucok langkah meuhila-hila
Putroe Sunoe payah han ban
Neupioh yoh nyan sikutika

Teuma neubeudoh bak pioh nyan
Lom beurjalan sigra-sigra
Neuteungoh cot neuteen paloh
Hingga ka troh lom bak data

Droe cit ka ngon teukeudi Allah
Putroe Sunoe sah meuraba-raba
Neujak keudeh neujak keunoe
Geunap uroe dalam seungsara

Han ek le troh neuwoe u nanggroe
Manyang gunong nyoe lam antara
Gunong jimeunan Gunong Saleuban
Sikhan lam awan sikhan u donya

Rab ngon Gunong Raja Habeusyah
Nanggroe nyan luah hana tara
Trep nyang meunan dalam gunong
Umu sithon bak calitra

Amma bakdu dudoe nibak nyan
Bangta Sulotan lon calitra
Silawet gadoh tuan Siti
Sianeuk ruji tan neurasa

Dawok neumoe neumeubae
Ie mata ro meuleulumba
Hana neuduek le di nanggroe
Neumita putroe sigala donya

Dawok neujak-jak taloe pasi
Ulee ili ngon ie mata
Hana sapat nyang na meugah
Bangta gundah hana tara

Tahe gante keudeh keunoe
Siulah proe miseue gila
Bukon sayang neumoe bae
Ingat keu judo putroe muda

Sabab gadoh cre di nanggroe
Malam uroe neuro ie mata
Bu han neumakeuen ie han neujep
Droe nyan galeb bak meumita

Umu lhee buleuen jak taloe pasi
Ulee ili Bangta muda
Badan payah pijuet han ban
Neumakeuen tan jeh 'oh lama

Dudoe nibak nyan teuma neuwoe
Ubak Putroe Baren Miga
Sare meuteumeung aduen adoe
Neupeugah proe neujak meumita

Hana meugah jeuep-jeuep nanggroe
Sayang Putroe Sunoe muda
Saleh mate dalam laot
Angen bapot lam antara

Teuma marit Putroe Baren
Tango dalem lon peuhaba
Wahe dalem aduen meutuah
Teumuda gadoh dalam rimba

Gunong nyang manyang dalam awan
Gunong Saleuban geuboh nama
Jeuh that dalam nyan ngon gampong
Umu lhee thon pasang guda

Kadang dumnan saleh han troh
Gunong jeuh hana tara
Ngon nanggroe nyoe cit jarak that
Han tom soe lihat gunong raya

Bek an takalon talumpoepi tan
Manyang gunong nyan rab bee antara
Batee cureh kareueng teudong-dong
Hayut tapandang miseue suda

Teuma dudoe lom bak gunong nyan
Trep di sinan jeh 'oh lama
Na ka sithon Tuhan teukeudi
Geureuda me dalam rimba

Geunap uroe jeuep luweuek gle
Peutang pagi dalam rimba
Meunan dalem ulon lumpoe
Tuhan sidroe nyang peunyata

Ban neudeungo haba meunan
Neumoe yoh nyan hana tara
Aduen adoe neumoe han ban
Reubah pangsang sikutika

Sare puleh nibak pangsang
Aduen aduen siseun dua
Droe cit ka ngon teukeudi Allah
Pakri tabah geutanyoe hamba

Amma bakdu teuduek nyan siat
Laen riwayat lon calitra
Jinoe lon peugah haba putroe
Geunap uroe ro ie mata

Geunap uroe geunap buleuen
Jak lam uteuen arong rimba
Umu sibuleuen jak lam gunong
Troh bak gampong he syeedara

Dua droe raja bak nanggroe nyan
Tango tuan lon kheun lanja
Sireuta jinoe lon balek ayat
Tango sahbat agam ngon dara

Ureueng nanggroe nyan cut-cut badan
Tango tuan lon peugah proe
Badan cut-cut bube-be sapai
Panyang sijeungkai jaroe geutanyoe

Nyang nyan tuan peuteungohan
Panyang nibak nyan sihah sijaroe
Miseue geutanyoe keulakuan
Jeuneh makanan dum sinaroe

Umong di blang pade jilhong
Laen jagong dum sinaroe
Pade cut-cut nyan geuseubot
Ban boh ceumeucet naleueng geutanyoe

Laen nibak nyan gadong ngon nala
Eumpeuek keutila le that bagoe
Timon ngon reuteuek pik ngon labu
That bit makmu dum sinaroe

Ladom keumili eumpeuek ngon birah
That barollah jeuep-jeuep bagoe
U ngon pineueng mamplam mancang
Dum sbarang laen sinaroe

Miseue di sinoe han sapeue tan
Na di sinan dum sibagoe
Kameng bubiri keubeue ngon lumo
Cukop he po dum sinaroe

Ubit-bit ureueng alatpi meunan
Allah Rahman nyang hareutoe
Kareuna kaya Tuhan Hadarat
Neupeujeuet makheuluk le that bagoe

Ladom raya that nyan neupeujeuet
Ladom cut-cut badan sinaroe
Sipeurti teuseubot dalam Quruan
Fireuman Tuhan lon hareutoe

Fa' 'alun li ma yurid
Nyankeu narit Poteu sidroe
Neupeujeuet makheuluk ban nyang hajat
Ceureudek that Tuhan sidroe

Subhanallah wabihamdihi
Tuan Siti keunan teuka
'Oh troh keunan neupioh siat
Dudoe umat neuueu rupa

Dum meuron-ron meukawan-kawan
Na tamse ban kawan kadra
Peunoh lingka dum meukalot
Badan cut-cut santeut rata

Sihah-hah panyang ladom sijeungkai
Hireuen akai putroe muda
Peuneujeuet Tuhan Khalikon 'Alam
Laen macam manusia

'Ajab hireuen putroe pandang
Peuneujeuet Tuhan laen rupa
Subhanallah walhamdulillah
Kuasa Allah barang keurija

Han tom lon kalon ureueng be-be noe
Nyang samlakoe jroh-jroh rupa
Ban nyang laku Tuhan peujeuet
Laen sifeuet manusia

Putroe hireuen tahe bimbang
Neueu meureuntang peunoh lingka
Teuma jimarit sabe keudroe-droe
Tuan putroe hireuen liga

'Ajab neukalon ureueng ubit-bit
Neungo jimarit dum sineuna
Rakyat marit sare tunyoe
Miseue geutanyoe watee sinja

Sang daruet kleng meunan macam
Bukon bubarang kiam subra
Rakyat rioh sare kiam
Pane pahlawan keunoe teuka

Han tom takalon ureueng bube noe
Dum geutanyoe bansineuna
Putroe Sunoe hireuen bimbang
Rakyat neupandang peunoh donya

Suara jimarit dum jeuet neufam
Dum neutuban Allah karonya
Rab-rab gaki dum teudong-dong
Meungieng-meungieng bansineuna

Putroe teuduek tundok ulee
Neungo lagee jimeusuara
Jikheun pahlawan raya han soe
Peue buet keunoe han tom nyang ka

Putroe Sunoe meuneuiem droe
Neudeungo proe jimeuhaba
Teuma neubeudoh tuan putroe
Rakyat sinaroe maken kubra

Jingieng bak putroe tangah u manyang
Babah teuhieng meuklep-klep mata
Pueh jitangah nyan u manyang
Han jeuet jipandang putroe muda

La ilaha illallah
Nyang di babah putroe baca
Sabab hireuen neuu peurintah
Neupujoe Allah Tuhan Nyang Esa

Teukeudi Allah Tuhan Rahman
Teutap di sinan putroe muda
Siseun Jameu'at sinan putroe
Rakyat lam nanggroe dum neueu rupa

Abeh neutilek dum peurusohan
Lam nanggroe nyan dum peukara
Dua droe raja nyang raya that
Laen rakyat han teukira

Raja Sikando sidroe geuboh nan
Dimat tuan nyang keudua
Dua raja nyan beurmusohan
Teungoh jimeuprang hana reuda

Rakyat meuteumeung dum ngon putroe
Bak teungoh woe bak prang raya
Teutapkeu putroe sinan bimbang
Neukalon prang that guranta

Umu lhee thon nyang geumeuprang
Mantong timang sabe padra
Hana talo nyan jimeuprang
Rakyat jimeucang han ban peubla

Siuroe-uroe mate rakyat
Adat tahimat na peuet laksa
rakyat le that tamse sidom
Prang hana tom nyang-na reuda

Sireutoh mate silaksa meugantoe
Teuka di nanggroe jak peungon raja
Prang meutunang deungon beude
Rakyat mate padum-padumna

Uroe malam meuprang sabe
Jimeuhei sare meuhayak donya
Troh bak malam hana teudoh
Jimeusuloh deungon sua

MILIK KEPUSTAKAAN
DIREKTORAT TRADISI
DITJEN NSSF DEPBUDPAR

Rakyat mate dum meutabu
Ladom taeu putoh keupala
Le that mayet han teuangkot
Boh beude cet hana reuda

Teudoh beude lheueh pusu bleuet
Jitop hat-huet ban siseun lingka
Ladom teulika nyang ladom kapak
Rakyat rusak ladom patah pha

Ladom jisrom leumbeng ngon kapak
Keunong tangkurak reuloh muka
Boh beude po sare hat-huet
Keunong ureueng cut mate fana

Ladom nyang lut meuhubong-hubong
Jeuet tasinthong tuleueng nyang na
Subhanallah prang meuhayak
Miseue umbak rieuek keunong sa

Rakyat mate han soe tudum
Beude cam-cum ban siseun lingka
Ladom beude bube jeundrang
putroe pandang hireuen liga

Teudoh beude jimeugeudubang
Rakyat guransang that guranta
Umu sibuleuen putroe sinan
Neueu prang nyan hana reuda

Teukeudi Allah prang meusaket
Rab toe jiglet lingka kuta
Rab ka talo Raja Dimat
Rakyat le that nyang ka fana

Lawan meuprang Raja Sikando
Rakyat jih le han teukira
Raja Dimat yue tulong droe
Ubak Putroe Sunoe muda

Abekh jikrah dumna rakyat
Jimeupakat dumjih rata
Abekh ngon waki tandi bujang
Uleebalang ngon bentara

Abekh geusyik keujruen imum
Keunan jitren dum ubak raja
Ban sare troh dum meusapat
Doli hadarat neumeusabda

Tadeungo he rakyat meukatoe
Na bak kamoe saboh bicara
Raja Sikando han ek talawan
Pakri padan takheun sigra

Kareuna rakyat di jih le that
Pakri pakat dumna gata
Ampon tuanku doli hadarat
Ban nyang pakat kamoe sireuta

Ban nyang tuanku neupeuduek pakat
Kamoe rakyat ikot dumna
Adat meunan na saboh padan
Taupah pahlawan tayue ngaza

Tabri upah sibungkai sapo
Tayue peusaho bansineuna
Tatueng ripee dum bak rakyat
Buet meupakat takeurija

Jahleh tawoe dilee u nanggroe
Tateuka keunoe beusigra-sigra
Nyang kaya bacut tatueng sikatoe
Nyang kaya that tatueng sibara

Ban nyang laku kaya gasien
Taeu ureueng uleh gata
Laen nibak nyan tango lon kheun kri
Tame bu kude dumteu rata

Abeh narit Raja Dimat
Ubak rakyat dum barangna
Insya Allah po junjongan
Rijang laman datang sigra

Teuma jiwoe dumna rakyat
Lheueh jideelat po jih raja
Sare leupah dum rakyat woe
Lon kisah jinoe raja muda

Raja Dimat peurab bak putroe
Jiyue bantu droe bak prang raya
Tadeungo he tuan pahlawan
Gaseh sayang keu kamoe dumna

Tulong bantu gaseh sayang
Tabantu prang sikutika
Lon bri upah limong ploh katoe
Tapeungon kamoe uleh gata

Maka seuot Putroe Sunoe
Neukheun jinoe nibak raja
Dumna taupah cuba kheun jinoe
Tayue kamoe uleh gata

Insya Allah tuan pahlawan
Dum nyang takheun ulon suka
Dum nyang takheun ulonteu bri
Asai beuase taprang Sikanda

Bahle teuduek haba nyan siat
Jinoe rakyat lon calitra
Rakyat jitren nyan u dalam
Ngadap junjongan poteu raja

Jitren rakyat hana hireuen
Peunoh mideuen banda raja
Jime peuseumbah dumjih sare
Ngon bu kude han teukira

Jeuneh bu gateng han ek peugah
Laen bu kulah meujeua-jeua
Rakyat tamong dum u dalam
Sare hitam peunoh donya

Jidong di yup peurakna seumbah
Jaroe dua blah ateueh jeumala
Kamoe tuanku ka meusapat
Pakri pakat laman sroepada

Trenkeu sabda teuma di manyang
Raja teumanyong bak rakyat dumna
Pakat dilee ka seuleusoe
Jadeh jinoe taprang raja

Talakee bantu bak pahlawan
Sikando tuan taguncang kuta
Amma bakdu geupeuduek pakat
Raja Dimat lon calitra

Raja Dimat jinoe lon kheun proe
Jiyue tulong droe bak putroe muda
Jibri ngon upah limong ploh katoe
Jijok u jaroe pahlawan raya

Putroe sambot meuh u jaroe
Teusinyom jinoe putroe muda
'Ajab teuceungong tuan putroe
Neueu meuh nyoe han padumna

Meuh nyang jibri limong ploh katoe
Adat di tanyoe na sipeuha
Meuh nyan jibri keu upah prang
Adat tatimang dumnan bit na

Leubeh kureueng na peuet mayam
Adat deureuham nanggroe kita
Dumnankeu le meuh nyan jibri
Tuan Siti sangat liga

Lheueh nyan geubri ngon makanan
Peurjamuan nibak raja
Bu kude jime saboh sapo
'Oh meusaho tan padumna

Meunyo tasukat na sigantang .
Ngon bu gateng bansineuna
Putroe hireuen laloe dukhoe
Neukalon proe rakyat dumna

Subhanallah 'amma yasifun
Putroe hireuen neuueu rupa
Sare seuleusoe peurjamuan
Meupakat yoh nyan dumna peutua

Geumeupakat peubeudoh prang
Rakyat meukeumang tujoh ploah laksa
Keumah pakat geuhei sare
Geutet beude nyang raya raya

Rakyat jigrop meuen tangkeh
Beudoh abeh tuha muda
Tuan putroepe ka neujak
Rakyat seuleusak lam blang raya

Pueh that neujak neucok langkah
Rakyat barollah peunoh lingka
Neutakot bicah ureueng cut-cut
Neuyue surot jarak sideupa

Rakyat bandum abeh jisurak
Rasa meuhayak nanggroe raja
Sare 'a-'u sangat tunye
Tamse glang te teungoh sinja

Deumpek ngon surak meualon-alon
Sang bakat tren di mieng kuala
Jipeh ngon tambo yup seurune
Ngon napiri sangkaikala

Ladom peh gong deungon geundrang
Ladom canang hareudammama
Ladom hareubab ngon keucapi
Dangdimuri that guranta

Yup ngon suleng peh keudadek
Surak deumpek that meutaga
Beude jitet sang beureuteh
Reubah bareh seun silaksa

Putroe jak dilee rakyat di likot
Meukalot-kalot wie uneun lingka
Putroe Sunoe panglima prang
Di jaroe peudang bube toi mata

Sikhan uroe jak lom baro troh
Geumeupioh sikutika
Amma bakdu dudoe nibak nyan
Sikando nyan ulon calitra

Raja Sikando sangat kiam
Maken agam nibak nyang ka
Rakyat lam kuta jihei sare
Jitet beude nyum lham donya

Jareueng-jareueng lheueh seun siploh
Bunyoe rioh sang geulura
Sare meugah bak Raja Dimat
Dumna rakyat that guranta

Rakyat seuu dum di dalam
Jicoh meuriam seun silaksa
Dumna rakyat guranta that
Raja Dimat jipreh teuka

Teukeudi Allah dudoe nibak nyan
Troh utosan nibak raja
Troh utosan Raja Dimat
Jiyue intat surat keu raja

Haba lam surat beuingat-ingat
Tapreh beugot that kamoe teuka
Kamoe sinoe lam angan-angan
Tapreh sinan dumteu rata

Bak meusapat dum beusapeue
Kamoe mampleue jak bak gata
Alat nyan meuba cokma ngon peudeueng
Beugot taampeueng kamoe nyoe teuka

Beugot tapreh sinan di dalam
Tameubisan geutanyoe dua
Meunankeu narit Raja Dimat
Dalam surat lahe nyata

Raja Sikando kalon surat
Ro meutrop-trop ngon ie mata
Teuka panglima keunan sidroe
Jitanyong proe nibak raja

Raja marit haba sipatah
Sireuta limpah ngon ie mata
Bek tatanyong aneuk teungku droe
Takalon jinoe surat bak raja

Jicok surat nyan u jaroe
Jikalon proe peuebu haba
'Oh sare jibeuet surat kireman
Lahe di sinan haba raja

Narit seungkoe saket-saket
Jibicah phet hana tara
Surat jipriek tanoh jigeudam
Mukajih hiram tuan panglima

Badan meutoto bulee ban kabat
Siseun jilumpat na sideupa
Teuma marit panglima meuntroe
taidin kamoe po meukuta

Kubalah narit keu raja Dimat
Kubalah surat tuanku raja
Lon peuet keudeh surat kireman
Idin junjongan keu lon sigra

That teumeui-meui aneuk jalang
Bah kamoe cang meusalop jungka
Di gata taduek dalam meuligoe
Dumna kamoe meulawan raja

Meugoh lom mate kamoe rakyat
Doli hadarat bek neungaza
Han peue salah aneuk teungku droe
Tabalah jinoe surat keu raja

Geutanyoe umpama dara baro
Tapreh linto ureueng teuka
'Oh troh keunoe beugot taampeueng
Cokma ngon peudeueng peukawen dua

Bek tabri leupah keunoe u dalam
Tapeumeuriam keudeh u lua
'Oh lheueh raja neukheun meunan
Surat kireman jipeugot sigra

Dilee phon jiseubot deungon bismillah
Alhamdulillah sajan sireuta
Teuma seulaweuet keu Muhammad
Sireuta sahbat keuluarga

'Oh lheueh abeh nyan khuteubah
Teuma jikisah haba raja
Saket mangat dum di sinan
Bit deungon han lahe nyata

Suratpi lheueh panglima meuntroe
Jijok u jaroe utosan raja
Lheueh nyan utosan leugat jiwoe
Surat bak jaroe jijok keu raja

'Oh sare troh jiwoe utosan
Deelat junjongan poteu raja
Raja teumanyong bak utosan
Peue habaran nibak raja

Utosan peugah raja tanyong
Narit nyang keunong po meukuta
Peuebu haba cuba peugah
Ban nyang kisah tapeuhaba

Utosan seuot rijang-rijang
Jipeugah ban ubak raja
Na peuneuet po junjongan
Surat kireman nyoe na meuba

Toh kucuba eu pakri narit
Peue peuneuet nibak raja
Teuma jijok surat u jaroe
Jibeuet jinoe sigra-sigra

Lahe baten saket mangat
Miseue narit dilee nyang ka
'Oh lheueh abeh jibeue. surat
Jiheh rakyat bansineuna

Hoka gata rakyat meukatoe
Tango kukheun proe jinoe sigra
Raja Sikando jilawan meuhad
Narit lam surat brat siploh gunca

Beuingat-ingat wahe teelan
Geutanyoe jilawan bak ri rupa
Han peue salah tuanku droe
Dumna kamoe ingat rata

Teuma marit Raja Dimat
Beudoh he rakyat taprang kuta
Lheueh nyan beudoh dumna rakyat
Guranta that hana tara

Jitet beude peubeudoh prang
Beurangkat yoh nyan raja muda
Teng-tong canang gram-grum geundrang
Meugeuruncang that geulura

Tambo keudadek that meugrum-grum
Beude syam-syum that guranta
Suleng bangsi sangat rindu
Rakyat seuu hana tara

Surak meualon that meuhayak
Meugalak-galak meusuka-suka
That guransang asoe nanggroe
Peudeueng di jaroe jimat rata

Peuedeung jimat dum sinaroe
Ban-ban tajoe raya mata
Sikin geudubang sipaleuet panyang
Peurise jisandang ube on buga

Leumbeng ngon kapak bube sujoe
Dum jijaroe jimat rata
Teulike cakcoe sang bak ceumeucet
Beude cut-cut dum simua

Sang beude bube pureh 'at
Rata jimat dumna tantra
Geuek laju nyan ngon geujak
Deumpek surak meutaga-tagat

Sajan meuteumeung dua pihak
Prang meuhayak sang geulura
Sang riyeuek tren musem barat
Guranta that rakyat dumna

Jipeulheueh beude na ban ujeuen
Bunyoe tupheuen meugeumpita
Beude barollah that meugeucoh
Rakyat bah-boh meutimpa-timpa

Boh beude sret hana padoe
Tan meusidroë na binasa
Beude keunong han lut asoe
Keuramat Putroe Sunoe muda

Bandua blah meunan sabe
Hana mate rakyat dumna
Na meusaket sang sidom kap
Bukon 'ajab buet Rabbana

Peudeh mantong luka cit tan
Hireuen yoh nyan rakyat dumna
Jitiek beude jimat peudeueng
Sidroe ureueng hana luka

Meuleuha kudrat Tuhan Ghani
Keuramat Siti Sunoe muda
Teudoh beude lheueh pusu bleuet
Jiek santeut lam blang raya

Teudoh pusu bleuet jimeugeudubang
Meugeuruncang that geulura
Jitak jitop hana jipajoh
Taeu tuboh hana luka

Jitiek cokma peumeuen peudeueng
Cangkeng-mangkeueng lam blang raya
Sideh meunan sinoë saban
Rakyat sikalian that guranta

Hana saboh lut luka asoe
Keuramat Putroe Sunoe muda
Tuan putroe mantong neuïem droë
Neukalon proë rakyat dumna

Galak neukalon ubit-bit that
Grap-grup jilumpat bansineuna
Jigrop keudeh jigrop keunoe
Putroe Sunoe hireuen liga

Teukeudi Allah troh geupeujak
Yoh nyan geupeusak ubak kuta
Ureueng di dalam sangat rioh
Beude tangkoh lheueh u lua

Ladom beude seunapang cicem
Beude laen han teukira
Subhanallah prang meukalot
Beude jimeulot dalam ngon lua

Umu lhee buleuen prang meutunang
Mantong timang sabe padra
Jimeududom sinan lam blang
Prang han reunggang sikutika

Uroe malam hana teudoh
Rakyat sunggoh jiglet kuta
Putroe Sunoe hireuen bimbang
Neukalon prang hana reuda

Umu lhee buleuen prang meutunang
Rakyat meukeumang lam blang raya
Tahe dahsyah tuan putroe
Hana sidroe na binasa

Hana sidroepi na mate
Keuramat Siti Sunoe muda
Amma bakdu laen jinoe
Putroe Sunoe lon calitra

Putroe dilee kon neuie mantong
Neukalon han tom putroe muda
Jinoe neulawan tuan putroe
Peuedeueung di jaroe bube toi mata

Rakyat meukatoe abeh jiboh droe
Cula-culoe bansineuna
Badan geunta yo meugam-gam
Miseue deumam tumakot raya

Putroe neugeudam gaki bak tanoh
Abeh meh-moh plueng simua
Rajapi talo abeh jiboh droe
Lam-lam duroe han jikira

Jiplueng leugat meukalot-kalot
Putroe jitakot jieu that raya
Ka troh u gle dalam uteuen
That reuen-mareuen bak-bak dada

Duroe garot duroe awe
Beukah sare dumna ija
Badan meukreh duroe pajoh
Mirah tuboh darah teupanca

Teuma jipioh dum sinaroe
Jicui duroe bak anggeeta
Peunoh badan dumjih sangat
Duroe jai that hana tara

Abeh geumeuciek nyan jijamong
Badan keumong duroe seuba
Teutap jiduek sinan di gle
Han ek jak le payah raya

Nafah teubiet meuhueh-meuhueh
Takalon weueh ro ie mata
Sare leupah rakyat lam gunung
Putroe tamong dalam kuta

Neueu rakyat han saboh le
Abeh u gle dum jiguda
Teuma putroe tamong keunan
Hireuen yoh nyan sikutika

Neueu meuligoe that meusigak
Meuteuratak meutangga-tangga
Istana jipeugot cit manyang that
Trohkeu tamat bak pucaknya

Peuet blah rueueng istana panyang
Teuma u manyang santeut dada
Linteueng peuet hah buju 'oh nan
Meuligoe nyan teumpat raja

Lingka istana ngon meuligoe
Parek sinaroe jikueh rata
Kuta jitambak manyang 'oh teuot
Krueng tujuh pat dalam kuta

Saboh lapeh kuta jipeugot
Adat tasipat na peuet deupa
Krueng peuet limong dalam kuta nyan
Eungkot sinan han teukira

Krueng luah that bit meucakap
Jeuet talumpat na sideupa
Buya le that di dalam krueng
Bube-be tarung di nanggroe kita

Putroe Sunoe hireuen han ban
Le peurasan di dalam kuta
Kuta jitambak ngon tanoh cak
Hireuen galak taeu rupa

Le that bangon peuneujeuet Tuhan
Kuasaan Allah Ta'ala
Pageue kuta trieng jirancong
Peunoh jiglong ban siseun lingka

Ban bak jeundrang pade di sinoe
Trieng sinaroe dum geupula
Nyankeu be-be trieng cut-cut that
Putroe lihat dum peukara

Jiboh bupaleh batee jilabo
Beude meuato dum cut raya
Ban ban sujoe sang pureh u
Dum teudu-du ateueh kuta

Putroe Sunoe neungieng laju
Ho nyang neuu mayen mata
Manyang kuta deungon pageue
Putroe lingkeue bansineuna

Ija han keunong mangat tajak
Putroe sipak dum simua
Abeh neuglueng dum ngon gaki
Reuloh sigala be siklep mata

Lheueh nyan teuma tuan putroe
Raja nanggroe neujak mita
Hoka jiplueng han saboh le
Abeh u gle dalam rimba

Raja Sikando dalam uteuen
Putroe buleuen keunan teuka
'Oh jikalon ka troh keunan
Dum yo badan miseue geumpa

Jikeumeung pluengpi han jeuet le
Dumjih sare teumakot raya
Sabab ka rab keunan hampae
Tuan Siti jieu rupa

Teuma marit tuan putroe
Neukheun meunoe ubak raja
Peue buet taplueng keunoe lam gunong
Tinggai gampong rumoh tangga

Raja Sikando jiiem seungap
Han jijeuet bleuet aneuk mata
Teuma marit tuan putroe
Beudoh keunoe dumteu rata

Tango kamoe Raja Sikando
Lon kheun laku ubak gata
Adat tapateh jeuet keubajikan
Sangkira han jeuet binasa

Gata dua droe bek meuprang le
Troh an page kiamat donya
Lon keumeung peugot bek le meubantah
Cuba peugah lon deungo nyata

Kupeumat jaroe ngon Raja Dimat
Bek le keusumat singoh dan lusa
Bek le tameuprang uroe dudoe
Amanat kamoe nibak gata

Meunyo tameuprang uroe dudoe
Ingat keudroe kuseurapa
Raja Sikando teuma marit
Jikheun sabet jipeucaya

Tuanku lon tem insya Allah
Neupeumeuah kamoe dua
Rela lon tem meumat jaroe
Dumna kamoe bansineuna

Teukeudi Allah peurintah Hadarat
Ngon keuramat putroe muda
Yoh masa nyan neupeumat jaroe
Bandua droe han le dawa

Geupeumeuah meumat jaroe
Bandua droe meucom meuwa
Sare teutap aman nanggroe
Putroe Sunoe teuma bungka

Abeh bi'at dum amanat
Troh an kiamat bek le goga
Meuh nyang jibri keu upah prang
Abeh neupulang bansineuna

Tuan putroe neulakee droe
Raja dun droe ro ie mata
Rakyat laen dum moe jamong
Kareuna sayang jieu rupa

Kareuna han le ureueng meutuah
Eelia Allah ka neubungka
Hokeu neujak neukeumeung woe
Siri nanggroë rumoh tangga

Putroe neuleueng jaroe dua blah
Lakee bak Allah beusijahtra
Teuma neukheun bek tatanyong
Nyan 'oh mantong sigala haba

Rakyat jicom tuan Siti
Tapak gaki putroe muda
Bek tatanyong nanggroë kamoe
Lon jak jinoe ho langkah ba

Do'a talakee keu lon sidroe
Kujak jinoe dalam rimba
Teuma teupike raja dua droe
Rakyat meukatoe ro ie mata

Jigaseh that ngon jipujoe
Gop nyoe sidroe nyo eelia
Adat meukon ureueng meutuah
Han troh langkah keunoe teuka

Meunan narit urueng nanggroë nyan
Putroe budiman deungo haba
Amma bakdu dudoe nibak nyan
Putroe bangsawan lon calitra

Putroe bungka bak nanggroë nyan
Neujak lam hutan rimba raya
Han saho trok tuan putroe
Meuteutaloe ngon ie mata

Ingat keuuntong teuoh keu nasib
Teugeutit-geutit dalam rimba
Lheueh leupah ate teugoe-goe
Geunap uroe ro ie mata

Peuturot langkah gadoh gampong
Peuseutot untong meuraba-raba
Allah Allah Poku Tuhan
Hokeu jalan kujak jinoo

Kalee na untong ngon bahgia
Neupeunyata rot keu kamoe
Neubri keu lon rot nyang seunang
Beutroh u gampong pat na nanggroe

Nanggroe ngon gampong han lon tupat
Lon ka sisat dalam gle nyoe
Padum lawet arong rimba
Meuraba-raba geunap uroe

Neuteungoh gle neutren tuwi
Moe meu'i-'i tuan putroe
Cit lam neujak hana reuda
Ngon ie mata ro meutaloe

Gunong raya bee-bee awan
Kareueng tajam luka asoe
Putroe Sunoe mohon bak Tuhan
Meunoe neukheun ban ngo lon kheun proe

Do'a neubeuet jaroe neuleueng
Tangah u manyang sira neumoe
Neungadu droe ubak Tuhan
Ilahon Manan Poku sidroe

Nyoeban do'a putroe neubeuet
Neuleueng paleuet jaroe dua
A l-lahumma baligh ila hajatina
A l-lahumma ashiih ila tariqina

'Oh l-heueh neubeuet seuleusoe do'a
Neurahop muka deungon jaroe
Ya Tuhanku neupeutroh hajat
Rot nyang teupat neubri keu kamoe

Bek le meunoe lon meuraba-raba
Uteuen rimba seumak tuloe
Neugaseh keu lon ya Habibi
Rot nyang suci bek miseue nyoe

Meunan do'a tuan Siti
Teuma peureugi neujak sidroe
Neuek gunong neutren data
Arong rimba geunap uroe

Ie han neujeb bupi cit tan
Lam beurjalan hana padoe
Umu peuet thon jak han putoh
Hankeu rek troh le u nanggroe

Nyang na langet leumah neupandang
Laen nibak nyan gunong sinaroe
Meulinteueng-linteueng gunong cuceue
Meujan-jan neu'eue tuan putroe

Meujan-jan troh lam padang luah
Uroe tampah tutong han soe
Pat neumeusyeue kayeepi tan
Nyang le tuan naleueng lakoe

Badan tutong leulah han ban
Meureuoh badan yo ngon asoe
Sira neujak ie mata ro
Tahe gante tuan putroe

Teukeudi Allah umu peuet buleuen
Dalam uteuen nyan meuwoe-woe
Droe ka langkah iradat Tuhan
Pakri tapaban dum geutanyoe

Nyang ka kada han meuisot
Buet Hadarat Tuhan geutanyoe
Cit ka maklum masa dilee
Han meusilee dum sinaroe

Tuan putroe neujak leugat
Teuma neulihat saboh sungoe
Reuleueng manyang lhok u dalam
Iejih tajam hana padoe

Batee dum raya miseue gajah
Ie jeureuengéh jeuet taloh droe
Peungeuh sare ie hijo that
Sijuek sangat ie sungoe nyoe

Binehjih luah reuleueng manyang
Hireuen teuceungang tuan putroe
Neubloh han neujeuet ie tarek that
Neutakot hanyot Putroe Sunoe

Neutakot han ek neupeutheun tuboh
Hanyot bah-boh dalam sungoe
Ie teurijon krueng seumareuek
Miseue rieuék meunan bunyoe

Eungkotpi le that han peue peugah
Bube gajah lam nanggroe nyoe
Eungkot ateueh ie meulayeue-layeue
Leumah neuéu tuan putroe

Sare gam-gum jiseumajoh
Babah luah lot geutanyoe
Putroe Sunoe hireuen bimbang
Bukon bubarang geunta asoe

Teuma neuili seutot bineh krueng
Neumeung jeumeurang droeneu sidroe
Neumita deue pante sarah
Bak nyang luah neubloh dudoe

Teukeudi Allah Tuhan Ghani
Troh bak pante luah han soe
Iepi lintang deue neupandang
Neujak rijang keunan jinoe

Bateepi cut kruengpi hampa
Neubloh lanja tuan putroe
Ban sare troh sama teungoh krueng
Ok meulinteueng raya han bagoe

Meusawak bak pha teungoh jeumeurang
Putroe riwang peudeuh jinoe
Teuma neuteungoh laju u darat
Ok raya that neuueu bagoe

Neuhue neutarek pantah rijang
Putroe pandang hireuen laloe
Raya bube awe tagu
Panyang sulu hana bagoe

Peuet ploh deupa ok panyang that
Abeh neusipat le tuan putroe
Tahe teuceungong akai dahsyah
Putroe meutuah hireuen laloe

Putroe neukheun subhanallah
Pujoe Allah Tuhanku sidroe
Panyang bukon troh ploh deupa
Peue lom ngon raya hana bagoe

Bukon gli hireuen putroe muda
Allah Ta'ala teuma neupujoe
Subhanallah Poku Rabbi
Saleh gogasi ureueng po ok nyoe

Han tom lon kalon he Tuhanku
Lawet umu lon nyang meunoe
Panyang sangat rayapi that
Ulon lihat dalam krueng nyoe

Neutilek-tilek neusipat-sipat
Hireuen dahsyat Putroe Sunoe
Poku Tuhan kuasa that
Neupeulihat ubak kamoe

Ka na lhee peue neupeunyata
Tanda kuasa Tuhan sidroe
Geureudapi ka ulon lihat
Ureueng cut that lam donya nyoe

Nyang ka lon eu na dua ban
Lhee nyoe tuan deungon sungoe
Peuet deungon ok nyang raya that
Tuhan peulihat bak lon sidroe

Tuhanku Ghani kaya murah /
Leungkap peurintah dum sibagoe
Saleh gogasi ok raya that
Kucuba lihat u pucok krueng nyoe

Peue jeuneh ureueng nyan di pucok
Kukalon ok raya han soe
Teuma neumudek nyan u gunong
Umu sibuleuen neujak sidroe

Han sapat na nanggroe meuteumeung
Ureueng uteuen seutot sungoe
Putroe Sunoe mudek lanja
Dalam rimba seumak tuloe

Hana sapeue na meurumpak
Laju neujak tuan putroe
Meubuleuen-buleuen dalam hutan
Sapeuepi tan neukalon proe

Sayang Putroe Sunoe muda
Neubloh rimba geunap uroe
Gampong nanggroeapi tan sapat
Uteuen jai that hana bagoe

Teukeudi Allah neujak leugat
Rot meudarat bineh sungoe
Teuma meurumpok saboh keubon
Nyan baro phon troh bak nanggroe

Dalam rimba padang luah that
Putroe lihat banpeuet sagoe
Phon meuteumeung lampoh tanaman
Dum buahan le that bagoe

Droe cit ka ngon teukeudi Allah
Kudrat limpah Poteu sidroe
Ureueng nanggroen nyan raya-raya
Duek lam rimba pucok krueng nyoe

Nanggroen luah that hana tara
Ureueng raya hana bagoe
Biek gogasi raya-raya
Nyang calitra Putroe Sunoe

Tuan putroe teudong siat
Hireuen 'ajab neukalon proe
Neueu bak u ngon bak pinang
Abek neupandang dum sinaroe

Bak raya that bube-be krong
Panyang-panyang that seureuloe
Bohjhipi le tuha muda
Raya-raya ban krong geutanyoe

Panyang apoh troh lam awan
Sion-on nyan jeuet eh dua droe
Bube-be tika bideueng luah
Panyang leupah ban laku droe

Nyankeu on u ureueng nanggroen nyan
Calitra tuan Putroe Sunoe
Jeuneurop pageue bak u jiglong
Trieng keu beunteueng dum sinaroe

Nyanpi raya rab sabe bak u
Sulu-sulu trieng meuduroe
Jareueng-jareueng jiboh jeuneurop
Jeuet gajah lop adat di sinoe

Lam nanggroe nyan gajah raya that
Abeh neulihat tuan putroe
Teuma neutamong leupah lampoh
Tanaman peunoh dum sinaroe

Jeuneh boh kayee meulaen ban
Han soe tupeue nan dum jipasoe
Reuteuek ngon labu piek ngon timon
Meutamon-tamon ateueh bumoe

Bayam ngon trueng that barollah
Putroe peugah dum sinaroe
Teuma meuteumeung boh timon bruek
Putroe neuduek sinan sidroe

Neupeurab keunan timon neubalek
Teuma neukurek neurasa asoe
Neurasa asoe mameh han ban
Sang manisan saka lam nanggroe

Neurasa mameh tamse gula
Neupajoh lanja tuan putroe
Teuma neulop lam boh timon nyan
Neuduek sinan dua lhee uroe

Lheueh neutebok neuduek sinan
Timon burek nyan neupajoh asoe
Badanneu puleh ladat sare
Rasa jati mameh han soe

Teukeudi Allah Tuhan Rahman
Po timon nyan teuka jinoe
Dua droejih keunan teuka
Aneuk ngon ma ureueng binoe

Badan sulu raya panyang
Putroe pandang geunta asoe
Badan raya bukon dum gle
Sang gogasi meunan bagoe

Putroe Sunoe kalon rupa
Yo anggeeta geunta asoe
Sabab teumakot neuueu raya that
Bak Hadarat neupeujok droe

Badan panyang limong ploh deupa
Suara ban taga bandua droe
Ok di ulee bube-be tagu
Sulu-sulu panyang han soe

Ngon bulee dhoe tujoh deupa
Bulee mata hana gagoe
Matajih dua bube canang
Abeh neupandang tuan putroe

Lam boh timon teubiet u lua
Neukalon rupa bandua droe
Badan meugam-gam gaki meutat-tat
Teumakot pucat Putroe Sunoe

Neukeumeung plueng han neujeuet jak
Badan meuhayak lumpok asoe
Gaki han leupah jih di lua
Pakri daya ngon peulheueh droe

Teutap neukuwien lam boh timon bruek
Sinan neuduek neukalon proe
Hayut putroe sang nyum mate
Meubet-bet ate gli that asoe

Neujeungeuk-jeungeuk ho nyang jijak
Rasa neulop dalam bumoe
Rab ngon putroe keunan jijak
Gaki tapak panyang han soe

Aneuk jaroe sulu-sulu
Bube bak u lam nanggroe nyoe
Na peuet deupa gukee silhuek
Ban jigusuek saket asoe

Meunankeu nyum bak tapandang
Gukee panyang hana bagoe
Kulet jaroe gasa-gasa that
Raya paleuet deungo lon kheun proe

Deuh neukalon dum peukara
Teuma muka neukalon proe
Gigoe panyang hana tara
Lom ngon raya hana bagoe

Ban-ban papeuen raya panyang
Jan jimakan leumah gigoe
Putroe Sunoe teukeuta-keuta
Neueu rupa aneuk bisoe

Geulunyueng dua bube seuladang
Hayut tapandang geunta asoe
Su meutaga miseue reudok
Sang meugruk-gruk langet bumoe

Putroe Sunoe hayut ate
Nyum neulop le dalam bumoe
Hayut neueu yo teumakot
Ie muka sret tuan putroe

Neupeujok droe ubak Tuhan
Kuyut badan geunta asoe
Teukeudi Allah peurintah Ma'bud
Neukalon aneuk cut jinoe jipeutoe

Sinan jidong di geunireng
Tuan putroe ngieng neukalon proe
Panyang badan na peuet deupa
Aneuk dara goh lom sampoe

Goh troh umu meucupeng mantong
Hana pinggang nibak asoe
Bube peurise cupeng raya that
Abeh neulihat tuan putroe

Aneuk nyan keunan jidong di nap
Putroe neulop neutarek droe
Teuma putroe neuduek teutap
Yo meugap-gap hana bagoe

Neutakot jiteumee le aneuk nyan
Putroe bangsawan geunta asoe
Aneuk nyan ka troh rab timon bruek
Teuma jiduek sigra jinoo

Jieu timon ulat kurok
Saleh ka brok boh timon nyoe
Teuma jipot jimat lanja
Ubak po ma jipeugah proe

Timon jatang boh lam paleuet
Boh raya that hana bagoe
Bube-be krong siploh gunca
Jimat lanja boh bak jaroe

Putroe Sunoe hayut han tara
Duka cita hana padoe
Troh bak po ma timon jatang
Jipeugah ban le hareutoe

Hai ma timon nyoe ka kupot
Kueu ka brok pheuet geurudoe
Ka pheuet puta boh timon bruek
Euncit ulat kurok asoe

Majih tanyong pakon kapot
Timon putik aneuk bisoe
Geupoh le du euntreuk geutampa
Dukeu mungka beungeh han soe

Timon putik asoe puteh
Goh lom mirah boh timon nyoe
Pakri han kupot ka ulat kap
Reuhung raya that arab lot jaroe

Tacuba eu ma nyan dilee
Timon layee ka brok asoe
Nibak taboh brok di sinan
Gotkeu kaman tapajoh jinoe

Putroe Sunoe neudeungo meunan
Yo that badan geunta asoe
Neutakot mate jipicet badan
Ubak Tuhan neupeujok droe

He Tuanku gata peulara
Nibak baya lon nyoe sidroe
Teuma timon bruek jitiek yoh nyan
Ulat sinan sret u bumoe

Ban sare sret putroe neu'eue
Leumah jieu aneuk bisoe
Jipeuleumah jeh peue ulat
Majih marit kajak keunoe

Wahe aneuk kacok rijang
Kumeung pandang peue ulat nyoe
Aneukjih cok rijang-rijang
Ulat jitatang boh lam jaroe

Teuma jijok majih lakee
Jieu lagee geunta asoe
Peue ulat nyoe jroh that rupa
Han tom nyang ka kueue meunoe

Gakijih peuet ulee bunta
Mata meucahya ban bintang Paroe
Geulunu yeng miseue manusia
Dum peukara sang geutanyoe

Meujaroe gaki that jroh rupa
Tapeulara nyan tapeuwoe
Bek kaboh-boh euntreuk barangpat
Kaboh lam kanot troh rumoh droe

Kabri ngon umpeuen troh u rumoh
Bek kapoh-poh nyoe kapeuwoe
Ulat jibalek jiboh lam paleuet
Badan krot-kreut tuan putroe

Jaroejih raya geuhon larab
Jan jipeujap saket asoe
Teuma jibalek keudeh keunoe
Wah ulat nyoe jroh that rupa

Jih tapeuwoe keudeh u rumoh
Bek tapoh-poh tapeulara
Taboh lam kanot tabri umpeuen
Meunan jikheun uleh bunda

Teuma putroe teutap jipeuwoe
Dalam jaroe aneuk dara
Troh u gampong teuma jipeuwoe
Jipeuek jinoe u rumoh tangga

Leupah u rumoh putroe hayut
Sabab manyang that hana tara
Nyum-nyum ka sret nyan u bumoe
Tuan putroe moe hana suara

Rumoh meulip-lip manyang han ban
Rab bee tuan lam antara
Rumoh manyang aleue jareueng
Dalam rueueng na peuet deupa

Ate kuyut neutakot that
Ayut sangat putroe muda
Teutap jiboh dalam kanot
Jinoe mawot bak nyum rasa


Ubak dali nyum han le lheueh
Nyoe sineulheueh kupandang donya
Saleh mate lon di sinoe
Ho rot kamoe lheueh u lua

Kanot nyan raya na bube mon
Seupot di dalam glap gulita
Keumeung teungoh hana dapat
Kanot lhok that hana tara

Jitiek meuleubub keunan putroe
Neuplueng bak sagoe kanot raya
Adat proe sret lam kanot nyan
Hanco tuleueng jeuet keu sira

Bahle kuduek lam kanot nyoe
Saleh dudoe jicok u lua
Teutap neuduek lam kanot nyan
Jiboh umpeuen jeup kutika

Jitiek lam kanot bu sianeuk
Lom ngon rayek hana tara
Bak jitiek nyan rab keunong putroe
Neuplueng lam sagoe kanot raya



Kanot dang nyan raya sangat
Tamse meuhad krong lhee ploh gunca
Putroe neuduek lam kanot nyan
Ate lam badan kon le lia

Neueu u ateuh reuhung han leumah
Putroe sosah hana tara
Hangap-hageup that di dalam
Sare geumeuntan putroe muda

Umu lhee uroe lam kanot nyan
Jicok tuan teuma u lua
Jipeuteubiet dalam kanot
Jiboh bak paleuet ulat raya

Teuma jibalek keudeh keunoe
Krot-kreuet asoe putroe muda
Kareuna jaroe raya sangat
Lompi ngon brat hana tara

Jigusuek-gusuek putroe jiurot
Sare teumakot nyum binasa
Meuneupreh bicah jan jireugam
Gukee tuan rab sideupa

Ngon raya that gukee tajam
Badan meureugam bak jiraba
Na bube pha ngon geuhonpi that
Nyum han dapat lheueh u donya

Teukeudi Allah peurintah Tuhan
Teungoh jimat nyan neugrop u lua
Neulumpat putroe sret u bumoe
Manyang rumoh nyoe toe antara

Neugrop ninan neuplueng leugat
Teumakot that putroe muda
Teuduek meutumpok ulee mumang
Sret di manyang rumoh raya

Ban sare sret hirojih tan
Leumah jikalon hana nyata
Sang sidom jak sideh di bumoe
Putroe sambinoe jieuh rupa

Putroe Sunoe neuweh ninan
Yup rumoh nyan neuplueng lanja
Putroe di bumoe teungoh jak-jak
Seun rot meurumpak manok raya

Manok meureugoh raya jantan
Na tamse ban lumo tuha
Parohjih panyang mata raya that
Tamse meuhad gong reubana

Lameng di ulee bube seuladang
Hayut neupandang putroe muda
Gaki bulee panyang han soe
Manok agam nyoe sangat raya

Su jikukuek sang geulanteue
Putroe neu'eue lheueh u lua
Neutakot jicoh le manok nyan
Juah han ban bak ri rupa

Sigo jikeupak suara sayeuep
Bunyoe meuhuet na tamse taga
Putroe neukheun subhanallah
Sidroe Allah nyang kuasa

'Azizon Hakim kuasa that
Han tom kulihat meunoe nyang ka
Putroe neuseubot nama Tuhan
Sabab hiran neuueu rupa

Droe cit ka ngon teukeudi Allah
Neupeuleumah tanda kuasa
Putroe Sunoe meutuah that
Abekh neulihat dum peukara

Dum nyang 'ajab leumah neukalon
Dalam uteuen rimba raya
Tanda kuasa Rabbon 'Alamin
Hireuen sikalian neuueu rupa

Kareuna putroe jeuoh langkah
Mangat neukisah neucalitra
Mangat neupeugah uroe dudoe
'Oh troh u nanggroe pidroe muda

Neupeuleumah uleh Tuhan
Dum sibarang neupeunyata
Ammah bakdu dudoe nibak nyan
Putroe bangsawan lon calitra

Kata salib eumpunya rawi
Tuan Siti teuma bungka
Neucre nanggroe nyan neujak lam uteuen
Meubuleuen-buleuen arong rimba

Uroe malam neujak han teudoh
Tuan putroe bloh rimba raya
Geunap uroe jeuep-jeuep buleuen
Jak lam uteuen putroe muda

Han saho troh tuan putroe
Neujak jinoe ho langkah ba
Pat nyang seupot sinan neueh
Badan reugeh pijuet raya

Badanneu phui langkahneu brat
Muka pucat hana tara
Umu tujoh thon cre di nanggroe
Geunap uroe meuraba-raba

Neuek gunong neutren bak pante
Meunan sabe rok-rok masa
Pat nyang han ek pioh siat
Teuma beurangkat lom neubungka

Jak ho nyang roh geunap uroe
Sira neumoe ngon ie mata
Ulee ili jak lam gunong
Manyang-manyang bee antara

Troh u pucak tren u baroh
Han tom pioh barangjan masa
Tuan putroe that bit payah
Neucok langkah meuhila-hila

Le peurasan ladam meuteumeung
Dalam uteuen rimba raya
Nyang meurumpok bandum gareb
'Ajab-'ajab neueu rupa

Putroe neujak laju leugat
Timu barat sigala donya
Han neutuho le tanda kiblat
Uroe neulihat leumah hana

Sabab padok ngon on kayee
Uroe reudee reului raya
Kayee cut-cut jeuet raya bak
Siseuek bayak ban siseun lingka

Ie meutrop-trop sijuek han ban
Rab bee awan lam antara
Gunong manyang that peuet boh sagoe
Tamse sinoe Salue Meuria

Reumbang peuet sagoe pucak meurang-rang
Cong gunong nyan putroe muda
Ureueng rame that suara bunyoe
Leumah han sidroe neuu rupa

'Oh watee malam neudeungo hat-het
Ureueng meurateb dalam rimba
'A-'u sare suara kiam
Miseue geukhatam meunan umpama

Putroe Sunoe neuduek sinan
Dalam gle nyan ateuh pucaknya
Pucak gunong nyan putroe kheun ban
Dalam awan hawa antara

Neumeusadeue droe nyan bak kayee
Tumpang ulee ro ie mata
Putroe ingat nyan keu untong
Meugulong-gulong dalam dada

Adat mate ulon sinoe
Han thee sidroe manusia
Allah ya Allah Poku Rabbi
Bek neubri mate lon lam rimba

Teuingat keudroe langkah ka leupah
Teukeudi Allah Po Nyang Esa
Teungeut han jitem ceureubai badan
Payah han ban putroe muda

Atot kuweut badan leumoh
Bak neuteungoh gunong raya
Padum cureh kareueng teudong-dong
Roh neugidong putroe muda

Gaki keumong sare mirah
Miseue darah lagee rupa
Peudeh raya saket suntok
Trok ujong ok meunan rasa

Bitpi meunan neujak laju
Barat timu han meuhingga
'Oh ka han ek teuma neupioh
'Oh tho reuoh neujak lanja

Weueh that ate ingat keudroe
Meutaloe-taloe ngon ie mata
Lawet neucre nanggroe Makah
Cit lam sosah hana tara

Meunankeu buet barangjan sabe
Jeuep luweuek gle meuraba-raba
Uroe malam hana teudoh
Jak ho nyang roh lam-lam paya

Gunong raya manyang han ban
Pucak lam awan meutangga-tangga
Cureh kareueng dum meususon
Putroe neutren gunong raya

Tuan putroe that bit gundah
Reuboh-reubah ngon ie mata
Ban nyang untong nibak Allah
Nyang ka langkah han ek landa

Tuan putroe neukheun meunan
Grak bak Tuhan dum peukara
Allah Allah he ya Ghani
Keu lon neubri nyang sijahtra

Han ek lon jak le he ya Rabbi
Bahle mate sinoe lam rimba
Gaki lon peudeh ka meudarah
Geuhon that langkah hana kuasa

Nyoe han ek le troh u nanggroe
Lon keumeung woe ya Rabbana
Lheueh nyan putroe neutren leugat
Leumah neulihat sungoe raya

Reuleueng manyang ie hijo that
Luah sangat bineh dua
Han deueh neuueu adat na ureueng
Nyan be linteueng krueng that raya

Di pucok krueng saboh kulam
Ie di dalam hijo wareuna
Kulam nyan luah lingka lhee buleuen
Di teungoh uteuen rimba raya

Dum pucok krueng teubiet sinan
Na tamse ban laot raya
Ngon geulumbang rieuek meualon
Meunan bangon neuueu rupa

Ie meupadon hijo sangat
Peuet ho meuhad ie meumata
Gampong peuet boh nyang raya that
Sungoe larab nyang that raya

Sinan pucak gunong Saleuban
Krueng nyan sinan teubiet mata
Putroe Sunoe muda bangsawan
Neupujoe Tuhan Po Nyang Esa

Subhanallah Ilahussamad
Peuneujeuet le that neupeurupa
Hireuen putroe sinan teudong
Krueng neukalon sangat raya

Teuma neuili laju seutot krueng
Umu peuet buleuen bak calitra
Cit ka meunan Allah teukeudi
Jeuep luweuek gle meuraba-raba

Han neuboh le seutot nyan neujak
Seun rot meurumpak padang raya
Luah han sabe kayee tan sibak
Padang meuhayak mahajana

Krueng nyan teupat sama teungoh blang
Jroh meurang-rang hana tara
Hana padokpi meusapat
Putroe lihat banpeuet panca

Teuma neuili siseun Jumeu'at
Neujak leugat lam blang raya
Hana sapeue na meurumpak
Bak rot neujak putroe muda

Teukeudi Allah teuma dudoe
Meurumpok jinoo gunong raya
Krueng hana le gunong beusot
Ie keunan lop dalam guha

Kapai lhee tihang jeuet ba keunan
Luah guha nyan hana tara
Tuan putroe neuueu rot han le
Neumoe sabe ro ie mata

Dilee neusangka gunong han le
Mangat ate dalam dada
Bukon le hireuen tuan putroe
Ho rot jinoo lon safara

Lompi neumoe bukon bubarang
Basah ngon mieng ro ie mata
Neuduek siat nyan neupioh
Dang tho reuoh bak anggeeta

Di gaki gunong toe bineh krueng
Sinan neudong yup kayee raya
Teuma neuheh tuan putroe
Peureubah droe sikutika

Putroe pangsang teungeut mangat
Pioh siat lumpok anggeeta
Hingga seupot rab lop uroe
Jaga Putroe Sunoe muda

Putroe beudoh rijang-rijang
Yoh masa nyan seumbahyang asa
Neuek gunong teungoh jeurujong
Lam lam linggong neujak lanja

Leupah pucak troh u baroh
Leupah paloh troh bak data
Na sikhian buleuen neubeurjalan
Dalam hutan rimba raya

Leupah putroe neutren gunong
Leumah neupandang lom krueng raya
Jeuoh mantong putroe lihat
Ie puteh that hana tara

Laju putroe keunan leugat
Rot neutakat dalam rimba
Ban sare troh bineh krueng nyan
Neuili tuan sigra-sigra

Dua malam jak taloe krueng nyan
Leumah neupandang saboh rupa
Leumah meubayang jeuoh mantong
Dalam padang mahajana

Sang meujak-meujak meukawan-kawan
Siulah ban tamse unta
Teuma neupeurab neujak laju
Neukalon lumo bansineuna

Teungoh jimeurot meukawan-kawan
Dalam padang luah raya
Putroe Sunoe ate mangat
Neujak leugat taloe krueng raya

Ili u baroh seutot sungoe
Dalam nanggroe luah lagoina
Neueu meureuntang taloe pasi
Nanggroe Peuranggi geuboh nama

Droe cit ka ngon teukeudi Tuhan
Bak nanggroe nyan teuma neuraja
Bangta Sulotan teuka keunan
Neujak tuan ngon putroe muda

Sabab ureueng binoe teuka dua droe
Aman nanggroe hana tara
Abeh Islam ureueng nanggroe nyan
Mudah makanan dum peukara

Sabab meutuah Bangta ngon putroe
Aman nanggroe sigala donya
Bahkeu teuduek baba nyan siat
Dudoe lon sambat peutimang punca

La ilaha illallah
Saheb kisah po calitra
Ban sare troh bineh nanggroe
Tuan putroe balek rupa

Neumeungui tamse ureueng lakoe
Neujak sidroe keunan lanja
Lawet lawan troh u pasi
Tuan Siti laju bungka

Umu sibuleuen neujak lam nanggroe
Ili putroe u kualah
Teukeudi Allah Tuhan Rahman
Leumah neupandang kapai raya

Teungoh meulayee dalam laot
Putroe kawot deungon ija
Neulambai ngon ija tuna putroe
Neuyue tueng droe sigra-sigra

Ureueng lam kapai teuma jikalon
Leumah meubayeuen sang di mata
Leumah ureueng dong bineh laot
Putroe kawot leugat lanja

Teuma jiteungoh rijang-rijang
Jidayong sampan sigra-sigra
Ban sare troh teungoh leugat
Banta jilihat indah rupa

Ureueng lam kapai teungoh u darat
Ate mangat suka rasa
Tuan putroe tanyong yoh nyan
Pane tuan kapai taba

Pane gata peulayaran
Takheun tuan meungo nyata
Ureueng nyan seuot tuan putroe
Nanggroe kamoe jeuoh raya

Siri nanggroe nyan tapeugah
'Oh na langkah tameung bungka
Nanggroe Mureh gampong kamoe
Meujak keunoe ubak raja

Teuma marit tuan putroe
Taintat kamoe uleh gata
Keudeh bak raja lon taintat
Gaseh sayang that tuan keu hamba

Teuma seuot ureueng lam sampan
Neuek rijang keunoe sigra
Sare leupah dalam sampan
Jidayong tuan pantah sigra

'Oh sare troh sampan keunan
Neuek le rijang dalam bahtra
Leupah neuek tuan putroe
Meumat jaroe deungon nahuda

Tuan nahuda teuma teumanyong
Panebu gampong muda beulia
Putroe seuot rijang-rijang
Nahuda bimbang jingo suara

Gampong jeuoh kheundak Rabbi
Tuhan teukeudi leupah lam rimba
Asai dilee phon entu nini
Nanggroe Arabi Makah mulia

Teukeudi Allah Tuhan Kade
Lon troh u gle rimba raya
Geureuda bapo trep padum thon
Nyoe baro phon meuteumeung donya

Nyoekeu nanggroe phon meuteumeung
Jeh 'oh jameun dalam rimba
Kalee na gaseh tuan ngon sayang
Intat beurijang ubak raja

Padumna trep jeuoh ninoe
Na siuroe bak keukira
Nahuda seuot jikheun hareutoe
Limong ploh uroe troh bak raja

Meunan jipeugah ubak putroe
Nahuda jinoe suka rasa
Napsu bimbang hireuen laloe
Jieu bak putroe han peuweh mata

Nahuda pike salah waham
Bukon agam ubak rupa
Saleh aneuk nyoe ureueng binoe
Ulah laku proe bak meuhaba

Rupapi jroh that sambinoe
Saleh putroe aneuk raja
Droe cit ka ngon teukeudi Allah
Yoh nyan leumah jieu rupa

Neulop tangkulok leumah subang
Cahya intan ngon peurmata
Nahuda hireuen jikalon proe
Putroe sambinoe jieu rupa

Kulet licen puteh kuneng
Abeh jingieng dum peukara
Dhoe meuangget buleuen siuroe
Putroe sambinoe hana tara

Bulee keuneng sangat leubat
Nyang leuntek that bulee mata
Bibi reunom gigoe meukilat
Suara mangat sang biula

Takue bulat jroh han padan
Hireuen yoh nyan tuan nahuda
Sapai dua jroh that macam
Tamse tuan ban geujangka

Paleuet jaroe ban on buni
Paleuet gaki ban on buga
Nahuda tahe laloe dukhoe
Jieu putroe pungo gila

Ureueng lam kapai hireuen jipandang
Dum mabok-bang laloe mata
'Oh lheuuh puléh nahuda bimbang
Teuma jitanyong sigra-sigra

Bak tuan putroe nahuda tanyong
Patbu gampong asai mula
Rupa indah putroe sambinoe
Nan geuhei soe geurasi nama

Teuma seuot tuan putroe
Tango jinoe lon peuhaba
Gampong kamoe nanggroe Arab
Nama leungkap Makah mulia

Nyan gampong lon meupeugah proe
Putroe Sunoe nama hamba
Teuma seuot nahuda nyan
Tango kaman lon calitra

Tango kamoe tuan putroe
Ulonteu nyoe judo gata
Lon meukawen nyan beutatem
Gata khadam lon syeedaga

Lon kaya that tujoh boh geudong
'Oh troh u gampong lon bri keu gata
Teuma seuot tuan putroe
Neudeungo kamoe tuan syeedaga

Han jeuet ulon meukawen sinoe
Judo kamoe droe cit kana
Syeedaga marit sira jikhem-khem
He putroe canden sambinoe rupa

Adat han jeuet bak meukawen
Bahle buet laenpi kurela
Pakon dalem tamarit meunan
Di kamoe han ban kheun gata

Di lon kutakot that keu Allah
Page geukeubah dalam nuraka
Nahuda marit teuma sipatah
Tango kupeugah ubak gata

Han jeuet han tatem tuan putroe
Napsu kamoe that keu gata
Putroe seuot than di kamoe
Buet geutanyoe di lua agama

Teuma seuot nahuda nyan
Di lon han jeuet han ban kupinta
Adat han trep tabri meusiat
'Oh ka leueh hajat deungon adekda

Teuma seuot tuan putroe
Neukheun meunoe sigra-sigra
Astaghrifullah dalem teungku droe
Han di kamoe ban kheun gata

Bek Allah bri roh nyang meunan
Di kamoe han paleng muka
Cuba han tatem ban napsu kee
Tohbu lagee rot lueh gata

Barang ho tajak han kubri le
Adat matepi kurela
Adat taplueng lam kapai nyoe
Hokeu jinoo tajak gata

Meupeulagee meudeh meunoe
He putroe nyoe bek le dawa
Teuma seuot tuan putroe
Neukheun jinoo bak nahuda

Wahe dalem bek tamat kamoe
Ingat keudroeteu di gata
Meunyo tamat kamo sidroe
Dum geutanyoe abeh binasa

Tuan nahuda akai pungo
Han jideungo putroe meuhaba
Yoh nyan putroe jikeumeung mat
Uleh rakyat dalam bahtra

Wahe dalem dumna rakyat
Lon bek tamat he syeedara
Bahle lon tem ban nyang hajat
Meubek tamat lon le gata

Ban nyang napsu jinoe lon peutroh
Batang tuboh cit hukom gata
Teutapi bacut lon lakee tanggoh
Nak rijang troh napsu kakanda

Lon meung seumbahyang dua raka'at
Lon peutroh hajat ban napsu pinta
Ho rot kuplueng laot lhok that
Jinoe troh hajat ban nyang hawa

Lonpi sidroe ureueng binoe
Tatueng jinoe uleh gata
Meubek tamat-mat lon he cut lem
Jinoe lon tem han le meudawa

Cit di lon galak keu dalem
Han jeu et han lon tem ban nyang pinta
Tapreh dilee meusijamang
Kuseumbahyang sikutika

Bak he putroe seumbahyang jinoe
Bahle dudoe takeurija
Napsu rindu hawa lon that
Jak eh siat putroe muda

Ban neudeungo narit jak eh
Bit nyoe paleh kaphe ceulaka
Tuan putroe saket ate
Neucarot le di nap mata

Mate aneuk haram jadah
Sitree Allah asoe nuraka
Kaphe kutok laknatillah
Lon ya Allah neupeulara

Bek roh neubri rot nyang sisat
Jalan teupat neukaronya
'Oh lheueh putroe mohon bak Tuhan
Nahuda nyan maken that subra

Teuma jiyue mat dum bak rakan
Putroe bangsawan gundah raya
Jikeumeung mat 'oh jap badan
Abeh bandum yo sang geumpa

Krot-kreuet badan geunta asoe
Keuramat Putroe Sunoe muda
Rakyat subra sare kiroh
Reubah-reuboh meutimpa-timpa

Badan keurawat jaroe ceukang
Jiklik han ban dalam bahtra
Dum meukuien han teupat le
Teuot kaki keurawat dumna

Jaroe nyang jap badan putroe
Dum sinaroe yo sang geumpa
Teukeudi Allah peurintah Tuhan
Syeedaga nyan teuma binasa

Jipot angen ujeuen ribot
Seupot-seupeuet glap-gulita
Teuka angen puteng beuliong
Abeh jilambong lam antra

Abeh ngon rakyat dum sinaroe
Tinggai meung putroe sidroe saja
Rakyat abeh angen bapot
Sret u laot bansineuna

Siuroe simalam seupot-seupeuet
Abeh rakyat dum binasa
Lheueh nyan teuma teukeudi Tuhan
Putroe bangsawan duka cita

Saleh mate lon di sinoe
Gadoh kamoe miseue nyang ka
Putroe marit teuma sidroe
Sira neumoe ro ie mata

Neumoe jamong neungieng lu langet
Cit meurep-rep ngon ie mata
Neuleueng jaroe mohon titah
Nak meung gadoh duka cita

Sireuta neubeuet do'a yoh nyan
Ubak Tuhan mohon pinta
Ya Rabbi unsumi 'ala 'aduwika z-zalimi
Wa l-musii ba'iyanna l-mustaqifina

Aghisni - ghaisan - syadida
Wahe Tuhan kabui pinta
Ya Tuhanku tulong kamoe
Bak sitree nyoe darohaka

Sitree gata nyang lalem that
Kaphe meuhad asoe nuraka
Sibagoe tulong nyang sangat that
Gaseh Hadarat akan hamba

'Oh lileueh neukheun nyan tuan putroe
Neurahop jaroe ubak muka
Teuma neumeungui tuan putroe
Kayen neupakoe bak anggeeta

Neungui tangkulok nyan bak ulee
Sok ngon bajee turon tiga
Lheueh nyan neusok silueue plang
Tiwah bintang malam jula

Ija plang neupinggang kasab meurok
Meuseulipok jroh that rupa
Palet keuieng neulhat ngon kreh
Peukayan abeh dum anika

Sare cukup peukayan di asoe
Jroh that Putroe Sunoe muda
Tiwah buleuen ngon matauroe
Cahya gigoe sang meutia

Watee teusinyom meuhambo kilat
Pangsang rakyat kalon rupa
Ladat beureuhi soe nyang pandang
Cahya subang meucuaca

Subang meucintra mata intan
That meupadan indah rupa
Neungui tangkulok seulap bayong
Peuet boh gulong bube raya

Putroe Sunoe neumeulayeue
Angenpi kheu bagi dua
Pasa reumbang hana sakri
Kapai jititi lam laot raya

Tuan putroe duek keumudoe neumat
Kapai leugat miseue guda
Ie meubura rot kapai plueng
Pasa keunong barat daya

Teukeudi Allah peurintah Tuhan
Troh kapai nyan ubak raja
Ban sare troh neutiek saoh
Beude neucoh that meutaga

Neutet beude dum meuriam
Troh u dalam su bak raja
Raja Peuranggi nyang that meugah
Keurajeuen limpah sigom donya

Raja nyang laen taklok keunan
Bak bilangan tujuh laksa
Nyankeu raja bak nanggroen nyan
Putroe bangsawan keunan teuka

Banda luah that bit jarak
Limong uroe jak pasang guda
Jipeugot geudong deungon keude
Rakyat rame hana tara

Teuma teumanyong Raja Peuranggi
Peue saleh beude that meutaga
Lon deungo that meugeureupoh
Saleh musoh keunoe teuka

Saleh ureueng peurmusohan
Jak takalon tapeunyata
Meunan narit Raja Peuranggi
Bujang ili jak peunyata

Jicok sampan dayong leugat
Jeipeuteupat ubak bahtra
Sampanpi troh bak kapai nyan
Tanyong yoh nyan bujang raja

Bujang marit teuma ngon putroe
Pane kapai nyoe tapeuhaba
Kukalon ureueng hana sidroe
Peugah bak kamoe muda beulia

Putroe Sunoe peugah yoh nyan
Jeuh jalan that safara
Kapai nyoe tuan nanggroe Mureh
Kamoe han le abeh binasa

Bak simalam teukeudi Tuhan
Teuka angen bade raya
Jipot angen puteng beuliong
Abekh jilambong kapai nyang na

Nyang na tinggai meulon sidroe
Rakyat sinaroe dum binasa
'Oh lheueh marit tuan putroe
Bujang jiwoe le jigisa

Ban sare troh jiwoe u dalam
Ngadap tuan poteu raja
Raja Peuranggi teuma tanyong hai
Pane kapai keunoe teuka

Deelat tuanku doli junjongan
Seumbah laman po meukuta
Kapai Mureh teuka keunoe
Bak geutanyoe tuanku raja

Nyang na tinggai aneuk miet sidroe
That samlakoe indah rupa
Di nanggroe nyoe tan sipadan
Rupajih ban sang geuteumpa

Dhoe meuangget buleuen siuroe
Miseue laku proe aneuk raja
Peukayan jingui sileungkapan
That analan hana tara

Takue tamse larek dulang
Badan seudang muda beulia
Keuieng sijakhop badan situlang
That meupadan hana tara

Ban raja ngo bujang peugah
Jakleh langkah katueng sigra
Taba rijang keunoe u dalam
Lon keumeung pandang pakri rupa

Bujang ili laju u baroh
Sampan jikayoh miseue guda
Trohkeu sampan ubak putroe
Jiek jinoe sigra-sigra

Bujang tahe laloe dukhoe
Jieu putroe indah rupa
Sare teutap jiduek siat
Teuma jimarit bujang raja

Tango kamoe muda bangsawan
Lon surohan bak meukuta
Nyang troh langkah lon jak keunoe
Gata sidroe neuyue tueng bak raja

Neuyue ba gata rijang-rijang
Neuyue tamong sigra-sigra
Putroe seuot insya Allah
Lon meulangkah bak sroepada

Han peue salah wahe tuan
Meunyo na sayang nibak gata
Taba ulon bak junjongan
Lon ngadap tuan poteu raja

Han peue salah muda samlakoe
Beudoh jinoe sigra-sigra
Ban neudeungo narit meunan
Neubeudoh yoh nyan putroe muda

Neutren lam sampan teungoh u darat
Tamong leugat ubak raja
Tuan Siti peukeumah droe
Peukayan neungui sang bentara

Ban sare troh teungoh u darat
Tahe rakyat bansineuna
Ureueng lam peukan hireuen bimbang
Tamse bintang jieu rupa

Mata ladat napsu rindu
Han tom jieu meunan rupa
Sipanyang rot troh u dalam
Rakyat hitam seutot lanja

Na nyum bek cre bak jipandang
Rakyat bimbang bansineuna
Trohkeu putroe bak leuen meuligoe
Raja pindoe ate suka

Ban jikalon teudong di leuen
Na ri buleuen sang di mata
Han tom jieu rupa samlakoe
Raja pindoe ate suka

Rasa beuji'uet jipeureulan
Adat makanan meunan umpama
Meunankeu bangon Raja Peuranggi
Anjeng babi asoe nuraka

Asoe meuligoe dum dendayang
Suka jipandang ladat mata
Peurumoh raja lam meuligoe
Peuet droe putroe jroh-jroh rupa

Dum jijeungeuk u leuen meuligoe
Hireuen laloe suka rasa
Jisangka putroe ureueng lakoe
Jih banpeuet droe pungo gila

Amma bakdu teuma dudoe
Tuan putroe lon calitra
Putroe geupeuek lam meuligoe
Geubri jinoe teumpat mulia

Ateueh keurusi meutatahkan
Pudoe intan meucahya-cahya
Tameh geuta peuet sagoe intan
Geupasoe keunan yakot meutia

Bak geuta nyang meutatah nyan
Putroe bangsawan duek di sana
Keuleumbu kaca tujuh lapeh
Leumah ureueng eh di dalamnya

Sinan geukeubah muda samlakoe
Sajan putroe peurumoh raja
Raja peuranggi hireuen bimbang
Suka jipandang ladat mata

Jiduek sinan sajan putroe
Sare wah-woe raja ceulaka
Peurumoh raja sare seudee
Jieu lagee indah rupa

Putroe Sunoe meuneuiem droe
Hana sapeue neumeuhaba
Raja Peuranggi peungaroe asee
Siulah lagee tamse bui buta

Galakjih that hana padoe
Jieu putroe han peuweh mata
Na nyum bek crè nyan jipandang
Raja suang asoe nuraka

Putroe pike dalam ate
Hana lahe neupeunyata
Meunyo kaphe agama tan
Maleepi han dalam dada

Teuma putroe geubri makanan
Geubet idangan saboh nyang raya
Raja sinan duek rab sajan
Putroe bangsawan lon calitra

Putroe Sunoe that ceureudek
Akai bayek hana tara
'Oh lheueh geupeuduek u nap putroe
Neubuka jinoe idang raya

Neukalon lam idang dumna cawan
Sie di dalam peunoh rata
Tuan putroe that juhari
Dageng babi neuueu rupa

Teuma putroe neukheun meunan
Han ek lon makan po meukuta
Han ek makeuen tunaku bu nyoe
Pinah ninoe idang raya

Pruet lon saket hana padan
Han ek lon makan po meukuta
Teuma geupinah idang ninan
Putroe bangsawan lom beurkata

Neumarit deungon Raja Peuranggi
Tuan Siti lhok bicara
Tuanku peurab keunoe siat
Na peue pakat ngon meukuta

Teuma jipeurab Raja Peuranggi
Tuan Siti buka suara
Tango kamoe tuanku droe
Narit lon nyoe tapeucaya

Meunyo tapateh ban lon kheun nyoe
Tatueng kamoe nyan keu gata
Teuma marit Raja Paeuranggi
Cuba kheun kri peuebu haba

Haba lon got po junjongan
Tatem tuan tamong agama
Bek taseumbah beurala patong
Taseumbah Tuhan Po Nyang Esa

Taseumbah Tuhan taikot Nabi
Patong Yahudi taproh simua
Tatamong Islam taikot Rasui
Beutakabui tapeucaya

Taucap syahdat takheun jinoe
Lon peurunoe po meukuta
Nabi Muhammad Rasui Tuhan
Meunan tuan tapeucaya

Meunyo tapateh haba lon nyoe
Tatueng kamoe uleh gata
Kareuna lon kon ureueng lakoe
Ureueng binoe aneuk raja

Tameukawen ngon lon dudoe
Takheun jinoe po meukuta
Meuhan tapateh ureueng binoe
Taeu jinoe leumah tanda

Tuan putroe cok tangkulok
Hireuen teuseupok raja ceulaka
Masa dilee kon tuan putroe
Ban ureueng lakoe lagoe rupa

Neungui peukayan ban ureueng lakoe
Han thee sidroe manusia
Neubalek rupa sang ureueng agam
Ngui peukayan miseue raja

'Oh deuh jikalon ureueng binoe
Leubeh bak bunoe pungo gila
Raja Peuranggi han jithee putroe
Tekap jaroe raja ceulaka

Jikira agam ureueng lakoe
Han jithee putroe indah rupa
Tahe hireuen dahsyah jipandang
Bukon bubarang suka teumasa

Di ulee kon troh u gaki
Jingieng sabe han sapat ceula
Jikalon bak ok intan meukarang
Miseue bintang blet-blot cahya

Jeuep bulee ok peunoh meutabu
Peungeuh that hu trang cuaca
Bungong sanggoi dum manikam
Dhoe meupatam jroh han tara

Subang intan bak geulunyueng
Cahya jiplueng seumilu mata
Dum peukayan alat di asoe
Neuba di nanggroe masa neubungka

Neungui peukayan ban ureueng lakoe
Tuan putroe balek rupa
Nak bek gop thee ureueng binoe
Jeuep-jeuep nanggroe meusafara

Nyandum areh Putroe Sunoe
Neupeungeut jinoe raja ceulaka
Raja Peuranggi tahe keudroe
Hana sapeue na lom haba

Han jiingat narit putroe
Raja pindoe sangat liga
Teuma marit tuan putroe
Neukheun jinoe nibak raja

Pakon tahe peue teuceungong
Taiem mantong hana haba
Pakri jimarit jih ka pangsang
Teubleut tuan meuaneuk mata

Dumnan dahsyah ladat jipandang
Tamse intan putroe muda
Putroe Sunoe neucukeh ulee
Raja seudee yoh nyan jaga

Ban teukeujot raja pindoe
Tuan putroe tanyong haba
Pakri laku pu junjongan
Haba laman tapeucaya

Nyoe phon marit raja pindoe
Tuan putroe deungo haba
Tango kamoe tuan putroe
Han di kamoe ban kheun gata

Han kutamong agama Muhammad
Beunciku that keuji raya
Han lon ikot Nabi Muhammad
Kareuna sulet sihe raya

Bak endatu han tom lon deungo
Miseue lagee nyoe haba gata
Tayue ucap syahdat dumna kamoe
Tayue pujoe nyang han meurupa

Han mee kudeungo tuloe geulunyueng
Narit nyang kon tapeuhaba
Tuan putroe ngo haba meunan
Beungeh yoh nyan hana tara

Nyum neuhanco ngon sijameung
Meunan bangon putroe muda
Saket ate tuan putroe
Neucarot jinoe di nap mata

Kadeungo kamoe Raja Peuranggi
Jeuheut that bagi asoe nuraka
Raja ceulaka laknat Allah
Kaphe bedeu'ah musoh agama

Beuhareuem tuboh bek jap badan
Neukheun meunan di nap mata
Ban jideungo putroe kheun meunan
Beungeh yoh nyan raja ceulaka

Jikeumeung mat Putroe Sunoe
Raja pindoe keumah raya
Ija jipalet nyan bak badan
Jimeung drop yoh nyan putroe muda

Han jiteumeung mat Putroe Sunoe
Lam meuligoe teumpat raja
Jikeumeung drop tuan putroe
Neuplueng jinoe lam istana

Han meuteumeung nyan 'oh jimat
Putroe lumpat ban kilat faja
Meuligoe meuguncang meuhayak-hayak
Putroe tanjak u ateueh raya

Meuhubo-hubo sare meugucang
Raja suang sret lam guha
Dang-dang jibeudoh raja pindoe
Neutak le jinoe ateueh keupala

Ban raja eu putroe jimeucaṅg
Jimarit yoh nyan sigra-sigra
Gatai asoe lon han padan
Tatak he intan bek na reuda

Saleh jitem teuploh urat
Gantoe teceupet uleh gata
Badanku bron krot-kreuet sangat
Bukon that mangat he binatang Zahra

Beuthat tatak bek wayang-wayang
Bek sang-sang ureueng meuseunda
Tatak he putroe tasirong-sirong
Saleh na untong jitem raya

Tatak beuthat tuan putroe
Gatai asoe hana tara
Saket ate tuan putroe
Raja pindoe uguh raya

Hana hiro dumnan neucang
Raja suang keubai han tara
Putroe Sunoe peudeueng di jaroe
Laju neuseudoe di keupala

Neutak di ulee sret u baho
Sang kulet tho raja ceulaka
Di jih ate cit keu putroe
Ulee neuseudoe han jikira

Putroe jirungkhom han meuteumeung
Neutak king-keueng di keupala
Meugumoe-gumoe jireupah putroe
Peudeueng di jaroe tujoh deupa

Putroe neumeucang hana padoe
Peudeueng di jaroe han ban peubla
Neutak tam-tum bunyoe guroh
Han lut tuboh keubai raya

Han jitem pajoh peudeueng bisoe
Tuan putroe gundah raya
Neutakot jiteumeung le raja pindoe
Tuan putroe duka cita

Raja Peuranggi sang rimueng bueh
Jiplueng krah-kruh lam istana
Jirumpuet keudeh neugrop keunoe
Putroe Sunoe utoh raya

Sira neugrop sira neutak
Bunyoe meuhayak dalam istana
Sare kham-khum keunong-tangkurak
Putroe Sunoe tak ateueh keupala

Dumnan utoh tuan putroe
Raja neuseudoe han ban peubla
Asoe istana dum sikalian
Tahe keunan dumjih rata

Boh nyang agam got nyang inong
Dumjih tuan tahe rata
Teuhah babah teuhing gigoe
Jingieng bak putroe han peuweh mata

Raja Peuranggi sitree Tuhan
Hirojih tan kaphe ceulaka
Putroe Sunoe neumeutangkeh
Meuligoe abeh dum binasa

Keunong peudeueng putroe meutangkeh
Raja pelah uga hana
Teuma jimarit raja seudee
Pioh dilee putroe muda

Na peue lon kheun tuan putroe
Tango kamoe lon calitra
Hana faidah lon nyoe tacang
Payah mantong han meuguna

Luka han jitem saketku tan
Mangat badan nyum kurasa
Peudeueng ka sumpah lam donya nyoe
Sigala beusoe sumpah seutia

Peue faidah tameuayang
Bek le ta cang putroe muda
Adat tapheu et tageurudoe
Han lut beusoe pueue tasangka

Nyang got pioh bek le tacang
Tabri rijang peue nyang hawa
Sep ka dumnan tameuayang
Bek le tacang han binasa

Teuma marit tuan Siti
Raja Peuranggi kadeungo haba
Dum ruman kah meunapsu keu kee
Na ri cagee binatang rimba

Ban jideungo haba meunan
Beungeh yoh nyan ban uleue bisa
Jimeung teureupa ateuh putroe
Raja pindoe amarah raya

Putroe Sunoe meugriet sangat
Rab toe jimat raja ceulaka
Putroe meulakee ubak Hadarat
Neubeuet hekeumat saboh mintra

Sare keunong hekeumat putroe
Raja Pindoe pangsang sigra
Reubah meugule ka teugageueng
Raja bajeueng bah jirasa

Bandum teungeut ban saboh nanggroe
Hekeumat Putroe Sunoe muda
La ilaha illallah
Tuhan peurintah alam donya

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Kata dalang eumpunya rawi
Tuan Siti lon calitra
Putroe Sunoe tango lon peugah
Peutoe neuplah saboh nyang raya

Neucok asoe dum peukayan
Areuta sulotan raja raja
Neucok peudeueng saboh u jaroe
Neuteubiet jinoe u blang raya

Ban sare troh u leuen meuligoe
Meuteumeung jinoe guda raja
Putroe Sunoe guda neupasang
Neuteubiet rijang u blang raya

Blangpi luah that meuhayak
Lhee buleuen jak pasang guda
Teukeudi Allah tuan putroe
Umu lhee uroe dalam blang raya

Troh teungoh blang guda neupasang
Meurumpok geulumpang tujuh sibanja
Bube-be krong nyan raya bak
Reului rampak naung lingka

Luah naung di yup kayee
Lot siribee ureueng ba guda
Troh yup kayee tuan putroe
Neuikat jinoe taloe guda

Lheueh neuikat guda taji
Tuan Siti pioh sigra
Dang tho reuoh neueh siat
Teungeut mangat sangat indra

Siuroe simalam teungeut putroe
Hana sidroe ureueng teuka
Lheueh nyan jaga tuan putroe
Duek teupipoe wet ngon sila

Putroe beudoh rijang-rijang
Guda neupasang sigra-sigra
Neupacu guda that peulari
Tuan Siti utoh raya

Na siuroe guda neupacu
Jiplueng laju hana tara
Ban sare troh sama teungoh blang
Meuteumeung sinan paya raya

Tamse laot luah sangat
Han deuh talihat bineh dua
Ngon ie hijo lhok di dalam
Meugeulumbang bicah ceuncala

Tuan putroe neutren keunan
Neumanoe yoh nyan sigra-sigra
Lheueh neumanoe suci badan
Neungui peukayan sianika

Teuma neutueng ie seumbahyang
Dalam kulam paya raya
Lheueh seumbahyang tuan putroe
Neupeupuleh jinoe teuma mintra

Puleh hekeumat Raja Peuranggi
Kaphe Yahudi asoe nuraka
Abeh jaga raja ngon rakyat
Leungkap samat bansineuna

Lheueh nibak nyan tuan putroe
Neuleueng jaroe neubeuet do'a
Neuucap syuko meubagoe-bagoe
Neungadu droe bak Rabbana

Seulaweuet keu Nabi dum seuleusoe
Tuan putroe peupuleh mintra
Abeh neupeupuleh dum ngon rakyat
Han khianat putroe muda

'Oh sare lheueh mintra puleh
Teuma neueh di bineh paya
Na sikeujap neueh sinan
Meulumpoe yoh nyan putroe muda

Neulompoe teuka sidroe ureueng
Janggot panyang syeureuban raya
Tuan putroe saleuem neubri
Geuseuot le sigra-sigra

Teuma neumarit neutumanyong
Pane gampong nyan di gata
Putroe seyot teuma neupeugah
Nanggroe Makah gampong hamba

Abek dumpeue nyan neupeugah
Gampong ayah ngon jak lam rimba
Nyan ngon karam dalam laot
Abek neuseubot neucalitra

Droe cit ka ngon teukeudi Tuhan
Syiah nyan tuan eelia raya
Teuma neumarit syiah ngon putroe
Neupeugah proe dum peukara

Ban nyang neuue neupeugah meunan
Tuan syiah nyan droe troh mata
Tango ulon tuan putroe
Peue buet keunoe taeh gata

Bek taeh sinoe he putroe di blang
Beudoh rijang sigra-sigra
Beudoh rijang tuan Siti
Raja Peuranggi keunoe teuka

Teungoh kiam rakyat jikrah
Lon ngo jipeugah jihak tueng gata
Beuthat taingat tuan putroe
Rakyat lam nanggroe le that teuka

Nyankeu haba lon bri bi'at
Beuingat-ingat putroe muda
Teuma marit tuan putroe
Tango kamoe tuan peundita

Talakee do'a keu lon beuthat
Beuseulamat nibak bahya
Insya Allah tuan putroe
Do'a kamoe le keu gata

Ulon mohon nibak Allah
Bak meusiblah nibak bahya
Tango lon kheun tuan putroe
Beudoh jinoe sigra-sigra

Beudoh rijang bek taduek le
Raja Peuranggi that guranta
Raja Peuranggi keunoe datang
Beudoh rijang putroe muda

Buet nyoe tuan raya sangat
Lon ngo jiseubot jicalitra
Saket ate keu gata sidroe
Kareuna meuligoe ka binasa

Peutoejih taproh guda tabaplueng
Peudeuengjih tatueng sajan areuta
Guda ngon peudeueng alat peuprangan
Bandua nyan le that hareuga

Jinoe jijak tueng gata jiprang
Beudoh rijang putroe muda
Teuma marit tuan putroe
Kaphe pindoe asoe nuraka

Laman neutulong Tuhanku sidroe
Raja pindoe meuhad binasa
Insya Allah tulong Hadarat
Han troh hajat raja ceulaka

Han troh meukeusudjih ngon kamoe
Teutapi buet nyoe **sangat** raya
Cit dilee kon ka Tuhan bri
Ngon raja kaphe musoh raya

Nibakjih kon troh bak aneuk
Prang cit rayek teungku peundita
Prang nyoe teungku cit raya that
Teutapi hajat that samporeuna

'Oh lheueh abeh putroe lumpoe
Teukeujot jinoo putroe muda
Sajan neubeudoh nibak tido
Meungucap syuko keu Rabbana

Alhamdulillah subhanallah
Nyan di babah putroe neubaca
Teuma neurahop le ngon jaroe
Lheueh neupujoe Tuhan Esa

Teuma neubeudoh bak neuduek nyan
Leugat beurjalan bineh paya
Neusrah muka sajan ngon babah
Putroe meutuah lheueh nyan bungka

Neucok guda neuboh keukang
Teuma neupasang neupoh lawa
Guda neupasang leugat meupacu
Jiplueng laju lam blang raya

Troh le guda sama teungoh blang
Yup geulumpang dilee nyang ka
Teuma neupioh sinan siat
Guda neuikat sigra-sigra

Amma bakdu teuduek siat
Raja laknat lon calitra
Raja Peuranggipi ka wah-woe
Jikalon putroe han meuho ka

'Oh ban jikalon peutoe ka beukah
Peudeueng ka gadoh gudapi hana
Yoh nyan beungeh raja suang
Teubiet u blang jijak mita

Jiba ngon rakyat dumna sajan
Mita tuan putroe muda
Jimita keudeh mita keunoe
Putroe Sunoe lam blang raya

Teungoh neupasang guda tajoe
Tuan putroe neupoh lawa
Putroe Sunoe sangat areh
Neumeuen tangkeh ateueh guda

Gudapi utoh sangat ragoe
Tuan putroe that peundika
Gudapi utoh jigrop meulayang
Putroe ateueh nyan neulila-lila

Cit guda nyan alat peuprangan
Utoh tuan hana tara
Adat meukarat teungoh neumeuprang
Neutarek keukang pantah sigra

Jigrop meulayang jitren u bumoe
Pantah han soe ngon tapeusa
Guda utoh sangat ragoe
Tuan putroe ate suka

Dua lhee uroe guda neupasang
Peumeuen peudang utoh raya
Jeu et neunari meuen ateueh rueng
Guda baplueng that meutaga

Neudong ngon gaki cong guda jak
Peudeueng neuancak that peundika
Peudeueng neugeuca neusayong-sayong
Su meudeungong bunyoe nukara

Meunankeu buet tuan putroe
Dua lhee uroe dalam blang raya
Peudeueng neugeucaí meutoto ujong
Neutak le rancong geulumpang raya

Na bube krong raya geulumpang
Di teungoh blang mahajana
Tujoh sibanja geulumpang sinan
Teupnat meuneu'en ureueng meupanta

Paseulon kisah keumudian dudoe
Raja pindoe lon calitra
Raja Peuranggi lon peugah proe
Jimita Putroe Sunoe muda

Lam-lam gampong pat na nanggroe
Hana putroe leumah nyata
Hana leumah putroe jipandang
Raja suang duka cita

Putroe Sunoe sama teungoh blang
Yup geulumpang meuseunia
Raja Peuranggi teubiet u blang
Putroe jipandang ban siseun lingka

Jicok teureupong saboh u jaroe
Jikalon putroe raja ceulaka
Teukeudi Allah peurintah Tuhan
Leumah yoh nyan jieuh rupa

Leumah jikalon lam teureupong
Di yup geulumpang putroe muda
Sinan neupioh yup geulumpang
Guda neupasang jikalon nyata

Teuma meusabda raja laknat
Ubak rakyat dum barangna
Jeh pat jinoe tuan putroe
Aneuk bisoe pasang guda

Udeh geutanyoe tajak tueng jinoe
Keunoe tapeuwoe lam istana
Kadrop bak le-le taboh taloe
Putroe sambinoe indah rupa

Keumah pakat raja ngon rakyat
Jijak leugat lam blang raya
Dum meugrop-grop seuu asoe
Harok keu putroe raja ceulaka

Ban sare rab goh lom that toe
Jipioh jinoe rakyat ngon raja
Peuduek pakat jitanyong lagee
Jikeumeung tipee putroe muda

Tango kamoe rakyat meuktoe
Dumteu jinoe beusanteut rata
Taglet lingka banpeuet sangoe
Tadrop putroe indah rupa

Tajak beuseungap bek kiam-kiam
'Oh ka malam taglet lingka
Meuka meupat dilee takalon
Euntreuk 'oh malam tapeuteuka

Tadong meulingka dum beusapat
Meuteumee meuhad putroe muda
Meunan waham Raja Peuranggi
Ate beureuhi hana tara

Nyum jiteumeung keujih putroe
Raja pindoe suka rasa
Teukeudi Allah peurintah Tuhan
Uroepi malam le ho sinja

Teuma marit raja laknat
Beudoh he rakyat dumteu rata
Geutanyoe tajak bacut-bacut
Beuingat-ingat bek that subra

Nak bek jithee le tuan putroe
Beuseungap geutanyoe bek meuhaba
Teukeudi Allah Tuhanku sidroe
Neubri keu putroe saboh rahsia

Lheueh nyan putroe guda neukeukang
Teuma neupasang neupoh lawa
Siseun reuoh guda neupasang
Leumah meureuntang lam blang raya

Leumah neuu ban sikhian blang
Putroe neuriwang sigra-sigra
Teuma neumaju guda taji
Han soe tukri bagah raya

Neupacu keudeh neugrop keunoe
Putroe Sunoe that peundika
Tamse kilat guda jilumpat
Leumah le rakyat ban siseun lingka

Neuthee ka jiglet tuan Siti
Raja Peuranggi nyan ka teuka
Neukalon rakyat wie ngon uneun
Neueu meutamon miseue rimba

Di nappi meunan di likot saban
Gundah tuan putroe muda
Teungoh jipeujak seun-seun bacut
Kaphe laknat asoe nuraka

Teukeudi Allah peurintah Tuhan
Putroe bangsawan lon calitra
Ate mangat tuan putroe
Beureuhi asoe hana tara

Putroe Sunoe guda neupasang
U yup geulumpang le neuhala
Sinan neupacu jiplueng leugat
Troh bak rakyat kaphe ceulaka

Putroe Sunoe that juhari
Jeuet neunari ateueh rueng guda
Neumeu'en ancak neumeutangkeh
Hana ngeudeh putroe muda

Rab-rab tamon kaphe pindoe
Tuan putroe teumakot hana
Neupura thee neupura han
Rab-rab kawan kaphe ceulaka

Droe cit maklum dalam ate.
Raja kaphe meuhad binasa
Prang raya that amat sangat
Teutapi hajat han samporeuna

Han ek samporeuna hajat kaphe
Keumeung tueng Siti Sunoe muda
Abeh mate raja rakyat
Putroe Sunoe that guransang raya

La ilaha illallah
Nyang peurintah Tuhan Nyang Esa
Amma bakdu uroepi beungoh
Rakyat damoh sajan raja

Deumi leumah deuh jipandang
Raja suang ate suka
Ban jikalon leumah putroe
Seuu asoe kaphe ceulaka

Jipeurab rakyat dum sinaroe
Jimeung drop putroe Sunoe muda
Sare lingka rakyat meukatoe
Di teungoh putroe deungon guda

Guda neupasang mantong teudong
Teuma teumanyong putroe muda
Neutanyong bak raja dumna rakyat
Hobu hajat dumna gata

Rakyat le that meuribee katoe
Taglet kamoe peue kareuna
Pakonbu taglet ulon sidroe
Peue napsu jinoe cuba peuhaba

Lon kalon rakyat 'oh seupot blang
Peue tajak tueng peugah sigra
Peugah ban buet kheun bak teupat
Ulon talihat peue kareuna

Rakyat seuot tanyong putroe
Hajat kamoe cit keu gata
Adat tajak tueng kamoe sidroe
Lon woe jinoe sajan gata

Meutatem seubot dua kalimah
La ilaha illallah
Muhammad Rasullullah
Ulon sidroe sah tatueng keu gata

Taikot Nabi taucap syahdat
Nyan tateebat dumna gata
Ban jideungo haba putroe
Han di kamoe masok agama

Han di kamoe ikot Nabi
Teulah akhe saboh masa
Lagi Nabi le hibatan
Sihe han ban ateueh donya

Hanyi geulunyueng atemeu luat
Di kamoe syahdat beunci raya
Putroe Sunoe deungo meunan
Neucarot yoh nyan kaphe ceulaka

Kadeungo he Raja Peuranggi
Agama Nabi han karela
Han katem ucap kalimah syahdat
Raja sisat asoe nuraka

Meuhan kaikot ban haba kee
 Kuproh ulee bansineuna
 Kulakee bulong ubak Tuhan
 Kah kulawan kusalop jungka

Rakyat le ib
 jagat kamo
 pakondu ta
 Pene naga

Insya Allah tulong Rabbi
 Raja Peuranggi kuplah dua
 Muka ri asee teuka keunoe
 Keumeung tueng kamoe po ceulaka

lao kelon
 Pene tajak
 Pongai pa
 Uloa talip

Bek antara kateumeung kee
 Kadang meubee han karasa
 Tulong Tuhan deungon Nabi
 Meunyo cit neubri ban kupinta

Kajal se
 jagat kai
 Abat raja
 Lom woe

Ban jideungo narit meunan
 Beungeh yoh nyan kaphe dumna
 Teuma marit Raja Peuranggi
 Kaphe majusi asoe nuraka

Mentat
 La lila
 Mubana
 Ulon se

Kadrop putroe dumteu sare
 Bek kango le jimeuhaba
 Jimeukeumah dumna rakyat
 Putroepi that sangat guranta

Takot
 Nyun t
 Ban ta
 Ulon

Peudeueng di jaroe ban on pisang
 Guda neupasang neulila-lila
 Peudeueng neusayong bube seuladang
 Rakyat neucang le that fana

lila d
 lila
 lila
 lila

Padumna mate guda sipak
 Lom tangkurah beukah dua
 Ban meureunggot jikeumeung runghom
 Sigo neupeujom peudeueng seuba

lila
 lila
 lila
 lila

Jan-jan meugriet jikeumeung mat
 Guda lumpat han ban peubla
 Neutajo keudeh neugrop keunoe
 Guda that ragoe lam blang raya

Kat
 Aba
 Aba
 Aba

Sigo lheueh peudeueng tuan putroe
Rakyat sinaroe abeh fana
Putroe meutangkeh meu'en tanjak
Rakyat neutak han ban peubla

Le that mate meusong-abong
Rakyat keupong ban siseun lingka
Mate rakyat meulaksa katoe
Tuan putroe sidroe saja

Dumnan rakyat mate meukatoe
Di jih putroe cit jihawa
Keu rakyat mate hana gundah
Laen jikrah hana reuda

Subhanallah wabihamdihi
Tuan putri that guranta
Neuhei raja uleh putroe
Peue lom jinoe napsu gata

Kakeumeung beuabeh dumna rakyat
Kaphe laknat asoe nuraka
Le lom rakyat mantong di nanggroe
Kaba keunoe bansineuna

Lon lakee tulong nibak Tuhan
Ingat kusimpan ban sigom donya
Han jideungo kaphe pindoe
Di jih putroe cit jimita

Meusurot-surot rakyat lam blang
Putroe ceumeucang han ban peubla
Jirumpuet u wie neugrop uneun
Utoh that neutheun putroe muda

Trep-trep siseun neupeuhah ulee
Abeh seudee rakyat ngon raja
Dang-dang meugriet jikeumeung mat
Guda jilumpat dalam hawa

Meunan kayem geunap uroe
Kaphe pindoe le that fana
Han meuteumeung mat di jih putroe
Abeh neuseudoe teubinga-binga

Hana ngilu dumnang neucang
Kaphe suang biek beudeuga
Uleejih puntong dum meutabu
Tamse boh u sret u bumoe

Ladom puntong teupat keuieng
Keunong peudeueng tuan putroe
Rakyat mate that barollah
Ile darah miseue sungoe

Putroe Sunoe jilet leugat
Guda jilumpat ateueh bumoe
Peudeueng bak jaroe neukeuta-keuta
Neucang lanja hana padoe

Rakyat mate meulaksa ribee
Mabok ngon bee tuan putroe
Jikalon rupa tamse bintang
Mayoh bimbang kaphe pindoe

Rakyat nyang tajo le that mate
Meutindeh bangke ateueh bumoe
Rab siteungoh mate kaphe
Darah ile tamse sungoe

Putroe Sunoe guda neupasang
Yup geulumpang neupioh droe
Payah jilet sama teungoh blang
Raja suang keumeung drop putroe

Teukeudi Allah peurintah Hadarat
Nyang bri kuat Putroe Sunoe
Peudeueng bak jaroe neukeuta-keuta
Rakyat lingka meuploh katoe

Putroe Sunoe juhari that
Guda neupeulumpat ateuh bumoe
Sira neureutek neulinggang-linggang
Bak geulumpang neuteubang jinoe

Na bube krong geulumpang reubah
Kaphe bicah dum sinaroe
Abekh meugeunton ngon bak geulumpang
Ladom riwang peusiblah droe

Abekh jiplueng dumna rakyat
Teumakot that hana bagoe
Jieu geulumpang abekh reubah
Rakyat barollah dum jiboh droe

Han saboh le abekh simpan
Tinggai tuan raja pindoe
Tango lon peugah Raja Peuranggi
Miseue babi buta tuloe

Jieu rakyat han saboh le
Saket ate raja pindoe
Jipalet ija le bak keuieng
Putroe jingieng hu ngon mata

Putroe teumanyong meuadoe-adoe
Peue lom han kawoe kaphe ceulaka
Peuebu kapreh sinoe di blang
Hana sayang le keu nyawa

Rakyat abekh plueng u gampong
Di kah kadong peue kamita
Teuma marit Raja Peuranggi
Bek le po Ti tameuhaba

Han kuwoe le di lon u gampong
Bah abekh nyawong lon beufana
Meuhan kuteumeung gata sidroe
Hareuem han kuwoe peue tasangka

Maleeku that han kuwoe le
Bahle mate lon di donya
Teuma marit tuan putroe
Neukheun meunoe ubak raja

Kadeungo be Raja Peuranggi
Tamse babi asee ceulaka
Dum ruman kah meunapsu keu kee
Muka ri asee paroh rusa

Raja Peuranggi saket ate
Jitajo le sang bui buta
Jikap bibi mata jipet
Dumnan saket putroe seurapa

Raja marit ngon tuan putroe
Taingat keudroe po jroh rupa
Di lon barangkri bahle tatop
Gata kudrop kusabong nyawa

Putroe seuot han peue peuingat
Raja laknat kueumpu muka
Hana peue le peuingat kamoe
Kaingat keudroe kaphe ceulaka

Peudeueng lon deuek hana lom troe
Bak uroe nyoe safeh pueh dahga
Saleh ek teuploh urat jaroe
Peurab keunoe bek syok sangka

Maken bicah phet raja pindoe
Tuan putroe laju seurapa
Teuma jipeurab raja pindoe
Jimeung drop Putroe Sunoe muda

Putroe Sunoe peudeueng di jaroe
Neutak jinoe raja ceulaka
Neugeuca peudeueng neusayong-sayong
Neutak rancong asoe nuraka

Neutak di ulee sret u baho
Sang kulet tho keubai raya
Nu sikh an uroe neucang sabe
Meugule-gule lam blang raya

Badan keumong lumpok asoe
Tuan putroe neucang lanja
Teuma jimarit Raja Peuranggi
Tango po Ti kucalitra

Tacang lon nyoe hana amilan
Payah badan sia-sia
Bit dumn an kamoe tatak
Kuniet tagusuek bak anggeeta

Saket ate tuan putroe
Raja pindoe han ek binasa
Pakri kutak raja paleh
Han jitem pajoh raja ceulaka

Tren eleuham nibak Allah
Peudeueng neukeubah sigra-sigra
Tren cong guda neutiek peudang
Neucok geulumpang nyang that raya

Neuwiet saboh dheuen teuma u jaroe
Neupoh jinoe raja ceulaka
Neuseupot di ulee sret u tanoh
Sare meh-moh putroe muda

Kayee hanco abeh patah
Putroe payah hana tara
Raja Peuranggi hirojih tan
Hana tuan meuklep mata

Teuma jikheun Raja Peuranggi
He putroe Ti mangat kurasa
Tacok laen tatiek nyan keudeh
Bintang peureuseh intan peurmata

Kadang ek mangät badan lon puleh
Kuniet ka lon eh sibantai dua
Supaya puleh badan keurawat
Kuniet gata mat gusuek anggeeta

Teuma putroe neucok peudeueng rijang
Neukoh geulumpang sigra-sigra
Teuma neucok geulumpang sigreh
Raja paleh neupoh bak muka

Neupoh di ulee yoh nyan reubah
Kayeepi patah meukhan dua
Neutiek nyan keudeh neubet peureudee
Seupot di ulee raja ceulaka

Sigo neusakai meunyum bingong
Tuloe geulunyueng teubinga-binga
Teubiet lam idong darah meulimbak
Muka pipak keumong raya

Teuma neuseupot bak cruep takue
Sare rudui leumoh anggeeta
Lhee go neupoh neuturot-turot
Jadeh mawot raja ceulaka

Droe cit ka ngon teukedui Allah
Utak beukah yoh nyan teupanca
Utak meusiseue abeh meuhambo
Jimeututo raja ceulaka

Tapoh sigo treuk tuan Siti
Lon nyoe han le tinggai donya
Teuma seuot tuan putroe
Han di kamoe sep dum nyang ka

Bahkeu dumnan peunyum dilee
Raja seudee bah karasa
Teueungkak-eungkak that teumeue-meue
Meu'eue-meu'eue ateueh donya

Teutap mate raja bajeueng
Teudu lam naleueng lam blang raya
Napsu beu putroe han ek meuteumeung
Jih teugageueng hilang nyawa

Nyandum napsu aneuk jalang
Raja suang asoe nuraka
Rakyat mate jihpi simpan
Napsu tuan han samporeuna

'Oh lheueh mate Raja Peuranggi
Tuan Siti lon calitra
Putroe giduek guda taji
Neupacu le lam blang raya

Guda jiplueng that meudeungong
Keudeh u gampong neupoh lawa
Troh lam gampong guda neupasang
Neukalon urang han sapat na

Sohkeu rumoh jeuep-jeuep nanggroe
Abeh jiboh droe dalam rimba
Han jijeuet dongpi meusidro
Jikalon putroe amarah raya

Teuma neujak tuan putroe
Neutet nanggroe bansineuna
Abeh neutet rumoh sikalian
Neuteubiet u blang putroe muda

Laju neujak tuan putroe
Neutet meuligoe raja ceulaka
Abeh neutet dum sigala be
Angoh sare hana tara

Tamse geutat gle ureueng meuladang
Hu ceumeureulang sigala donya
'Oh lheueh neutet dum sibirang
Neuteubiet u blang pasang guda

Neuteubiet u blang sira pioh
Guda neuparoh jiplueng lanja
Gudapi jiplueng that neudeungong
Sama teungoh blang mahajana

Siuroe simalam guda neupasang
Jiplueng seunang binéh kuala
Teuma putroe neupioh sinan
Teungeut yoh nyan hana tara

Trep that uroe hana neueh
Badan reugeh putroe muda
Neueh sinan di yup aron
Padok linggong sawang kuala

Teungeut pangsang dua lhee uroe
Hana sidroe ureueng teuka
Droe cit ka ngon teukeudi Allah
Putroe meutuah raya that abala

Bala raya that Tuhan teukeudi
Jikoh takue le aneuk raja
La ilaha illallah
Peurintah Allah han ek juga

Kata dalang eumpunya rawi
Tuan Siti lon calitra
Putroe teungeut sinan pangsang
Han nuetujan teungeut indra

Bah lon peuduek haba nyan siat
Meuwoe riwayat aneuk raja
'Oh sare meugah ayahjih mate
Jiwiet rante sigra-sigra

Geuboh bak keuieng rante beusoe
Jiwiet jinoe meukhan dua
Ban sare lھےuh dalam rante
Jiteubiet le u blang raya

Jicok peudeueng saboh u jaroe
Jiteubiet jinoe aneuk raja
Jikalon bangke meuleuek-kapeuek
Meuseupreuek-seupreuek lam blang raya

Jie ureueng hana sapat
Seungue rakyat safan-safa
Putroe jikalon hana di blang
Abeh jipandang sigala donya

Jicok teureupong saboh u jaroe
Jikalon putroe lam blang raya
Teukeudi Allah peurintah Tuhan
Leumah jieu trang meucuaca

Umpama beuneung raja timoh
Hu seumeuloh bineh paya
Teuma jipeutoe jijak peudeuh
Maken peungeuh that cuaca

Laju jipeurab teuma keunan
Leumah yoh nyan putroe muda
Jikalon teungeut sinan putroe
Leugat jipeutoe aneuk raja

Ban sare troh raja pindoe
Jikoh takue putroe muda
Jisuet peudeueng dalam sarong
Jitak rancong sigra-sigra

Dua go jitak tuan putroe
Jicok u jaroe peudeueng raya
Teuma jikalon raja suang
Nyata jipandang putoh dua

Teuma jicok putroe ninan
Jitiek tuan u laot raya
Jiwoe di jih raja pindoe
Tuan putroe kakeu fana

Meunan waham raja kaphe
Kakeu mate hilang nyawa
Putroe Sunoe hana mate
Tuhan Kade nyang peulara

Tuhan peuudep lom sigo trek
Neubah sifeuet putroe muda
Di jih jikira bit ka mate
Teuma jiwoe le sigra-sigra

Atejih mangat sangat puah
Ka na bila mbah kaphe ceulaka
La ilaha illallah
Tuhan peurintah alam donya

Amma bakdu teuma dudoe
Tuan putroe lon calitra
Putroe Sunoe jitiek lam kureng
Buya baplueng u laot raya

Droe cit ka ngon teukeudi Tuhan
Putroe bangsawan Tuhan peulara
Dua lhee buleuen jibaplueng lam laot
Meuteumeung eungkot saboh nyang raya

Eungkot jimeunan ikan dindin
Eungkot nyan meujen inong beurala
Buya marit deungon eungkot nyan
Tango tuan saboh rahsia

Jimarit yoh nyan ngon basa droe
Jijok Putroe Sunoe muda
Jiyue puelara bek tapoh-poh
Putroe nyoe saboh keuramat raya

Meutuah that gaseh Tuhan
Tunangan aduen Baren Miga
Nyankeu judo Bangta Sulotan
Putroe Sunoe nyan kaphe enaya

Nan geumeuhei Putroe Sunoe
That sambinoe meubahgia
Abek narit ka jibi'at
Jipeuingat eungkot raya

Eungkot sambot Putroe Sunoe
Buya jiwoe lam kualah
Lawet lawan dudoe nibak nyan
Eungkot raya nyan lon calitra

Umu peuet buleuen putroe bak eungkot
Dalam laot jipeuba-peuba
Sabab meutuah putroe bangsawan
Eungkot nyan tuan ate suka

Umpeuen le that mudah meuteumeung
Yup-yup iseueng keunan teuka
Teukeudi Allah peurintah Hadarat
Eungkot raya that sosah raya

Pruetjihpi geuhon badan raya that
Ji'eue u darat sigra-sigra
Jisadeue droe bineh kareueng
Leumah iseueng bube raya

Keueng jisadeue babah u darat
Jitiek le bakat eungkot raya
Sinankeu teudu meumet han ek
Geulumbang tiek u darat lanja

Meusareueng eungkot nanggroe Isfahan
Nanggroe nyan tuan luah raya
Teukeudi Allah Rabbon 'Alamin
Rahman Rahim Tuhan Yang Esa

Bak siuroe Po tallah bri
Nahuda male keunan teuka
Jak meuramien pajoh ikan
Peurumoh tuan sajan jiba

Namietpi na jiba sajan
Nahuda nyan ureueng that kaya
Rakyat nyang laen dua lhee ploh droe
Ili jinoe u kuala

Ban deumi troh bineh laot
Leumah eungkot bube raya
Teudu u darat teusareueng meugule
Nahuda male jipeunyata

Ban sare troh keunan hampe
Nahuda eu le eungkot raya
Bube gunong eungkot teugageueng
Geulumbang tinteueng bakat timpa

Rakyat kalon hireuen bimbang
Hayut jipandang inong beurala
Abeh teukeujot dumna ureueng
Nyang ladam plueng nyan jibungka

Nahuda male peurab laju
Leumah treuk hu eungkot raya
Miseue beuneung raja timoh
Hu seumeuloh trang cuaca

Pruet meutoto cahya soseue
Sang meu' eue-meu' eue meunan rupa
Nahuda pike teuma lheueh nyan
Eungkot jipandang that meucahya

Peue jeuneh na eungkot lam pruet
Peue saleh ji'euet eungkot raya
Nahuda tahe hireuen laloe
Jikalon proe eungkot raya

Teuma jipeurab keunan jipeutoe
Parang bak jaroe na sideupa
Teuma jiplah pruet ikan dindin
Eungkot nyan meujen raja beurala

Jitak di pruet deungon parang
Leumah trang-bandrang hu meucahya
Sare meuhure abeh teusuet
Jikoh le pruet sigra-sigra

Teuma jiteutah deungon parang
Budak jipandang indah rupa
Teuma jicok rijang-rijang
Laju jijulang u istana

Jiwoe laju leugat u rumoh
Sare meh-moh hana tara
Peurumohjih eu rupa jroh that
Akai dahsyat hana tara

Nahuda bimbang ate mangat
Ka na aneuk cut indah rupa
Peurumoh nahuda le thah lagee
Jiyue cok kayee yoh nyan sigra

Ladom cok ie ngon meusuci
Jroh that taki tuan nahuda
Jikheun peurumoh ka na manyak
Ate galak hana tara

Peurumoh nahuda teuma madeueng
Teuka ureueng hana reuda
Jime beureuteh ngon breueh pade
Nahuda male aneuk ka na

Aneukpi jroh that ureueng binoe
Lam nanggroe nyoe tan umpama
Rupa bayek that peungaroe
Tamse pudoe ngon meutia

Soe nyang pandang hireuen laloe
Han jitem troe aneuk mata
Peurumoh nahuda madeueng leugat
Kayee le thah jijak mita

Ureueng binoe asoe nanggroe
Geunap uroe keunan teuka
Jijak kalon ureueng madeueng
Beureuteh pisang keunan geuba

Soe-soe nyang jak nyum bek jiwoe
Hireuen laloe pandang mata
Manyak geupeueh dalam ayon
Geuboh panton lagee doda

Lawet lawan dudoe nibak nyan
Budak cut nyan lon calitra
'Oh lheueh madeueng majih sidroe
Putroe Sunoe maken raya

Siuroe laen simalam laen
Maken canden indah rupa
'Oh jimeututo tilo alang
Nahuda bimbang kalon rupa

Khem meukhak-khak ladat neupandang
Nahuda bimbang ate that suka
Tiwah intan deungon pudoe
Jroh hana soe aneuk nahuda

Soe nyang kalon hireuen laloe
Han jitem troe aneuk mata
Lawet lawan thonpi sampoe
Jroh that putroe nibak nyang ka

Leubeh indah nibak dilee
Siploh sukee jiek ganda
Lam donya nyoe han soe teuntang
Badan jeunjang sang geuteumpa

Umu peuet thon teuma dudoe
Nahuda jinoe meukeukira
Geumeung peukawen tan tunangan
Nyan sipadan putroe muda

Yoh nyan meugah jeuep sigala be
Nahuda male aneuk ka na
Ureueng binoe rupa indah
Mit soe teu'ah ateueh donya

Nan geuseubot Putroe Sunoe
Jroh han bagoe ngon tapeusa
Jeuep-jeuep nanggroeh troh meusyeuhu
Barat timu dum geupuja

Teuka ureueng jak teulangke
Peutang pagi hana reuda
Aneuk peutua uleebalang
Keu putroe nyan napsu hawa

Putroe Sunoe han tom neumarit
Droe mantong cut teungoh dara
Haba kawen hana meuteuoh
Han sipatah neumeuhaba

Bak siuroe nahuda marit
Nusasat bit haba rahsia
Wahe aneuk putroe sambinoe
Tajak keunoe bijeh mata

Napeue lon peugah aneuk boh ate
Putroe jak le sigra-sigra
Ban troh putroe duek lam leumueng
Nahuda tanyong yoh nyan sigra

He aneuk teungku boh ate nang
Na peue lon tuan tanyong bak gata
Putroe seuot narit ayah
Cuba peugah peuebu haba

Gata aneuk cit siurat
Raya hajat kamoe dua
Keumeung peukawen gata sidroe
Hajat kamoe dua ngon bunda

Putroe seuot isya Allah
Tango lon peugah du bak gata
Jido lon ka na masa dilee
Tango lagee lon calitra

Masa saboh roe yoh di nanggroe
Ayah lon sidroe raja raya
Nanggroe ulon nyan di Makah
Teukeudi Allah teuka bala

Ka lheueh kawen lon di nanggroe
Tango lon kheun proe ubak gata
Judo lon he du Bangta Sulotan
Aduen tuan Baren Miga

Aneuk Raja Baren Nasi
Nyan suami judo hamba
'Oh lheueh kawen teukedi Allah
Ulon gadoh u laot raya

Umu lhee buleuen dalam laot
Angen bapot bakat timpa
Po tallah bri meunan untong
Troh lam gunong rimba raya

Geureuda bapo lon dalam gle
Tuhan Kade nyang peulara
Trep that laman dalam gunong
Umu tujoh thon meuraba-raba

Ek gunong nyoe tren gunong jeh
Preh-preh abeh arong rimba
Teukeudi Allah siploh thon sampoe
Troh bak nanggroe kaphe beudeuga

Raja Peuranggi bak nanggroe nyan
Trep lon tuan padum lama
Teuma jipoh lon le kaphe
Jikoh lihe takue hamba

'Oh lheueh jipoh jitiék u krueng
Buya baplueng u laot raya
Teuma jijok lon bak eungkot
Jeuep-jeuep laot abeh jiba

Lawet lawan dudoe nibak nyan
Nyoho tuan lom bak gata
Nahuda deungo haba putroe
Reubah teupipoe pangsang raya

Weueh that ate bukon bubarang
Weueh jipandang putroe muda
Nahuda moe yoh masa nyan
Rasa hilang nyawong lam dada

Jicok putroe jocom jipangkee
Boh bak ulee ateueh jeumala
Wahe aneuk boh ate nang
Bukon sayang bijeh mata

Leubeh gaseh that keu putroe
Geunap uroe ateueh jeumala
Lam jipangkee jibuboe-buboe
Hana bagoe that mulia

La ilaha illallah
Kaya limpa Po Nyang Esa
Ban nyang Neubri tan soe bantah
Buet di Allah bek syok sangka

Subhanallah 'amma yasifun
Nahuda hireuen ladat mata
Putroe jitimang lam jipangkee
Com bak ulee hana reuda

Tamse buleuen rupa indah
Na nyum lam babah intan keulua
Nahuda bimbang rindu deundam
Uroe malam ate suka

Lawet lawan thonpi sampoe
Putroe Sunoe maken raya
Ka troh umu geunap peuet blah thon
Putroe ban tanglong indah rupa

Baleh sampoe troh rupa jroh that
Han jan siat putroe ka raya
Nibak tuboh peukayan jipakoe
Di ateuh dhoe bintang raja

Badan jeunjang jroh hana ban
Dada keumang ban kipah Cina
Di ulee kon troh u gaki
Siulah ri sang geuteumpa

Na tamse ban budiadari
Tuan Siti indah that rupa
Hingga meusyeuhu sigala nanggroe
Jroh putroe nyoe aneuk raja

Troh u Makah nyan meusyeuhu
Barat timu sigala donya
Teuma marit nahuda sipatah
Ka neupeugah bak aneukda

Gata aneuk nanggroe Makah
Cuba peugah bijeh mata
Nyoe na ureueng teuka keunoe
Ubak kamoe he aneukda

MILIK KEPUSTAKAAN
DIREKTORAT TRADISI
DITJEN NBSF DEPEUDPAR

Ureueng binoe plueng di Makah
Nan jipeugah jicalitra
Putroe tanyong nibak ayah
Ureueng neupeugah pakri rupa

Toh cuba eu pakri bangon
Khuluk lakuan nyan ngon rupa
Nahuda hei pantah rijang
Jitren yoh nyan pantah sigra

Sare jidong di hadapan
Putroe pandang dum peukara
Teuma neusidek neutanyong-tanyong
Patbu gampong dilee gata

Jatara seuot nyan jipeugah
Lon di Makah dilee mula
Lon nyoe namiet Putroe Sunoe
Lon plueng keunoe teumeureuka

Geukeumeung poh lon saboh roe
Le ma Putroe Sunoe muda
Sinan lon plueng leugat lon weh
Nyankeu jadeh teumeureuka

Teukeudi Allah troh nanggroe nyoe
Jameun uroe sinoe hamba
Bak kira-kira leubeh siploh thon
Nyang troh ulon bak nahuda

Putroe Sunoe teuma kheun proe
Neupeugah droe nibak Jatara
Na taturi ulonteu nyoe
Putroe Sunoe geuboh nama

Ban jideungo haba putroe
Jatara jimoe hana ngon sa
Sireuta jiseumbah paleuet gaki
Jitundok le jap keupala

Ampon meuah po cut boh ate
Hana lon turi po cut raja
Jameun keureumeun nyoho teurjali
Po cut boh ate keumala cahya

Putroe seuot han peue salah
Ampon bak Allah sibarang deesya
Jatara mangat ate bimbang
Putroe jijulang rok-rok masa

Teutapkeu putroe bak nanggroe nyan
Umu peuet thon bak calitra
Putroe meusyeuhu rupa indah
Troh u Makah bumoe mulia

Sigala nanggroe barat timu
That meusyeuhu putroe muda
La ilaha illallah
Sahib kisah po calitra

Kata dalang eumpunya rawi
Tadeungo he lam katanya
'Ajayeb subhanallah
Raja Makah lon calitra

Bangta Sulotan keurajeuen di Makah
Raja khalifah di ateueh donya
Ade sangat raja saleh
Hukom sareh han meuriba

Amma bakdu teuma dudoe
Lon kisah jinoe raja muda
Seulawet gadoh putroe sunoe
Cit lam neumoe ro ie mata

Bak siuroe Raja Makah
Neuduek bak ka'bah sangat duka
Ingat keu untong teuoh keu nasib
Moe meurep-rep raja muda

Raja Abdullah duek rab sajan
Bangta Sulotan peugah haba
Calitra nabi dum neupeugah
Hingga meuteuoh raja raja

Rakyat peunoh yup meuligoe
Raja sidroe peugah haba
Keu putroe-putroe dum nyang indah
Abek neupeugah neucalitra

Raja Abdullah nyang peusabet
Laen rakyat duek meulingka
Haba Bungsu aneuk jen Pari
Abeh neuturi asai mula

Teukeudi Allah lheueh nyan dudoe
Troh bak Putroe Sunoe muda
'Oh ban meuteuoh Bangsa ka neumoe
Ri geumanoe ro ie mata

Teuingat keu judo Putroe Sunoe
Jeh 'oh uroe han meuho ka
Euntah udep saleh mate
Siploh thon ka cre han neueu rupa

Teukeudi Allah peurintah Hadarat
Teuka Sahbat ureueng muda
Teudong di leuen peurakna seumbah
Jaroe dua blah ateueh jeumala

Ampon tuanku syahi alam
Seumbah laman po meukuta
Tuanku ampon laman meukatoe
Na bak kamoe saboh haba

Haba 'ajab tango lon kheun proe
Na saboh putroe indah that rupa
Putroe geuteumeung lam pruet ikan
Po junjongan bayek that rupa

Mit na bandeng jeuep-jeuep nanggroe
Nyang na putroe aneuk raja
Nahuda male cok putroe nyan
Lam pruet ikan eungkot raya

Masa geucok nyan mantong manyak
Jinoe rayek ka samporeuna
Ka troh umu jinoe ka baleh
Akai leubeh di ateueh donya

Nanggroe Isfahan sinan putroe
Lon deungo proe gop peuhaba
Putroe karam dalam laot
Ji'eut le eungkot nyang that raya

Abeh jipeugah asai-usui
Raja teukui deungo haba
'Oh lheueh abeh nyan jipeugah
Raja Makah tanyong sigra

Patbu nanggroe soe nyang peugah
Mangat kisah tacalitra
Tuanku ampon meukuta nanggroe
Gop hareutoe ubak hamba

Ban neudeungo haba geupeugah
Raja Makah meukeukira
Lawet lawan dudoe nibak nyan
Bangta Sulotan teuma neubungka

Neujak kalon putroe geupeugah
Rupa indah sang meutia
Limong boh kapai neuba sajan
Dum ngon rakan balantantra

Teuma raja neumeulayeue
Angenpi kheue reumbang pasa
Umu sibuleuen peulayaran
Troh kapai nyan ateueh kuala

Bah teuduek nyan dilee sikeujap
Jinoe riwayat meugisa punca
Jinoe lon kisah Putroe Sunoe
Neumarit jinoe ngon nahuda

Droe cit ka ngon peurintah Rabbi
Tuan Siti that troh mata
Lahe keuramat bintang Zahrah
Wakliyullah putroe muda

Putroe marit deungon ayah
Raja Makah nyan ka teuka
Judo ulon Bangta Sulotan
Keunoe tuan nyan geuteuka

Limong boh kapai neuba sajan
Dum ngon rakan balatantra
Nahuda deungo haba putroe
Hireuen laloe sikutika

Teuma jawueub nahuda sipatah
Sabet bit sah ban kheun gata
Sabet hai du ban lon peugah
Insya Allah rab troh tuka

Kada lhee uroe treuk goh lom troh
Teungoh geuroh laot raya
Pakri tathee soebu peugah
Raja Makah takheun teuka
Allah Tuhan Poku Rabbi

Eleuemee neubri nyan keu hamba
Nahuda pike na sikeujap
Saleh keuramat nyang jeuet troh mata

'Oh lھےuh putroe marit ngon ayah
Raja Makah seun rot teuka
Teudong di lhok kapai geusaoh
Beude gecoh meugeumpita

Su meuriam meualon-alon
Nahuda tren jak peunyata
Ureueng lam kapai teungoh u darat
Jida'yong leugat u kuala

'Oh sare troh teungo u darat
Nahuda maret sigra-sigra
Wahe tuan tango kamoe
Pane kapai nyoe tapeuhaba

Siri nanggroe nyan tapeugah
Cuba takisah tapeunyata
Teuma jiseuot haba sipatah
Tango lon peugah bumoe mulia

Po di kamoe Bangta Sulotan
Neujak meu'en kalon desa
Nahuda deungo haba meunan
Jiwoe yoh nyan pantah sigra

Ban sare troh u meuligoe
Jihe Putroe Sunoe muda
Wahe aneuk boh ate nang
Sabet reumbang ban kheun gata

Bak meutuah aneuk bangsawan
Muda budiman putroe jroh rupa
Teuka judo Raja Makah
Beumeutuah bijeh mata

Bit troh mata aneukku putroe
Ban jihareutoe han meutuka
Nahuda mayoh ate dukhoe
Aneukku nyoe gaseh Rabbana

Lheueh nyan nahuda jimeuase
Jiyue pangge dum peutua
Geume peuseumbah dum boh kayee
Pisang teubee ngon boh u muda

Jeuneh keuruma anggo ngon jabet
Nyan jiintat keu nahuda
Boh timoh bruek ngon timon phang
Laen sibirang dumpeuepi na

Sare cukop dum seuleusoe
Neuteubiet jinoe tuan nahuda
Debeueh geuangkot dum lam sampan
Geupeudieng tuan dalam bahtra

Dua peuraho lancang pukat
Peunoh alat dum anika
Nahuda male di likot nyan
Rakyat sikalian dum simua

Geujak meuteumeung ngon Raja Makah
Geume peuseumbah han teukira
Ban sare troh peuraho keunan
Beudoh yoh nyan tuan nahuda

Geuek lam kapai rakyat sajan
Geudeelat tuan raja muda
Sare abeh dum meumat jaroe
Geuduek jinoe dalam bahtra

Sira ploh poh beurakah
Geujok peuseumbah bansineuna
U geuculek geusek ngon teubee
Laen boh kayee han teukira

Lheueh geupajoh dum makanan
Geubet puan nyang meucintra
Ranup geupasoe peunoh sare
Nahuda jok le keu raja muda

Raja pajoh ranup sigapu
Sira meututo peugah haba
Meutanyong-tanyong dum seuleusoe
Raja meuproe ngon nahuda

Pane-pane keulakuan
Kamoe tuan kalon desa
Nahuda deungo raja peugah
Hireuen dahsyah hana tara

Ban putroe kheun hana ubah
Sabe kisah ngon raja muda
Teuma nahuda neubet jaroe
Ampon kamoe po meukuta

•
Teuanku tamong u gampong jinoe
Ubak kamo hamba saya
Kru seumangat insya Allah
Bah singoh-ngoh, tuan nahuda

Nyang langkah lon cit ubak droe
Bahle dudoe singoh lusa
han jeuet tuanku jinoe le sajan
Po junjongan tamong sigra

Insya Allah udeh kaman
Beudoh yoh nyang raja mudah
Sireuta sajan dumna rakyat
Teungoh u darat bansineuna

Ban sare troh tamong leugat
Raja beurangkat bak nahuda
Troh le raja u leuen meuligoe
Jaumingeuk Putroe Sinoe muda

Neupeuhah tingkap neungieng u leuen
Leumah meubayeuen raja muda
Rupa samlakoe that analan
Putroe bangsawan ate suka

Putroe Sunoe marit yoh nyan
Neupeugah ban ubak cutma
Nyankeu judo lon di nanggroe
Ka teuka keunoe wahe bunda

Putroe Sunoe mayoh bimbang
Kon bubarang suka rasa
Ban neukalon di leuen teudong
Hireuen teuceungong dua ngon cutma

Lheueh nyan raja geume u leupu
Teupat meusaho jamee teuka
Tika geuleueng kasang-kasot
Manyang 'oh teuot teubai 'oh pha

Dilee phon guleueng tika iboh
Panyang siseun troh ngon top guha
Di ateueh nyan tika awe
Geucok nyang sabe han cut raya

Di ateueh nyang peureumadani
Bineh keurusi banpeuet punca
Di ateueh nyan geuleueng keumasan
Di ateueh nyan meusrudiwangga

Na 'oh teuot tika manyang
Geuleueng hampara tika peureuda
Reubeueng tika dum geukarang
Rika awan tamse miga

Soe nyang kalon mayoh bimbang
'Oh tapandang mata suka
Geuleueng leulanget intan meutabu
Ban bintang hu di antara

Tiree leulanget hu ceumeureulang
Intan meukarang ban siseun lingka
Subhanallah that sukaan
Soe nyang pandang jieu rupa

Lalee bimbang mata han troe
Tamse bagoe sang syeuruga
Raja geupeuek laju keunan
Geupeuduek yoh nyan sigra-sigra

Rakyat nyang laen di seuramoe
Raja sidroe ateueh tahta
Peuet droe ureueng sajan sulotan
Raja budiman meubahgia

Na sikeujap neuduek sinan
Tahe junjongan raja muda
Mayoh deundam ate rindu
Hawa napsu pandang mata

Intan meuhambo cahya limpah hu
Ban bintang timu kutika faja
Raja seubot subhanallah
Sabab indah neu eu rupa

Mata hireuen 'ajab bimbang
Raja pandang ladat mata
Teuma geubet ranup lam puan
Ceureumen intan meupeurmata

Peunoh geupasoe ranup meusak
Bee meuhayak hana tara
Sare meudre-dre bee meukeumang
Bee bungong lawang ngon boh pala

Geuboh jeumuju mangat han ban
Geuboh sajan lidan jeumpa
Raja pajoh ranup sigapu
Napsu rindu mangat rasa

La ilaha illallah
Sahib kisah nyang calitra
Amma bakdu teuma dudoe
Putroe Sunoe lon peuhaba

Putroe geupeungui alat peukayan
Sileungkapan bajee ija
Silueue meujingki meuh sinaroe
Peukayan Putroe Sunoe muda

Bajee bak badan kasab meurok
Ija seulipok peulimbang Cina
Ikai peurmata sok bak sapai
Hireuen akai soe eu rupa

Neusok subang bak geulunyueng
Cahya intan plueng tamse uroe kha
Euncien neusok bak aneuk jaroe
Indah han soe ngon tapeusa

Sok bak gitek ikat silan
Teulunyok tuan unggah deureuma
Di teungoh nyan rakam tujoh
Hu seumeuloh trang cuaca

Bak inong jaroe euncien utah
Rupa indah hana ngon sa
Jaroe dua blah han jeuet kuwien
Peunoh euncien nyang meugenta

Teuma neungui ganceng simplah
Meuh geutatah ngon peurmata
Peundeng bak keuieng gleueng bak jaroe
Tamse putroe aneuk syeuruga

Nibak gaki geuboh keuruncong
Su meukrang-krang hana tara
Geusanggoi ok meugeunggaloe
Patam di dhoe hana ngon sa

Sare leungkap dum peukayan
Na tamse ban asoe syeuruga
Teuma geupasoe ranup lam puan
Geuboh sajan ngon gapu laga

Lheueh nyan putroe geuba u leupu
Sapa judo raja muda
Teuma marit po ma sipatah
Aneuk meutuah pakri tasapa

Meunoe takheun saleuem tabri
Tango po Ti Lon peuhaba
Wahe po ma tango kamoe
Han peue peurunoe aneuk gata

Han peue peurunoe ma teungku droe
Cit utoh droe jeuet kusapa
Jak he putroe rupa sambinoe
Sapa judo droe raja muda

Putroe Sunoe neuk laju
Troh bak pinto singgasana
Ban sare troh ka meuteumeung
Neusapa rijang raja muda

Neumeubri saleuem jroh that meufom
Assalamu 'alaikum bak phon neumula
Na neuteuka tuanku droe
Ubak adoe ureueng nyang hina

Meuek meutren neubet jaroe
Tuan putroe utoh seumapa
'Alaikum salam tuan putroe
Nakeu kamoe jak bak gata

Bukon canden Putroe Sunoe
Teukap jaroe raja muda
Bangta Sulotan hireuen lälöe
Neukalon putroe jroh that rupa

Suara haloh tamse bangsi
Ladat beureuhi ate suka
'Oh lheueh saleuem putroe tajo
Seumbah judo raja muda

Com di teuot seumbah di kaki
Yoh nyan ile ngon ie mata
Putroe Sunoe peubeudoh ulee
Moe meuree-ree limpah dada

Teuma marit tuan putroe
Ampon kamoe po meukuta
Putroe laju seumbah judo
Ie mata ro basah ija

Jaroe neupeuduek ubak teuot
Sira neuseubot meuah deesya
Ampon tuanku po junjongan
Seumbah laman doli baginda

Na neuturi ulonteu nyoe
Lonkeu Putroe Sunoe muda
Ban raja ngo narit meunan
Neumoe yoh nyan ro ie mata

Ateneu weueh that keu putroe
Jameun uroe cre di mata
Raja neumoe hana padan
Reubah pangsang teungeut indra

Ban putroe eu raja pangsang
Neubeudoh tuan sigra-sigra
Neucok ie mawo dalam seurahi
Teuma neuboh le ateueh raja

Ban jap ie nyan putroe urot
Teuma teukeujot raja muda
Neubeudoh neuduek tahe gante
Ie mata ro hana reuda

Putroe neucom nibak talak
Lheueh nyan neugusuek jeuep anggeeta
Raja neumoe hana lawan
Reubah pangsang lom teurhanta

Na sikeujap reubah meugule
Weueh that ate raja muda
'Oh sare puleh nibak pangsang
Marit yoh nyan poteu raja

Neuteumanyong ubak putroe
Peugah bak kamoe judo muda
Teuma seuot tuan putroe
Tango kamoe po meukuta

Langkah raseuki peutumeun mawot
Hankeu na jeuet taboh hingga
Lon tuanku asai silsilah
Bah lon peugah bak meukuta

Tuanku deungo ulon kisah
Jinoe lon peugah dum peukara
Masa phon-phon karam lam laot
Angen bapot bakat timpa

Trep nyang meunan tuanku droe
Sigala nanggroe meuraba-raba
Umu nam buleuen dalam laot
Lon preh mawot ajai teuka

Dudoe nibak nyan geureuda bapo
Jeuep-jeuep ranto dalam rimba
Gunong jeuoh that cureh han ban
Gunong nyan tuan manyang raya

That meulip-lip sikham lam awan
Gunong Saleuban geuboh nama
Trep Padum thon jak lam gunong
Panteng-panteueng meuraba-raba

Teukeudi Allah teuma dudoe
Meuteumeung nanggroe di teungoh rimba
Ureueng nanggroe nyan cut-cut that badan
Peuneujeuet Tuhan laen rupa

Sijeungkai-jeungkai panyang badan
Hireuen tuan lon eu rupa
Lheueh lon eu nyan lon jak leugot
Seun rot lon lihat sungoe raya

Teuma lon bloh dalam krueng nyan
Hanyot tuan ok bube pha
Teuma lheueh nyan lon jak u pucok
Ureueng po ok lon meung eu rupa

Laju lon mudek seutot krueng nyan
Leumah lon pandang lampoh raya
Peunoh jipasoe dum tanaman
Jeuneh timon han teukira

Teuma lon tamong dalam lampoh nyan

Lon eu timon raya-raya

Teuma lon kurek lon pajoh asoe

Maneh han seo miseue gula

Teuma lon lop lam timon bruek

Sinan lon duek meuseunia

Dua lhee uroe lon duek sinan

Teuku le keunan ureueng raya

Dua droejih aneuk deungon nang

Badan panyang hana tara

Sireutoh hah na nyum badan

Panyang tuan toe anatar

Lon tuanku yoh lon eu nyan

Kuyut badan yo sang geumpa

Adat na reuhung lam tanoh crah

Na nyum beulupah siklep mata

Nyum-nyum han le troh u nanggroe

Ajai sampoe dalam rimba

Lheueh nyan jicok lon jipeuwoe

Teuma jipasoe lam kanot teumaga

Jiboh ngon umpeuen bu raya that

Jitiek meuhad ateueh keupala

Teukeujot lon keunong asoe

Lon plueng bak sagoe kanot raya

Dua lhee uroe lon di sinan

Jicok yoh nyan jime u lua

Lon jimat-mat krot-kreuet asoe

Aneuk jaroe raya raya

Lon ka leumoh asoe ngon badan

Bak jireugam le aneuk dara

Teungoh jibalek lon grop rijang

Nyum ka hilang nyawong lam dada

Rumoh manyang hana bagoe
Hayut asoe hana tara
Ate sangat hayut han ban
Manyang rumoh nyan toe antara

'Oh sret u yup jap bak tanoh
Lon plueng meh-moh hana tara
Teungoh lon plueng lon lumpat-lumpat
Leumah lon lihat manok raya

Manok jantan agam meureugoh
Badan pupoh hana tara
Lameng di ulee panyang tujuh hah
Paroh babah na peuet deupa

Suara jikukuek geulunyueng tuloe
Sang lagee proe sangkaikala
Lheueh nyan lon plueng pantah rijang
Hayut lon pandang manok raya

Lon cre sinan lon jak leugat
Lon peuteupat dalam rimba
Allah Tuhanku han ek lon peugah
Let tah kisah panyang calitra

Hingga troh lon nanggroe Peuranggi
Ubak kaphe asoe nuraka
Sinan meurumpok bala meuguncang
Jeuet deungon prang kaphe ceulaka

Abek mate kaphe ulon poh
Lonpi jiboh dalam kualah
Jikoh takue le Raja Peuranggi
Jikira ka mate raja ceulaka

Troh dalam krueng jitiek meuleubak
Lonpi jicok uleh buya
Jime leupah troh u laot
Meurumpok eungkot raja beurala

Hingga nyoho Po tallah bri
Tuhan Ghani nyang peulara
Le that bala subhanallah
Han ek lon peugah po meukuta

Mayoh meusyen geunap uroe
Tuanku sidroe nyum-nyum di mata
Po tallah bri lom meuteumeung
Meuthon-thon buleuen dalam beurcinta

Putroe Sunoe sira neukheun nyan
Han meuban-ban ro ie mata
Bangta Sulotanpi neumoe yoh nyan
Weueh neupandang putroe muda

Rupa seumeuloh miseue bintang
Soe nyang pandang napsu teuka
Lawet lawan teuma dudoe
Raja yue woe rakyat dumna

Jakleh tawoe nyan u Makah
Lon tapeugah bak nahuda
Tinggai siat hana lon woe
Lon duek sinoe sajan cutma

'Oh lheueh neukheun meunan hareutoe
Rakyat jiwoe bansineuna
Han meusidroe tinggai sinan
Jiwoe tuan dum simua

Ban sare troh dum u Makah
Teuma jipeugah ubak raja
Putroe Baren Raja Abdullah
Keurajeuen di Makah bumoe mulia

Teuma jipeugah dum sinaroe
Ka na Putroe Sunoe muda
Po cut kamoe tinggai sideh
Kamoe abeh neuyue gisa

Kamoe neuyue woe keunoe u Makah
Peuneuet seumbah keu po meukuta
Peuneuet seumbah saleuem takdem
Keu junjongan bek that duka

Droeneu tinggai di Isfahan
Neubri keurajeuen uleh nahuda
Ban raja ngo dua ngon putroe
Suka han soe ate lam dada

Mangatkeu ate Raja Abdullah
Peungeuh limpah han le duka
Putroe Baren muda bangsawan
Gaseh Tuhan asoe syeuruga

'Oh neudeungo haba meunan
Putroe yoh nyan galak suka
Teuduek siat haba ureueng woe
Putroe Sunoe lon calitra

Putroe Sunoe mangat ate
Peutang pagi mayoh suka
Teuma nahuda pulang nanggroe
Muda samlakoe tueng pusaka

Bangta Sulotan mat khalifah
Keurajeuen meugah sigala donya
Rakyat gaseh timu barat
Raja jideelat jeuep-jeuep kutika

Lam jipujoe uleh rakyat
Rupa jroh that raja muda
Soe nyang gaseh napsu bimbang
Enseueh sayang dalam dada

Umu dua thon Bangta sinan
Nanggroe pi aman hana tara
Judi madat ngon pancuri
Han sapat le sigala donya

Jroh that nanggroe hana lawan
Bangta Sulotan peukong agama
Tajoe sabong han sapat le
Nanggroe suci hana tara

Dumna rakyat abeh seumbahyang
Inong agam tuha muda
Nanggroe rame banda jroh that
Hana sapat na umpama

Makanan mudah hana lawan
Bangta Sulotan meubahgia
Blangpi luah padepi doe
Rakyat pi troe bansineuna

Sithon dua seun jeuet geumeugoe
Pade lam nanggroe mudah raya
Silawet troh raja keunan
Murah makanan sigala donya

Blang geumeugoe meuteuraktak
Ladom masak ladom dara
Ladom pade teungoh geutabu
Ladom sare hu mirah rata

Lheueh geukoh nyan mu'ue laen
Meunan kayem rok-rok masa
Ujeuenpi le khuengpi jareueng
Bak sibuleuen peuet uroe saja

Nyankeu dum khueng dalam nanggroe
Meutuah Putroe Sunoe muda
Lom meutuah muda samlakoe
Jroh that nanggroe hana tara

Miseue layeue keurajeuen Yusuf
Nyang that makruh dum ulama
Nanggroe Meuse teupat keurajeuen
Mua! makanan sigala donya

Nyoepe meunan cit teuladan
Karonya Tuhan Po Rabbana
Teutap raja bak nanggroë nyan
Umu limong thon bak calitra

Amma bakdu laen kisah
Raja Abdullah teuseubot pula
Raja Abdullah jinöe lon peugah
Keumeung meulangkah saweue aneukda

Sajan neuba Putroe Baren
That bit meusyen droe nyan dua
Neubungka u Rom Raja Abdullah
Rakyat barollah sajan sireuta

Raja bungka rot meudarat
Geupeudieng brat sireutoh unta
Umu lhee buleuen bungka di Makah
Troh peurintah bak aneukda

Ujong nanggroë Rom toe ngon Meuse
Pucok krueng Ne meuseunia
Neucré sinan na sijameung
Leumah neukalon saboh blang raya

Luah blang nyan that mahayak
Peuet buleuen jak pasang guda
Teuma raja bungka leugat
Ireng rakyat han teukira

Dua buleuen jak dalam blang nyan
Leumah neupandang nanggroë raja
Jeuoh mantong hana lom toe
Daerah nanggroë leumah tanda

Raja Abdullah Putroe Baren
Rakyat laen bungka lanja
Teukeudi Allah peurintah Tuhan
Troh nanggroë nyan poteu raja

Teuma raja ka neupioh
Kimah geuboh bandum rata
Geudeuk lam blang toe ngon gampong
Neuapet jurong raja muda

Deuh meupayong leumah geupandang
Di teungoh blang mahajana
Na sikeujap neuduek sinan
Teuka yoh nyan ureueng bak raja

Geuteubiet u blang geujak laju
Leumah meujambo lam blang raya
Teuma jiriwang u likot pantah
Jijak peuseumbah ubak raja

Jitamong u dalam nyan teudap-dap
Raja jideelat yoh nyan sigra
Jidong di yup peurakna seumbah
Junjong khalifah raja muda

Ampon tuanku doli hadarat
Rakyat le thah keunoe teuka
Sideh di blang dum geupioh
Kimah geuboh bandum rata

Sabda raja bak ureueng nyan
Jakleh tuan tapeunyata
Nak taturi ureueng di blang
Cuba kheun ban lon ngo nyata

Wallahu a'lam hana lon tusoe
Ureueng sinaroe lam blang raya
Teuma neumarit raja dipatah
Cuba peudeuh jinoe sigra

Ho ka waki tandi bujang
Hei beurijang keunoe sigra
Bujangpi troh dum ka keunan
Sigra junjongan neumeusabda

Wahe waki tandi bujang
Tajak u blang jinoe sigra
Meugah ureueng teuka keunoe
Siri nanggroe tapareksa

Jak takalon pantah-pantah
Taeu beudeuh tapeunya
Bujang seuot sabda hadarat
Teubiet leugat u blang raya

Ban sare troh ubak kimah
Jitanyong toh nyang peutua
Ureueng lam kimah seuot rijang
Ubak bujang jipeuhaba

Po di kamoe Raja Abdullah
Nanggroe Makah peugang neuraca
Keurajeuen limpah karonya Allah
Raja meutuah eelia raya

Jeh nyang rame di yup payong
Rakyat sigala don ngadap raja
Teuma jipeurab bujang keunan
Ngadap junjongan raja eelia

Deelat tuanku doli khalifah
Ampon meuah po meukuta
Ampon bak Allah ngon bak Nabi
Jaweueb neubri keu ureueng teuka

Bak Allah ngon Nabi neupulang seumbah
Raja meutuah gaseh Rabbana
'Oh sare, lheueh nyan jideelat
Seumbah hadarat raja raya

Com di teuot seumbah di gaki
Hana sakri jipeumulia
Teuma meuteumeung ngon Putroe Baren
Teuma ngon laen rakyat dumna

Lheueh nyan marit tuan bujang
Lon surohan bak meukuta
Suroh raja nyang di dalam
Bak junjongan neuyue peuteuka

Pane tuanku 'oh na langkah
Tuanku peugah ubak hamba
Teuma seuot Raja Abdullah
Nanggroe Makah bumoe mulia

Sinan daerah nanggroe kamoe
Bak nanggroe nyoe jinoe meuteuka
Ban bujang deungo sabda meunan
Maklum yoh nyan dalam dada

Jithee ayah raja di dalam
Ayah sulotan raja muda
Teuma bujang lakee idin
Woe u dalam ubak raja

Ban sare troh tamong leugat
Teuma jideelat raja muda
Jidong di yup peurakna seumbah
Jaroe dua blah ateueh jeumala

Tuanku ampon doli khalifah
Ampon meuah po meukuta
Ampon tuanku doli khalifah
Tuanku ayah nyan ka teuka

Ban raja deungo teuka ayah
Neubeudoh pantah sigra-sigra
Ate mangat mayoh deundam
Uroe malam neumeucinta

Raja neukrah dumna rakyat
Neuyue meusapat dumna peutua
Po tallah bri ase le rijang
Uleebalang meuntroe panglima

Geume peuseumbah bandum nanggroe
Bungong jaroe nyankeu raja
Teubee u muda pisang ngon timon
Dum meutamon han teukira

'Oh lheueh ase sileungkapan
Beurangkat junjongan raja muda
Neuba rakyat bandum nanggroe
Troh meukatoe na peuet laksa

Beude ngon canang yup napiri
Laen keucapi ngon sangkaikala
Raja neugiduek gajah puteh
Areuta nideh nibak po ja

Neuduek di yup payong meuceuradi
Han soe tukri indah rupa
Raja geuarak teubiet u blang
Gong ngon canang that guranta

Seurune bangsi dangdimuri
Lila kaucaji ngon nukara
Suara beude ngon su geungrang
Bukon bubarang that geulura

Ladom tangkeh peumeu 'en peudeueng
Ladom ureueng peumeu 'en ganja
Subhanallah wabihamdihi
Han soe tukri ngon suara

Ladom ta-ti ladom 'a—'i
Suleng bangsi hareudammama
Sare ka toe rab meuteumeung
Beude meuampeueng seun silaksa

Bandua pihak meunan sabe
Sura beude that guranta
Sare meuteumeung bandua pihak
Gendrang meuarak mayoh suara

Raja Abdullah teubiet lam kimah
Rakyat barollah sajan sireuta
Geudong meureuntang dum meujundrong
Geundrang ngon gong that meutaga

Raja muda tren cong gajah
Neujak seumbah ayahneu raja
Rakyat sare teudong meureuntang
Dum sikalian bagoe ie raya

Raja muda di nanggroë Rom
Meuteumeung com deungon ayahda
Deelat tuanku sialam deelat
Sijuak beureukat po meukuta

Leheueh neudeelat neutajo le
Ubak gaki paduka ayahda
Teuma neuseumbah maneu putroe
Bandum meumoe-moe suka rasa

Putroe Baren mayoh bimbang
Aneuk neupandang peumayen mata
Wahe aneuk muda samlakoe
Jameun lagoe cre di mata

Rindu sangat jantung ate
Jeh lawet cre lon ngon gata
Wahe aneuk muda bangsawan
Meuteumeung pandang lom bijeh mata

Beumeutuah aneukku sidroe
Geunap uroe lon cinta-cinta
Gata lhee droe saban-saban
Aneuk kaban boh ate ma

Jeh 'oh lawet cre di nanggroë
Bak uroe nyoe kieu rupa
Sira neukheun nyan tuan putroe
Ri neumanoe ro ie mata

Weueh keu aneuk rupa jroh that
Cre di teupat jeh 'oh lama
Raja Abdullahpi moe sajan
Weueh neupandang keu aneukda

Rupa jroh that miseue bintang
Soe nyang pandang 'ajab liga
Ureueng lhee droe rupa indah
Aneuk ngon mbah nyan ngon bunda

Banlhee droe nyan saban-saban
Miseue intan ngon meutia
Lheueh com meuwa sinan lam blang
Geupeuwoe u dalam teupat aneukda

Aneuk ngon nang lhee ngon ayah
Di cong gajah ateueh runka
Rakyat ireng subhanallah
Rab toe peunoh padang raya

Teuma geutamong laju u dalam
Raja seumayam ubak tahta
Ban sare troh lam meuligoe
Raja ngon putroe Baren Miga

Abeh meuteumeung asoe meuligoe
Dum sinaroe ate suka
Teutap raja lam meuligoe
Rakyat lam nanggroe lon calitra

Rakyat jitren subhanalah
Intat peuseumbah dum keu raja
Agam inong hana padoe
Siuroe -uroe na silaksa

Ek siribee tren siribee
Jak meuteumee dum ngon raja
Jime meuh' pirak bungong jaroe
Ladom sikatoe ladom sibara

Ri nyang raja uleebalang
Meuteumee yoh nyan bansineuna
Subhanallah meuleuha kudrat
Sabab keuramat raja muda

Meuh jiintat geunap uroe
Bri keu Ptroe Baren Miga
Siuroe sibara ladom sikatoe
Barangian uroe meunan juga

Putroe Baren teutap sinan
Sajan junjongan raja muda
Geunap uroe lam sukaan
Pajoh makanan nyang jatirasa

Raja Abdullah mulia sangat
Umat Muhammad deelat dumna
Troh meusyeuhu sigala nanggroe
Raja ngon Putroe Baren Miga

Rakyat jitren subhanallah
Junjong khalifah raja eelia
Raja Abdullah sinan neudeuk
Sajan aneuk raja muda

Bahkeu dumnann nyan riwayat
Jinoe lon sambat haba nyang ka
La ilaha illallah
Kudrat limpah sigala donya

Kata sahib eumpunya rawi
Tango akhi lam katanya
Tango lon peugah Bangta Sulotan
Nanggroe Isfahan sajan nahuda

Geunap limong thon droe di sinan
Nanggroe pi aman hana tara
Makanan makmu rakyat pi troe
Sigala nanggroe meunan rata

Lawet lawan kata rawi
Raja Peuranggi lon calitra
'Oh lheueh jipoh Putroe Sunoe
Raja pindoe teumeureuka

Abeh dum deuek jeuep sagoe don
Banda duson sigala donya
Makananpi han rakya sosah
Abeh gadoh dum lam rimba

Khueng meuti-ti blang abeh tho
Nanggroe hanco keunong bala
Ujeuen han tom troh khueng meuda-dah
Poteu Allah neubri bala

Sabab jipoh Putroe Sunoe
Papa nanggroe sigala donya
Han tom sigo nyang na ujeuen
Krueng lam uteuen abeh tho mata

Ie han peue jep dum tanoh crah
Kutok Allah keunong bala
Geunap lapan thon khueng meuti-ti
Nanggroe Peuranggi keunong meureuka

Rakyat amte dum sigala don
Tuhan peutren keujih bala
Kayee lam gunong han sibak le
Dum tho sare sigala donya

Oh dum mirah nyang na kayee
Tanoh meuabee safan safa
yoh nyan rakyat bandum meh-moh
Jipajoh tanoh bansineuna

Ladom mate meuleuek-kapeuek
Nyan sabab deuek hilang nyawa
Ladom meuseuk-meuseuk han ek jak le
Meunan sabe bandum rata

Sabab jipoh Putroe Sunoe
Meuwoe keudroejih ceulaka
Putroe Sunoe that meutuah
Eelia Allah gaseh anbia

Allah ngon Nabi that neugaseh
Sabab saleh deungon takwa
Kaphe laknat dum khueng pajoh
Mate bah-boh seumak donya

Teukeudi Allah geunap siploh thon
Abek sigala don dum geuseuba
Raja Peuranggi jiboh nanggroe nyan
Mita makanan sigala donya

Jiba ngon kapai sireutoh ribee
Rakyat meuree-ree abek bungka
Jak mita pade pat na meugah
Rakya barollah sajan jiba

Jime meuneukat sira bloe pade
Peunoh sare kapai nyang na
Meuneukat haloh intan ngon pudoe
Peunoh jipasoe ngon meutia

Teukeudi Allah umu sibulan
Peulayaran lam laot raya
Jeup-jeup nanggroe abek jitamong
Hana meuteumeung pade jimita

Meunan-meunan sangkot-pawot
Dalam laot meuraba-raba
Breueh pade tan dum abek deuek
Abek ngak-ngeuek dalam bahtra

Lawet lawan peurintah Rabbi
Raja Peuranggi bungka lanja
Hingga troh bak nanggroe Isfahan
Meugah makanan breueh pade na

Pade damoh makanan mudah
Nanggroe meutuah hana tara
Bak nanggroe nyan jijak leugat
Kaphe laknat asoe nuraka

Ban sare troh jiteungoh leugat
Le that rakyat na peuet laksa
Lalu jitamong dum u dalam
Ngadap junjongan raja muda

Raja neuduek ateuh batee
Rakyat meuribee wie uneun lingka
Raja Peuranggi peuk seumbah
Deelat khalifah raja muda

Deelat tuanku syahi alam
Di yup kidam haram mulai
Neumeusabda Bangta Sulotan
Pane tuan nanggroe gata

Jipeugah bak Bangta Sulotan
Kamoe tuan aneuk raja
Nanggroe Peuranggi gampong laman
Kamoe junjongan masok agama

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Nyang troh langkah meujak keunoe
Dumna kamoe neupeuhamba
Nanggroe kamoe deuk laparan
Hana makanan sigala donya

Khueng meu'i-i ka siploh thon
Ujeuen han tom sat teuka
Kayee mate on dum luroh
Han peue pajoh mate simua

Kamoe tuanku nyang troh keunoe
Hajat kamoe tamong agama
Agama Islam neupeurunoe
Bandum kamoe po meukuta

Ban raja ngo neusangka bit
Han neuthee sulet bansineuna
Neupeurunoe agama Islam
Kaphe jahannam asoe nuraka

Jiucap syahdat meung bak lahe
Lam ate kaphe tasdek hana
Han jiingat makna syahdat
Kaphe laknat rujee nuraka

Jijak peungeut raja meutuah
Nak meung mudah geubri areuta
'Oh lheueh meuucap dumna kaphe
Neubri pade uleh raja

Dumna jakeuet bulueng muallah
Poteu yue krah sigala donya
Geubri pade troh peuet ploh ribee
Raja seudee sulet raya

Bangta Sulotan hana neuthee
Neueu lagée nyo bit beuna
'Oh lheueh geubri pade u jaroe
Kaphe pindoe ate suka

Raja Peurangi peuk seumbah
Bak khalifah raja muda
Deelat tuanku laman meukatoe
Idin kamoe ili u kual

Kamoe tuanku meupeugot keude
Nak meung rame nanggroe meukuta
Poteu seuot han peue salah
Peugot pantah dumna gata

Ban jideungo din neubri
Ka jili u kual
Teuma jiduek dumna kaphe
Jipeugot keude sigra-sigra

Banda makmu rakya meukatoe
Rame nanggroe raja muda
Meuneukdt haloh jeuneh intan
Nyang keumasan meusrudiwangga

Teukeudi Allah meuleuha kudrat
Leumah ridat Po Nyang Esa
Bak siuroe raja beurangkat
Hana rakyat sidroe saja

Troh u pasi laju neujak
Seun rot meurumpak raja ceulaka
Jihpi sidroe ngonjihpi tan
Meurumpok yoh nyan sabe raja

Meumat jaroe jicom jasad
Mulia that hana tara
Teuma jiba laju u keude
Ubak deune hireuen liga

Bangta Sulotan neudeuk sinan
Jibri makanan jatirasa
'Oh lheueh makeuen makanan nyang jibri
Raja Peuranggi jimeuhaba

Tango kamoe po junjongan
Peurjanjian geutanoe dua
Beusah syeedara neumeuseubot
Donya akhirat po meukuta

Bek ubah-ubah teuma dudoe
Dua geutanyoe sah syeedara
Gata aduen ulon adoe
Troh an dudoe bek meutuak

Bangta seuot insya Allah
Hana ubah nibak hamba
Tuanku di lon hana ubah
Tuanku sah aduen lon gata

Di lonpi sah gata adoe
Boh meumat jaroe teugoh seutia
Raja Peuranggi Bangta jideelat
Doli hadarat sah syeedara

Meunan narit kaphe hareubi
Meubak lahe sah syeedara
Dalam baten jitroh deungki
Raja kaphe han jeuet peucaya
Bangta Sulotan keunong tipee
Le that lagee raja ceulaka
Han neutupeue peurangui kaphe
Islam lahe taeu nyata

Hingga teutap neumeusahbat
Ngon raja laknat asoe nuraka
Han neuthee deungki jitroh deundam
Kaphe jahanam that ceulaka

Neukira ban kheun puteh ate
Patot ngon kaphe tameusyeedara
Droe cit ka ngon teukeudi Tuhan
Bangta Sulotan keunong ranjana

Miseue teuseubot dalam hadih
Narit kusus geucalitra
Zahiruhum siabun wa batinuhum ziabu
Makna teungku teuma lon nyata

Lahe ija jeuet tapakoe
Ngon top asoe bak anggeeta
Batenjih rimueng soe wiet takue
Hana neutupeue raja muda

Neujak meurakan deungon kaphe
Dudoe page jeuet meubahya
Lahejih got jeuet keu sahbat
Gasehpi that hana tara

Baten dudoe jeuet keu rimueng
Jikoh reukueng raja muda
La ilaha illallah
Teukeudi Allah han soe landa

Amma bakdu teuma dudoe
Raja neuwoe jinoe sigra
Ate mangat ka na sahbat
Neuwoe leugat lam istana

Ban sare troh u leuen meuligoe
Neuhei Putroe Sunoe muda
Putik pisang klat jantung pisang nu
Soe di leupu rumoh raya

Putroe Sunoe muda bangsawan
Neuseuot yoh nyan narit raja
Nabu kamoe judo meutuah
Neuek pantah po meukuta

Bangta Sulotan neuek leugat
Putroe bak rambat neupreh raja
Neumat ngon geupet ie srah gaki
That meubakti putroe muda

'Oh meubayeuen raja di pinto
Saleuempi laju putroe sapa
Suara haloh tango rindu
Tamse madu gula di Rawa

Lheueh neubri saleuem neuseumbah le
Peutang pagi han tom lupa
Teuma neumat geupet u jaroe
Neusrah jinoe gaki raja

'Oh lheueh neuple ie ka seuleusoe
Neusampoh dudoe ngon ceumara
Ok neuhambo troh 'oh singkee
Ngon mangat bee gahru ceundana

'Oh lheueh neusampoh gaki ka tho
Raja neulalo ubak tahta
Laju u leupu ateueh kaso
Raja meututo ngon putroe muda

Teungoh mayoh rindu ate
Neumarit le putroe jroh rupa
Pakon tuanku muka rumeh
Lagee teuseungeh ateneu suka

Teuma seuot Bangta Sulotan
Tango he intan ulon calitra
Pakri jinoe tuan putroe
Lon peugah proe ubak gata

Raja Peuranggi lon meung peujamee
Takheun lagee toh bicara
Adat han lon ba rasa han mangat
Kareuna sabab ka jeuet syeedara

Saleh akmak 'oh tameungieng
Sipu meumandang mata dua
Ban putroe ngon narit meunan
Beungeh han ban that keu raja

Allah tuanku akai ka sisat
Neujak meusahbat hantu ceulaka
Pakon meunan po junjongan
Nyang kaphe nyan musoh pusaka

Allah Allah han meupeue-peue
Pakon rabuetue po meukuta
Pakon pungo neujak meusahbat
Bukonkeu that akai gila

Putroe Sunoe beungeh han soe
Raja pindoe neuseurapa
Teuma marit Bangta Sulotan
Pakon meunan haba gata

Raja Peuranggi kuba keunoe
Di lon sah adoe meusyeedara
Singoh beungoh bu beuase
Bek peue kheun le putroe muda

Putroe Sunoe marit laju
Bek tuanku meusyeedara
Geutanyoe Islam jih nyan kaphe
Jikheun bak lahe tamong agama

Allah tuanku pakon seudee
Deungon asee neumeusyeedara
Bek tuanku neuba keunoe
Raja kaphe nyoe le bicara

Meunyo tuanku teuma kon meunan
Nibak Tuhan teuka bala
Meuhan neupateh ban lon kheuh nyan
Dudoe neupandang han meutuka

Bek neuharap keu kaphe pindoe
Akhe dudoe jeuet meubahya
Saleh meusane po junjongan
Raja kaphe nyan paya raya

Bek tuanku neuba keunoe
Han di kamoe po meukuta
Patot ngon rimueng tameurakan
Jan jipeureulan jeuet binasa

Teuma lom marit Bangta Sulotan
Le that ragam nibak gata
Ban nyang lon kheun han meukeunong
Bit nyo inong le peusuna

Kukheun meunoe meudeh ka ampeueng
Le that linteuing lon tadawa
Han kupateh inong rabuetue
Han meupeue-peue jimeuhaba

Putroe Sunoe seuot sipatah
Anpon meuah po meukuta
Kon han meupeue narit lon peugah
Insya Allah han neutuka

Han patot tuanku lon peuyang
Lon linteung kalam po meukuta
Meunyo nyang kon insya Allah
Han sipatah lon boh dawa

Sabab lon kalon ka sisat akai
Lon peugah hai bak meukuta
Lon bri nasihat peungajaran
Akan junjongan bek binasa

Kalee neupateh ka meutuah
Haba lon peugah bukon seunda
Adat han neupateh pakri lon bah
Teutapi beukah ate lon luka

Page miseue uroe dudoe
Ban kheuen kamoe han neutuka
Masa neukheun nya, tuan putroe moe
Ri neumanoe ngon ie mata

Weueh keu judo Bangta Sulotan
Kheundak Tuhan keunong bala
Putroe Sunoe droe cit neuthee
Keunong tipee raja ceulaka

Mataneu troh baranggajan
Deueh neukalon padok hana
Bitpi lon kheun matapi troh
Kadang han roh saboh kutika

Meugeutanyoe sifeuet baro
Allah Tuhanku deuh sibeuna
Droe ka bagi Tuhan teuntee
Hana lagee rot tapeubla

Meukon Tuhan nyang peurintah
Kudrat limpah sigala donya
Putroe Sunoe neumoe bae
Weueh keu judo raja muda

Bangta Sulotan teuma kheun ban
Pakon meunan peurangui gata
Le peusuna ureueng binoe
Meudeh meunoe jiboh dawa

Pakon tamoe le that lagee
Keumeung peumalee lon bak raja
Akai kureueng ureueng binoe
Pura-pura moe ro ie mata

Han kupateh ureueng binoe
Kuba keunoe singoh raja
Bu beuase teupeurintah
Singoh jadeh keunoe kuba

Putroe seuot insya Allah
Ban nyang titah lon keurija
Bek Allah bri ulon bantah
Meureuka bak Allah dudoe teuka

Bek an tuanku neuyue maguen
Adat peue laen lon usaha
Payah tuleueng hana lon syen
Laman ka idin po meukuta

Adat gop yuepi lon peubuet
Ban nyang patot tuanku raja
Teutapi bacut lon peudapat
Bunoe hadarat meutuka banja

Buet han patot jeuet meunyeusai
Nyankeu sagai nyang weueh hamba
Raja neumarit that meupot-pot
Peue han patot tapeuhaba

Lom-lompi nyan cit taseubot
Haba karot han peue buka
Amarah raja putroe neumoe
Ri neumanoe ro ie mata

Neungieng bak raja weueh that ate
Rasa reule gadoh nyawa
Bangta yoh nyan meuyum sayang
Neutren rijang le neubungka

Han neudeungo haba putroe
Muda samlakoe neuweh lanja
Putroe bae dalam meuligoe
Weueh keu lakoe keunong bala

Meuligoe meuguncang putroe tiek droe
Na tamse proe geumpa raya
Sabab neuthee keunong fiteunah
Nyankeu gundah putroe muda

Bangta Sulotan hana neuthee
Keunong tipee raja ceulaka
Droe ka nasib nibak Allah
Pakri tabah geutanyoe hamba

Barangdum tapeuse 'oh meurumpak
Nyang ka kheundak bak Rabbana
Nyang ka bagi han jeuet taplueng
'Oh meuteumeung cit tarasa

Nyang ka bak gle han jeuet bak krueng
Nyang hak bak rimueng han jeuet bak buya
Siperti neukheun uleh Tuhan
Dalam Quruan lahe nyata

Wa l-lazina tafiruna minhu fa innahu mulaqikum
Meunan meufom kalam Rabbana
Ho nyang taplueng cit meurumpak
Nyang ka kheundak Po Nyang Esa

Teutapi ekhtiyeeu wajib bak ensan
Meunan kheun ban uleh Saidina
Mudah-mudahan Po tallah bri
Meuhapit bagi nibak donya

Bek tako-ko keunan takajee
Cit ka tathee sinan bahya
Meuna ekhtieuepi meurumpak
Nyang ka kheundak han jeuet talanda

Meunan narit Putroe Sunoe
Sira neumoe ngon ie mata
Weueh keu judo keunong fiteunah
Han neupateh uleh raja

Neupeuingat neubri nasihat
Keu hadarat raja muda
Bek meusahbat ngon raja Peuranggi
Peurangui deungki kaphe ceulaka

Han neutem pateh tuan putroe
Nyankeu neumoe ro ie mata
Bangta Sulotan hana sinan
Ka bak rakan kaphe ceulaka

Hingga malam seupot ngon uroe
Hana neuwoe raja muda
Sideh neudom nyan bak keude
Droeneu lale sajan raja

Peugah haba poh beurakah
Hingga beungoh teubiet faja
Sare beungoh rab toe siang
Beudoh rijang raja muda

Neujak u krueng Bangta Sulotan
Tueng ie seumbahyang sigra-sigra
Teuma raja seumbahyang suboh
Wateepi jroh rab cuaca

'Oh lheueh seumbahyang watee suboh
Abeh tasbeh nyan ngon do'a
Lheueh beuet do'a neurahob jaroe
Laju neuwoe raja muda

Ban sare troh raja u leuen
Geureuhem siseun nak geuthee teuka
Putroe Sunoe ban lheueh seumbahyang
Neuteubiet rijang bak musalla

Han jan neukheun ayat kurusi
Tasbeh dike do'api hana
Khedeumat raja neuplueng rijang
Neujak ampeueng judo teuka

Bajee teuleukom mantong bak badan
Hankeu na jan nyan neukira
Neujak u guci seurahi neupasoe
Tuan putroe sigra-sigra

Teuma neupreh nyan di rambat
Seun rot neulihat raja muda
Putroe Sunoe dong bak pinto
Saleuen laju le neusapa

Teuma neuseumbah com di teuot
Sireuta neuseubot meuah deesya
Lheueh neuseumbah neusrah gaki
Neusampoh le ngon ceumara

Gaki neusampoh dum abeh tho
Poteu lalo ateueh tahta
Di ateueh geuta neuduek sinan
Geubet idangan sigra-sigra

Neuduek poutroe sinan sajan
Bangta Sulotan makeuen lanja
Putroe Sunoe makeuen sapat
Sajan hadarat raja raya

'Oh lheueh makeuen simpan idang
Ranup lam puan geubot sigra
Ranup masak lheueh neugapu
Bee meudru-dru hana tara

Bangta pajoh ranup sigapu
Jibeudoh hu wareuna muka
Teuma neumarit tuan putroe
Pakon han neuwoe po meukuta

Patbu neueh beuklam neudom
Nyangka han tom cre di tangga
Simalam suntok lon preh neuwoe
Kamoe sidroe lam istana

Di lon sidroe han lon jeuet eh
Takot iblih tipee daya
Teutap lon duek teungeutpi tan
Lon preh tuan woe meukuta

Tuanku droe lon teumakot
Rumoh seupot hana tara
Bulee lon srui lon sangat gli
Preh meu'i-i burong teuka

Mata lon pet han lon jeuet bleut
Hana teungeut troh an jula
Lon balot droe rijang-rijang
Lon preh datang burong rimba

Su meu'i-i hana bagoe
Kamoe sidroe yo anggeeta
Trep nyang meunan hingga suboh
Teuma gadoh han le suara

Lon ploh ija balot badan
Lon bleut tuan mata dua
Seun rot lon kalon ka peungeuh trang
Lon tren rijang bak teulaga

Lon cok tima tueng ie seumbahyang
Uroepi trang le cuaca
Lon ek lanja pantah rijang
Lon seumbahyang pantah sigra

Meuhad saleuem dumnan mantong
Troh le rijang po meukuta
Allah tuanku meubhak-bhak ate
Lon rab mate teumakot raya

Pakon han neuwoe bupi sijuek
Pakon neutheun deuk tuanku raja
Nyang ka han tom nyang meumeunoe
Pakon malam nyoe neuboh hamba

Raja seuot teuma sipatah
Tango lon peugah ubak gata
Ulon baro lon jak u keude
Teuma lale troh an sinja

Lon keumeueng woe teuma jitahan
Jibri makanan nibak raja
Dang-dang makeuen poh beurakah
Malam leupah le ho jula

Teuma lon eh 'oh lheueh makan
Teungeut pangsang troh an faja
Lon kira woe lon eh siat
Nibak sahbat raja muda

Ranup lon pajoh teutap lam babah
Han jan bicah teungeut lanja
Lon kira han teungeut peureubah droe
Hajat lon woe cit u tangga

Meunan narit Bangta Sulotan
Lhok teunuban panyang bicaa
Jeuet neusom droe utoh neukilah
Bukon cidah raja muda

Bak-bak ceumeucet neumeusilee
Putroe neuthee dum peukara
Nyang neupeugah bandum kaze
Narit sulet neucalitra

Neukira putroe han neutuban
Nyang jeuet meunan neusom basa
Putroe Sunoe that ceureudek
Akai bayek that samporeuna

'Oh lheueh haba sudi-mudi
Uroe tinggi le ho jula
Raja marit deungon putroe
Haba baroe lom neubuka

Raaj Peuranggi lon ba keunoe
Bak geutanyoe lam istana
Tanta meuseubot sahbat ngon kamoe
Tapeumulia jinoe aneuk raja

Taba u rumoh tabri makeuen
Nyan meusiseun tanda mulia
Putroe Sunoe teuma seut
Ban nyang patot bak meukuta

Lon tuanku han kubantah
Ban nyang titah lon keurija
Cit ka lon kheun haba baroe
Dum sinaroe bak meukuta

Peue neupeugah lom bak kamoe
Ureueng binoe le peusuna
Neuyue taguen bu lon peuse
Peujamee kaphe raja ceulaka

Bangta Sulotan neutren laju
'Oh neungo su meunan haba
Sare leupah Bangta laju
Beudoh u dapu putroe muda

Neucok kanot neutaguen bu
Peuduek u dapu sigra-sigra
Apui neuparok rujee neuboh
Cuco reuoh bak-bak muka

Sare meh-moh neutaguen bu
Apui neupeuhu meunyalanya
Jatara taguen le ngon gule
Dapo ma lale reundang jawa

Eungkot neutaguen tuan putroe
Gule rampoe nyan di Jatara
Dapo ma dawok peugot reundang
Keumah neucang bawang halia

Sare masak dum sibirang
Pasoe lam idang sigra-sigra
Dalong keurikeue tulak bawo
Geuboh le bu pantah sigra

Sare ase bu lam idang
Eungkot reundang meureutoh mata
Geutop ngon sange geuboh sahab
Jroh meucakap hana tara

'Oh lheueh ase bu lam idang
Geuleueng hamparan sigra-sigra
Geuleueng deungon peureumadani
Bak duek Peuranggi raja ceulaka

Sare cukop dum seuleusoe
Putroe Sunoe nyang keurija
Ate seungkoe neupeuturot
Sabab neutakot beungeh raja

Ban neupeugot cukop sare
Peuturot ate putroe muda
Ateneu paneuh rasa tutong
Kaphe bajeueng neuseuraja

Sare cukop geuleueng hamparan
Seun rot yoh nyan teuka raja
Neuek u rumoh pantah rijang
Neukalon idang ase leungka

Raja Peuranggi goh lom datang
Di keude mantong goh lom teuka
Bangta Sulotan neutren yoh nyan
Neujak kalon pakon trep teuka

Troh u peukan neuek u keude
Hana lale raja muda
Teuma marit Bangta Sulotan
Udeh tuan tamong sigra

Dumpeue ase ka lam idang
Tamong rijang adoe raja
Teuma marit Raja Peuranggi
Dalem pakri lon tamaba

Di lon dalem bah bek jinoe
Dudoe-dudoe singoh lusa
Han jeuet tamong peue lon me tan
Malee tuan bak teumuda

Bek takheun nyang wahe adoe
Gata ngon kamoe sah syeedara
Peue tagundah keu han peue me
Ka tan bahle han soe sigra

Pakri tateumeutuek gata adoe
Peugah jinoe lon ngo nyata
Kon teumeutuek dalem teungku droe
Malee kamoe bak teumuda

Lagipi phon han tom meuteumeung
Pakri lon tamong dalem raja
Bek he dalem lon neukarat
Malee lon that bak teumuda

Han peue malee adoe badan
Gata ngon lon tuan sah syeedara
Meunyo takira meudeh meunoe
Ubah geutanyoe janji nyang ka

Hana ban kheun miseue dilee
Nyan ban lagee haba gata
Ate lon puteh keu gata adoe
Udeh jinoe bek le dawa

Raja Peuranggi laknat Allah
Meung di babah pura-pura
Dalam ate nyum beurijang
Raja suang asoe nuraka

Teuma marit Raja Peuranggi
Jakleh woe le dilee gata
Lon di likot cit lon jak le
Dalem boh ate deungon sigra

Ban raja ngo haba meunan
Neuwoe le yoh nyan ka neugisa
Sare leupah raja neuwoe
Kaphe pindoe ate suka

Raja Peuranggi ngui peukaya
Bajee di badan jroh that rupa
Dokma meuriti dum manikam
Jampu pualam ngon meutia

Sare leungkap peukayan di asoe
Buka peutoe saboh nyang raya
Peunoh di dalam alat peukayan
Jeuneh intan deungon meutia

Laen nibak nyan kayen seunujoe
Dum sinaroe mutiara
Meuh meulungke sihah panyang
Ban binatang jipeurupa

Alat teupeuen peunok teurusu
Meuh bandum hu jroh-jroh rupa
Taloe teupeuen meuh geurante
Turak geuuke jroh han tara

Cadoh geuculek meuh sinaroe
Alat putroe peurumoh raja
Ceuko ngon suri meuh bandum nyan
Indah tuan hana tara

Pasa geuuke geutatah iritan
Di dalam nyan geuboh geunta
Abek jicok dum sinaroe
Jime keu Putroe Sunoe muda

Jibeureukah dum sinaroe
Jibalot dudoe deungon ija
Jicok ija teuma sikrak
Daneun pirak neudong suasa

Meuh meulungke jime sajan
Peurseumbahan nyan keu raja
Sare ase dum seuleusoe
Jijak sidroe ngon han jiba

Ban sare troh teudong di leuen
Geureuhem siseun that bit suka
Teuma neutren Bangta Sulotan
Neujak kalon neupeunyata

Teuma neumarit pakon lambat
Taek leugat keunoe sigra
Trep that lon preh jeh 'oh uroe
Taek adoe keunoe sigra

Raja Peuranggi jiek laju
Ate seuu galak raya
'Oh sare troh u seuramoe
Jiduek jinoe raja ceulaka

Teuma neubet ranup lam puan
Bangta Sulotan raja muda
Neuduek sapat sinan di nap
Neubri horeumat tanda mulia

Amma bakdu teuma dudoe
Putroe Sunoe lon calitra
Putroe Sunoe muda bangsawan
Neungui peukayan jroh that rupa

Neungui bajee kasab sinaroe
Bak siseun nyoe meuhambo cahya
Intan meutabu peunoh sare
Dum meuriti meubanja-banja

Teuma neungui ija pinggang plang
Meutabu bintang kasab Roma
Kasab meurok dum seunujoe
Peukayan Putroe Sunoe muda

Neungui keumasan ija sawak
Daneun pirak neudong suasa
Teuma neusok euncien bak jaroe
Jroh hana soe ngon tapeusa

Peunoh sare euncien malakat
Cahya meukilat seumilu mata
Ikai peurmata neusok bak sapai
Hireuen akai soe eu rupa

Gleueng keuruncong ikat simplah
Meuh geutatah ngon mutiara
Ganceng peundeng/ngon ajimat
Abekh leungkap dum peukara

Subang neusok bak geulunyueng
Cahya jiplueng trang cuaca
Patam sanggoi ngon manikam
Dhoe neuandam jroh han tara

Ok neusanggoi miseue kipah
Neuboh di ateueh bungong meutia
Sare blet-blot cahya seumeuloh
Intan peunoh bak anggeeta

Soe nyang kalon hireuen laloe
Tamse putroe aneuk syeuruga
Na tamse proe budiadari
Ladat beureuhi 'oh taeu rupa

Neungui minyeuek nyang mangat bee
Neuboh bak'ulee gahru jeumpa
Dum bee-beewan peunoh badan
Bee meukeumang barangsoe gila

Bee meudre-dre lam meuligoe
Buetan Putroe Sunoe muda
Peukayan neungui han tom soe kalon
Jroh that bangon hana ngon sa

Peuturot ate tuan putroe
Raja pindoe neujak sapa
Mangat jieu uleh Peuranggi
Tuan Siti le bicara

Neupeuharok raja seudee
Neuboh ngon bee dum anika
Teuma neupasoe ranup lam puan
Keumala intan Sunoe muda

Laju neutren u seuramoe
Neusapa jinoe raja ceulaka
Ban meubayeuen 'oh babah pinto
Raja tahe hireuen liga

Mata bak pinto jingieng leugat
Sare ladat jroh that rupa
Goh deuh jieu lom meuteuntang
Bukon bubarang pungo gila

Dumnan bimbang tahe laloe
Raja pindoe hireuen liga
Putroe Sunoe saleuem neubri
Raja Peuranggi jiseuot hana

Peue jiseuot jih ka tahe
Mata u pinto jingieng lanja
Putroe Sunoe le that lagee
Neupeuseudee raja ceulaka

Neudong di pinto neutrenpi han
Neueu lakuan hantu meureuka
Meunan kasad dalam ate
Raja kaphe neupeugila

Mabok beureuhi mayoh rindu
Hawa napsu ladat mata
Trep that neudong sinan di pinto
Neueu laku raja ceulaka

Teuma neutren tuan putroe
Jak mat jaroe raja raya
Neukeubah puan bak ulee teuot
Putroe surot neuk lanja

Puan neukeubah jitheepi han
Jih ka pangsang laloe mata
Leupah putroe ek u leupu
Tahe laju raja ceulaka

Teuma puleh na sikeujap
Jipajoh ranup sigra-sigra
Dang pajoh ranup mata u pinto
Hireuen tahe kaphe meureuka

Ranup jipajoh na sigapu
Ate rindu keu putroe muda
Preh jingieng han leumah le
Raja kaphe gundah raya

Yoh masa nyan etikeuet ubah
Laknat Allah asoe nuraka
Na nyum beuji'uet jipeureulan
Adat makanan han jan boh sira

Atejih mangat nyum jiteumee
Meunan lagee bak jisangka
Bantah Sulotan keunong tipee
Raja seudee boh ranjana

Ate deungki jitroh deundam
Bangta Sulotan jimeung poh fana
Meunan etikeuet Raja Peuranggi
Ubah janji bak syeedara

Ban jikalon putroe indah
Etikeuet ubah si ceulaka
Meunan etikeuet kaphe jahannam
Jitroh deundam jipoh Bangta

Teuma geubet le idangan
Neutren tuan raja muda
'Oh lheueh geupeuduek u hadapan
Dalong peunuman bate suasa

Raja muda neubet jaroe
Makeuen adoe sigra-sigra
Makeuen beutroe adoe teungku droe
Eungkot han sapeue gule ngon sira

Bek malee-malee wahe adoe
Nibak kamoe nasa syeedara
Roh meupeungeut bek weueh ate
Sira campli eungkot hana

Eungkot han sapeue roh lon tipee
Meuah lon lakee ubak gata
Kru seumangat dalem teungku droe
Nibak kamoe ateueh jeumala

Tabeu ngon masen meuah bak adoe
Peuneugot putroe teumuda gata
Han peue dalem nibak kamoe
Makanan nyoe jatirasa

Dalem payong keunoe sajan
Neumakeuen tuan sapat dua
Lon hai adoe ban lheueh makan
Adoe badan makeuen lanja

Bah tinggai lon makeuen sidroe
Meutho jaroe lonpi hana
Raja Peuranggi makeuen sidroe
Jingeuk Putroe Sunoe muda

Putroe isyarat raja seudee
Neuniet asee meunan rupa
Dalam ate neuniet babi
Raja Peuranggi musoh raya

Lah han neujeuet kheun neupeudapat
Neutakot hat keu raja nuda
Neutakot beungeh Bangta Sulotan
Han neujeuet kheun sapeue haba

Raja Peuranggi makeuen leugat
Bupi mangat jatirasa
'Oh lheueh makeuen geucok idang
Ranup lam puan geubet sigra

Ranup sugapu baro bicah
Ate beulisah raja ceulaka
Bek le lagee sot lon balek ayat
Ate beumangat adek sambinoe

Harok keu Putroe Sunoe muda
Napsu hawa hana padoe
Nyum beujinoe sajan jiba
Ladat mata hireuen laloe

Jipajoh ranup tan beureunti
Ate beureuhi raja pindoe
Jiduek sidroe sinan tahe
Mata u pinto jingieng putroe

Tuan putroe ngieng lam ruweueng pinto
Neueu tahe raja pindoe
Neup adok droe neumeusilee
Le that lagee tuan putroe

Putroe Sunoe neueu laku
Matajih hu kaphe pindoe
Bak pinto jingieng mata jipandang
Preh meubayang leumah putroe

Sare kengkot han ek duek le
Beureuhi ate hana bagoe
Ranup jipajoh seun-seun sigapu
Matajih hu that keu putroe

Putroe Sunoe di likot pinto
Neungieng laju u seuramoe
Neueu bangon hantu beudeu 'ah
Mata mirah beureuhi han soe

Teuma putroe neuweh ninan
Neuek yoh nyan lam meuligoe
Keuruncong krang-kring meusu geunta
Raja gila jingo bunyoe

Di seuramoe sidroe saja
Akai gila kaphe pindoe
Bangta Sulotan sina hana
Lam istana sajan putroe

Teuma marit Raja Peuranggi
Dalem tren le siat keunoe
Bangta seuot insya allah
Lon meulangkah u seuramoe

Teuma neutren Bangta Sulotan
Ranup lam puan mat di jaroe
Ban sajan troh Bangta duek le
Hindu kaphe marit jinoe

Jicok bungkoh alat teupeuen
Bangta hireuen neukalon proe
Teuma jijok ubak Bangta
Nyankeu nyang na dalem teungku droe

Alat teupeuen dum sileungkap
Bangta 'ajab mata laloe
Dum meuh huri pande teumpa
turak pasa dum sinaroe

Raja sambot neupeumulia
Bak syeedara kaphe pindoe
Meuh meulungke ija seulpok
Dum ka jijok nyan u jaroe

Putroe Sunoe di likot pinto
Neueu laku di seuramoe
Teuma neuhei uleh Bangta
Ho ka gata tajak cok nyoe

Putroe Sunoe seuot nyopat
Lon di rambat tuanku droe
Tajak rijang keunoe sigra
Putroe teuka teuma jinoe

Neudong 'oh pinto na sijamang
Neujak rijang neucok jinoe
Ban meudieueng meublet subang
Tamse bintang meunankeu proe

Tamse intan badan meukilat
Tahe 'ajab raja pindoe
Lom ka wah-woe pungo gila
Mata liga ubak putroe

Bangta Sulotan sinan sajan
Neuduek tuan tahe keudroe
Putroe Sunoe duek di pinto
Neueu laku raja pindoe

Teuma neuweh rijang-rijang
Raja suang ate wah-woe
Leugat u rumoh neuk laju
Abeh neueumpu dum sinaroe

Bak batee lada dum neuantok
Raja dawok di seuramoe
Abeh neupeh-peh dum neuhanco
Jatara tahe meujjiem droe

Jikeumeueng tanyong pakon neuproh
Areuta jroh-jroh dum sinaroe
Hana jijeuet tanyong sipatah
Putroe beungeh hana bagoe

Teutap hanco dum neureuloh
Yoh nyan neuboh neutiek u bumoe
Abeh bandum ka neubuang
Meutamon sinan likot meuligoe

Amma bakdu dudoe nibak nyan
Bangta Sulotan lon calitra
Bangta neuduek di seuramoe
Droeneu laloe peugah haba

Teuma jimarit Raja Peuranggi
Raja deungki asoe nuraka
Tango dalem haba kamoe
Kukheun jinoe ubak gata

Pakri dalem tajak u laot
Tamita eungkot po meukuta
Tajak meuramien keudeh u pasi
Sira meu'en meusuka-suka

Taba ngon jalo saboh sapo
Meunan laku keumah haba
Kawe sipucok tajak u laot
Tamita eungkot dum peue nyang na

Teuma Bangta seuot yoh nyan
Di lon tuan kawe hana
TOMPI tan kawepi han
Tapeugot tuan uleh gata

Taloe beuteugoh mata beujroh
Tapeugot saboh beumeujasa
Han peue salah dalem teungku droe
Lon hareutoe kawe gata

Laman ka tajak bek ubah le
Takoh janji geutanyoe dua
Bangta senoe insya Allah
Pajan talangkah geutanyoe dua

Teuma tameuhei ulon keunoe
Harap geutanyoe teugoh seutia
Adat meunan dalem teungku droe
Tujoh uroe tanggoh ngon gata

Dang lon puta taloe kawe
Lon peuse dum peukara
Lon peugot jalo peungayoh lon boh
Teuma saohpi cit hana

Tihang ngon layeue lon peurigap
Beumencakap dum semua
Meunankeu adoe tapeurintah
Jan nyang jadeh keunoe teteuka

Han peue salah dalam teungku droe
Lon jak keunoe lon hei gata
Idin dalem lon woe u keude
Trep that lale lon bak gata

Han peue salah wahe adoe
Jakleh tawoe jinoe gata
Tasaweue-saweue gata keunoe
Ulon sidroe bek talupa

Got jiseuot pantah rijang
Lalu jidong sigra-sigra
Meumat jaroe jitren laju
Ateh rindu suka rasa

Teuma jiwoe troh u keude
Jiek laju sigra-sigra
Raja Peuranggi ate mangat
Jiboh hekeumat nyan keu raja

Ate beureuhi that keu putroe
Jipoh jinoe raja muda
Raja Peuranggi tamong lam buet
Jinoe jikhaluet jiamai do'a

Jibeuet mintra hana padoe
Geunap uroe hana reuda
Meunankeu hai raja pindoe
Tujoh uroe jibeuet do'a

Jiseumbah apui jimohon tulong
Jiseumbah patong jibeuet mintra
Meunankeu hai raja pindoe
Janji saboh roe jipaleng muka

Yoh meusapat di seuramoe
Neudeungo le putroe dum peukara
Hana neugrak uleh Allah
Han sipatah neubri dawa

Bah lon peuduek haba nyan siat
Dudoe lon sambat teuma punca
La ilaha illallah
Sahib kisah peucalitra

Bangta Sulotan raja budiman
Gaseh Tuhan Po Nyang Esa
Sare leupah Raja Peuranggi
Ka neuek le lam istana

Neuduek bak geuta neusadeue droe
Teuka Putroe Sunoe muda
Neuduek ngadap di hadapan
Putroe bangsawan indah rupa

Teuma neumarit Bangta Sulotan
Raja budiman meubahgia
Neukheun bak putroe neujak u laot
Mita eungkot sajan ngon raja

Meujak keumawe keudeh u pasi
Idin tabri uleh gata
Bek tatham-tham judo meutuah
Lon meulangkah bek tasangga

Putroe Sunoe seuot sipatah
Peue neupeugah po meukuta
Peue neupeugah nyan bak kamoe
Ureueng binoe le peusuna

Adat lon tham han neupateh
Leubeh gaseh keu kaphe ceulaka
Ulon tuanku ureueng inong
Akai kureueng hana guna

Hana sagang adat neujak
Bek meutimplak keu lon sangga
Bangta Sulotan meuneuiem droe
Cit meuputroe nyang meuhaba

Putroe Sunoe neumoe bae
Weueh keu judo raja muda
Lom wueh keu droe ingat keuuntong
Meugulong-gulong ngon ie mata

Han neupateh Bangta Sulotan
Neumeurakan ngon si ceulaka
Teuma marit poteu sidroe
Areuta bunoe ho ka taba

Tacuba eu pat takeubah
Putroe peugah ka binasa
Hana tuanku sinoe di rumoh
Jeh ho u lampoh lon geulawa

Abeh lon proh dum bak batee
Areuta asee keupeue guna
Ban raja ngo narit meunan
Beungeh yoh nyan hana tara

Bit nyo pungo tuan putroe
Kureueng budoe han meubasa
Patot taboh meuh dum-dumnoe
That peurangoe tan bicara

Di gop geume bungong jaroe
Keu gata putroe tanda mulia
Di gata taboh han tatem tueng
Nyankeu ureueng tan bahgia

Bitkeu inong akai ban hewan
Dumnian meuh tuan jigeulawa
Teuma marit tuan putroe
Ampon kamoe po meukuta

Keubit nyo bit lon ri asee
Tuanku seudee keumeueng gila
Na meupeue-peue tateurimong
Dudoe nyawong jikeulua

Tuanku ampon laman meukatoe
Deungo lon kheun proe bak meukuta
Areuta jime bak geutanyoe
Jeunamee kamoe dudoe jidawa

MILIK KEPUSTAKAAN
DIREKTORAT TRADISI
BETEN NBSF DEPBUDPAR

Di tuanku hana neuthee
Di lon eleumee Allah peunyata
Uroe dudoe hana ubah
Ban lon peugah tan meutuka

Sabab lon boh hana keu pakon
Areuta syetan kaphe ceulaka
Di tuanku neutupeue tan
Neujak meurakan ngon beudeuga

Page dudoe jeuet keu teulah
Cit neuueu sah han meutuka
Laman ngon kaphe neumeusahbat
Meuteumeueng laknat keunong bala

Adat neupateh haba lon peugah
Untong meusiblah nibak bala
Bek tuanku neumeurakan
Ngon kapeh nyan musoh pusaka

Lahe takalon rakan sahbat
Gasehpi that hana tara
Baten musoh jeuet keu lawan
Page tuan neuueu nyata

Bek tuanku neumeusahbat
Kaphe laknat asoe nuraka
Han tom neudeungo haba Nabi
Tuanku ahli bijaksana

Pakri geupeugah dalam hadih
Kaphe paleh bek meusyeedara
Bek taseubotjih keu rakan
Wajib talawan musoh raya

Barangri nanggroe meunyo kaphe
Wajib sare dum tangaza
Di tuanku pakon seudee
Neutueng sitree keu syeedara

Hana neudeungo Rasulullah
Pat na meugah kaphe neungaza
Neuparang nanggroë dum sigala be
Nyang na kaphe neupoh fana

Hana neutueng nyan keu teelan
Sitree Tuhan asoe nuraka
Nyang jeuet lon kheun sabab ka lon thee
Jih nyan sitree ngon meukuta

Bangta Sulotan teuma neubantah
Peue tapeugah dum kon haba
Le that lagee gata sidroe
Meudeh meunoe tacalitra

Han kupateh inong jalang
Kee jileukang ngon syeedara
Keunong narit droeneu peugah
Inong beurakah han peue peucaya

Putroe seuot haba junjongan
Pakon meunan po meukuta
Patot neukheun lon beurakah
Han tom peureunah dilee nyang ka

Bek Allah bri lon beurakah
Haba lon peugah that sibeuna
Tanda tuanku lon esteuri
Meekeu lon bri sipatah haba

Lon peuingat akan judo droe
Akhe dudoe roh teulanja
Di tuanku neungo hana jan
Peue habaran neupeurbula

Leubeh neubeunci keu lon sidroe
Kaphe pindoe that mulia
Han neupateh ban lon peugah
Neukheun beurakah haba peurbula

Leubeh kaphe nibak kamoe
Tuanku sidroe gadoh bicara
Narit nyang seunang neukheun karot
Haba han patot sia-sia

Nyandum tuanku lon bri ingat
Bek roh laknat keunong bahya
Han neupateh neupeubeuah
Pakri lon bah po meukuta

Tanda gaseh ka lon peugah
Neukheun beurakah cit keu hamba
Pihak beuncit jaehpi that
Leubeh sahbat kaphe ceulaka

Bangta Sulotan neuieum tahe
Neudeungo su putroe meuhaba
Meunyum enseueh suara mayoh
Ate leumoh Bangta muda

Reumbang suntok keunong teugah
Han sipatah le suara
'Oh neuingat janji ka leupah
Sinankeu gadoh akai bicara

Weueh keu putroe suara mangat
That bit cakap enseueh suara
Putroe marit jampu-bau
Sikrak sapeue neumeusuara

Meujan-jan saket meujan-jan mangat
'Oh meunyum brat neupeunyo sigra
Bangta Sulotan maken sosah
Neutakot ubah janji nyang ka

Teuma neukheun ubak putroe
Ulonteu nyoe ka seungsara
Ulon tamse seureuba salah
Han lon tukri bah ganu-gana

Adat kujak ulon jinoe
Sang kudeungo tamoe gata
Adat han kujak janji ka ubah
Lon sidroe sah ka jeuheuet nama

Hana ban kheun ka ubah janji
Deungon peuranggi raja muda
Putroe Sunoe teuma seuot
Leumah-leumbot ngon suara

Bek tuanku keu lon neugaseh
Janji meuureh deungon raja
Peue neusayang keu lon sidroe
Gadoh budoe Hindu beudeuga

Han sep teuma cre ka siploh thon
Masa ulon arong romba
Meuraba-raba sigala nanggroe
Tuhan peuwoe bak meukuta

Jinoepi lom neukeumeung meucré
Nyokeu bagi bak Allah Ta'ala
Ban raja ngo narit meunan
Na ri hujan ro ie mata

Bukon meunan tuan putroe
Gata sidroe ateueh jeumala
Ulonteu nyoe alang-pialang
Pakri nyang reumbang tabicara

Adat han kujak ka leupah janji
Jiteumee keuji lon jeuheut nama
Teuma marit tuan putroe
Tango kamoe po meukuta

Lon calitra haba jameun
Ureueng syik kheun geupeuhaba
Tamu'ue tanoh umong di blang
Tapula pisang di bineh paya

Adat na gaseh deungon sayang
Haba lon kheun nyan tapeucaya
Bak pihak beunci bayek dibilang
Meunyo jigaseh meuribee daya

Meunan narit tuan putroe
Sira neumoe ro ie mata
Bangta Sulotan hana sibok
Nyang na dawok putroe meuhaba

Teuma lom seuot putroe Sunoe
Tuanku droe bek tha kubra
Neupike dilee adat neujak-jak
Bek meutimplak ateuh hamba

Han neupateh haba kamoe
Neukheun jinoo po meukuta
Dumnun lon tham padum uroe
Tuanku sidroe ka mawot ba

Kupaban bah lon theun langkah
Kheundak Allah ajai teuka
Pakri tuanku tajak jinoo
Taba kamoe sajan meukuta

Mate gata lonpi sajan
Judo bangsawan meukuta donya
Hokeu troh lon uroe dudoe
Tuanku sidroe ka kaphe ba

Tuanku sidroe keunong tipee
Jiboh euntee u laot raya
Lahe jikheun jak keumawe
Baten kaphe jipoh meukuta

Meukon ban lon kheun uroe dudoe
Neukoh takue lihe hamba
Idin lon mate meunyo ubah
Ban lon peugah po meukuta

Bangta jaweueb haba putroe
Le that bagoe narit gata
Meunoe meudeh jeuet tapeugah
Inong beurakah le bicara

Peue tapeugah kupateh han
Taiem 'oh nan putroe muda
Haba putroe hana hireuen
Di droe neukheun ban nyang hawa

Tuan putroe neumoe bae
Wahe judo keunong ranjana
Neutumbok dada garo ulee
Ho kujak kee 'oh tan gata

Dumnan kutham han neupateh
Haba lon jayeh sia-sia
Allah tuhanku judo teungku droe
Ho tok kamoe 'oh tan meukuta

Gata tajak sajan kaphe
Jipoh mate lam laot raya
Putroe Sunoe neumoe laju
Paroe ngon su keumong mata

Kri cit narit Bangta Sulotan
Tango lon tuan putroe muda
Bek that tamoe he judo payong
Gata lon seuon ateueh jeumala

Bek tamoe le ploh dilee
Lon kheun lagee ubak gata
Tango lon peugah haba nyang seunang
Bek tasagang taboh dawa

Jikalee teukeudi lon jitipee
Droe ka dilee ajai hamba
Nyang ka bagi nibak Allah
Pakri tabah ka troh masa

Barangdum tathampi droe leupah
Mawot ngon langkah han ek sangga
Di lon kujak bak siseun nyoe
Bek le tamoe putroe jroh rupa

Barangkri tathampi cit lon
Meuka kheundak abeh kila
Meuseuki geurante ngon geuikat
Meuka hajat han ek landa

Di lon narit sigo koh reupang
Han meuulang laen bicara
Meuka lon kheun kumeuhajat
Lon jak meuhad barangho donya

Meuka bak u han jeuet bak pineung
Hana dua seun kupandang donya
Meuka bak laot han jeuet bak krueng
Meuka bak rimueng han jeuet bak buya

Tuhan neupeujeuet mate ngon sabab
Maseng-maseng had ajai teuka
Adat han lon peugah he tuan putroe
Meufom bak droe dum peukara

Adat mawot pakri tabah
Kheundak Allah ateueh hamba
Meuka u nap han u likot
Meunan geuseubot raja muda

Teukeudi lon ubah janji teugoh
Abeh jitu'oh peurangui hamba
Meuhad jitunyok jipeukeuji
Han peue meujanji singoh lusa

Meunankeu dudoe lon jicarot
Han peue taikot kureueng seutia
Sabab janji lon ka leupah
Pakri tabah han jeuet daya

Takeumeung surot alang-pialang
Narit ka trang roh teulajja
Jinoe 'oh lon jak judo meutuah
Bu takulah saboh dua

Bek le bantah tuan putroe
Tuhan sidroe nyang keukira
Bek tahukom nyang lam baten
Cit na Tuhan sidroe Esa

Di tanyoe tahukom meubak lahe
Teukeudi jimungke Tuhan peubinasa
Meunyo jiubah janji ngon kamoe
Page dudoe balah nuraka

Di donya kon troh akhirat
Beu Tuhan bri laknat Allah peumeureuka
Jinoe putroe bek tagundah le
Tuhan Rabbi nyang keukira

Ban Tuhan bri pakri tabah
Meunan tuah bak Allah Ta'ala
Ban putroe ngo haba meunan
Neukheun yoh nyan sigra-sigra

Pakri tuanku neujak jinoe
Tinggai kamoe sidroe saja
Pat neukeubah ulon sidroe
Neukheun jinoe po meukuta

Meuka teuntee lon neupeuduek
Lheueh nyan neujak tuanku raja
Raja muda seuot sipatah
Bak Po tallah lon peujok gata

Tuhan nyang peujeuet langet bumoe
Dum ngon asoe leungkap simua
Gata keunan ulonkeubah
He putroe indah peunawa mata

Putroe deungo haba sulotan
Idin yoh nyan neubri bungka
Han le neutham neupateh han
Neujem yoh nyan putroe muda

Teuma neubeudoh tuan putroe
Neutaguen jinoe bu keu raja
Neuhej Jatara duek di dapu
Jitaguen bu sigra-sigra

Putroe Sunoe bu neutaguen
Sare cuen-buruen dua ngon jatara
Di po ma on ngon kulah bu
Neupeulaku sigra-sigra

Sapeue sapo neupeurintah
Bu neukulah uleh cutma
Sare seuleusoe dum bu kulah
Teuma neubungkoh jinoe sigra

Teuma marit tuan putroe
Tango kamoe po meukuta
Nyoe lon wasiet bak junjongan
Haba laman neupeucaya

Nyan bu kulah ka lon bungkoh
Na tujoh boh raya-raya
Bu nyang leubeh bak neumakeuen
Neupeuwoe keu lon po meukuta

Bek neubri-bri keu soe laen
Beuthat neusyen keu lon hamba
'Oh lheueh neupeusan uleh putroe
Raja jinoe jadeh bungka

Raja muda neukheun bak putroe
Do'a keu kamoe bek talupa
Tameulakee bak Hadarat
Beutroh hajat kabui pinta

Insya Allah judo teungku droe
Do'a keu kamoe po meukuta
Beurijang neuwoe po junjongan
Ubak laman ureueng nyang hina

Teuma neubeudoh Bangta Sulotan
Meuteumeung yoh nyan asoe istana
Putroe seumbah ubak teuot
Sireuta neuseubot meuah deesya

Meuah bak Allah ngon bak Nabi
Bak kamoe han le tameudeesya
Putroe Sunoe seumbah judo
Sare meuhubo ngon ie mata

Tamse ujeuen toh nyang leubat
Putroepi that neumoe rugha
Sajan neukalon weueh neupandang
Meugeufumbang ngon ie mata

Putroe neuwa nibak keuieng
Weueh that neungieng akan raja
Neudeungo bae mayoh bimbang
Putroe jamong limpah dada

Bunyoe suara ladat beureuhi
Tiwah bangsi ngon biula
Miseue suleng buloh meurindu
Mangat that su hana tara

Bangta Sulotan han jeuet jak le
Weueh that ate neungo suara
Teutap neudong di seuramoe
Raja neumoe ro ie mata

Meunyum enseueh teuka sayang
Bagoe bintang neuueu rupa
Putroe Sunoe moe meudre-dre
Jamong bae hana reuda

Bangta Sulotan alang-pialang
Bagoe geureundang ate lam dada
Neukeumeung jak weueh keu putroe
Sayang neumoe ro ie mata

Adat han neujak janji ubah
Raja gundah hana tara
Tuan putroe lom neubae
Mangat that su ban suleng Jawa

Bangta Sulotan culok geulunyueng
Yoh nyan neuplueng sigra-sigra
Han ek neungo bae putroe
Le that bagoe nyang jeuet liga

Nyum han leupah neubungka le
Weueh that ate raja muda
Nyankeu neuplueng laju-laju
Bek neungo su putroe muda

Bangta Sulotan troh u keude
Ka neuek le sigra-sigra
Teuma neupioh sinan siat
Teuka sahbat raja ceulaka

Teuma marit Bangta Sulotan
Peue lom tuan udeh tabungka
Tohbu kawé nyang di kamoe
Tabri keunoe kueurupa

Teuma jijok kawé u jaroe
Bangta sidroe tanyong haba
Peue lom lale udeh jinoe
Dum geutanyoe bansineuna

Tacok jalo di tanyoe saboh
Nak takayoh u kuala
Bangta Sulotan neutren laju
Neucok jalo sigra-sigra

Ban sare troh neuhue u krueng
Neukayoh rijang u kualah
Raja muda leupah u laot
Laen di likot bansineuna

Bangta Sulotan dilee sidroe
Laen sinaroe sajan raja
Sare troh jalo dong meusapat
Raja muda that ate suka

Neucok kawé neuboh umpeuen
Neulhom tuan sigra-sigra
'Oh meulayang neutiek kawé
Ka jicok le eungkot raya

Bangta rinthak tarek rijang
Jalo meulinggang meugisa-gisa
Eungkot jibaplueng kawé meutreung-treung
That meudeungong hana tara

Simalam suntok jibaplueng sabe
Han ek mate eungkot raya
Watee 'isya awai malam
Dua go lham jibaplueng lanja

Teukeudi Allah eungkotpi mate
Neutarek le sigra-sigra
Ban sare troh u bineh jalo
Neuhei bantu uleh raja

Wahe adoe tulong kamoe
Tajak keunoe sigra-sigra
Keunoe rijang eungkot raya that
Tajak siat adoe raja

Kaphe maleu'un laknat Allah
Khem meuhah-hah dumjih rata
Han jitem bantu kaphe pindoe
Muda samlakoe payah raya

Sare meu-moh neutarek sidroe
Kaphe sinaroe jikhem lanja
Sae khak-khik dum sinaroe
Kaphê pindoe sulet raya

Bangta Sulotan muda samlakoe
Neuyue tulong droe hirojih hana
Peuranggi kaphe alaihen laknat
Jikhem leugat si ceulaka

Di jih bandum sapeue sare
Hana kawé bandum rata
Bangta Sulotan keunong tipee
Raja seudee boh ranjana

Han jibantu dum jiiem droe
Bandum sinaroe le bicara
Nak meung payah Bangta Sulotan
Mangat tuan jiboh mintra

Lom neumeuhei bantu kamoe
Tatarek keunoe eungkot raya
Han jideungo raja beudeubah
Bangta payah hana tara

Sare leumoh payah badan
Sidroepi tan jitem teuka
Teukeudi Allah kuasa Tuhan
Beudoh junjongan raja muda

Eungkot neuhila ceukeng-ceukeueng
Reubah teugageueng u laot raya
Jalo meulinggang raja reubah
Neubalek pantah sigra-sigra

Kada lhee go neubalek-balek
Bangta han ek payah raya
Neumeuhei bantu mate kamoe
Tabalek kamoe adek raja

Kaphe bajeueng laknat Allah
Khem meuhah-hah leumah jungka
Bangta Sulotan lham-lham timue
Badan rudui leumoh raya

Han jipeurab dumjih sare
Bahle mate gadoh nyawa
Bangta Sulotan neucaphuek-caphuek
Droeneu buhuek langue lanja

Jalo ka tinggai han ek balek le
Sigala kaphe tahat guranta
Jikheun bandum bahle mata
Mangat ate si ceulaka

Teuma neulangue laju u laot
Meuteumeung eungkot raja beurala
Jipeutimue droe ruengjih leumah
Geulumbang bicah meuceuncala

Neueu ie laot mirah sare
Teumakot ate raja muda
Bangta Sulotan langue keunan
Ateueh eungkot nyan nyang that raya

Neudong bak ulee jime laju
Troh bak jalo dilee nyang ka
'Oh sare troh bak jalo nyan
Neulumpat keunan sigra-sigra

Teuma neubalek pantah-pantah
Neuek u ateueh raja muda
'Oh ban leupah Bangta lam jalo
Eungkotpi laju seunom lanja

Teuma neuboh ie pantah-pantah
Raja payah mirah mata
Abeh neuboh neuseuet ngon amak
Lheueh nyan neuduek raja muda

Neucok kawé mat u jaroe
Neutarek jinoe eungkot raya
Rab-rab teungoh ka han ek le
Meunan sabe rok-rok masa

Kaphe ceulaka han jibantu
Jikhem laju asoe nuraka
Teukeudi Allah Rabbon 'Alamin
Leupah yoh nyan ek neuhila

Ban sare troh dalam jalo
Eungkot teudu bube raya
Bangta Sulotan payah han ban
Krot-kreuet badan hana tara

Kaphe maleu'un dum ka jieh
Teungeut abeh bansineuna
Kaphe paleh teungeutjih tan
Seungap tuan han le suara

Bangta meuhei han jiseuot le
Bandum sare seungap simua
Yoh nyan Bangta peureubah droe
Leumoh asoe jeuep anggeeta

Raja neueh teungeut pangsang
Han neutujan raja muda
Badan payah teungeut mangat
Nafah hat-huet bube-be raya

Raja Peuranggi teuma peurab
Jikalon teungeut hana tara
Laju jiek jiduek bak ulee
Jieu lagee raja muda

Raja Peuranggi boh hekeumat
Raja laknat asoe nuraka
Mintra jiboh hana padoe
Rab toe sampoe gadoh nyawa

Jimat bak badan leumoh asoe
Raja pindoe ate suka
Teuma jicok sikin u jaroe
Jikoh takue raja muda

Han jipajoh sikin patah
Yoh nyan gundah asee ceulaka
Jicok lom ganja jitop di pruet
Nyanpi han lut hana luka

Lheueh nyan jiboh laju hekeumat
Kaphe laknat asoe nuraka
Larab that keunong hekeumat jipasoe
Muda samlakoe pangsang raya

Teuma lheueh nyan jitiek u laot
Kaphe laknat troh ban pinta
Mangat ate dum sinaroe
Teuma jiwoe kaphe ceulaka

Ate mangat aneuk bisoe
Meuteumeung putroe indah rupa
Kee kaintat euntreuek bak putroe
Ulonteu mampleue lam istana

Meunankeu nait Raja Peuranggi
Ate beureuhi dalam dada
La ilaha illallah
Poteu Allah balah guna

Bangta Sulotan dalam laot
Jinoe lon seubot raja ceulaka
Raja Peuranggi kaphe pindoe
Jikheun jinoe bak rakyat dumna

Gata bandum teutap sinoe
Ulon jak woe dalam istana
Bek tajak-jakpi meusidro
Lon woe bak putroe hana peue gata

Peue Buet tajak rame-rame
Raja ka mate lam laot raya
Adat meunan tuanku droe
Neuwoe jinoe po meukuta

Raja Pewranggi kaphe pindoe
Jiwoe bak Putroe Sunoe muda
Putik pisang klat jantung pisang nu
Soe di leupu lam istana

Nabu kamoe di meuligoe
Soe nyan adoe raja muda
Teuma jiseuot rijang-rijang
Jak keunoe tuan he teumuda

Putroe neutren u seuramoe
Sira neumoe ro ie mata
Droe ka neutupeue raja han le
Jipoh mate le si ceulaka

Putroe jingeuk rot rueueng sandeng
Neukeureuleng ngon iku mata
'Oh neukalon kaphe bajeueng
Laju neutanyong ho ka raja

Ho ka dalem wahe adoe
Hana lagoe sajan gata
Raja Peuranggi seuot sipatah
Dalem payah hana tara

Euncit meujaga bak keumawe
Payah sare raja muda
Neutarek eungkot simalam suntok
Gop nyan dawok teungeut raya

Han ek neuwoe neueh di keude
Eungkot neuyue me ubak gata
Teungeutnue that hana padan
Reubah pangsang sangat indra

Putroe Sunoe muda bangsawan
Lhok teunuban panyang bicara
Neungieng bak rupa neungo bak narit
Karinah sulet hantu beudeuga

Pakon meunan peue han ek woe
Hana tapeugoe uleh gata
Ulon peugoe cit keubit-keubit
Neukheun teungeut mumang raya

Putroe Sunoe cit areh that
Neucue tungka raja muda
Yoh nyan neukheun putroe bintang
Sira mumang peugah haba

Pakon han tapoh ureueng dungee
Han meulagee kureueng bahgia
Teuma seuot Raja Peuranggi
Kaphe deungki asoe nuraka

Dalem ka kupoh baroe di laot
Tatueng kamoe jeuet keu judo gata
Ulon ka lon woe bak gata putroe
Tabri lon gantoe raja muda

Ban putroe ngo haba meunan
Neumoe yoh nyan hana tara
Neuklik kong that neusumpomdroe
Meutaloe-taloe ngon ie mata

Raja Peuranggi putrie carot
Dum ujeuen sret neuseurapa
Mate aneuk raja pindoe
Kahkeu sidroe asoe nuraka

Kacok lakoe kee kaboh tipee
Raja asee biek beudeuga
Kajak peungeut mita eungkot
Hana patot kapoh raja

Allah Allah Raja Peuranggi
Peurangui deungki gajah sula
Biek si geucang kaphe bajeueng
Bangsa kureueng geupubloe ba

Bukon paleh si geukoh ulee
Jijak boh euntee raja muda
Wahe teungku gata ka mate
Jipoh le kaphe Hindu beudeuga

Gata ka mate teungku pangulee
Hokeu troh kee judo raja
Allah Allah neuba lon sajan
Judo badan jienaya

Cit han lon bri neumeurakan
Kaphe nyan tuan musoh pusaka
Han neupateh judo meutuah
Ulon peugah po meukuta

Allah hai judo ho kutiek droe
Han le kamoe udep lam dony.
Wahe judo myang pangulee
Sohkeu juree 'oh tan gata

Gata sidroe mate lam laot
Hana patot judo raja
Kaphe ceulaka laknat Allah
Gata jipoh di laot raya

Ate lon tutong bagoe geureundang
Neutueng lon rijang po meukuta
Putroe Sunoe muda bangsawan
Neumoe yoh nyan hana tara

Ok di ulee neugeureubang
Neumoe jamong lam istana
Teuma neucarot Raja Peuranggi
Anjeng babi asoe nuraka

Judo kee kapoh raja asee
Kaboh tipee he ceulaka
Allah hai paleh biek si geucang
Buya timang rimueng seuba

Putroe carot ban keumang beureuteh
Raja paleh pucat muka
Ureueng laen hana lon peugah
Panyang kisah le calitra

Teuma jimarit raja pindoe
Bek le hai putroe meuseurapa
Nyoe leupeue lon keu geunantoe
Tatueng kamoe keu judo gata

Pakon tacarot judo meutuah
Lon sidroe sah keu lakoe gata
Tabuka pinto poutroe beurijang
Han ek le lon dong jeh 'oh masa

Tirut beuteh meudong sinoe
Gata putroe meuseurapa
Tatueng ulon keu asoe juree
Harok tha kee gata jroh rupa

Bangta Sulotan nyang jeuet kupoh
Gata saboh lon that hawa
Ban putroe ngo narit meunan
Beungeh han ban hu ngon mata

Teuma neukheun bak Raja Peuranggi
Han kapike hai ceulaka
Kakira galak lon that keu kah
Lakoe kapoh keu kee kahawa

Meudum-dum kah kaphe jahannam
Adat Islam han kuhawa
Pura-pura droe tamong Islam
Iblich jahannam syetan raya

Adat bit kah tamong Islam
Lahe baten kah samporeuna
Adat meunanpi han kutem
Buet kah lalem kapoh raja

Hana harok dikee keu kah
Hai gajah plah rimueng seuba
Yoh nyan pinto neuboh gunci
Raja Peuranggi leugat yue buka

Wahe putroe tabuka pinto
Lon keumeung lalo pok bak gata
Gata putroe kuat ceumarot
Tacok eungkot sigra-sigra

Tatueng kamoe nyoe keu judo
Buka pinto putroe muda
Nibak neubuka ka neutumbok
Putroe neuek otk lam istana

Tuan putroe ek lam meuligoe
Raja pindoe lon calitra
Raja Peuranggi jiproh pinto
Leupah jilalo lam istana

Pinto beukah dum meukeupeng
Ate gigeng raja ceulaka
Jitiek eungkot di seuramoe
Putroe Sunoe jihei lanja

Tatren keunoe tuan putroe
Nyoho kamoe judo gata
Putroe Sunoe maken kiroh
Keubeue meureugoh asoe nuraka

Raja Peuranggi lom jiproh pinto
Leupah jilalo lam istana
Dua boh pinto beukah sare
Raja kaphe that peurkasa

Ban sare troh leupah u rambat
Putroe Sunoe that meuseurapa
Putroe neuplueng leupah u dapu
Neucok ie ju sigra-sigra

Neumat ngon aweuek nibak jaroe
Neuseuet jinoe raja ceulaka
Sare gram-grum neuseuet ie ju
Dum abeh lhu kulet muka

Dumnann tutong hirojih tan
Putroe tuan cit jiraba
Putroe Sunoe jidrop han jeuet
Abee neuseuet dum bak muka

Abee seuuem dum neuseupreuek
Apui meumeuk mirah wareuna
Ija bajee apui pajoh
Tutong tuboh han jikira

Abeh abee dum bak dapu
Geunuku neueumpu ateueh muka
Darah teupanca mirah tuboh
Geunuku pajoh teupluek anggeeta

Raja Peuranggi teugom putroe
Troh bak sagoe dapu raya
Peue meulintah neusrom abeh
Neueumpujih dum bak muka

Dumnann neusrom hana uga
Badan meudarah abeh luka
Putroe Sunoe plueng u juree
Laju neukajee neuek u para

Pinto neuganceng gunci neuboh
Nyanpi reuloh beukah dua
Abeh jitrom pinto hanco
Leupah lalo raja ceulaka

Jilop lam tiree mita putroe
Jeuep-jeuep sagoe jieu rata
Abeh jisintak tiree keuleumbu
Teumpat beuradu raja muda

Sare peungeuh dum jituweueh
Seun rot leumah putroe muda
Duek bak para junte kaki
Raja Peuranggi ate suka

Teungoh jimeung mat kaki putroe
Neutrom jinoe ateueh muka
Pakon meunan tuan putroe
Tatrom kamoe he nang nyawa

Tatren keunoe poutroe rijang
Hana sayang nyan keu hamba
Nyopat bak bahoku tagidong
Tatren rijang putroe muda

Putroe Sunoe neuceumarot
Dum ujeuen sret hana reuda
Mate geutop biek sigeucang
Kaphé bajeueng gajah sula

Biek sipaleh raja asee
Hana malee biek beudeuga
He maleu²un raja pindoe
Kah sidroe asoe nuraka

Peue buet kaek keunoe bak kee
Raja asee ban bui buta
Tajo keunoe tajo keudeh
Na ri paleh waba puta

Wahe putroe judo bangsawan
Pakon intan meuseurapa
Keupeue tapeugah meudeh meunoe
Ulonteu nyoe judo gata

Adat tajak keunoe laju
Meudawok karu mantong kubra
Lon nyang gantoe Bangta Sulotan
Bek le tuan meuseurapa

Gata putroe tangke ate
Tren keunoe he cahya mata
Putroe seurapa meuturot-turot
Han meubacut masam muka

Dum geugusuek meunan mangat
Raja laknat gundah hana
Narit ban buet jipeuayang
Geutop geucang han jikira

Di jih putroe jihei sabe
Beureuhi ate kaphe ceulaka
Putroe Sunoe saket ate
'Iek neutoh le dalam ija

Teuma neuseuet sare meuree-ree
Ateueh ulee ngon bak muka
Neukira jiweh rijang-rijang
Mate geucang umpeuen buya

'Iek nyang neuseuet ateueh ulee
Jiniet ie mawo minyeuk ata
Ulee jitheun jiweh han le
Hindu kaphe ate suka

Abeh jilumue dum bak badan
Jirahop yoh nyan troh bak muka
Putroe neuue dum peurintah
Maken gundah hana tara

Neukeumeung sakai hana kayee
Neutrom di ulee hana reuda
Mata u ateueh jingieng bak putroe
Tatren keunoe he nang nyawa

Meuhan tatren kuek keunan
Pakri kaman takheun sigra
Putroe Sunoe neubeudoh dong
Neutrom bak idong ngon bak muka

Dalam idong darah meujojo
Hana hiro raja ceulaka
Putroe Sunoe grop di manyang
Laju neuplueng ubak cutma

Teudong Jatara lhee meureuntang
Raja suang keunan teuka
Po ma pundok mat di jaroe
Jatara cakcoe na bube pha

Putroe Sunoe neumat batee
Raja seudee peurab lanja
Jimeureunggot jikeumeung runghom
Sare tam-tum ateueh muka

Po ma neusakai meuturot-turot
Putroe di likot sakai lanja
Raja Peuranggi beungeh han so
Po ma seudoe roh lam mata

Bukon paleh ka buta kee
Pakri lagee saket raya
Teubiet ie mata gram-grum ile
Gundah kaphe ka rab buta

Jitren jiwoe Raja Peuranggi
Ubak keude le jiguda
Mata jithuep han jeuet bleut le
Ie mata ile meubura-bura

Rakyat kalon han jijeuet tanyong
Jieu bangon beungeh raya
Troh u keude jiboh ubat
Puleh ban sot peungeuh mata

Raja Peuranggi that guransang
Lom jiriwang sigra-sigra
Han jimeuhei jeuek leugat
Putroe Sunoe that maken kubra

Bukon paleh raja pindoe
Peue buet keunoe lom jiteuka
Po ma beungeh hana padoe
Pundok bak jaroe han ban peubla

Sakai bak ulee poh bak beuteh
Raja paleh reubah teurhanta
Badan keumong hana padan
Reubah sinan raja ceulaka

Bah karasa kutok Allah
Sare meu'ah-'ah teudu lam guha
Putroe Sunoe cok batee seunungkee
Eumpu di ulee kaphe beudeuga

Beukah ulee keunong batee
Raja seudee bah karasa
Batee seunungkee abeh beukah
Neubet pantah batee raya

Batee seunupeh teuma neusumpom
Nyanpi ka lom beukah dua
Raja Peuranggi mantong iem droe
Tajo putroe neugidong dada

Neutrom di muka sipak bak ulee
Abek lagee putroe peurasa
Mata neupeubleut neuprue abee
Raja seudee klik meu'a-'a

Peudeh meuhop-hop miseue roh camplici
Raja Peuranggi beungeh raya
Teuma jimarit wahe putroe
Tapoh kamoe he nang nyawa

Ingat keudroe judo meutuah
Abee taboh dalam mata
Klik meu'i-'i peudeh meuhop-hop
Saket sangat hana tara

Putroe Sunoe saket ate
Neuculek le dalam mata
Abee neuboh dum neupasoe
Raja pindoe bak karasa

Raja Peuranggi han ek beudoh le
Sinan meugule dalam guha
Teuma neuweh tuan putroe
Tren jak manoe bak teulaga

Badan najih iek meuligan
Neujak rijang manoe meuupa
Neujak u mon putroe manoe
Neupleu asoe pat nyang leuta

Sira manoe neumoe bae
Ingat keu judo raja muda
Neudeumpek-deumpek Putroe Sunoe
Teungoh manoe bak teulaga

Po ma neutren lam meuligoe
Neukalon putroe pakon kubra
Po ma ka troh keunan bak mon
Teuma neutanyong sigra-sigra

Pakon tamoe boh ate nang
Peugah rijang bijeh mata
Wahe po ma bek neutanyong
Weuehku jamong keu raja muda

Allah hai aneuk muda bangsawan
Kheundak Tuhan ka troh masa
Bek tamoe le aneuk teungku droe
Tuhan sidroe nyang keukira

Saba beuthat boh ate nang
Bek le jamong bijeh mata
Meunan nasib nibak allah
Pakri tabah geutanyoe hamba

Bek tamoe le aneuk meutuah
Peujok bak Allah dum peukara
Ureueng saba raya faidah
Meunan peuneugah dalam sabda

Di gata aneuk cit maklumkan
Bahle lon kheun ban peurunoe gata
Inna l-laha ma'a s-sabirin
Meunan Neukheun uleh Rabbana

Poteu Allah Tuhan Ghani
Limpah neubri akan hamba
Ureueng saba hana gundah
Sajan Allah nantiasa

Po ma peurab ubak poutroe
Neuuet asoe pat nyang leuta
Putroe Sunoe meusok-meusok
Po ma dawok peugot basa

Bitpi meunan po ma kheun ban
Moe cit sajan ngon putroe muda
Han ek neutheun weueh that ate
Kareuna han le peugawe donya

Rupa ilok hana bagoe
Muda samlakoe raja muda
Raja ka mate dalam laot
Kaphe laknat peubinasa

Neumoe yoh nyan meusok-meusok
Po ma dawok alet ie mata
Neuteuoh hai raja mate
Buet si kaphe nyang enaya

Sayang mate muda samlakoe
Teuduek sidroe di laot raya
Soe kalon tan droeneu sidroe
Muda samlakoe sayang lagoina

Teukeudi Allah peurintah Rabbi
Trep that Siti bak teulaga
Lale ngon po ma teungoh manoe
Sira neumoe nyan bandua

Seun rot rioh di meuligoe
Jatara sidroe kiam raya
Jikalon raja teudong bak guci
Teungoh jicrong ie ngon srah muka

Cinu di jaroe jisrah ulee
Raja seudee ka ban nyang ka
Puleh ban sot teuga badan
Jatara tuan jiplueng sigra

Troh ubak mon jiplueng pantah
Teuma jipeugah nyan bak po ma
Raja Peuranggi nyar. ka puleh
Raja paleh that ceulaka

Jidong bak guci muka jisrah
Meunan jipeugah uleh Jatara
Ban putroe ngo meunan peuneugah
Neuplueng pantah neujak peunyata

Putroe neuk le u meuligoe
Raja pindoe seun rot teuka
Roh meurumpok nyan meuteuntang
Jirungkhom rijang putroe muda

Han jiteumeung neugrop pantah
Neuplueng leupah lom u para
Keudeh jiseutot jiek leugat
Raja kaphe that ate suka

Jikalon teulhon badan putroe
Raja pindoe pungo gila
Badan jeunjang that meulaku
Glum meutabu peunoh dada

Rupa jroh that tamse bintang
Raja suang ate suka
Han jan meusalen ija basah
Neuplueng pantah u istana

Meunan teulhon ijaneu tan
Deuhkeu badan jieu rupa
Raja Peuranggi harok keu putroe
Sare wah-woe ate suka

Teuma marit raja Peuranggi
Jinoe pakri toh bicara
Tatren keunoe tuan putroe
Napsu kamoe that keu gata

Napsuku that hana padoe
Bek le putroe tameuseunda
Putroe Sunoe kheun geukoh ulee mbah
Kaphe beudeubah asoe nuraka

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Pakon kah meuhei mate geucang
Kaphe suang gajah sula
He putroe bek tameuayang
Tren rijang judo muda

Ate beureuhi keu gata putroe
Meugoh lom sampoe napsu hawa
Putroe carot ban beureuteh
Raja paleh maken suka

Tuan putroe neuduek mantong
Raja eungkong meuhei lanja
Teuma jiek raja pindoe
Neugrop Putroe Sunoe muda

Sira neucarot neuplueng leugat
Putroe Sunoe that lhok bicara
Neubeuet hekeumat tuan putroe
Raja pindoe keunong mintra

Mata seupot han leumah le
Raja kaphe bah karasa
Jijak king-keueng teugeutit-geutit
Han sapeue jeuet mata buta

Putroe Sunoe teuma peurab
Nyoe kee kadrop hai ceulaka
Ban jideungo suara putroe
Ban bui tuloe jirumpuet lanja

putroe surot teuma neuweh
Jikogn tameh miseue geumpa
Ulak u likot reubah teulinteueng
Jibeudoh mameung lom jiraba

Teuma neudong di geunireng
Keunoe kangieng hai ceulaka
'Oh jigrak droe jimeung teugom
Meupok tameh lom reubah teurhanta

Dhoe meuhi-hi teubiet darah
Muka mirah troh u dada
Tuan putroe dong rot likot
Teuma neuseuot neumeusura

Raja Peuranggi riwang u likot
Baro jireunggot sret lam guha
Leupah boh pha roh teusuruek
Putroe teupuek teuma di muka

Nyan karasa raja laknat
Peuturot that napsu hawa
Muka asee peuturot napsu
Abeh umu han jikira

Di jih laju jiraba putroe
Pat meubunyoe na suara
Tuan putroe neuweh ninan
Raja kaphe nyan meuraba-raba
Tameh jikong dhoe meudarah
Laknat Allah asoe nuraka
Trep nyang meunan umu lhee uroe
Raja pindoe jikong istana

Putroe Sunoe le that lagee
Neupeuseudee raja ceulaka
Droeneu han le neuduek sinan
Neuweh yoh nyan sajan cutma

Sideh neuheh uroe malam
Raja jahannam meuraba-raba
Jan-jan seungue hana le su
Jiheh laju putore muda

Pat meubunyoe jideungo su
Jiplueng laju le jimita
Tameh jikong malam uroe
Jak raba Putroe Sunoe muda

Binteh ngon tameh jipok tam-tum
Meujan kram-krum sret lam guha
Meunakeu sabe baranggajan
Sitree Tuhan kaphe meureuka

Putroe Sunoe muda bangsawan
Le peurasan dalam istana
Hireuen tahe tuan putroe
Neukalon proe raja ceulaka

Trep-trep siseun neupeurab putroe
Cukeh bak dhoe Hindu beudeuga
Neungui ngon minyeuk boh bak ulee
Raja seudee pungo gila

Jirumpuet keudeh neugrop keunoe
Putroe Sunoe utoh raya
Raja Peuranggi mabok ngon bee
Raja seudee rimueng seuba

Geunuku di dapu abeh hanco
Putroe eumpu ateueh muka
Putroe Sunoe le that lagee
Raja seudee neupeusinga

Peurasan le lam meuligoe
Nibak Putroe Sunoe muda
Raja Peuranggi cula-caloe
Jeuep-jeuep sagoe meuraba-raba

Jimita putroe han jitupat
Raja kaphe that duka cita
Wahe putroe tango kamoe
Peurab keunoe he nang nyawa

Pakon tabeunci keu lon sidroe
Jeh 'oh uroe han tateuka
Ho ka tajak tuan putroe
Tatueng kamoe judo gata

Putroe neukheun bek kameuhei
Pakon kiam hai ceulaka
Nyopat kamoe di geunireng
Pungo mantong kaphe buta

Patteu lagoe soe marit nyan
Pakon meunan tameuseunda
Nyopat kamoe meudong di keue
Wahe dajeue kaphe ceulaka

Lom jiraba meu'eue-meu'eue
Tan na sapeue pakon meuseunda
Putroe Sunoe cukeh bak keueng
Raja bajeueng meuraba-raba

Pat droe putroe pakon taiem droe
Tajak keunoe he adekda
Putroe Sunoe neukheun nyoe ban
Pakon kaphe nyan le bicara

Muka ri asee meuhei kamoe
Khut taiem droe asee ceulaka
Raja Peuranggi marit leugat
Gata kuat meuseurapa

Bek le po cut carot kamoe
Peurab keunoe bungong jeumpa
Dumnan geucarot bakjih mangat
Kaphe laknat asoe nuraka

Teuma marit tuan putroe
Neukheun meunoe di nap mata
Bit kaphe nyoe pungo gajah
Han ubah mbah waba puta

Cit ka meubiek haram jadah
Kreueh that babah ate buta
Leubeh kreueh nibak batee hitam
Han tamong eleuham dalam dada

Jeup-jeup nanggroe nyang ka kujak
Han tom meurumpak meunoe rupa
Subhanallah 'amma yasifun
Han tom kukalon meunan nyang ka

Kata dalang eumpunya rawi
Tadeungo he lam katanya
'Ajab tadeungo ureueng keuramat
Allah peuseulamat nibak bala

Bak ri adat han lheueh keu putroe
Raja pindoe that angkara
Kareuna putroe ureueng inong
Leumoh tuan bak ri rupa

Raja Peuranggi ureueng lakoe
Kuat bak Putroe Sunoe muda
Nibak Allah hana meunan
Sipeurti fireuman Allah Ta'ala
Wa lan yaj'ala l-lahu li l-kafirina
'ala l-mu'minina sabila
Hana neupeujeuet uleh Allah
Bak kaphe beudeubah seumbah beurala

Ateueh bandum ureueng mukmin
Keunan jalan Tuhan neurela
La ilaha illallah
Sahib kisah nyang calitra

Amma bakdu dudoe nibak nyan
Nyoe laen ban lon calitra
Putroe Sunoe meunyum enseueh
Neukalon weueh meuraba-raba

Putroe keuramat gaseh Rabbi
Hana deungki dalam dada
Teuma neupeupuleh mintra neuboh
Seun rot peungeuh le ngon mata

'Oh ban leumah jieu putroe
Raja pindoe suka rasa
Jitajo le teugom keunan
Marit yoh nyan putroe muda

Pioh dilee bek that krah-kruh
Jinoe kupeutroh ban kapinta
Meubek kamat-mat badanku nyoe
Ingat keudroe kah binasa

Meubit napsu keu lon sidroe
Kame keunoe peutoe kaca
Sinan kuduek dalam peutoe
Jak cok jinoe pantah sigra

Meupeutoe nyan peue talakee
Siploh ribee ek kupeuna
Putroe neukheun bahle meunan
Jak cok kaman keunoe sigra

Ban jideungo haba putroe
Jitren jiwoe raja ceulaka
'Oh sare troh ubak keude
Ka jicok le peutoe kaca

Jiba ngon rakan teuma peuet droe
Jiyue me peutoe uleh raja
Jime laju ubak putroe
Raja pindoe galak raya

Ban sare troh u meuligoe
Jiek bak Putroe Sunoe muda
Wahe putroe judo bangsawan
Nyopat tuan peutoe kaca

Putroe Sunoe teungoh pajoh bu
Sideh bak dapu sajan cutma
Raja Peuranggi kaphe pindoe
Jihe putroe saleh ho ka

Putroe seuot hai nyopat kee
Raja seudee kiam kubra
Nyoe leupeue peutoe nyang talakee
Jak eu dilee judo muda

Kakeubah sinan raja bajeueng
Meukako mantong po ceulaka
Tajak keunoe tuan putroe
Trep that lagoe nyan tateuka

Bukon paleh kukheun nyopat kee
Kapreh dilee bek that kubra
Po ma neumoe ngieng bak putroe
Meuteutaleo ngon ie mata

Weueh neupandang aneuk boh ate
Jime le kaphe putroe muda
Neugusuek di rueng neucom di mieng
Teungoh neungieng-ngieng peupueh mata

Han gadoh meusyen deungon putroe
Po ma neumoe hana tara
Sare 'a-'i neumoe jamong
Meugeulumbang ngon ie mata

Putroe Sunoe panyang teunuban
Gaseh Tuhan ateueh donya
Di donya kon troh akhirat
Neubri teupat lam syeuruga

Kareuna ate that ekheulah
Miseue tuah Baren Miga
Putroe tanyong pakon tamoe
Ma teungku droe bek that duka

Pakri han kumoe aneuk boh ate
Jiba le kaphe bijeh mata
Bek taweueh le po ma badan
Kheundak Tuhan beutarela

Talakee do'a ma teungku droe
Keu lon sidroe bek na reuda
Mudah-mudahan tulong Rabbi
Tuhan neubri woe bak gata

Raja Peuranggi kaphe laknat
Jih kupeungeut kaphe ceulaka
Kupadan-padan insya Allah
Bek le gundah po ma raja

Kuboh tipee raja pindoe
Deungon kamoe musoh raya
Teutop napsu Raja Peuranggi
Han Tuhan bri ban jih pinta

Kulakee tulong nibak Allah
Tuhan peuleupah nibak bala
Beureukat syafa'at Nabi Muhammad
Tuhan Hadarat nyang peulara

Tateumeung kalon lom ulon woe
Bek le tamoe po ma raja
Lheueh neukheun nyan tuan putroe
Com meumoe-moe deungon cutma

He ma teungku deungo kamoe
Geunap uroe talekee do'a
Do'a seulammat neuleueng ngon jaroe
Bak Allah bri kamoe leupah lam bahya

Teuma neuseumbah uleh putroe
Po ma sidroe ro ie mata
Wahe putroe aneuk meutuah
Ubak Allah kupeujok gata

Beuseulammat aneukku putroe
Beumeuteumeung woe lom bak po ma
Putroe Sunoe teuma beudoh
Neukalon deuh kaphe ceulaka

Banlimongjih jiduek sapat
Putroe Sunoe that meuseurapa
Po bajeueng nyoepe le padan
Sitree Tuhan asoe nuraka

Peubuet keunoe limong-limong
Kaphe bajeueng kuteumeung tanpa
Bit ri asee kaphe piko
Sigo sapo kutrom bak muka

Leupang-leupeung neutrom di ulee
Kaphe seudee sret ie muka
Teusireuk gaki neutrom di rueng
Sret lam leubeueng meuseubee muka

Jibeudoh jiplueng jiwoe leugat
Putroe Sunoe that meuseurapa
Neupoh bandum neutrom di ulee
Raja seudee meusuara

He putroe cut muda bangsawan
Pakon he intan meunan gata
Pakri han meunoe raja bajeueng
Keupeue ureueng keunoe kaba

Soe me gata tuan putroe
Rakan kamoe he nang nyawa
Bit kaba kee kakheun jinoe
Toh na keunoe peutoe kaba

Kame keunoe rijang-rijang
Kaphe suang nak troh pinta
Kaphe beudoh mangat ate
Peutoe jibet le sigra-sigra

Jipeuduek u nap Putroe Sunoe
Mate keudroe waba hila
Trohkeu napsu meunan waham
Kaphe jahannam harok raya

Yoh nyan cut gle raya ate
Han meukri sakri raja ceulaka
Ulonteu sidroe bit meusampe
Meuteumeung kande tanglong peulita

Jinoe jadeh jih nyan keu kee
Lon eu jilakee peutoe kaca
Kamoe dua meuduek lam peutoe
Sajan putroe indah rupa

Teuma kuwoe keudeh u nanggroe
Deungon putroe sajan kuba
Meunan waham raja beudeubah
Peurintah Allah han jikira

Di jih 'oh droe jimat gayam
Cit ka meunan kaphe ceulaka
Putroe Sunoe ek u leupu
Sikin neuueu sigra-sigra

Sikin dawan neumat u jaroe
Putroe Sunoe lhok bicara
Teuma neumarit tuan putroe
Kabuka peutoe jinoe sigra
Kukeumeung tamong dalam peutoe
Kabuka jinoe he ceulaka
Raja Peuranggi buka peutoe
Neutamong Putroe Sunoe muda

Teuma neulakee gunci u jaroe
Jijok jinoe yoh nyan sigra
Peutoe neugunci keudeh u dalam
Raja jahannam bah karasa

Teutap teuduek Putroe Sunoe
Jicok le peutoe jime sigra
Peutoe jibaplueng laju u keude
Rakyat rame dum ka teuka

Jieu putroe miseue bintang
Kaphe suang suka rasa
Han tom jieu siumu nanggroe
Dumnannan putroe indah that rupa

Sigala kaphe ate beulisah
Tijoh ie babah bandum rata
Jipeuduek peutoe dalam keude
Marit Peuranggi raja ceulaka

Wahe rakan jak tren jinoe
Bek meusidroeu tinggai gata
Sare abeh rakyat lalo
Jitop pinto sigra-sigra

Jiboh gunci rijang-rijang
Raja suang suka rasa
Teuma jipeurab ubak putroe
Tabuka peutoe he nang nyawa

Kukeumeung tamong keunan sajan
Taduek tuan sapat dua
Teuma seuot tuan putroe
Kango kamoe he ceulaka

Meukah sidroe jeuet kutipee
Adat meubee bek karasa
Pakriku kee tuan putroe
Teubiet keunoe po jroh rupa

Han kuteubiet raja ri asee
Bah kacom bee sinan di lua
Tango lon kisah Raja Peuranggi
Peutang pagi meuraba-raba

Peutoe jilingka ueh ngon teuot
Sare meupot-pot raja ceulaka
Putroe Sunoe duek lam peutoe
Dawok neupujoe Allah Ta'ala

Neuseubot Tuhan do'a neubeuet
Teuma seulaweuuet akan anbia
Sira neuduek afai Quruan
Lam peutoe nyan rok-rok masa

Raja Peuranggi kaphe pindoe
Jihe putroe hana reuda
Putroe neuem neuseuot han le
Gundah kaphe pungo gila

Raja Peuranggi tumbok-tumbok droe
Buka peutoe he nang nyawa
Bukon paleh kubri gunci
Kee jitaki sinoe di lua

Pakri lagee tuan putroe
Kee nyoe sidroe sajan gata
Han tateubiet tuan putroe
Kuproh jinoe peutoe kaca
Wahe kaphe cuba kaproh
Takue kukoh bahle fana
Wahe putroe muda bangsawan
Pakon meunan judo muda

Ban jikalon sikin neumat
Raja laknat klik meutaga
Wahe putroe pakon meunan
Bek he intan nyan tapoh droe

Taeu po cut nyan keu abang
Gaseh sayangteu keu kamoe
Putroe Sunoe lhok bicara
Sikin neupura mat di jaroe

Raja Peuranggi teumakot that
Jiplueng siat peusiblah droe
Sare jiweh Raja Peuranggi
Tuan Siti duek teupipoe

Sikin neukeubah di geunireng
Raja keureuleng neukalon proe
Teuma jipeurab Raja Peuranggi
Jilise-lise lingka peutoe

Teuotjih ueh abeh luka
Han jikira kaphe pindoe
Putroe jimeuhei hana reuda
Raja ceulaka beureuhi asoe

Peutoe jilise uroe malam
Raja jahannam harok keu putroe
Teuma marit Raja Peuranggi
Tabuka gunci siat peutoe

Keupeue takeubah kee di lua
Peutoe tabuka tuan putroe
Kukeumeung duek sajan gata
Dua-dua dalam peutoe

Peuekeu untong keu kee tabri
Peue jeuet po Ti kuduek sinoe
Gata di dalam tateubiet han
Pakon meunan tapeungeut kamoe
Wahe putroe tangieng keu abang
Tabri kutamong dalam peutoe
Pakon meunan tapeungeut kee
Judo pangulee keumala nanggroe

Putroe Sunoe hironeu tan
Dawok Tuhan nyan neupujoe
Raja Peuranggi meuhei leugat
Beureuhi that geunta asoe

Wahe po cut judo bangsawan
Pakri padan keu kee jinoo
Pakon meunan judo meutua
Kee takeubah di lua sidroe

Raja Peuranggi that beulisah
Teuot meudarah hana padoe
Lam ji'eue-'eue meuraba-raba
Peutoe jilingka geunap uroe

Bu deungon ie han jihiro le
Di jih ate cit keu putroe
Badan pijuet bu tan sagai
Meunankeu hai raja pindoe

Gop han sidroe jijeuet peurab
Jih beungeh that hana bagoe
Meunan-meunan baranggajan
Jigusuek tuan di lua peutoe

Meu'eue-meu'eue jak peuet gaki
Ban bubiri kameng pindoe
Jak peuet gaki meugeunireng
Mata keureuleng ubak putroe

Raja Peuranggi abeh neutuban
Abeh bangon jimeu'en droe
Umu sibuleuen han tom jieh
Raja paleh sare wah-woe

Raja Peuranggi pike lam ate
Han lagee le bak teumpat nyoe
Gotkeu kuwoe di kee jinoo
Kuba putroe nyan u nanggroe

Raja Peuranggi laknat Allah
Putroe jikeubah dalam peutoe
Bah teuduek nyan dilee siat
Lon peuwoe ayat miseue nyang ka

Jipeuduek putroe dalam peutoe
Raja pindoe teuma bungka
Jiwoe u nanggroe bandum sare
Sigala kaphe ate suka

Pasoe bahtra dum meuneukat
Jiwoe leugat raja ceulaka
Putroe Sunoe jiba sajan
Peuduek tuan dalam bahtra

Sare ase dum jisimpan
Bungka tuan sigra-sigra
Jimeulayeue laju leugat
Angen mangat reumbang pasa

Droe cit ka ngon teukeudi Tuhan
Putroe yoh nyan meusuara
Kadeungo he Raja Peuranggi
Kutanyong kri kapeuhaba

Laot toh kapih judo kamoe
Peugah jinoe kungo nyata
Pakon tatanyong ho tameung me
Bangta ka mate hilang nywa

Ho tame lom keupeue taingat
Judo bek that duka cita
Teuma seuot tuan putroe
Kango kamoe he ceulaka

Han kapeugah kaphe bajeueng
Kukoh reukueng mangat fana
Neumat le sikin neutayang-tayang
Leumah jipandang uleh raja

Wahe putroe kupeugah jinoe
Bek tapoh droe judo muda
Nyoe di sinoe raja mate
Kadang han le ka yee seuba

Jeh 'oh lawet masa mate
Saleh tan le raja sidroe
Keupeue guna nyan takira
Hokeu taba tuan putroe

Teuma seuot putroe eelia
Hai ceulaka ingat keudroe
Ban nyang kukheun bek kasangga
Na ho kuba di kee lakoe droe

Kacuba keubah kee u laot
Beukaikot ban kukheun nyoe
Meuhan kakeubah jinoe rijang
Kukoh reukueng bah kupoh droe

Ban jideungo haba meunan
Jikeubah yoh nyan teuma peutoe
Jilhom u laot sigra-sigra
Peutoe neubuka tuan putroe

Neujingeuk lam ie teuma neupandang
Mayet rijang teuka rab peutoe
Teuma neujingeuk laju u laot
Raja kaphe dhot tuan putroe
Suara kreueh that jigurantang
Peue tapandang he judo droe
Putroe Sunoe teuma ceumarot
Peue meupot-pot kaphe pindoe

Pakon kah tanyong peurbuetan kee
Raja seudee ingat keudroe
Raja Peuranggi han le haba
Han jijeuet dawa tuan putroe

Raja Peuranggi meulayeue leugat
Angen jroh that hana bagoe
Angen jipot barat daya
Got that pasa malam uroe

Tuan putroe dalam laot
Neuduek teutap dalam peutoe
Mata u lua baranggajan
Neujingeuk tuan bak judo droe

Bangta Sulotan raja meutuah
Gaseh Allah Tuhan sidroe
Rab ngon peutoe hanyot leugat
Putroe lihat geunap uroe

Umu sibuleuen peulayaran
Troh kapai nyan dum u nanggroe
Teukeudi Allah Rabbon 'Alamin
Iepi paseueng laot sinaroe

Bangta Sulotan tinggai lam laot
Kaphe kukot woe u nanggroe
Kapai tamong laju u lhok
Rab meutajok bak mieng kualala

Kapai jilhom dum ngon saoh
Beude jicoh meugeumpita
Lheueh nyan teungoh dum u darat
Kappe laknat ate suka

Maseng-maseng woe bak teumpat
Teungoh u darat bansineuna
Putroe Sunoe teuma jipeuwoe
Jiseuon peutoe sigra-sigra

Ban sare troh u leuen meuligoe
Jipeuduek peutoe sikutika
Teuma jipeuek lam meuligoe
Raja pindoe ate suka

Peutoe kaca jiba u leupu
Bak teumpat beuradu raja ceulaka
Raja Peuranggi ate rindu
Jilingka laju peutoe kaca

Bu han makeuen ie han jijep
Di jih galeb meuraba-raba
Lawet lawan troh keunan putroe
Raja pindoe ate suka

Bak siuroe teukeudi Tuhan
Teuka keunan peurumoh raja
Jiduek rab peutoe putroe jipandang
Na ban bintang indah rupa

Teuma jimarit deungan putroe
Pane nanggroe gata geuba
Peue nan gata geuurohan
Peugah tuan kungo nyata

Rupa indah hana bagoe
Soe nan putroe geuhei nama
Putroe seuot rijang-rijang
Pakon tatanyong lon le gata

Nanggroe Makah gampong kamoe
Putroe Sunoe nama hamba
Wahe po cut cuba peugah
Pakri jeuet bah gata geuba
Rupateu jroh miseue intan
Han sipadan ateueh donya
Wahe po cut teubiet keunoe
Sajan kamoe dua-dua

Taduek sapat keunoe sajan
Wahe intan teubiet u lua
Taduek u lua nak tamakeuen
Bu lon taguen nyan keu gata

Lon meupayah po cut bangsawan
Teubiet he intan keunoe sigra
Bek lam peutoe han meulaku
Bak gop nyang eu jiupat ceula

Nyum geutanyoe han sipakat
Teubiet leugat bek meudawa
Teuma jaweueb Putroe Sunoe
Gajah giek nyoe le bicara

Peue kapeugah dara asee
Pakon kah yue kee keunan u lua
Kaphe bajeueng dara suang
Pakon kiam kah ceulaka

Pakon kah taguen kakheun bu keu kee
Kajok keu asee dara ceulaka
Ban jideungo putroe carot
Teuma jiseuot sigra-sigra

Pakon kacarot kamoe sidroe
Aneuk bisoe le bicara
Han thee keudroe teubeulisat
Bukon jeungkat pana tara

Pakon kacarot lakoe kamoe
Han thee keudroe dara geuba
Kapreh dilee kujak peugah
Bahle geuplah kah le raja

Jakleh peugah bek kaduek le
Dara kaphe biek beudeuga
Teuma jibeudoh dara suang
Jipeugah rijang ubak raja

Dara lam peutoe gata jicarot
Babah kreueh that meuseurapa
Kamoe tanyong mangat-mangat
Jicarot leugat teuma gata

Keupeue tako ba inong nyan keunoe
Tayue carot kamoe po meukuta
Putroe Sunoe le that lagee
Moe meu'ee-'ee pura-pura

Meusok-meusok neupeuhit droe
Raja pindoe teuma teuka
Peurab laju Raja Peuranggi
Pakon po Ti tamoe gata

Putroe Sunoe teuma seuot
Lon jicarot jiseurapa
Jikheun keu lon dara jalang
Bukon bubarang hu ngon mata

Jilakee poh kamoe sidroe
Peue han kumoe po meukuta
Hana mulia ulon sidroe
Han kuthee meunoe jiseurapa

Adat meukuthee cit han kujak
Jilakee sipak lon di muka
Jikheun lon langgeh gata sidroe
Kutueng keu lakoe po meukuta

Jeh pat nanggroe nyoho ka lon jak
Kareuna galak akan sroepada
Adat han galak pane ulon jak
Meuseuki geutak bah hilang nyawa

Putroe Sunoe peusayang droe
Raja pindoe beungeh raya
Teuma jicarot peurumoh droe
Jalang bisoe le bicara

Inong paleh that ceumburu
Kuteumee eumpu bak keupala
Pakon kah kheun nyan keu putroe
Ingat keudroe kah kutampa

Putroe Sunoe lom neumarit
Jilakee reuet ok keupala
Kateubiet keunoe nak kureuet ok
Nak kukhok-khok kutampa-tampa

Jikheun lon reubot tuanku sidroe
Jikheun keu kamoe dara geuba
Sabab lon lakee makanan bacut
Lon kheun deuek pruet po meukuta

Han jitem bri bu meubacut
Abee jiyue 'uet akan hamba
Pakon kujak bri bah bek kapajoh
Peukeu kiroh kuteumeung tampa

Lon keumeueng teubietpi han jibri
Jiyue gunci peutoe kaca
Ho ka teubiet jalang bisoe
Lakoe kamoe kameuhawa

Meunan jikheun tuanku droe
Peue han kumoe ro ie mata
Weueh keu untong taba di nanggroe
'Oh troh keunoe neuyue seurapa

Ban jideungo haba meunan
Beungeh yoh nyan raja ceulaka
Jidrop peurumoh jimat bak ok
Ulee jiantok bak tameh punca
Jitampa di mieng mata teusuet
Jiseupot meuleubup ka patah pha
Teuma jikheun inong beudeubah
Sabab babah jeungkat raya

Jicok ninan jimat di gaki
Ulee jisundi dara ceulaka
Kah jak kheuh-kheuh kacarot putroe
Jalang bisoe bah karasa

Kupoh beumate kah kucriek-criek
Dara geuceukiek le peusuna
Kukira kuba putroe keunoe
Judo kamoe indah rupa

Hana indah di jih beunci
Peutang pagi jiseurapa
Meunyo ceumburu that keu putroe
Patot kah sidroe jinoe fana

Jikeumeung teubietpi han kabri
Kayue gunci putoe kaca
Raja Peuranggi sare wah-woe
Jigantung putroe lam istana

Ulee u miup gaki u manyang
Bukon bubarang jipeuseksa
Babah jiplah jisie bibi
Mata jikawe raja ceulaka

Idong jireupang geulunyueng jikoh
Hankeu na weueh jieuh rupa
Ate saket tutong ngon peudeh
Raja paleh tan bicara

Teutap jigantung sinan meutik-tik
Dara geuceukiek bah karasa
Jipeurab bak Putroe Sunoe
Dilua peutoe meugisa-gisa

Jiduek sinan teuma jimarit
Keunoe tateubiet nyak jroh rupa
Bek sinan le teubiet keunoe
Judo sambinoe keumala donya

Loh that rindu jeh 'oh lawet
Han tom meusiblet teubiet u lua
Wahe putroe cut meuh peulanggi
Bek le tagunci peutoe kaca

Buka rijang judo teungku droe
Kulop jinoe sajan gata
Pakri tateubiet keunoe he bintang
Peugah rijang lon deungo nyata

Bek meunan le taduek sidroe
Teubiet keunoe meusuka-suka
Wahe putroe cut tangieng keu abang
Beuna tapandang meusiblah mata

Lon aroh laot uroe dan malam
Bak pihak bimbang intan keu gata
Peutoe kaca tabuka rijang
Ate lon ringan ka padum masa

Sep ka adoe lon tapeungeut
Jeh 'oh lawet kee tapeujra
Teuma seuot Putroe Sunoe
Tango kamoe po meukuta

Meuhan tapohjih beumata
Di lon han le teubiet u lua
Han ek lon kalon si jih nyan madu
Jak taeumpu dilee beufana

Meumantong udep jih nyan sidroe
Hareuem peutoe han le lon buka
Ban jideungo haba putroe
Raja pindoe beudoh sigra

Jicok peurumoh jikoh taloe
Jisumpom jinoe keudeh lam guha
Jiceukiek reukueng jipoh mate
Raja kaphe pungo gila

Abekh lagee jipeumeu'en droe
Jipoh jinoe putroe nyang ka na
Putroe Sunoe jikira meuteumee
Peurumoh nyang dilee ka mate fana

Nyang ka na mate nyang laen han roh
Balasan jipoh raja muda
Sabab jipoh Bangta Sulotan
Allah peuriwang keujih meureuka

Bangta Sulotan ngon Putroe Sunoe
Han jitupeue gaseh Rabbana
Peue jitupeue meujih kaphe
Ureueng mungke keu agama

Subhanallah 'mma yasifun
Hireuen takalon buet Rabbana
Kata dalang eumpunya kisah
Meunan peuneugah asai mula

'Oh lheueh mate jipoh putroe
Raja pindoe suka rasa
Teuma jipeurab ubak peutoe
Teubiet keunoe he nang nyawa

Nyang jeh ka mate ka lheueh kupoh
Gata saboh cit lon hawa
Bahle bek laen tuan putroe
Gata sidroepe meumada

Jinoe tateubiet putroe meutuah
Peutoe tapeuhah sigra-sigra
Adat han tateubiet gata keunoe
Bahle kamoe masok keu sana
Teutapi sinan pueh tameuduek
Peutoepi cut arat raya
Nyang got po cut bahle keunoe
Bak teumpat nyoe ateueh geuta

Taeh mangat taduek mangat
Tateubiet siat putroe muda
Raja Peuranggi sare meupot-pot
Putroe seuot bek that kubra

Lon nyoe kuteubiet ho cit kujak
Troh ban kheundak po meukuta
Bahle dilee bek sigra that
Pioh siat judo raja

Meuka keunoe judo teungku droe
Barangri uroe hukom gata
Jan troh watee hana peue le
Napsu ase po meukuta

Teutapi tuanku raya hajat
Kaoi le that goh samporeuna
Ma lon dilee meunan neukheun
Beukit na peutumeun lon lam donya

Ulonteu jinoe lon meutanggoh
Kaoi goh troh po meukuta
Lhee buleuen treuk dudoe nibak nyan
Nyan 'oh tuan tanggoh hamba

Pakon meunan tuan putroe
Kamoe sidroe tapeukra-kra
Han kujinoh han ek kupreh
Le that daleh tapeuhaba

Pat na kaoi tameuayang
Buka rijang peutoe kaca
Meuhan kuproh di kee peutoe
Meudeh meunoe narit gata
Tacuba proh tuanku droe
Mate kamoe peue tasangka
Pakon han tateubiet teuma keunoe
Trep that kamoe preh di lua

Teuma seuot tuan putroe
Tanggoh kamoe ubak gata
Lhee buleuen treuk han ek tapreh
Lheueh nyan jadeh meukeurija

Wahe putroe judo badan
Pakon meunan tameuhaba
Pakon trep that tuan putroe
Han di kamoe he nang nyawa

Adat han tapreh tanggohku nyan
Peubuet kaman ban tapinta
Ban nyang napsu cuba peurintah
Pakri taproh peutoe kaca

Takheun rijang peue taiem droe
Peugah jinoe kungo nyata
Meunyo taproh peutoeku nyoe
Han le kamoe udep lam donya

Lon kupoh droe kukoh takue
Bah mate kamoe bek taeu rupa
Han sapeue meuteumeung gata sidroe
Mate kamoe po meukuta

Raja Peuranggi deungo meunan
Gundah tuan hana tara
Meunoe salah meudeh salah
Sare meh-moh gadoh bicara

Teutapi jipeungo raja pindoe
Jikalon putroe indah that rupa
Subhanallah wabihamdihi
Mahasuci Allah Ta'ala

Suci Allah sajan ngon pujoe
Putroe Sunoe lon calitra
Putroe Sunoe neuduek teutap
Pujoe Hadarat Po Nyang Esa

Neubeuet Quruan geunap uroe
Tuan putroe mayoh liga
Ate beureuhi that keu Tuhan
Sikeujap han na tom lupa

Teudoh Quruan meuseulaweu
Do'a neubeuet rok-rok masa
Teudoh do'a neumeusyahdat
Ma'arifat pujoe Esa

Meunan-meunan baranggajan
Tuan putroe nyan saleh raya
Umu sibuleuen beuet Quruan
Leumah buruhan Allah peunyata

Leumah neukalon Bangta Sulotan
Raja budiman meubahgia
Leumah neuu teuduek lam laot
Hana mawot raja muda

Hana mate Poteu Allah bri
Raja Peuranggi peukeunong mintra
Keubiet that keunong hekeumat kaphe
Rab bee mate hilang nyawa

Putroe Sunoe deuh that neuu
'Azizon Ghafo nyang peunyata
Neumoe meu'eut-'eut dalam peutoe
Weueh keu lakoe raja muda

Teuma lheueh nyan teupike keudroe
Pakri jinoe toh bicara
Leumah yoh nyan dalam ate
Putroe ban kande keumala donya

Putroe Sunoe that bit ragoe
Peusaket droe pura-pura
Neuboh lam babah batee neukabom
Miengneu reudom pura-pura

Neugeumeuciek neupoh-poh droe
Tuan putroe lhok bicara
Raja Peuranggi sare wah-woe
Tanyong bak putroe pakri gata

Wahe putroe judo sambinoe
Pakon meunoe lon eu rupa
Pakon taklik-klik judo meutuah
Cuba peugah asoe istana

Putroe Sunoe neukheun saket
Saleh mawot lo.1 meukuta
Mieng laon keumong saket han ban
Pakri padan toh bicara

Badan kuweut ate seungkoe
Reukueng lon doe hana tara
Saleh mateku siseun nyoe
Pakri kamoe po meukuta

Raja Peuranggi teuma marit
Keunoe tateubiet he nang nyawa
Teubiet keunoe kuboh ubat
Judo bek that duka cita

Putroe Sunoe buka peutoe
Teubiet jinoe sigra-sigra
Ban neuteubiet neutiek-tiek droe
Sira neumoe ro ie mata

Neuklik kong that sumpom-sumpom droe

Putroe Sunoe le bicara

Raja Peuranggi sosah ate

Jihpi sare pungo gila

Peurab bak putroe jikeumeung mat

Jiboh ubat sigra-sigra

Ban jiboh ubat keunong asoe

Neuklik Putroe Sunoe muda

Ubat neusampoh rijang-rijang

Raja suang maken gila

Putroe Sunoe akai le that

Raja sisat neupeudaya

Miengneu keumong neukabom batee

Le that lagee putroe muda

Su meukrie-krie hana bagoe

Reukeuengneu doe hana tara

Raja Peuranggi jiduek sajan

Pakri padan saket gata

Putroe seuot mameung-mameung

Su lam reukueng cut lagoina

Han that jingo putroe marit

Suneu ubit han that nyata

Teuma jipeudeuh peurab geulunyueng

Neukheun reukueng saket raya

Saleh peue timoh bak uram lidah

Babah lon crah po meukuta

Ku'uet ie babahpi han jeuet le

Saleh pakri mate hamba

Putroe teuma marit sipatah

Tabib neukrah po meukuta

Kukeumeung tanyong peue peunyaket

Deungon ubat tayue jiba

Neujak rijang tuanku droe
Beutok jinoe tabib dumna
Raja Peuranggi deungo meunan
Jiseutot yoh nyan tabib dumna

Tabib jipeuek u meuligoe
Bak Putroe Sunoe lam istana
Putroe Sunoe teueh sinan
Teuka keunan tabib dumna

Jiduek peunoh lingka putroe
Marit jinoe tabib sigra
Tango kamoe tuanku droe
Neupeugoe putroe po meukuta

Neuyue peuleumah peue nan saket
Meucuba sidek meupeunyata
Raja Peuranggi jak peumeugoe
Jimeuhei Putroe Sunoe muda

Beudoh siat tuan putroe
Kukeumeung eu proe peunyaket gata
Putroe Sunoe teuma teukeujot
Buka seulimbot sigra-sigra

Tabib ngon nujum abeh teuceungong
Jikalon keumong mieng bandua
Kreueh ban batee sare batat
Nujumpi that ate kubra

Teuma jitanyong ubak putroe
Padum uroe meunan nyang ka
Putroe Sunoe marit han jeuet
Teuma ngon paleuet nyan neubasa

Neutunyok reukueng deungon jaroe
Neukheun ka doe han suara
Teuma nujum kalon surat
Jibeuet ayat deungon angka

Abeh jikalon dumna surat
Hana sapat nyang na nyata
Teuma jipeugah putroe meurampot
Masa di rot yoh neubungka

Peunyaket nyoe larab sangat
Hana ubat pat tamita
Raja Peuranggi teuma meukalam
Kalee na sayang ubat tamita

Hukom gata nyan tarajah
Taseuleuah dumteu rata
Meuk puleh tuan putroe Ti
Upah kubri dua bara

Nujum deungo haba meunan
Jiboh yoh nyan ubat sigra
'Oh ban jap ubat keunong badan
Neuklik tuan putroe muda

Neupoh-poh droe bukon bubarang
Rasa hilang gadoh nyawa
Teuma jirajah sigo sapo
Maken laju keumong raya

Putroe marit lon nyoe mate
Tarajah bek le dumna gata
Maken tarajah maken saket that
Hana mufeu'at ubak taba

Sigala nujum gadoh bisoe
Ngon Putroe Sunoe gadoh bicara
Ubat jiboh abeh neusrom
Tabib ngon nujum malee mata

Putroe Sunoe neuklik laju
Meuloe-loe su hana nyata
Lheueh nyan marit dumna nujum
Tuanku ampon idin meukuta

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Idin meugisa meuwoe u teumpat
Tuanku deelat laman sroepada
Hana peue salah tawoe jinoe
Ubat putroe laen tamita

Got tuanku kamoe seuleuah
Kamoe meupayah keunoe meuba
Lheueh nyan abeh nujum jiwoe
Nibak Putroe Sunoe muda

Sare leupah nujum jiwoe
Marit putroe deungon raja
Pakri laku tuanku droe
Saket lon nyoe hana tara

Maken jirajah maken saket
Nujum sulet bansineuna
Han jitupeue jikira reumbang
Jirajah mantong pura-pura

Na cit saket lon saboh roe
Po ma kamoe tabib raya
Meuka neurajah ubak saket
Sep ngon siblet tajam do'a

Ubatpi jroh neurajahpi got
Cit utoh that tabib raya
Udep mate neutu' oh fam
Sangat 'ajam ateueh donya

Meuseuki hanco tuleueng patah
Jeuet neurajah uleh po ma
Tuleueng meukap nyang ka putoh
Dum meuwoe jroh miseue nyang ka

Peunyaket buta deungon tuloe
Meuka bak droe abeh teunawa
Tabib utoh that bit ajam
Dum abeh fam peunyaket nyang na

Jinoe tuanku pakri padan
Lon nyoe tuan saket raya
Gaseh sayang tuanku droe
Neuintat kamoe ubak po ma
Kadang puleh tuanku droe
Taintat jinoe ubak po ma
Po ma rajah 'oh troh u nanggroe
Kadang meuwoe miseue nyang ka

Lheueh neukeubah lon teuma neuwoe
Neuteuka dudoe neujak tueng hamba
'Oh lheueh puleh nibak saket
Neuteuka bek trep po meukuta

Beurijang troh tuanku droe
Neutueng kamoe keunoe lom neuba
Beujeuet keu namiet ulonteu nyoe
Lon keu putroe gata keu raja

He tuanku bek that gundah
Ma meurajah utoh lagoina
Raja Peuranggi deungo meunan
Jiintat yoh nyan sigra-sigra

Jiboh lam peutoe Putroe Sunoe
Jiintat jinoe dalam bahtra
Troh u laot teuma jime
Jiikat le peutoe kaca

Peutoe lam ie jiboh taloe
Meulayeue jinoe raja ceulaka
Jibet saoh jiboh layeue
Angenpi kheue reumbang pasa

Teukeudi Allah peurintah Tuhan
Bangta Sulotan teuma teuka
Timue meuampong di yup peutoe
Miseue saboh roe meunan rupa

Ban putroe eu muda samlakoe
Yoh nyan neumoe hana tara
Weuehneu sangat bukon bubarang
Ateuh geulumbang meugisa-gisa

Umu sibuleuen peulayaran
Troh teuma nyan ateuh kual
Iepi paseueng bukon bubarang
Muda bangsawan teusareueng lam bangsa

Putroe Sunoe neukalon laju
Nyan neuu ho geulumbang ba.
Bangta Sulotan troh u darat
Geulumbang intat muda beulia

Putroe Sunoe ate mangat
Ka troh hajat ban nyang pinta
Raja Peuranggi hana jipandang
Bangta Sulotan ka lam bangsa

Meunan teukeudi nibak Allah
Ureueng meutuah Tuhan peulara
Subhana l-lah rabbiya l-'azim
Rabbi l-karim jalla wa 'aza

Raja Peuranggi kaphe asee
Keunong tipee asoe nuraka
Dilee jitipee ureueng meutuah
Tuhan balah ateuhjih teuma

Ban sare troh kapai keunan
Teungoh yoh nyan bansineuna
Abeh leupah dum u darat
Putroe jiintat keudeh bak cutma

Putroe jiusong jime laju
Troh u leupu' dalam istana
Ban po ma eu putroe jiintat
Pujoe Hadarat Po Nyang Esa

Ate mayoh bukon bubarang
Neuteumeung pandang lom aneukda
Teuma jimarit Raja Peuranggi
Nyan jikheun kri bak tuan tha

Wahe tuan deungo kamoe
Kukheun jinoe ubak gata
Putroe saket tapeubat
Gaseh beuthat akan hamba

Laman ka puleh saket putroe
Siploh katoe upah keu gata
Hukom gata tuan putroe
Kamoe meuwoe jinoe meugisa

Janji ngon gata umu sibuleuen
Teuma kujak tueng putroe muda
Sira kujak tueng tuan putroe
Kume keunoe upah gata

Po ma seuot hana peue salah
Ban nyang titah nibak meukuta
Raja Peuranggi teuma jiwoe
Putroe Sunoe lon calitra

La ilaha illallah
Peurintah Allah Po Nyang Esa
Kata dalang eumpunya kisah
Meunoe peuneugah he syeedara

'Oh sare leupah raja jiwoe
Teubiet putroe lam peutoe kaca
Neubuka peutoe teubiet leugat
Sujud khideumat ubak po ma

Po ma laloe hireuen teuceungong
Aneuk neukalon peumayen mata
Teuma marit po ma putroe
Muda sambinoe meubahgia

Seulawet hana gata aneuk droe
Malam uroe kulakee do'a
Beu Tuhan bri lom beumeuwoe
Aneukku putroe bijeh mata

Lam kucinta kuleueng jaroe
Gata sidroe bak meubahgia
Poteu neubri lom meuteumee
Meutuah kee bijeh mata

Teuma marit tuan putroe
Deungo lon kheun proe ma bak gata
Raja Peuranggi kaphe seudee
Jeuet kutipee Allah karonya

Po ma tanyong pakri peurintah
Nyang jeuet leupah tawoe gata
Putroe seuot po ma tanyong
Kupeukeunong kuboh daya

Wahe po ma kupeusaket droe
Raja pindoe sosah raya
Mieng lon keumong kukabom batee
Raja seudee keunong daya

Jikira-bit-bit that saket kee
Hana lagee ate duka
Mita tabib ubat jilakee
Nujum meuribee keunan teuka

Jiyue keumalon me ngon ubat
Jieu mieng lon that keumong raya
Peue jitanyong lon kuiem droe
Deungon jaroe nyan kubasa

Teuma tabib lon jirajah
Jiboh seupah bak anggeeta
Ban jiboh ubat keunong bak badan
Lon klik kiam hana tara

Kucok ubat ageh kusrom
Jirajah lom dumjih rata
Maken lon klik kupoh-poh droe
Saket lagoe lon peuhaba

Teuma keunoe lon yue intat
Gata peuubat utoh raya
Gata tabib sangat ragoe
Lam donya nyoe tan umpama

Ban jideungo haba lon peugah
Rakyat jikrah bansineuna
Teuma jiintat lon jipeuwoe
Ate kamoe suka rasa

Nyankeu haba ma lon peugah
Laen kisah lon calitra
Tadeungo lon po ma badan
Bangta Sulotan neujak cok sigra

Sideh lam bangka bineh beurawang
Jak tueng rijang po ma raja
Me ngon ija balot badan
Neujak rijang he ma sigra

Taba usong dua lhee droe
Ngon tapeuwoe lam istana
Ban neudeungo haba putroe
Neujak jinoe po ma sigra

Cok ngon kajeueng neume sajan
Neujak tuan lam bak bangka
'Oh sare troh po ma keunan
Mita yoh nyan raja muda

Tamong beurawang seuon ngon kajeueng
Seun rot meuteumeung mayet raja
Po ma peurab laju neupangkee
Moe meuree-ree dalam bangka

Ureueng laen nyang jak sajan
Bandum tuan jimoe rata
Teuma neucok ka neupeuwoe
Dua lhee droe usong Bangka
Boh lam kajeueng nyan geubalot
Geukheun eungkot poteu raja
Raja geupeuwoe nyan geuseuon
Laju u gampong sigra-sigra

Ban sare troh u leuen meuligoe
Geupeuek jinoe raja muda
Geulop tiree ngon keuleumbu
Teuma geupeudu ateueh geuta

Lheueh nyan teuka tuan putroe
Neukalon proe raja muda
Meugrak han le leumoh asoe
Tuan putroe ro ie mata

Putroe Sunoe areh billah
Mataneu troh Allah karonya
Neucok ie mawo nyan u jaroe
Tuan putroe peupuleh mintra

Gusuek badan dum seuleusoe
Tuan putroe neubeuet do'a
Lhee go neupruh mumet bak dhoe
Muda samlakoe puleh mintra

Putroe yoh nyan neubeuet leugat
Neupruh meuhad bak keupala
Ie mawo neuboh lheueh neurajah
Raja meutuah teuma jaga

Ban teukeujot nibak pangsang
Beudoh tuan raja muda
Sireuta neuseubot laju pantah
Subhana l-lah wa l-hamduli l-lah

Wa la ilaha illa l-lah wa l-lahu akbar
Wa la hawla wa la quwwata
Illa bi l-lahi l-'aliyyi l-'azim
Tuhan Karim nyang that mulir
Raja neungieng bak tuboh droe
Lumpok asoe jeuep anggeeta
Teukeuta-keuta asoe meutoto
Raja tahe sikutika

Neukalon wie deungon uneun
that teujaneun raja muda
Teuma neumoe teuingat keudroe
Raja pindoe peukeunong mintra

Allah Tuhanku raja seubot
Moe meu'eut-'eut ro ie mata
Gatakeu Tuhan kaya limpah
Leungkap peurintah sigala donya

Teuma neuseubot subhanallah
Sabab dahsyah hireuen bicara
Duek teuseupok neusadeue droe
Sira neumoe ro ie mata

Allah Allah laju neuseubot
Sabab teumakot hana tara
Na sijameung neuduek teutap
Geubet u nap idang raya

Putroe Sunoe jok ie rijang
Bek le bimbang po meukuta
Neumakeuen bu po junjongan
Neusrah tangan tuanku raja

Tuan putroe duek di hadapan
Neumakeuen sajan raja muda
Neupajoh bu buju jaroe
Nekmat ka troe jatirasa

'Oh lheueh makeuen geucok idang
Geubet puan meupeurmata
Peunoh di dalam ranup masak
Bee meuhayak gahru ceundana

Raja pajoh ranup sigapu
Putroe ngadu buka suara
Ampon tuanku doli khalifah
Keumala Makah peugawe donya

Sabet tuanku ban lon peugah
Keumala Makah keunong ranjana
Harap binasa doli khalifah
Kaphe beudeubah tinggai seutia

Cit ka lon kheun masa dilee
Ngon raja seudee bek meusyeedara
Han neupateh haba lon peugah
Neukheun beurakah narit peurbula

Peue meuteumeung po junjongan
Neumeurakan deungon beudeuga
Patot tuanku jikoh reukueng
Ulon jitueng jiteumee ba

Troh u nanggroe lon jibaplueng
Kaphe bajeueng asoe nuraka
Kada nam buleuen lon di sinan
Po junjungan lam laot raya

Silawet hana deelat tuanku
Sianeuk bu tan lon rasa
Ate lon sosah ban geutampoe
Tuanku sidroe lo cinta-cinta

Lon leueng jaroe lon mohon tulong
Ate lon tutong hana tara
Lon meuinseuen malam uroe
Tuanku sidroe beuleupah mara

Lom ngon gunah keu tuboh droe
Malam uroe lon meujaga
Bangta seubot masa nyan le
Allah ya ghani aghisni

'Ala 'aduwika z-zalimi wa l-musi i
Raja Peuranggi neubalah guna
Gatakeu Tuhan kaya limpah
Neueu peurintah ateueh hamba

He Tuhanku tulong kamoe
Ateueh sitree nyoe kaphe ceulaka
Ateku puteh kuseubot adoe
Han kuthee meunoe balah teuka

Allah Tuhanku tulong kamoe
Gata sidroe balah guna
Lon jitipee kaphe pindoe
Jipoh kamoe raja ceulaka

Bangta Sulotan raja budiman
Gaseh Tuhan Po Nyang Esa
Dawok teulah droe ka leupah
Teukeudi Allah han ek landa

Sare meumoe-moe lam meuligoe
Teuingat keudroe keunong bala
Bangta Sulotan beungeh han soe
Neukheun bak putroe sigra-sigra

Pakri laku tuan putroe
Kuseutot u nanggroe raja ceulaka
Idin tabri lon jak siat
Raja laknat kuprang kuta

Kee jipeungeut kaphe geucang
Patot kuprang Hindu beudeuga
Putroe Sunoe ngo narit meunan
Neukheun yoh nyan ubak raja

Deelat tuanku doli khalifah
Keumala Makahbeuthat saba
Peue neugundah tuanku droe
Raja pindoe keunoe lom teuka
Hana peue taprang keudeh u nanggroe
Cit troh keunoe po meukuta
Janji dilee sibuleuen sampoe
Jijak cok kamoe keudeh lom jiba

Sinoe tapreh po junjongan
'Oh troh tacang raja ceulaka
Ban raja ngo haba putroe
Ka neuiehm droe han le haba

Bangta Sulotan peucakap droe
Peudeueng di jaroe tujoh deupa
Ate beureuhi bukon bubarang
Nyum beurijang troh jiteuka

Peudeung di jaroe sabe neuasah
Jeuett pruh gapeueh tajam mata
Di Putroe Sunoe peudeueng saboh
Raja Allah poh neupreh teuka

Raja ngon putroe sapeue padan
That pahlawan nyan bandua
Meunan neubri uleh Tuhan
Badai tuan Ali Murtala

Kuatpi that hana padan
Siribee man ek neuba-ba
Bah teuduek nyan dilee siat
Laen riwayat lon calitra

Subhanallah wabihamdihi
Mahasuci Allah Ta'ala
Suci Tuhan han sibagoe
Raja Peuranggi nyoe teuma bungka

Jiba kapai jimeulayeue
Angenpi kheue reumbang pasa
Umu sibuleuen peulayaran
Troh kapai nyan ateueh kual
Teuma jiteungoh dum u darat
Raja laknat suka rasa
Laju jijak u meuligoe
Ubak Putore Sunoe muda

Ban sare troh u meuligoe
Raja Pindoe meusuara
Soe na di rumoh tuan putroe
Nyoe leupeue kamoe nyan ka teuka

Ban putroe ngo neuseuot rijang
Nyopat lon tuan lam istana
Kamoe meuhei tuan putroe
Tatren keunoe he nang nyawa

He nyak putroe tabuka pinto
Kamoe judo nyan ka teuka
Ban putroe ngo haba meunan
Tahe heran sikutika

Putroe peugah bak muda juhari
Ka neukheun kri sigra-sigra
Ampon tuanku di bawah doli
Raja Peuranggi saleh ka teuka

Ban raja ngo raja Peuranggi
Ate beureuhi raja muda
Neucok ngon peudeueng reugam bak jaroe
Raja pindoe meuhei lanja

Wahe judo putroe bangsawan
Tatren tuan keunoe sigra
Putroe Sunoe seuot sisuen
Meunoe neukheun jaweueb haba

Tapreh tuanku bek that mameung
Teungoh lon leueng tika peureuda
Tapreh dilee judo samlakoe
Trep that lagoe hana teuka

Jeh 'oh lawet kamoe deundam
Uroe malam lon meucinta
Bangta Sulotan deungo meunan
Neutren yoh nyan sigra-sigra

Neupadok droe di likot pinto
Neueu laku raja ceulaka
Peudeueng di jaroe kong that neugunci
Raja Peuranggi neuproh keupala

Putroe Sunoe neutren laju
Buka pinto sigra-sigra
'Oh ban leumah jieu putroe
Raja pindoe tajo sigra

Neusurot putroe plueng u rambat
Pakon meukarat po meukuta
Tapreh dilee ho cit lon jak
Lon peutroh heundak napsu gata

Loh han kuplueng judo teungku droe
Jameun uroe lon preh meukuta
Jinoe 'oh tathee peunoh napsu
Tapreh tuanku bek that kubra

Maken neusurot maken jiseutot
Tuanku got jinoe lon rela
Masa dilee kon lon meuayang
Napsu bimbang akan meukuta

Preh tuanku meusikeujap
Bek meugriet that doli baginda
Lon tuanku cit judo droe
Barangjan uroe hana meudawa

Peurumoh tuanku umong meuneugoe
Jinoe napsu droe tapeuteuka
Han soe teugah po junjongan
Bangta Sulotan nyan a fana

Jinoe tuanku nyang mee gantoe
Tuanku sidroe laen hana
Raja Peuranggi deungo meunan
That sukaan hana tara

Wahe putror judo badan
Bek trep tuan keunoe tateuka
Di tuanku bukon klo le
Meuhei sabe hana reuda

Ka lon peugah dilee tapreh
Jinoe jadeh lon keu gata
Boh kundo di wie sikin di uneun
Jan tamakeuen hana meudawa

Umpama bungong di dalam reugam
Ase barangjan sunteng keupala
Bek that sosah po junjongan
Bu lam idang jipreh meukuta

Bak tuanku ase barangjan
Teutapi tuan tanggoh sibeunta
Tuan putroe kheun fireuman Tuhan
Dalam Quruan lahe nyata

Nisaukum harşun lakum fa'tu harsakum
Anna syi'tum, meunoe meufum kalam Rabbana
Peurumoh gata umong meuneugoe
Jan meunapsu tapeuteuka

Han meudawa han jeuet meubanta
Meunoe peurintah po meukuta
Teuma marit Raja Peuranggi
Bah-bah po Ti tanglong donya

Ate rindu that sukaan
Judo badan keunoe sigra
Teuma seuot tuan putroe
Neukheun meunoe ubak raja
Han ho kujak lon cit sinoe
Lam meuligoe barangjan masa
Lon nyoe bit-bit napsu bukon le
Suka ate keu po meukuta

Masa tuanku leupah neuwoe
Lam lon lumpeo nyjm-nyum di mata
Sabab mayoh napsu bimbang
Nyan lon pandang nyum-nyum sireuta

Lon meulakee geunap uroe
Tuanku sidroe beurijang teuka
Pakri han lon tem po junjongan
Napsu laman that keu gata

Adat na udep Bangta Sulotan
Han sipadan ngon meukuta
Kuko meukawen ngon Bangta Sulotan
Nyang got tunangan lon ngon gata

Bangta han mee tameujudo
Bak ri laku hana seutia
Lah na gaseh tuanku sidroe
Neupoh jinoe raja muda

Kupoh keudroe hana mangat
Takot gop upat geuceureuca
Meunankeu ate han ek kukalon
Hana sakon lon ngon raja

'Oh tuanku peugah ka lheueh neupoh
Ate lon mayoh dalam dada
Dilee cit sabe seupot tuloe
Geunap uroe lon seurapa

Na nyum lon tuba beurujang mate
Meunankeu he po meukuta
'Oh lon ngo gah teuka junjongan
Ate laman suka rasa

Ban sare troh lam meuligoe
Ate kamoe sirasa gila
Pakri ngon rupa hana lawan
Tan sipadan ngon tapeusa

Ban meudieueng leumah lon pandang
Napsu bimbang akan meukuta
Lah lan lon jeuet malee sipu
Leumah napsu malee mata

Dalam ate lon that rindu
'Oh ban lon eu po meukuta
Nyum beuyoh nyan le jeuet kawen
Ate lon meusyen napsu hawa

Ban jideungo haba meunan
Jikhenn le yoh nyan sigra-sigra
Beukit keubit nyan tapeugah
Peue cit tanggoh suntok masa

Nyang tanggoh nyan lon meuayang
Lon meueng eu lakuan po meukuta
Ulonteu marit saket mangat
Hana saket bak meukuta

Sinan dali lon thee sabet
Nyobit keubit tuanku kata
Teuma seuot raja pindoe
Harok han soe ngon tapeusa

Ban gata kheun bit he putroe
Lon nyoe sidroe judo gata
Nyo tuanku hana ubah
Ban neupeugah han meutuka

Raja Peuranggi ate teuham
Bah judo bah tanglong donya
Putroe Sune akai panyang
Neupeungo haba nyan bak raja muda
Nyankeu jeuet panyang neuboh cakri
Nak neuthee Peuranggi pungo gila
Bangta Sulotan yoh neungo nyan
Neuiem tuan hana suara

Neupadok droe neumeusilee
Neueu lagee raja ceulaka
Putroe Sunoe le that cakri
Raja Peuranggi neupeudaya

Raja Peuranggi laloe dukhoe
Marit ngon putroe harok raya
Han jitupeue jih geutipee
Raja seudee meuhei lanja

Putroe Sunoe mata bak pinto
Neuklep bak judo nyan neubasa
Putroe neudong di seuramoe
Neupeulaloe raja ceulaka

Raja Peuranggi teungoh meututo
Seun rot neutajo raja muda
Peudeung di jaroe kong that neureugam
Neutak meutam bak pupok ma

Sireuta neucarot kaphe bajeueng
Neutak ngon peudeueng teubinga-binga
Reubah teusungko nyan bak aleue
Beudoh ji'eue yoh nyan sigra

Neutak ngon peudeung tam-tum sare
Reubah meugule dalam guha
Raja Peuranggi tahe keudroe
Hana sapeue na suara

Roh neutipee uleh putroe
Raja pindoe teubinga-binga
Bangta Sulotan neutak hat-huet
Han jitem lut raja ceulaka

Bangta neutak meuturot-turot
Han jitem lut kaphe beudeuga
Raja Peuranggi teukui ulee
Kareuna malee asoe nuraka

Baro teuingat jithee ka udep
Han jjeuet marit malee mata
Peue jimarit jih ka malee
Meutheun ulee meuklep-klep mata

Bangta Sulotan beungeh han soe
Peudeueng bak jaroe han ban peubla
Neutak keubit tango meureung-reung
Jipo meuk peudeueng bube-be raga

Uleejih kreueh miseue beusoe
Raja pindoe keubai raya
Lutjih hana kulet keubai
Ban geusakai meunan rasa

Jikeumeung beudoh teugeutit-geutit
Mata meumet-met teubinga-binga
Geulonyueng tuloe ulee mumang
Peudeueng keunong bak-bak muka

Tan beureunti neutak laju
Reubah teusungko lom bak guha
Bangta Sulotan leumoh asoe
Neuhei putroe bantu sigra

Putroe Sunoe peurab rijang
Teuma neucang sigra-sigra
Nyanpi pantah that pahlawan
Neutak yoh nyan ateueh keupala

Raja Peuranggi sare bingong
Ulee mumang seupot ngon mata
Dum beureuteh peudeueng neusayong
Su meudeungong peudeueng raya

Raja Peuranggi jiteheun tadah
Putroe meutuah neucang lanja
'Oh han ek le tuan putroe
Beudoh jinoe raja muda

Neutak rancong that meudeungong
Teubiet meuk peudeueng hu meucahya
Lhee seun payah neucang sabe
Meugule-gule raja ceulaka

Han jitem lut raja paleh
Hana ngeudeh meuie mata
That beurani raja pindoe
Kulet asoe sang meulila

Badan keumong han lut peudeueng
Dum meubeunteueng bube-be pha
Sare meu'eh-'eh reubah limah
Kaphe beudeubah keubai raya

Bangta Sulotan meuhei putroe
Bantu kamoe putroe muda
Raja paleh kaphe bajeueng
Han lut peudeueng keubai raya

Putroe Sunoe laju peutoe
Peudeueng bak jaroe neugeunta-geunta
Putroe ceumeucang subhanallah
Kaphe beudeubah klik meu'a-'a

Badan mirah sare keumong
Peudeueng keunong han sapat bla
Teukeudi Allah siuroe simalam
Neutak curam lam istana

Meusurot-surot bak jimeuglueng
Putoh geulunyueng kaphe ceulaka
Keunong peurumpiang siblah abeh
Tuleueng puteh leumah nyata

Di ulee kon troh u baho
Putroe eundru han ban peubla
Ban jirasa putoh geulunyueng
Jigrop meudeungong leugat u lua

Jigrop rot pinto leupah jiplueng
Laju mameung le jiguda
Mata seupot jiplueng han jeuet
Palet-palot meugisa-gisa

Pha meukilah jigrop di rumoh
Sare meh-moh raja ceulaka
Ban sare trohjij u kapai
Jimeulayue sigra-sigra

Ate saket that keu putroe
Raja pindoe beungeh raya
Sare troh jiwoe nyan u nanggroe
Jikrah jinoo rakyat dumna

Raja Peuranggi kaphe suang
Jinoo jiprang raja muda
Jipeuet surat jeuep-jeuep nanggroe
Jiyue tulong droe bak prang raya

Troh u Mureh dum jiseutot
Jime ngon surat jeuep-jeuep raja
Umu peuet buleuen raja keumeurah
Rakyat barollah peunoh donya

Laot darat peunoh sare
Le that kaphe sum'ah donya
Sare meusapat dumna rakyat
Jimeupakat jiprang raja

Raja Peuranggi teuma peugah

Rakyat barollah deungo rata

Tango kamoe wahe rakan

Tabantu prang tulong ngaza

Lon meung tueng putroe nanggroe Isfahan

That analan hana tara

Abeh jipeugah dum hareutoe

Ban saboh roe buetjih nyang ka

Buet nyang dilee abeh jikheun proe

Tapeungon kamoe meuprang raja

Teuma jiseuot dumna rakyat

Doli hadarat bek that duka

Taprang jinoe tuanku droe

Tatueng putroe taprang raja

Meunankeu narit kaphe pindoe

Seuu asoe hana tara

Sare keumah jimeupadan

Bungka tuan kaphe ceulaka

Jiba ngon kapai troh ploh ribee

Seutot meunalee jiprang raja

Di Mureh kon troh u Piko

Abeh meusaho bansineuna

Raja Zanggi saboh peureulee

Na peuet ribee kapai jiba

Raja Peuranggi jak prang Isfahan

Jak tueng tuan putroe muda

Kapai bahtra han ek lon seubot

Peunoh laot na dum rimba

Teukeudi Allah peurintah Tuhan

Umu lhee bulepen troh jiteuka

Jidong di laot sare peunoh

Teuma jiteungoh rakyat dumna

Amma bakdu teuduek siat
Laen riwayat lon calitra
Rakyat lam nanggroë han saboh le
Jiplueng u gle bansineuna

Sohkeu nanggroë han le rakyat
Kaphe laknat ate suka
Han soe meudong theun angkatan
Ureueng Isfahan geusuen raya

Nyang na tinggai meurumoh soh
Ureueng han saboh plueng simua
Agam inong teuku ngon teungku
Plueng meu'u-'u dalam rimba

Sigala kaphe that guransang
Meuteumeung rijang putroe muda
Rakyat 'a-'u kiam bunyoe
Leungo bumoe nyum meugeumpa

Dumnankeu le rakyat jijak
That seuleusak peunoh donya
Laen di likot that barollah
Kaphe beudeubah that guranta

Lawet lawan dudoe nibak nyan
Bangta Sulotan lon calitra
Bangta Sulotan ateueh manjo
Teungoh syuko pujoe Esa

Laloe dukhoe neuduek ngadap
Pujoe Hadarat Allah Ta'ala
Putroe Sunoe muda bangsawan
Neupujoe Tuhan hana reuda

Raja ngon putroe afai Quruan
Sikeujap tan na neulupa
Teungoh galeb raja ngon putroe
Neudeungo bunyoe saboh suara

Suara Hatik hei di manyang
Raja bimbang deungo peunyata
Meunoe geuhei su meubunyo
Tango kamoe raja muda

Bek le tabeuet beudoh rijang
Kaphe suang le that teuka
Jak taampeueng Bangta Sulotan
Sitree Tuhan asoe nuraka

Nyoho ka troh Raja Peuranggi
Kaphe Yahudi talawan ngaza
Ban raja ngo suara meunan
Beudoh yoh nyan raja muda

Neucok peudeueng mat u jaroe
Neuhei putroe lam istana
He putroe cut judo badan
Kaphe tuan le that teuka

Suara geuhei bunoe di manyang
Geuyue ampeueng kaphe teuka
Ban neudeungo raja peugah
Peue lom tapreh po meukuta

Putroe ngon raja neutren u leuen
Giduek kandran saboh guda
Peudeueng di jaroe saboh sopo
Teubiet laju u lua kuta

Teumat marit tuan putroe
Tango kamoe po meukuta
Pakri kreueh that kaphe bajeueng
Padum-padum seun nyang ka jirasa

Udeh kaman tajak ampeueng
Kaphe bajeueng tasalop muka
Insya Allah bah talawan
Cit tunangan po meukuta

Tulong Tuhan beureukat Muhammad
Neugaseh beuthat kamoe hamba
Beureukat Makah ngon Madinah
Tuhan peujeuoh mara bahya

'Oh troh neutebiet u babah pinto
Raja tahe sikutika
Neukalon kapai peunoh laot
Laju neuseubot la hawla wa la quwwata
Subhanallah 'amma yasifun
Raja neukheun pujoe Rabbana
Saba neukalon kapai le that
Pujoe Hadarat Allah Ta'ala

Bangta Sulotan putroe bangsawan
Gaseh Tuhan nyan bandua
Neupasang guda taloe pasi
Raja Peuranggi neujak mita

Raja Peuranggi kaphe pindoe
Jitet nanggroe peungeuh raya
Han jipeurab dilee bak putroe
Jitet nanggroe rumoh tangga

Banta Sulotan beureuhi asoe
Peudeueng di jaroe neugeunta-geunta
Guda neutepok jiplueng laju
Leumah le neuueu kaphe ceulaka

Neueu meureunue dum meureuntang
Guda neupasang keunan sigra
'Oh troh raja keunan ngon putroe
Marit jinoe raja ceulaka

Nyoho ka troh Bangta Sulotan
Beudoh tuan dumna gata
Kadrop putroe bek kapoh-poh
Raja saboh kapeufana

Ban jideungo haba meunan
Jiampeueng yoh nyan raja muda
Ban sare rab ka meuteumeung
Neumarit rijang suara meutaga
Nyan lagoe kah Raja Peuranggi
Kaphe deungki asoe nuraka
Peue lom napsu kajak keunoe
Kakheun jinoe kungo nyata

Teuma jiseuot raja pindoe
Kujak tueng putroe peurumoh gata
Kah kupeh-peh kuplah ulee
Kutueng keu kee putroe muda

Ban neudeungo Bangta Sulotan
Neujaweueb yoh nyan sigra-sigra
Nyankeu napsu kajak keunoe
Peurab jinoe meung kacuba

Han Peue cuba dalam teungku droe
Kutueng binoe kupoh gata
Jinoe kapeurab kacok putroe
Kume keunoe cit kusaja

Bek payah tueng u meuligoe
Keunoe putroe keu gata kuba
Raja Peuranggi kheun bak rakyat
Dong meusapat taglet lingka

Sare keumah dum sinaroe
Peudeueng bak jaroe ladam ganja
Ladam cokma bube-be bak u
Jipoh laju ra muda

Banta Sulotan hana keunong
Deungon peudeueng neutheun sangga
Guda meupaleng jidong meuteuntang
Neutheun peudang ban siseun lingka

Meuturot-turot jipoh leugat
Dumna rakyat payah raya
Jitak jitop hironeu tan
Kaphe kalon lia hana

Jisrom ngon batee hana keunong
Dum meuulang ateueh muka
Le that rakyat mate keudroe
Keuramat putroe deungon raja

Bangta Sulotan raja meutuah
Rakyat barollah neupeusinga
Neuiem keudroe neutheun tadah
Neupreh payah rakyat dumna

Sare kham-khum dum pahlawan
Bangta Sulotan jipoh lanja
Hana keunong ubak badan
Cokma simban srèt u donya

Han ek jipoh sare reuah
Ban bui payah geulet lam rimba
Teuma neumarit Bangta Sulotan
Kaphe syetan peue lom hawa

Ulon sidroepi ka kapoh
Putroe saboh lom ka mita
Jakkeu jinoe bek payah le
Peue lom lale kaphe ceulaka

Teuma jimarit Raja Peuranggi
Le that cakri ingat binasa
Ingat keudroe kamoe le that
Kah sidroe had dumna kuasa

Ban neudeungo haba meunan
Neucarot yoh nyan raja ceulaka
Neugrop guda miseue kilat
Neucang rakyat meutimpa-timpa

Sigo neuseutek peudeueng bak jaroe
Kaphe teupipoe han ek bileueng sa
Peudeueng neugeucaí neusayong-sayong
Kaphe neurancong seun-seun silaksa

Abeh mate dum meutabu
Ladom taeu putoh keupala
Hana lut badan leumoh sare
Jimoe kaphe su meu'a-'a

Rakyat mate subhanallah
Ile darah jeuet langue guda
Kaphe le that teuka laju
Maken seuu raja muda

Putroe Sunoe duek di likot
Kaphe neuceugot seun silaksa
'Oh meureunggot kaphe keunan
Neutak tam-tum di keupala

Reubah teudu-du meutamón-tamón
Tamse timon dipeukan raya
Raja ngon putroe that peungaroe
Kaphe neuseudoe meutimpa-timpa

Subhanallah rakyat mate
Sibagoe gle laen lom teuka
Nyang ka u laot hana gisa le
Abeh mate seumak donya

Bangta Sulotan raja wali
Pahlawan Zanggi neuplah-plah muka
Rakyat neucang meusong-abong
Neusirong-sirong ladom putoh pha

Ladom putoh teupat keuieng
Dum teugageueng meutimpa-timpa
Kaphe bajeueng han cit ughah
Dumnan darah ban ie raya

Rakyat le that meugeulumbang
Jak bantu prang kaphe ceulaka
Bangta Sulotan dua ngon putroe
Peudeueng di jaroe neugisa-gisa

Raja ngon putroe keuramat that
Gaseh Hadarat Allah Ta'ala
Jitak jitop han keunong badan
Kaphe suang mate lanja

Seuu that asoe Bangta Sulotan
Peudeueng bak tangan neucang lanja
Kaphe meusui-sui dum meusak-sak
Laju neutak han ban peubla

Naleueng han le abeh bicah
Sare mirah jeuet ba bahtra
Rab jeuet pusong tanoh uyok
Rab han jeuet jak rup lhok 'oh pha

Bangke meuseupreuek pueh that tajak
Ban tanoh cak meukeuba-keuba
Uroe malam neucang sabe
Tuhan Kade bri kuasa

Uleebalang nyang meugah-meugah
Han le saboh dum ka fana
Pahlawan Zanggi abeh mate
Han saboh le nyang peurkasa

Dum geutamon bangke meutindeh
Mate abeh lam blang raya
Nyang di laot teuka laju
Jijak bantu po jih raja

Ri nyang teungoh dum ka simpan
Sidroepi tan na peurkasa
Raja Peuranggi kaphe pindoe
Jibeudoh jinoe sigra-sigra

Ate saket phet ka bicah
Mata mirah miseue saga
Jipeurab le mata jipet
Raja jiglet lam blang raya
Bangta Sulotan that beureuhi
Peudeueng neutadi ateueh keupala
Neutak tam-tum that seumeureueng
Teubiet meuk peudeueng tamse nuraka

Raja Peuranggi buta tuloe
Peudeueng neuseudoe han jikira
Jigrop laju di jih bak putroe
Raja pindoe beungeh raya

Putroe Sunoe peudeueng neusayong
Neukoh rancong kaphe ceulaka
Badanjih keubai kaphe pindoe
Han lut beusoe kapeh beudeuga

Putroe Sunoe tren u baroh
Kaphe rioh kiam subra
Bangta neuduek ateueh kandran
Kaphe neucang hana reuda

Putroe Sunoe le that laku
Neupeuseuu kaphe ceulaka
Neuhayak ulee bee meudru-dru
Kaphe seuu harok raya


Jipeucrok putroe bee jiringeut
Neutak hat-huet meutimpa-timpa
Idong keumang com bee putroe
Ban laku proe asee let rusa

Kaphe bajeueng mabok ngon bee
Seun siribee mate lanja
Neuhayak droe neupoh linggang
Bee mabok-bang hana tara

Mata kaphe sare bla-blie
Putroe nari peumeu'en guda
Dumna kaphe sare sok-adok
Tamse bee pok bak meuria
Putroe jipeucrok meuturot-turot
Bangta di likot neucang lanja
Sigo lheueh peudeung Bangta Sulotan
Sikhan kawan abeh fana

Hana hiro keu Bangta Sulotan
Putroe tuan cit jimita
Teuma marit Bangta Sulotan
Neukheun bak kawan kaphe dumna

Wahe kaphe 'alaihen laknat
Han kaingat hai ceulaka
Raja Peuranggi pungo keudroe
Di jih putroe cit jimita



Tuan putroe bagoe leuek useueng
Langkah sikureueng meu'en peundika
Mata bak putroe jikeureuleng
'Oh jirungkhom neulumpat sigra

Weh sikeujap rab meuteumeung
Jilumpat king-keueng pantah raya
Meucron u wie sigala kaphe
Neusirong le putroe muda

Meujan-jan teudong pura han hireuen
'Oh jirungkhom neugrop lanja
Lom jipeucrok meupuseng-puseng
Gigoe teuheng teubleut mata

Meuklep-klep mata teuheng gigoe
Keutum bak dhoe ulee teupula
Lom jipeuek jipeureughak
Dumnan geutak hiro hana

Jiek u ateuh bangke rakan
Peue na sayang kaphe ceulaka
Rakyat le that miseue sidom
Prang hana tompi na reuda
Putroe Sunoe that juhari
Kaphe Yahudi neupeudaya
Lompi putroe neuhayak ok
Bee that seubok gahru ceundana

Lom jirungkhon jikeumeung mat
Neutak hat-huet kaphe ceulaka
Di likot Bangta di nap putroe
Kaphe neuseudoe han ban peubla

Jipeucrok putroe keudeh u nap
Sinoe di likot neucang lanja
Raja muda cang di liko sabe
Di jih lale putroe jimita

Raja Peuranggi nyan ngon rakyat
Han sapeue jiingat harok raya
Asoe ngon kuah han meuteumeung
Nyang na meupeudeueng meuteumeung rasa

Raja Peuranggi yoh nyan ugh
Reubah limpah lam blang raya
Rakyat jiplueng han le theun droe
Mate sinaroe meutimpa-timpa

Abeh jiboh droe jilangue laot
Peucrok di likot geucang lanja
Eungkot di laot yee ngon pawoh
Abeh jipajoh kaphe ceulaka

Nyang ladom buhuek geulumbang tinteueng
Ladom geucang han teukira
Bangta Sulotan peucrok laju
Jiplueng meu'u-'u bansineuna

Bak teungoh plueng le that geucang
Kaphe suang yo sang geumpa
Miseue bangon unoe kleueng tak
Abeh meuseupak sigala donya
Raja ngon putroe ampeueng u nap
Neupeucrap-crap neucang lanja
Putroe dilee raja di likot
Peudeueng hat-huet bunyoe geureuda

Raja Peuranggi langue laot
Yo teumakot badan meugeumpa
Han ek theun le peudeh asoe
Putroe seudoe dua ngon raja

Raja Peuranggi plueng jiboh droe
Meuhei le putroe ho kaguda
Hai bui paleh asee geucang
Badeuek suang gajah sula

Riwang keunoe bek kaboh droe
Kaphe pindoe bah karasa
Barangpeue geukheun han hiro le
Jilangue sabe laot raya

Cangkeng-mangkeueng kaphe paleh
Bak yee tapih si geukoh pha
Raja Peuranggi langue sabe
Han jingo le sapeue haba

Lheueh nyan jiek dalam kapai
Raja bubai asoe nuraka
Teuma jiwoe kaphe pindoe
Laju u nanggroe maseng rata

Ban sare troh nyan u nanggroe
Jikrah jinoe rakyat dumna
Le nibak sot rakyat jikrah
Kaphe beudeubah han cit ek jra

Jiprang sigo treuk Bangta Sulotan
Jitueng pahlawan nyang raya-raya
Raja Tancawopi jiuroh
Jibri upah jiyue ngaza

Jikrah rakyat hana hireuen
Troh peuet buleuen mantong lanja
Ase rakyat peunoh seuleusak
That meubulak han teukira

Ban sare troh dum meusapat
Jipeuduek pakat miseue nyang ka
Bah lon peuduek haba nyan siat
Jinoe riwayat meugisa punca

La ilaha illallah
Sahib kisah nyang calitra
Jinoe lon seubot raja ngon putroe
Neuseutot jinoe raja ceulaka

Bangta Sulotan goh pueh jaroe
Neuseutot u nanggroe Hindu beudeuga
Pat na meugah Raja Peuranggi
Kaphe Yahudi asoe nuraka

Raja ngon putroe guda neupasang
Neuteureubang rot lam hawa
Guda jipo that meurang-rang
Troh bak awan nyang meumiga

Siroe simalam jiteureubang
Troh le seunang nanggroe raja
Guda jisujud tren u bumoe
Lon kisah jinoe putroe ngon raja

Buet teureubang mee bak adat
Sampoe ngon siat sikutika
Bak ureueng keuramat dum kri mudah
Poteu Allah peutroh pinta

Putroe marit deungon judo
Neupeugah laku bak raja muda
Tuanku ampon deelat meukatoe
Bak nanggroe nyoe jipoh hamba
Sinoekeu jikoh takue kamoe
Masa saboh roe raja ceulaka
Nyoekeu gampong Raja Peuranggi
Kaphe majisi asoe nuraka

Raja muda teuma pioh
Pot-pot reuoh bak anggeeta
'Oh lheueh pioh bungka leugat
Rot neutakat lam blang raya

Guda neupasang jiplueng laju
Troh bak busu teumpat raja
Bangta Sulotan keunan neujak
Guda neupeusak laju keu sana

Teukeudi Allah peurintah Rabbi
Raja Peuranggi dalam kuta
Rakyatpi peunoh meulaksa ribee
Laen peureulee raja raja

Teungoh geumeuduek geupadan prang
Laen lom datang seun silaksa
Sare peunoh rakyat kiam
Jikheun taprang jineoe raja

That teumeui-meui cit jih sidroe
Geutanyoe meukatoe meuploh laksa
Tadrop tacriek-criek taplah badan
Bangta Sulotan that angkara

Meunankeu narit kaphe sikalian
Teukaboran dum simua
Sare cukop keumah padan
Bangta Sulotan keunan teuka

Neutamong laju leupah u dalam
Kaphee jahannam meuklep-klep mata
Teukap jaroe dumna rakyat
Bangta leugat troh bak raja

Guda neupasang dalam kawan
Sabohpi tan na jeuet sangga
Han jituri Bangta Sulotan
Keunoe pajan troh neuteuca

Teutap tahe dumna ureueng
Kaphe bajeueng han le haba
Sigala kaphe teumanyong rijang
Pane ureueng nyan jroh that rupa

Han tom takalon dumna geutanyoe
Dalam nanggroe nyoe dilee nyang ka
Bangta Sulotan tamong laju
Guda neumaju dalam tantra

Ban deumi troh u leuen meuligoe
Raja ngon putroe ateueh guda
Raja Peuranggi hana jikalon
Bangta teudong di leuen istana

Teuma teuka sidroe rakan
Seumbah junjongan ubak raja
Deelat tuanku po junjongan
Na lon kalon po meukuta

Dua droe ureueng guda geupasang
Na ban bintang indah rupa
Peudeueng di jaroe sangat simban
Dua ureueng nyan pane teuka

Ban jideungo haba meunan
Jingieng yoh nyan sigra-sigra
Ban jikalon Bangta Sulotan
Jiklik yoh nyan that meutaga

Nyankeu leupeue Bangta Sulotan
Kacang tuan nyan bandua
Raja paleh pajan saleh troh
Bukon le jeuoh jih nyan dua

Raja Peuranggi bukon le 'a-'u
Jiheh bantu sigra-sigra
Teuma teuka rakyat meukatoe
Jilet putroe deungon raja

Bangta Sulotan Putroe Sunoe
Peudeueng di jaroe tujoh deupa
Neukeuta-keuta neusayong-neusayong
Kaphe neurancong seun silaksa

'Oh meureunggot neucang laju
Bangke meutabu seumak donya
Na sikeujap prang meucapheuek
Miseue rieuek teungoh keunong sa

Kaphe mate that barollah
Ladom patah meuhila-hila
Suara peudeueng raja ngon putroe
Miseue bagoe geulanteue teuka

Keureutam-keureutum tamse rieuek
Kaphe meuseupreuek mata lanja
Bukon bubarang kaphe mate
Darah ile sang ie raya

Miseue yoh jiprang nanggroë Isfahan
Jinoepi meunan taeu rupa
Raja Peuranggi rakyat meukatoe
Abéh jiboh droe dum u lua

Bak teungoh plueng neucang leugat
Kaphe laknat mate meukeuba
Bangta Sulotan that guransang
Han soe teuntang di ateueh donya

Raja Peuranggi kaphe pindoe
Raja ngon putroe jitakot raya
Jiplueng u blang dumna rakyat
Bangtapi leugat peucrok lanja

Bangke kaphe sang tanoh cak
Teuduek-duek bak tanoh data
Taeu ladam moe meu 'i-'i
Ladam meugule meuklep-klep mata

Raja Peuranggi jinoe ka talo
Jiplueng laju kaphe ceulaka
Nyang pahlawan han sidroe le
Abeh mate lam blang raya

Raja Peuranggi kaphe pindoe
Ka jiboh droe lam blang raya
Dalam rimba bandum jiplueng
Aneuk bajeueng gadoh bicara

Tango jimeucreuek nyum hana gop
Tango tak ngon top jipe'haba
'Oh na lawan han sapeue le
Geulet lam gle sang bui buta

Meunan teukeudi nibak Allah
Leubeh tuah putroe ngon bangta
Teutap 'oh nan teuduek siat
Jinoe riwayat laen calitra

Banta Sulotan neuduek nanggroe nyan
Neukeurajeuen teupat raja
Ureueng han le ka soh nanggroe
Na sidroe-droe kaphe tuha

Geunap sithon neuduek sinan
Nanggroe aman han le goga
La ilaha illallah
Poteu Allah balah guna

Kata dalang eumpunya rawi
Raja Peuranggi lon calitra
Raja Peuranggi kaphe laknat
Jikrah rakyat le bak nyang ka

Bungka u Mureh raja pindoe
Jiyue bantu droe bak prang raya
Meuek talo raja ngon putroe
Jibri nanggroe siblah donya

Teuma jiseutot ahli nujum
Jiyue eu dum surat kutika
Teuka nujum tujuh ploh droe
Bandum ragoe bijaksana

Ban sare troh nujum keunan
Jimarit yoh nyan raja ceulaka
Wahe nujum tango kamoe
Taeu jinoe surat kutika

Taeu pat na ureueng nyang padan
Kukeumeung lawan Bangta muda
Sigala nujum peuek seumbah
Han peue salah po meukuta

Teuma jikalon sif ngon surat
Jieu ayat jibeuet angka
Abek jikalon jeuep-jeuep kurah
Teuma jipeugah ubak raja

Teuanku ampon po junjongan
Bangta Sulotan han ek talanda
Tuanku mate rakyat meukatoe
Meukeusud geutanyoe han samporeuna

Jikalee tahimpon dumna rakyat
Mate meuhad bansineuna
Han ek tameutheun Bangta Sulotan
That pahlawan ateueh donya

Na cit lawan tango lon peugah
Nyang ek tangah raja muda
Sideh di Rom na dua droe
Raja ngon putroe that peurkasa

Lagi beurani that analan
Nyang ek sipadan deungon Bangta
Adat ek tatueng po junjongan
Neuyue lawan raja muda

Tabri upah ureueng dua droe
Siblah nanggroe mat neuraca
Nibak taupah laen sulotan
Neubri keunan po meukuta

Teutapi raja nyan ureueng museulem
Saleh han geutem doli baginda
Teutapi adat nyan na cit padan
That pahhlawan nyan bandua

Raja Peuranggi jingo meunan
Pat ureueng nyan tacalitra
Ureueng nyan di Rom bandua dro
Raja ngon -utroe mat neuraca

Raja Peuranggi marit yoh nyan
Peugot kireman saboh jiyue ba
Meuk talo Bangta Sulotan
Tataklok keunan geutanyoe dumna

Bangta Sulotan han ek tagagah
That meutuah ateueh donya
Pahlawan that keubai sangat
Han jitem lut alat seunjata

Geutanyoe abeh dum jisimpan
Bangta Sulotan that angkara
Got tapeuet surat kireman
Tayue lawan Bangta muda

Meuek talo Bangta Sulotan
Tataklok keunan geutanyoe dumna
Lheueh jikheun nyan Raja Peuranggi
Surat jiyue me nyan keu raja

Lawet lawan dudoe nibak nyan
Troh kireman utosan bawa
Ka troh u Rom ureueng me surat
Jitamong leugat ubak raja

Ban sare troh u leuen meuligoe
Jideelat jinoe poteue raja
Deelat tuanku syahi alam
Seumbah laman po meukuta

Teuma neuseuot Raja Abdullah
Paneubu langkah gata teuka
Panebu langkah gata teuka
Takheun jinoe kungo nyata

Ampon tuanku po junjongan
Kamoe utosan nibak raja
Suroh tuanku Raja Peuranggi
Surat neuyue me keunoe neuyue ba

Nyankeu nyang troh kamoe keunoe
Harap po kamoe keu po meukuta
Tohbu surat taba keunoe
Jijok jinoe sigra-sigra

Ban raja eu surat kireman
Lahe di sinan dum peukara
Kakeu abeh neubeuet surat
Raja keuramat suka raya

Poteu marit neutanyong proe
Pakri di nanggroë teungoh prang raya
Yoh nyan jiseuot tanyong sulotan
Meugeucoh prang po meukuta

Rakyat meukatoe han teupeugah
Teuma nyang patah han teukira
Abeh jipeugah dum hareutoe
Teuma jiwoe utosan raja

Raja Abdullah neukheun hareutoe
Jakleh tawoe dilee gata
Troh le kamoe meujak leugat
Dang meupakat sikutika

'Oh lheueh raja neupeugah proe
Teuma jiwoe utosan raja
Sare leupah woe utosan
Marit yoh nyan raja raya

Neupeugah hai ubak putroe
Pakri geutanyoe toh bicara
Teuma seuot Putroe Baren
Peue kireman po meukuta

Raja peugah putroe tanyong
Hana keunong neucalitra
Raja Peuranggi jiyue tulong droe
Prang di nanggroe meugeumpita

Nyoe kireman jiyue me keunoe
Bak geutanyoe jiyue ngaza
Han ek jimeutheun jih ka talo
Jilakee bantu jinoe sigra

Laman ek talo geutanyoe prang
Nanggroe jipulang sigala donya
Jih jitaklok bak geutanyoe
Pakri jinoe toh bicara

Ban putroe ngo raja peugah
Insya Allah prang tangaza
Bah geutanyoe prang po junjongan
Agama Tuhân tahat sibeuna

Taprang sabi fahla le that
Tuhan Hadarat nyang calitra
Padum-padum hadih Nabi
Taprang sabi le that fahla

Tapeubeuet rakyat tabri nasihat
Fahla le that Nabi peuhaba
Miseue narit Nabi Muhammad
Tango lon seubot po meukuta

Afdalu l-jihadi kalimatu haq 'inda sultani jair

————— Rasul Tuhan nyang calitra
Sileubeh-leubeh prang sabilullah
Haba sipatah nyang sibeuna

Akan raja nyang lalem that
Tabri nasihat po meukuta
Jalan sibeuna tapeurunoe
Tajak geutanyoe lawan ngaza

Rela Tuhan deungon Nabi
Taprang sabi raya fahla
Nyoe lom hadih Rasulullah
Tango lon peugah po meukuta

Ma akhbarat qadama 'abdin fi sabilillahi
Fatamassahu n-naru, tango teungku jinoe makna
Soe prang sabi Nabi peugah
Jimeusumpah apui nuraka

Nyang keunong hoi tapak kaki
Peuneugah Nabi yoh tangaza
Apui nuraka jipeuhareuem
Han jimakeuen po meukuta

Ureueng prang sabi fahla le that
Wajeb teumpat lam syeuruga
Tuhan neubri syeuruga nyang indah
Meuh meutatah intan peurmata

Padum-padum Tuhan bri nekmata
Han ek himat had ngon hingga
Tango kamoe tuanku droe
Tajak geutanyoe lawan ngaza
Tatueng pahlawan uroe akhirat
Agama Muhammad tapeumeusra
Ban neudeungo haba putroe
Beureuhi asoe hana tara

Nyum beutroh le neujak meuprang
Bukon bubarang seuu raya
Trep hana prang padum lawet
Baro siblet talawan ngaza

Masa tamuprang ngon Raja Sindon
Kaphe majeunun asoe nuraka
Nyankeu siblet sagai tameuprang
Bukon bubarang that guranta

Raja Abdullah seuu asoe
Neukheun bak Putroe Baren Miga
Wahe putroe judo badan
Takheun rijang toh bicara

Laman tuanku tajak jinoe
Dua geutanyoe taprang ngaza
Sare abeh pakat seuleusoe
Bungka jinoe raja raya

Putroe Baren muda bangsawan
Gaseh Tuhan asoe syeuruga
Neukheun bak aneuk muda samlakoe
Uleh Putroe Baren Miga

Wahe aneuk tango lon kheun proe
Taidin kamoe jak prang ngaza
Teuma seuot muda samlakoe
Taba kamoe hai ma raja

Gata aneuk tingai sinoe
Uroe dudoe teuma bungka
Han soe sinoe aneuk meutuah
Gantoe ayah mat neuraca
Dua kamoe meujak dilee
Teuma lon bri thee ubak gata
Laman jeuet sosah kamoe meugriet
Keunoe lon peuet surat keu gata

Bekbu tajak aneuk bangsawan
Han soe peutimang rakyat dumna
Tamohon tulong nibak Allah
Bak meusiblah nibak bahya

'Oh lheueh abeh neukheun hareutoe
Bungka putroe deungon raja
Saboh sapa neucok peudeueng
Neutren mameung lam istana

Neucok guda neuboh keukang
Leugat neupasang sigra-sigra
Teuma neutepok guda hekeumat
Jipo leugat dalam hawa

Guda teureubang miseue kilat
Troh le siat nanggroe raja
Troh bak nanggroe Raja Peuranggi
Tuan Siti marit lanja

Tuanku tarek taloe keukang
Guda jiriwang tren u donya
Geutanyoe ka troh tuanku droe
Nyoekeu nanggroe nyang tacinta

Tarek tuanku taloe rijang
Bek sret tuan u laot raya
Raja Abdullah deungo meunan
Neutarek yoh nyan sigra-sigra

Ban neutarek taloe keukang
Guda jiriwang tren u donya
Ban deumi troh u leuen meuligoe
Raja ngon Putroe Baren Miga

Raja Peuranggi sujud seumbah
Raja Abdullah that mulia
Teuma jimarit Raja Peuranggi
Kaphe majusi asoe nuraka

Jipeuhabaran jingadu droe
Haba saboh roe jicalitra
Nyan jipeugah yue bantu droe
Talo nanggroe sigala donya

Dumna kamoe han ek meulawan
Tulong junjongan nyankeu hamba
Malee lon that lam donya nyoe
Talo nanggroe sigala donya

Meuk neupoh raja ngon putroe
Kubri nanggroe keu po meukuta
Neukeurajeuen neuduek sinoe
Dumna kamoe neupeuhamba

Teuma seuot Raja Abdullah
Insya Allah kamoe ngaza
Bit ban takheun hana ubah
Jinoe meusumpah teugoh seutia

Raja Peuranggi jimeusumpah
Raja Abdullah ate suka
Sireuta neukheun haba sipatah
Deungo lon peugah wahe raja

Tadeungo he Raja Peuranggi
Teugoh janji lon ngon gata
Teugoh tuanku hana ubah le
Troh an page neupeuhamba

Nanggroe neuduek neukeurajeuen
Dalam ngon mideuen hukom meukuta
Insya Allah ngon tulong Tuhan
Kamoe lawan musoh gata

Siri nanggroe raja tapeugah
Cuba kisah meungo nyata
Tuanku sideh geuduek jinoe
Pucok nanggroe nyoe sawang kuala

Cit dua droe lakoe binoe
Lam nanggroe nyoe han sitara
Meunan teukeudi nibak Allah
'Oh nan sudah sigala haba

Raja Peuranggipi tan jipeugah
Raja Abdullah neutanyong hana
Adat meuna sasat sidek
Han roh prang tarek ngon syeedara

Raja Abdullah neukheun hareutoe
Udeh geutanyoe tajak ngaza
Ban jideungo meunan peuneugah
Jibeudoh pantah rakyat dumna

Rakyat seuleusak meuploh-loh katoe
Jibeudoh jinoe sajan raja
Teuma jitet beude nubat
Beudoh rakyat jak prang ngaza

Jipeh tambo gong ngon geundrang
Bukon bubarang meugeumpita
Jideumpek-deumpek ngon jisurak
Na nyum meuhayak nanggroe raja

Putroe Baren panglima prang
Guda neupasang neulila-lila
Raja Abdullah dua ngon putroe
Beureuhi asoe hana tara

Peudeueng di jaroe neukilap-kilap
Sigala rakyat atejih suka
Dumna rakyat atejih rab
Ka na peungarap pahlawan dua
Teukeudi Allah siuroe jak
Meubunyoe surak troh bak raja
Bangta Sulotan ngon Putroe Sunoe
Neutebiet jinoe u balng raya

Guda neugiduek dua ngon putroe
Peudeueng di jaroe na tujoh deupa
Guda neuteupok jiplueng leugat
Tamse kilat pantah lagoina

Troh le u blang jiplueng laju
Leumah le neuu rakyat dumna
Bangta Sulotan that juhari
Peudeueng neungunci meutoto mata

Ban sare troh ka meuteuntang
Raja suang yoh nyan meuhaba
Neungo kamoe tuanku droe
Nyan ka keunoe raja muda

Ban raja ngo haba meunan
Neumeuhei yoh nyan raja muda
Peurab keunoe wahe tuan
Tameubisan geutanyoe dua

Nyoe nyang ka troh sabe wadan
Peurab tuan keunoe lanja
Masa dilee kon gata guransang
Yoh goh na lawan nyang sabe padra

Yoh goh na reudok cit tarek that uroe
Yoh goh na kamoe cit bako gata
Teuma seuot Bangta Sulotan
Bek that guransang cit troh ban pinta

Reudok ngon tupheuen siseun nyoe hilang
Bek panyang kalam rugoe meubara
Padum trep sabe lon preh-preh lawan
Nyang ek timbangan dalam neuraca

Asoe lon gatai kulet meukalang
Aneuk meuriam trep that ka hana
Lon nyoe umpama dara baro
Lon jak tueng linto lam blang raya

Lon preh di rumoh hana tajak
Bek le tatimplak wahe syeedara
Sangkira gata nyo aneuk agam
Peurab tuan keunoe sigra

Insya Allah tapreh sinan
Cit tunangan di lon ngon gata
Bak uroe nyoe ka roh siwadan
Nyo sipadan bak ri rupa

Masa dilee han jeuet keu judo
Nyang na sikuphu deungon hamba
Peurab laju bek meucrak le
Di kamoe gaki keuboh raya

Bangta Sulotan marit nyang saket
Neubicah phet raja raya
Narit saket neugurantang
Neusuet peudang su meutaga

Tapreh beugot ngon tulong Tuhan
Kukoh reupang bansineuna
Bek peukreuh su ngon lon sidroe
Baranggasoe han kutaba

Preh di sinan aneuk jalang
Kaphe suang asoe nuraka
Bangta Sulotan that guransang
Guda neupasang u dalam tantra

Raja Abdullah teuma ampeueng
Neusayong peudeueng bunyoe taga
Ninoe peudeueng nideh peudeueng
That seumeureueng meugeumpita
Yoh nyan geuprang that meuhayak
Rioh surak tamse taga
Bangta Sulotan that guransang
Neusayong peudang hana reuda

Prang meucapheuek bunyoe tam-tum
Sare gram-grum miseue taga
Dua sinoe inong agam
Prang meuguncang pahlawan raya

Rakyat nyang le teudong mantong
Hireuen jipandang bansineuna
Bangta Sulotan that guransang
Droeneu meuprang ngon syeedara

Putroe Baren ngon Putroe Sunoe
Bandua droe utoh raya
Peudeueng krang-kring that seumeureueng
Han tom keunong tuboh anggeeta

Utoh neutheun jeuet neukilah
Hana tiwah sabe padra
Sibang parui han geumeuthee
Tuhan peusilee neupeulupa

Raja Abdullah that juhari
Peudeueng neutadi hana reuda
Ban neusayong peudeueng neutayang
Bangta neusagang sigra-sigra

Siuroe suntok meucang di bumoe
Hana sidroe na binasa
Droe cit ka ngon teukeudi Allah
Ureueng meutuah nyan bandua

Peurasan Tuhan le that bagoe
Meuprang ngon adoe sabe syeedara
Tuhan peusilap han neubri thee
Meunan lagee buet Rabbana

Troh bak malam prang maken that
Hana siatpi na reuda
Raja Abdullah rab han ek le
Neusurot le prang ngon guda

Neupo u manyang peusiblah droe
Dua ngon Putroe Baren Miga
Ban sare troh dalam awan
Bangta Sulotan seutot lanja

Nyoepi neupo guda neupasang
Neuteureubang dalam hawa
Bangta Sulotan ngon Putroe Sunoe
Troh le jinoe bak awan miga

'Oh sare troh ka meurumpak
Jeuet le meutak sang geulura
Bangta Sulotan that amarah
Kalam sipatah ngon syeedara

Pakon taplueng dalam awan
Gata tuan that peurkasa
Han soe teuntang ateueh bumoe
Peue buet keunoe taplueng gata

Barangho tapluengpi lon seutot
Adat u laotpi kumita
Bek 'oh noe ngon tulong Tuhan
Ban saboh alam kuseutot lanja

Bangta Sulotan neumarit seungkoe
Neuseuot Putroe Baren Miga
Bukon le bako gata pahlawan
Nyoe nyang padan sabe padra

Kamoe kon meuplueng meupioh siat
Meutakot that meunyo dum gata
Ek kuantam insya Allah
Jinoe tapreh sinan gata
Bangta Sulotan beungeh han soe
Neukap gigoe neupet mata
Peudeueng neusayong ujong meukrang-krang
Sidehpi tuan neutheun sangga

Neucang laju peudeueng neuhapit
Meuk jiteubiet meubura-bura
Putroe Baren ngon Putroe Sunoe
Teumuda ngon adoe that peundika

Bandua pantah han soe teuntang
Ka neumeucang dalam hawa
Putroe Baren bagoe leuek useueng
Cit lam geubileueng lam prang raya

Putroe Sunoe tamse keudidi
Utoh jinari di ateueh guda
Bandua droe sabe useueng
Han keunong peudeueng utoh peundika

Teukeudi Allah peurintah Tuhan
Meuprang lam awan raja muda
Rakyat di bumoe preh-preh talo
Hireuen tahe jieu rupa

Abeh teuseupok dumna rakyat
Jithee keuramat ureueng nyan dua
Han tom sabe that pahlawan
Bangta Sulotan ngon raja muda

Nyo meutuah hana lawan
Peue han simpan geutanyoe dumna
Geutak geutop han ek keunong
Utoh that neutheun neuboh sangga

Meunankeu jikheun rakyat di bumoe
Jikalon proe lam antara
Raja Abdullah dua ngon putroe
Neuplueng jinoe lom neubungka

Guda neupacu po lam awan
Bangta Sulotan seutot lanja
Meusong-abong teubiet laju
Plueng meu'u-'u Baren Miga

Jan-jan meugriek neutren bacut
Guda hat-huet sang boh lila
Ho nyang neuplueng geuhumeui leugat
Troh bak teumpat jen antara

Ban meurumpok leumah nanggroe
Neutren Putroe Baren Miga
Putroe Baren akai lisek that
Sira neulumpat meu'en peundika

Pura-pura peutalo droe
Neutren u bumoe sikutika
Ban neusujud neutren u bumoe
Neuampeueng jinoe raja muda

Meunan kayem geunap uroe
Aduen ngon adoe meuprang dua
Dua sinoe agam inong
Wueh takalon payah raya

Han meukon-kon roh neumeuprang
Kheundak Tuhan Po Nyang Esa
Allah neupeujeuet sabab bak kaphe
Tuhan Kade nyang kuasa

Teukeudi Allah tuan putroe
Neupo jinoe lom lam hawa
Neuek lam awan neutren u bumoe
Meunankeu proe nyan bandua

Troh sigala be guda teureubang
Prang meuguncang dalam antara
Hingga troh bak nanggroë Diu
Gampong Bungsu lam antara
Neueu ureueng meupeucrok-peucrok
Jikeumeung meurumpok jitheun sangga
Bangta deumpek meugeureupoh
Jenpi kiroh bansineuna

Teutap geumeuprang aduen ngon adoe
Dalam nanggroë jen antara
Han sidroe na keunong beusoe
Tuhan sidroe peubla bahya

Ureueng peuet nyan gaseh Tuhan
Page tuan asoe syeuruga
'Oh han ek le pioh siat
Nibak teumpat jen antara

'Oh lheueh pioh teuma geumeuprang
Bukon bubarang meugeumpita
Bangta Sulotan Putroe Sunoe
Bandua droe that peundika

Raja Abdullah Putroe Baren
Banpeuet meunan sabe padra
Baren Miga baplueng sabong
Kayem neuplueng dalam hawa

'Oh ka han ek neuplueng siat
Ulang u likot deungon sigra
Teukeudi Allah dudoe nibak nyan
Karonya Tuhan saboh rupa

Teuka jen pari saboh kawan
Jigiduek kandran bansineuna
Badan beusa raya panyang
Beude jisandang dumjih rata

Yoh masa nyan putroe bangsawan
Neuduek lam awan nyang meumiga
Neukalon jen that barollah
Putroe meutuah meunyum lia

Han tom neukalon raya-raya that
Teumakot pucat ngon ie muka
Jen jimeusu bunyoe guroh
Meugeureupoh lam antara

Di jen Islam bangsa Diu
Jiwoe laju nyan jibungka
Putroe Sunoe neutheepi tan
Neuduek lam awan meuseunia

Raja Abdullah neuduek sajan
Neukalon jen raya-raya
Sare leupah jen abeh woe
Neungo bunyoe jen meusuara

Bangon laku miseue geusurak
Rasa meuhayak dalam antara
Bunyoe suara tambo geundrang
Bukon bubarang subra donya

Seun rot leumah saboh pasokan
Jen meukawan pari raya
Ureueng le that deungon rakyat
Maseng babat giduek guda

Bangon laku ureueng jak meuprang
Putroe pandang neuu rupa
Raja Abdullah teumakot that
Neueu rakyat raya-raya

Jen nyang dilee bandum Islam
Teungoh jimeuprang dalam hawa
Jen nyang dudoe bandum kaphe
Jiheh sare meugeumpita

Teuma meurumpok deungon jen Islam
Jimeuantam jeuet prang raya
Surak meuhayak meualon-alon
Sare meucron-cron han ban peubla

Nideh jisurak ninoe jisurak
Meuhayak-hayak nanggroe antara
Peudeung beude ganja tumbak
Jen meutak-tak han ban peubla

Rotdeh meutam rotnoe meutum
Beude kram-krum dalam hawa
Rakyat mate han soe tudum
Reubah bam-bum meutimpa-timpa

Peulheueh busu jitop leumbeng
Keunong keuieng teupeh mata
Rakyat meucang meukeulileng
Meupuseng-puseng meugisa-gisa

Subhanallah prang meuhayak
Miseue umbak teungoh keunong sa
Di jen Islam that guransang
Rakyat jicang meutimpa-timpa

Meupuseng-puseng meukalot-kalot
Bacut meulikot ka putoh pha
Di jen kaphe dum teumakot
Boh beude cet seun silaksa

Bacut silap han jan jingieng
Keunong keuieng putoh dua
Nyang jen Islam tulong Tuhan
Bandum tuan that guranta

Jen kaphe dum le that mate
Darah ile ban ie raya
Mate geucang keunong beude
Teutiek bangke sret u donya

Guda jiklik gajah kiam
Suara geumeuntam dalam hawa
Guda teureubang sare bra-bru
Han jan taeu sang boh lila
Peudeueng ganja leumbeng tumbak
Guda jimeutak sang geulura
Gudah pantah miseue kilat
Peudeueng jimat dumjih rata

Jimeutamon 'oh meusapat
Jiek leugat ban boh panta
'Oh jisurak sare kiam
Di jen Islam that guranta

Nideh jisurak ninoe jisurak
Nyum meuhayak nanggroe antara
Tuloe geulunyueng sangat tunye
Surak rame that meutaga

Putroe Baren hayut asoe
Neukalon proe dalam antara
Neupreh-preh sret u ateueh droe
Bangke sinaroe tijoh lingka

Yoh nyan jeuet prang that meukalot
Jen jimeulet ban leuek cintra
Jimeusoh-soh jimeutak-tak
Ngon jisurak salli ala

Putoh takue sret tangkurak
Mate rusak han ek kira
Rotdeh rotnoe rakyat mate
Blah jen kaphe le logoina

Nyang jen Islam that geumeuntam
Jiek tajam sang boh lila
Talo jen kaphe jiplueng leugat
Jen Islam that kha lagoina

Dum jen Islam tarek geudubang
Jipeucrok rijang dum simua
Bak teungoh plueng jicang leugat
Mate le that han ek kira

Jicang rakyat bak teungoh plueng
Sare king-keueng yo sang geumpa
Putroe Baren kalon peurintah
Hireuen dahsyah sangat liga

Hana le raya prang ubenan
Bangta neupandang ateueh donya
Talo jen kaphe meunang Islam
Jipo peujam dalam hawa

Ka jipeucrok timu barat
Pat meubakat jijak mita
Lam-lam laot dum jipeucrok
'Oh meurumpok jiplah keupala

Abekh jiboh droe dum jen kaphe
Nyan jipo le lam antara
Keudeh jiseutot dum jiampeueng
Jicang bang-beung meutimpa-timpa

Klik meukrip-krip han meuho plueng
Peudeueng di rueng cokma ngon ganja
Siseun jigreh mate siribee
Putoh ulee ladom putoh pha

Di jen Islam seuu asoe
Peudeueng di jaroe han ban peubla
Jen kaphe talo abekh mate
Han saboh le abekh fana

Bangke meutabu meuleuek-kapeuek
Meuseupreuek-seupreuek seun silaksa
Teukeudi Allah prang ka teudoh
Talo musoh abekh fana

Teuma jiwoe di jen Islam
Ubak makam rumoh tangga
Bahkeu 'oh nan prang raja jen
Jinoe laen lon calitra

Kata sahib eumpunya kisah
Teutapi Allah thee sibeuna
Amma bakdu dudoe nibak nyan
Deungo tuan dumteu rata

Jinoe lon kisah Bangta Sulotan
Neuduek lam awan nanggroe antara
Neukalon jen dum jimeuprang
Laloe sinan siuroe dua

Bangta Sulotan marit yoh nyan
Meuteuoh buetan dilee nyang ka
Pakri laku geutanyoe sinoe
Cuba kheun proe lon ngo nyata

Putroe Baren Raja Abdullah
Seuot pantah sigra-sigra
Peue tatanyong kon tameuprang
Beudoh rijang bek le haba

Bangta Sulotan amarah han soe
Peudeueng di jaroe neugeunta-geunta
Teuma neubeudoh guda neupasang
Neuteupok rijang jiplueng sigra

Beudoh le ampeueng Raja Abdullah
Lalu neusasah u ateueh Bangta
Neusayong peudeueng bunyoe layang
Guda neupasang ban kilat faja

Na sikeujap prang meutunang
Sabe timang nyan bandua
Blahdeh blahnoe sabe rancak
Ureueng meutak sisyeedara

Putroe Sunoe that juhari
Meucang ngon Siti Baren Miga
Bandua utoh sangat pindoe
Teumuda ngon adoe sangat peundika

Teukeudi Allah peurintah Tuhan
Prang lam awan that guranta
Umu lhee uroe prang lam awan
Peurasan Tuhan Po Rabbana

Dudoe nibak nyan karonya Hadarat
Leumah peundapat saboh tanda
Tuhan peurupa gunong hekeumat
Phon di langet troh u donya

Nyan ngon peubla gunong meugantung
Tren di manyang Baren Miga
Han leumah le geukeumalon
Gunong teudong troh lam hawa

Putroe Baren Bangta Sulotan
Tren lam awan leugat u donya
Rotdeh sujud rotnoepe meunan
Teuduek 'oh nan prang antara

Ban sare troh tren u bumoe
Geumeuduek jinoe sikutika
Dang tho reuoh pioh siat
Gunong hekeumat ubah hana

Mantong ban sot torh u manyang
Karonya tuhan Po Nyang Esa
Putroe Baren hireuen laloe
Neukalon proe gunong raya

Putroe seubot subhanallah
Pujoe Allah Tuhan Nyang Esa
Sabab hireuen neuu peurintah
Kuasa Allah neupeurupa

Teutap geumeuduek di kaki gunung
Sama teungoh blang mahajana
Teungoh meuduek raja ngon putroe
Meuteuoh proe prang antara

Putroe Baren marit ngon judo
Tuanku deungo ulon meuhaba
Pane pahlawan hana bagoe
Lakoe binoe that peurkasa

Pakri laku han ek talawan
Po junjongan toh bicara
Bit nyo pantah hana bagoe
Pane nanggroe pahlawan teuka

Han tom tango gah nyang ka meunan
Po junjongan toh bicara
Raja Abdullah gaseh Allah
Raja meutuah asoe syeuruga

Neumohon tulong nibak Tuhan
Beuek talawan raja muda
Ya Ilahi wa ya Rabbi
Ya Habibi ya Meelana

NILAI KEPASTIKAN
DIREKTORAT TRADISI
DITJEN NBSF DEPBUDPAR

Beureukat mukjizat Nabi Muhammad
Beureukat keuramat dum eelia
Beureukat ka'bah karonya Tuhan
Beuek kulawan raja muda

Putroe Baren neumeuinseuen
Nyoban neukheun meusempeuna
Ya Ilahi wa ya Rabbi
Keu lon neubri ban kupinta

Beureukat mukjizat Muhammad Amin
Pangulee sikalian dum anbia
Beureukat entu Saiden Syarifah
Beureukat ayah raja raya

Beureukat ayah Baren Nasi
Beureukat umi Meureudum Rakna
Beuek talo ureueng dua droe
Tulong kamoe ya Rabbana

'Oh lheueh poutroe neumeuinseuen
Marit aduen Bangta muda
Sireuta neukheun haba meunoe
Teukap jaroe raja muda

Allah soe nyan wahe adoe
Nyoekeu kamoe aduen gata
Ulonteu nyoe Bangta Sulotan
Keurajeuen tuan Makah mulia

Ban putroe ngo haba meunan
Tahe yoh nyan sikutika
Putroe Baren muda bangsawan
Neupujoe Tuhan Po Nyang Esa

Astaghfirullah subhanallah
Nyan di babah le neubaca
La hawla wa la quwwata illa bi l-lahi l-
'aliyyi l-'azim, Tuhan Karim bri seuntosa

'Oh lheueh putroe seubot Allah
Gunongpi gadoh ngon siklep mata
Leumah neue deuh meuteuntang
Neukalon trang na syeedara

Putroe Baren ka neuturi
seumbah bak gaki Bangta muda
Ampon meuah dalem teungku droe
Deesya kamoe nibak gata

Allah hai dalem hana lon turi
Tuan Ghani nyang peulupa
Hana lon thee aduen meutuah
Kheundak Allah he syeedara

Putroe Baren seumbah leugat
Moe meumat-mat ro ie mata
'Oh lheueh neuseumbah gaki aduen
Teuma meuteumeung ngon teumuda

Allah teumuda hana lon turi
Tuhan Ghani nyang peulupa
Gatapi meunan lonpi saban
Kheundak Tuhan Po Nyang Esa

Ampon meuah teumuda teungku droe
Deesya kamoe nibak gata
Han kuturi gata dua droe
Tuhan sidroe peusilap hamba

Raja paleh kaphe geucang
Geutanyoe jipeuprang sabe syeedara
Neupeuampon dalem teungku droe
Dua kamoe buta mata

Meuah bak Allah adoe badan
Kheundak Tuhan Po Rabbana
Putroe Baren teulah-lah droe
Sira neumoe ro ie mata

Raja Abdullah Bangta Sulotan
Neumoe tuan hana reuda
Dawok teulah droe sinan lam blang
Kareuna sayang akan syeedara

Haba bae that le leupah
Han ek abeh lon calitra
Droe ka maklum dumna sahbat
Bae le that panyang haba

Adat lon kisah panyang sanjak
Kutakot glak bak tabaca
Lon tuan tinggai bacut sapat
Hana lon surat wahe syeedara

Bak siploh-ploh lon boh saboh
Haba jroh-jroh lon calitra
Dua boh prang hana lon seubot
Lon takot lanjot panyang that haba

Sigala pahlawan ngon uleebalang
Hana lon kheun nan tinggai dumna
Lon peugah buet bacut sapat
Hana lon surat panyang haba

La ilaha illallah
Peurintah Allah baranjan masa
Bah teuduek nyan abeh kisah
Jinoe lon peugah laen calitra

Subhanallah Poku Rabbi
Leungkap sare sigala donya
Putroe Baren muda bangsawan
Gaesh Tuhan asoe syeuruga

'Oh lheuueh moe jamong sinan lam blang
Marit yoh nyan putroe muda
Marit ngon aduen Putroe Baren
Udeh dalem ubak raja

Tajak peumasok agama Islam
Kaphe jahannam asoe nuraka
Bangta seuot rijang-rijang
Raja kaphe nyan le that bicara

Meuribee bagoe akaijih sulet
Le that peunyaket adoe raja
Teuma neujak Bangta Sulotan
Tamong u dalam ubak raja

Raja Abdullah nyang jak dilee
Neujak bri thee dalam kuta
Bangta Sulotan dudoe neutamong
Neupreh di blang sikutika

Ban sare troh Raja Abdullah
Neutamong leupah ngon Baren Miga
Neugiduek guda dua ngon putroe
U leuen meuligoe neujak lanja

Raja Peuranggi rakyat meukatoe
Jideelat jinoe raja raya
Deelat tuanku syahi alam
Seumbah laman po meukuta

Lheueh jideelat junjongan doli
Seumbah bak gaki jipeumulia
Teuma marit Raja Abdullah
Tango lon peugah ubak gata

Tango kamoe Raja Peuranggi
Pakon that deungki peurangui gata
Patot tapeungeut kamoe tatipee
Bukon seudee tan bicara

Tapeuprang kamoe tayue lawan
Bangta Sulotan di lon syeedara
Nyankeu aduen syeedara kamoe
Lam donya nyoe that peurkasa

Kamoe tapeungeut tayue meuprang
Bukon bubarang pungo gila
Raja Peuranggi deungo meunan
Hireuen yoh nyan hana tara

Raja Peuranggi yoh nyan teuseupok
Tahe teupakhok raja ceulaka
Teuma jimarit Raja Peuranggi
Hana lon turi po meukuta

Teuma jiseumbah ubak teuot
Sireuta jiseubot ampon deesya
Ampon tuanku syahi alam
Hana troh fam kamoe dumna

Hana lon thee po junjongan
Bangta Sulotan nyan syeedara
Raja Abdullah teuma marit
Jingo sabet rakyat dumna

Bangta Sulotan tango lon peugah
Gaseh Allah ateueh donya
Gata tameuprang bukon bubarang
Dum sikalian pungo gila

Jiteumee abeh ban saboh alam
Bek le taprang singoh da lusa
Tapoh han mate tatet han tutong
Tuhan tulong han binasa

Tacang ngon peudeueng han ek keunong
Bujon le bingong dumna gata
Tadrop taikat putoh taloe
Toh pakri proe talawan ngaza

Han ek talo Bangta Sulotan
Gata simpan bansineuna
Adat meupakat saboh donya nyoe
Talawan jinoe dum tangaza

Han ek talawan Bangta Sulotan
Talo sikalian peue tasangka
Han ek ase ban tahajat
Leubeh keuramat raja muda

Raja Peuranggi deungo hareutoe
Meujjiem droe hana dawa
Nyang na teumakot geunta asoe
Jideungo proe haba raja

Lom ngon malee amat sangat
Han jijeuet bleut aneuk mata
Teuma neumarit Raja Abdullah
Tango lon peugah ubak gata

Pakri ban janji gata ngon kamoe
Takheun jinoe wahe raja
Raja Peuranggi seuot sipatah
Hana ubah po meukuta

Jinoe meutaklok dumna kamoe
Nyan leupeue nanggroe hukom gata
Tango tuanku kamoe peugah
Harap di bawah kawoh mulia

Kamoe tuanku raya salah
Ampon meuah po meukuta
Gata pangulee dumna kamoe
Jinoe neupuwoe nanggroe.meukuta

Pakri tuanku meungadu droe
Dumna kamoe bak sroepada
Buet tuanku neupeurintah
Hukon Allah nyang sibeuna

Agama Islam neupeurunoe
Han meutupeue po meukuta
Ban raja ngo narit meunan
That sukaan ate lam dada

Teuma raja peurunoe syahdat
Dumna rakyat seuot rata
Asyhadu an la ilaha illa l-lah
Nyan di babah dum tabaca

Nyan di ate makna taingat
Tuhan Hadarat hana dua
Sidroe Tuhan nyang taseumbah
Hanya Allah nyang sibeuna

Wa asyhadu anna Muhammada r-rasulullah
Nyan di babah bandum gata
Meunoe taingat nibak ate
Kuek syaksi bahwasanya

Nabi Muhammad peusuroh Allah
Meunan beuteugoh bek meuriba
'Oh lheueh raja peurunoe syahdat
Dumna rakyat ate suka

Teuma jamarit Raja Peuranggi
Deungo lon kheun kri po meukuta
Kamoe tuanku deesya le that
Bak hadarat raja muda

Han peue salah bek tagundah
Kamoe peumeuah dumna gata
Neupeumeuah deesya kamoe
Neuba jinoe po meukuta

Raja Abdullah teubiet u blang
Guda neupasang sigra-sigra
Ban sare troh neutebiet u blang
Teuma datang raja muda

Teuma teumanyong Bangta Sulotan
Pakri padan peuebu haba
Raja Abdullah teuma peugah
Haba indah neucalitra

Raja Peuranggi ka jiislam
Roh bak meu'am geutanyoe dumna
Jih jitaklok bak geutanyoe
Ka jijok droe bansineuna

Poteu bri troh nyan ban hajat
Raja ngon rakyat sapeue haba
Hana peue le insya Allah
Hukom peurintah po meukuta

Nanggroe jibri takeurajeuen
Dalam ngon mideuen bansimua
Ban neungo haba Raja Abdullah
Peungeuh limpah dalam dada

Bangta Sulotan galak ate
Troh meusampe peukong agama
Raja seubot alhamdulillah
Poteu Allah bri seuntosa

Lheueh nyan Bangta tamong u dalam
Syahi alam meukuta donya
Banpeuet gob nyan tamong sajan
Bangta Sulotan ngon putroe muda

Raja Abdullah putroe bangsawan
Meuatoran sisyeedara
Ban sare troh leupah u dalam
Jiampeueng rijang sigra-sigra

Raja Peuranggi teuma peurab
Bangta jideelat hana tara
Ampon tuanku doli hadarat
Sijuek beureukat laman sroepada

Tuanku ampon dumna kamoe
Meuah jinoo po meukuta
Ampon bak Allah ngon bak Nabi
Raja Peuranggi sah syeedara

Sare maklum abeh ampon
Plueng meuron-ron seumbah raja
Com di gaki ladam bak teuot
Sireuta jiseubot meuah deesya

'Oh lheueh meuteumeueng raja ngon putroe
Teuma jipeuwoe dalam istana
Putroe Baren Putroe Sunoe
Bandua droe that mulai

Teutap aman yoh nyan nanggroe
Keuramat putroe ngon raja muda
Geunap peuet buleuen geuduek sinan
Nanggroe aman hana tara

Bangta Sulotan peukong nanggro
Gaseh sinaroe rakyat dumna
Neukrah ureueng yue ibadat
Bke maksit that darohaka

Peugot meunasah teupat seumeubeuet
Deungon meuseujid sigala donya
Rakyatpi rame dum ibadat
Suroh hadarat raja muda

Sare teutap aman nanggro
Raja ngon putroe keumeueng bungka
Neukeumeung woe nyan u Makah
Nanggro indah bumoe mulia

Lakee idin bak Raja Peuranggi
Din tabri kamoe meugisa
Gata sinoe takeurajeuen
Rakyat takalon bek sagai lupa

Beutalarang bak buet maksiet
Takrah beukeubit bak agama
Agam inong tayue ibadat
Nyan amanat lon bak gata

Bek taubah dumteu sare
Teuma page lam nuraka
Gata sinoe gantoe ulon
Dum sigala don takrah dumna

Wajib bak gata nyan Tateugah
Bek buet salah jikeurija
Miseue narit Nabi Muhammad
Tango lon bi'at ubak gata

Yajibu 'ala l-imami saimatun 'ala ra'iyathihi
Sabda Nabi nyang calitra
Wajib raja jiyue bak rakyat
Meunan Muhammad neumeusabda

Page neutanyong uleh Tuhan
Ubak ensan nyang peutua
Adat taeu bak buet salah
Beutateugah uleh gata
Han tasuroh bak ibadat
Jeu et meularat dudoe teuma
Pakon han tayue jii badat
Ubak rakyat gata peutua

Amarah Tuhan page jamah
Ateueh khalifah nyang mat neuraca
Nyan amanat nyang lon peugah
Bek taubah uleh gata

Kamoe meuwoe idin tabri
Dudoe page lom lon teuka
Raja Peuranggi seuot rijang
Seumbah yoh nyan sigra-sigra

Ampon tuanku keumala Makah
Han lon ubah wasiet meukuta
Nyang got tuanku neudong sinoe
Bek le neuwoe po meukuta

Tango kamoe Raja Peuranggi
Bahle bek tabri nanggroe gata
Kamoe tan hajat nyan keu nanggroe
Bahle keudroe nyan taraja

Hajat kamoe seunang nanggroe
Idin jinoe kamoe bungka
Allah tuanku neuwoe jinoe
Pakri kamoe po meukuta

Neuba kamoe kaman sajan
Jeuoh jalan silagoina
Raja Peuranggi weueh that ate
Sireuta ile ngon ia mata

Tango jinoe lon peugah proe
Kamoe meuwoe nyan meugisa
Trep that ka cre jeh 'oh uroe
Saleh di nanggroe pakri rupa
Saleh na prang nyan di sideh
Kamoe abeh ubak gata
Han jeuet han meuwoe bek tatham le
Dudoe page lom meuteuka

Bah meusaweue meuwoe siat
Kamoe lambat cre di tangga
Insya Allah meuna umu
Tateumeung eu dudoe lom teuma

Meubek meularat sideh di nanggroe
Troh lom keunoe saweue gata
Gata sinoe badai ulon
Rakyat sigala don kawai lingka

Amanat ulon bek taubah
Hukom Allah tapeulara
Insya Allah po junjongan
Nibak laman ateueh jeumala

Han lon ubah ban amanat
Troh kiamat lon seuon sabda
Raja Peuranggi ate mangat
Le that rahmat Allah karonya

Sabab meutuah raja ngon putroe
Jroh that nanggroe sigala donya
Nanggroe aman rakyatpi troe
Meutuah putroe sabab raja

Raja Peuranggi meuteumeung ijazah
Jipajoh seupah Baren miga
Jeuet keu alem eleuham Tuhan
Abek jituban hukom ban nyang na

Kitab Quruan jeuet di babah
Putroe ijazah nyan keu raja
Raja Peuranggi han jitham le
Idin jibri teuma bungka

Jibri keu putroe intan sirungke
Nyan neucok le Baren Miga
Putroe Sunoepi na jibri
Biramani yakut meutia

Teuma lom jijok ija sikrak
Daneun pirak neudong suasa
Bangta Sulotan jikeumeung bri
Neukheun bek le sep dum.nyang ka

Bek le tabri nyan keu kamoe
Bahkeu dumnoe he syeedara
Raja neutren lam meuligoe
Lheueh meumat jaroe bandum rata

Raja Abdullah guda neupasang
Neuteubiet u blang mahajana
Banpeuet sapat aduen adoe
Rakyat meukatoe ireng sireuta

Raja Peuranggipi na sajan
Jak intat tuan raja muda
Geuba peurasan balabagi
Jeuneh seurune ngon sangkaikala

Gong ngon canang tambo geundrang
Bukon bubarang 'ajab liga
Putroe Baren geuarak u blang
Gong ngon canang hareudammama

Rame pasukan hireuen 'ajab
Peurasan le that lam blang raya
Putroe Baren mulia that
Umat Muhammad gaseh dumna

Banpeuet gob nyan sabe deurajat
Mulia that bak Allah Ta'ala
Dalam donya eelia Allah
Keuramat limpah hana tara
Di akhirat han peue peugah
Syeuruga indah Po karonya
Peurasan mayoh bukon bubarang
Rakyat meukeumang rab troh laksa

Subhanallah wabihamdihi
Han soe tukri peucalitra
Suleng seurune lhee ngon bangsi
Ladat beureuhi mangat suara

Bungka laju tuan putroe
Rakyat meukatoe intat lanja
Subhanallah rahmat Tuhan
Han tatuban peucalitra

Salang lam donya dumnan mangat
Di akhirat meuribee ganda
Umu lhee uroe peurasan sabe
Raja Peuranggi arak raja

Raja Abdullah Bangta Sulotan
Marit yoh nyan deungon raja
Sep ka 'oh noe kamoe taintat
Jak woe leugat dumna gata

Teuma meuteumeung dumna rakyat
Sajan horeumat ubak raja
Atejih galak dum sinaroe
Teuma jiwoe rakyat dumna

Bangta Sulotan bungka leugat
Dumna rakyat ro ie mata
Weuehkeu ate ladat jipandang
Nyum bek leukang jarak di mata

Rupa jroh-jroh sa ngon intan
Hana teuladan ateueh donya
Raja Abdullah Bangta Sulotan
Saban-saban jroh-jroh rupa

Umupi sadum mudapi saban
Ruap ban bintang langet donya
Patot keu judo Putroe Baren
Sabe canden indah rupa

Badanpi jroh that samlakoe
Miseue pudoe ngon meutia
Miseue buleuen lawan uroe
Meuhad putroe lawan raja

Jroh that laku keunong padan
Karonya Tuhan sidroe Esa
Hana saboh leubeh kurang
Tamse geutimang lam neuraca

Tuahpi sa rupa saban
Utoh Tuhan Po Rabbana
Bitpi meunan tango lon peugah
Leubeh tuah Baren Miga

Tuah leubeh alempi that
Sabab mukjizat Nabi Mustafa
Sabab Muhammad ludah lam babah
Eleumee peuet blah neufam rata

Lom ngon saleh takotkan Allah
Hukompi kreueh hana tara
Lom ngon narit leumah-leumbot
Han tom neudhot rakyat nyang na

Banpeuet meunan muka mameh
Han tom beungeh barangjan masa
Hukompi ade ban lam Quruan
Bacutpi han na meuriba

Subhanallah Ilahon Manan
Nyokeu padan asoe syeuruga
Rakya tjimoe hana padan
Weueh jipandang that keu raja
Teungoh mayoh galak jipandang
Seun rot hilang leunyp dumna
Teungoh meugaseh galak jipandang
Bukon bubarang duka cita

'Oh ban meucré gadoh leugat
Teuingat-ingat ate lam data
Ngon jeuoh that nanggroe Makah
Meujingo gah mantong nyang na

Adat meurab jeuet cit tajak
Jan nyang galak ate suka
Rakyat lam blang moe meu'u-'u
Miseue laku bangon gila

Weueh that ate hana padoe
Geunap uroe ro ie mata
Jingieng laju nyan jipandang
Han saboh riwang nyan u tangga

'Oh han leumah le nyan ka leupah
Teuma pantah dum geugisa
Umu lhee uroe lheueng nibak nyan
Teudoh 'oh nan duka cita

Puleh ate gadoh bimbang
Hana jipandang le di mata
Leubeh bak ureueng mate nang mbah
Gaseh leubeh weueh lagoina

Meunan teukeudi ureueng keuramat
Gasehpi that beunci lagoina
Allah bri balapi han teudo
Neukeumeung tamah beule fahla

Balapi le sabapi that
Gaseh Hadarat Allah Ta'ala
Ureueng saba uroe akhirat
Allah bri teupat lam syeuruga
Lawet lawan dudoe nibak nyan
Ureueng peuet nyan leugat bungka
Dua agam dua inong
Woe u gampong Makah mulia

Umu sibuleuen teukeudi Allah
Troh u Makah neutamong lanja
'Oh sare troh nyan u teupat
Dudoe rakyat teuma teuka

Agam inong han tuepegah
Jak u Makah bansineuna
Meugah ka woe putroe bangsawan
Aduenneu sajan Bangta muda

Banpeuet gop nyan ka woe u Makah
Trep ka leupah jeh 'oh masa
Nyang keubit trep Putroe Sunoe
Rakyat meumoe-moe ro ie mata

Dumna rakyat jak meuteumeung
Agam inong bandum rata
Ureueng inong me beureuteh
Deureuham samah sajan jiba

Jeuneh keuruma anggo jabet
Han teuhimat han ek kira
Yoh masa nyan rame Makah
Rakyat barollah laju teuka

Jime meuh pirak meukatoe-katoe
Jijok keu Putroe Baren Miga
Rakyat lam nanggrooe ate mangat that
Ka woe malakat peugawe donya

Dumna rakyat inong agam
Rindu deundam hana tara
Euncit gadoh jeh 'oh lawet
Han tom sibletpi na teuka

Nyoe baro phon meuteumeung pandang
Peue han bimbang ate suka
La ilaha illallah
Peurintah Allah barang masa

Geunap lhee thon raja neuwoe
Aman nanggroe Makah mulia
Kata dalang po riwayat
'Ajab sangat tadeungo haba

Geunap lhee thon teutap di nanggroe
Lheueh nyan dudoe haro hara
Droe cit ka ngon teukeudi Allah
Pakri tabah buet Rabbana

'Ajayeb subhanallah
Raja Jabarah lon calitra
Tango lon kisah Raja Jabarah
Keurajeuen limpah sigom donya

Di yup langet di ateueh bumoe
Cit jih sidroe raja raya
Raja nyang taklok bak raja nyan
Tango tuan lon calitra

Lhee naleh lada dalam sukatan
Nyang taklok keunan bak raja raya
Tango lon peugah Jabarah nyan
Kaphe la'in tan agama

Meugah putroe di nanggroe Makah
Rupa indah hana tara
Di yup langet di ateueh bumoe
Hana sidroe bandeng rupa

Dua droe putroe sinau sapat
Rupa jroh that ban meutia
Ban jideungo haba meunan
Jiyue utosan jak peunyata
Jiyue jak kalon bit na putroe
Beurijang tawoe teuma gata
Jiyue me sajan bungong jaroe
Jok keu Putroe Baren Miga

Alat rumoh sileungkapan
Cawan pangan meuh suasa
Dalong peunuman talam keurikeue
Bandum sapeue meuh jiteumpa

Laen nibak nyan alat peukayan
Pudoe intan yakutpi na
Ija jipeuet meuseunujoe
Sireutoh bagoe jeuneh rupa

Hijo kuneng puteh mirah
Ija indah hana tara
Laen nibak nyan ganceng simplah
Meuh meutatah ngon mutiara

Sare leungkap peukayan putroe
Bungka jinoe deungon sigra
Dua kapai jiba sajan
Alat simban dum barangna

Beude jipeudieng raya-raya that
Panyang meuhad siploh deupa
Dua blah lapeh beude jiato
Dum teudu-du raya-raya

Kapai teugoh dumpeue kukoh
Tihang jiboh pirak suasa
Layeue keumukha sutra haloh
Kapajih jroh hana tara

Jimeulayeue pasa reumbang
Kapai jeumeurang laot raya
Lawet lawan peulayaran
Troh nam bulan bak calitra
Nanggroe Makah jinoe ka troh
Jilhom saoh sigra-sigra
Jidong lam lhok Teupin Jeudah
Kappe beudeubah asoe nuraka

Layeue jipeutren jitiék saoh
Beude jicoh meugeumpita
Suara rheuriam geunta bumoe
Troh meubunyoé ubak raja

Suara gong that geumeuntam
Beude meuriam raya-raya
Teuma ili Bangta Sulotan
Neujak kalon kapai teuka

Bangta Sulotan raja saleh
Gaseh leubeh nibak Rabbana
Hana neuba ngonpi meusidroé
Neujak keudroe u kuala

Neugiduek guda nyan neupasang
Jiplueng yoh nyan tan meuriba
'Oh sare troh Bangta keunan
Leumah neukalon kapai raya

Neuikat guda neucok sampan
Dayong tuan ubak bahtra
Ban sare troh neuek leugat
Kapai jroh that hana tara

Ureueng lam kapai badan raya that
Panyang meuhad na tujoh deupa
Bangta Sulotan teudong hireuen
Han tom neukalon meunan nyang ka

Siploh hah bideueng ijapinggang
Nibak keuieng 'oh teuot saja
Hireuen teuceungong Bangta Sulotan
Abeh neupandang dum peukara

Teudong tahe neukalon proe
Jitanyong dudoe ubak Bangta
He banyak cut hobu langkah
Cuba peugah lon ngo nyata

Patbu gampong cuba peugah
Nyak meutuah pane gata
Bangta seuot teuma neupeugah
Lon di Makah keunoe teuka

Bit-bit nyoe kah nyak di Makah
Putroe geupeugah peuebu nama
Cuba peugah nyak meutuah
Kah di Makah rumoh tangga

Kayem kakalon di kah putroe
Geunap uroe kaeu rupa
Bangta seuot neupeugah proe
Bit na putroe indah that rupa

Dua-dua putroe sambinoe
Han sibagoe ateueh donya
Pakri di kah nyang jeuet katanyong
Kakeumeung kalon putroe jroh rupa

Nyang troh langkah kamoe keunoe
Meujak eu putroe suroh raja
Pakri napsu lheueh kapandang
Cuba heun ban lon ngo nyata

Hobu kaba di kah putroe
Badan seureuloe bube raya
Putroe pijuet badan seudang
Kah kupandang raya lagoina

Putroe sinoe cut nibak kee
Bungong keumbee hana raya
Meudeungon kah hana padan
Lheueh kapandang hobu kaba
Meuo'h keuiengpi kadang tan
Nakeu 'oh nan bak nyum rupa
Meungon gata bit han meukri
Hana sabe ngon putroe muda

Han meulaku cut that badan
Bak lon pandang hana padra
Nyankeu bangon ka lon hareutoe
Bit na putroe indah rupa

Meunyo keu putroe hana teuladan
Tiwah bintang di langet donya
Adat na napsu keumeung pandang
Jakleh rijang teungoh sigra

Lheueh neukheun nyan Bangta neuieum droe
Neukalon proe tihang bahtra
Sikhan suasa sikhan pirak
Bangta galak kalon rupa

Yoh nyan neucarot kaphe pindoe
Pirak dum-dumnoe han meuho kaba
Adat meukabri keu seudeukah
Na faidah meuteumeung laba

Ka han Islam bah sabe droe
Na cit pujoe manusia
Nyoe han meuho pirak abeh
Kaphe paleh tan bicara

Hireuen tahe Bangta Sulotan
Neueu buatan kaphe ceulaka
Ureueng Jabarah dum teueh-eh
Teungeut abeh bansineuna

Bangta beudoh nyan nibak duek
Neutrom pak-puk di keupala
Neuglueng di punggong asoe meuguyak
Badan han meugrak geuhon anggeeta
Neutrom bak mieng ngon bak ulee
Kaphe asee abeh jaga
Neumat bak beuteh bulee neurintak
Ok tangkurak abeh neuhila

Kaphe teukeujot teuma jimarit
Wah aneuk miet galak meuseunda
Geutanyoe syik-syik abeh jisipak
Ok tangkurakteu jihila

Pakon he nyak di kah jeungkat
Bulee kareuet saket raya
Pakon cabak that si nyak nyoe
Jitrom geutanyoe ka tuha-tuha

Bulee beutehpi jirintak
Ok tangkurakpi jihila
Cit jeungkat tahataneuk miet Arab
Hana sabab kuat meuseunda

Bek meunoe le di kah cabak
Nyoe leupeue sikrak he nyak ije
Ija seuleupok kasab meutabu
Cahya that hu hana tara

'Oh ban jijok neucok rijang
Neumeupinggang sigra-sigra
Raja muda akai panyang
Neupeubimbang kaphe ceulaka

'Oh sare roh peukayan u asoe
That samlakoe indah rupa
Ureueng Jabarah hireuen laloe
Wah si nyak nyoe jroh lagoina

Kadong sinee hai banyak jroh
Kahkeu saboh indah rupa
Kubri peukayan peue nyan heundak
Kadong he nyak dalam bahtra

Mangat meukalon kamoe galak
Kubri lom sikrak keu kah ija
Teuma jicok ija seunujoe
Jijok u jaroe raja muda

Nyanpi neucok rijang-rijang
Neumeupinggang Bangta muda
Bangta Sulotan that juhari
Hana lale neumeuseunda

Ka neugrop-grop dalam kapai
Kaphe beubai suka rasa
Neutrom king-keueng bak-bak keuieng
Neutampa di mieng neumeuseunda

Neuteupuek ulee idong neuceupet
Ban aneuk miet goh meumbida
Maken neutampa maken galak
Mise neurintak neuhila-hila

Galakjih that ureueng Jabarah
Hana beungeh meubube seuma
Kajak rijang he nyak keudeh
Cuba meutangkeh kalila-lila

Bangta Sulotan hana lale
Neugrop ban tupe meu'en peundika
Galak jikalon ureueng Jabarah
Khem meuhah-hah dumjih rata

Lheueh nyan teuma Bangta meunari
Neucok beude nyang raya-ray
Ban neuhila beude meuriam
Teuma jitham dumjih rata

He manyak bek beude karintak
Pakon cabak silagoina
Bangta Sulotan neudeungo han
Neutarek yoh nyan sigra-sigra
Neumat bak jaroe beude neutatang
Neusrom lam awan u antara
Ban jikalon meunan lagee
Baro jithee pahlawan raya

Ureueng Jabarah yo teumakot
Jipreh-preh sret lam antara
Ri nyang ka sret lom neulambong
Jipo meudeungong ban boh lila

Bandum beude neusrom leugat
Jipo hat-huet dalam hawa
Ureueng Jabarah jiklik han ban
Jipreh-preh jan keunong bak muka

Mata jitangah dum u manang
Beude jipandang lam antara
'Oh ban leumah beude ka sre
Abeh teukeyot kiam kubra

Bangta Sulotan that juhari
Ate beureuhi hana tara
'Oh lheuuh neupeuduek beude bak sot
Neuato 'oh got dum meubanja

Ureueng Jabarah geunta badan
Jithee pahlawan Bangta muda
Teukap jaroe mata tahe
Jieu laku that peurkasa

Badan cut tek kri teuga that
Han tom talihat dilee nyang ka
Meunan jikheun sabe keudroe
Han tom Bangta nyoe teuga baja

Nyan bube beude jisrom lam awan
Hireuen tapandang gadoh bicara
Di geutanyoe bekkeu tasrom
Meutaeu mantong pucat muka

Adat sireutoh han ek tagrak
Bek an tatiek dalam hawa
Bukonkeu le that pahlawan
Cut that badan pakri teuga

'Oh lheueh puleh nibak hireuen
Bangta neukheun sigra-sigra
Wahe po ya deungo kamoe
Teungoh jinoe dumna gata

Tajak eu putroe nyan di Makah
Rupa indah ban meutia
Ureueng Jabarah teuma marit
Ngon aneuk miet Bangta muda

He manyak cut udeh sajan
Tajak u dalam ubak raja
Gata ba rot kamoe meu'ak
Udeh hai nyak jinoe sigra

Bangta Sulotan seuot pantah
Jakleh teungoh dumna gata
Mangat lon intat jinoe keudeh
Teungoh beuabeh wahe po ya

Ureueng Jabarah jicok bingkeh
Buka abeh lam gumtia
Areuta peuneuet bungong jaroe
Tujoh boh peutoe nyang raya-ray

Peunon di dalam geuboh asoe
Peukayan Putroe Baren Miga
Meuh ngon pirak intan pudoe
Saboh peutoe mutiara

Teuma ija saboh peutoe
Kayen seunujoe pirak suasa
Ija haloh han peue peugah
That barollah jroh-jroh rupa
Meuh raya that saboh peutoe
Jiyue jok keu Putroe Baren Miga
Sare abeh sileungkapan
Peudieng lam sampan sigra-sigra

Ureueng Jabarah teungoh u darat
Dayong leugat sampan tinda
Ban sare troh keunan jiteungoh
Sare meh-moh dumjih rata

Bangta Sulotan nyang jak dilee
Kaphe seudee di likot Bangta
Ban sare tok u Teupin Jeudah
Rakyat barollah teuma teuka

Jak kalon ureueng badan raya that
Panyang meuhad tujuh deupa
Ureueng Jabarah badan seudang
Siploh hah pinggang meucom punca

Ureueng teumakot kuyut asoe
Hana jipeutoe rakyat dumna
Jeuoh jidong rab han jijeuet
Jikalon geunteut badan raya

Hitam ban Kleng badan meukilat
Saleh kawom 'Ad dilee nyang ka
Bangta Sulotan ureueng meutuah
Suku Jabarah neupeukra-kra

Dawok meuseunda neupeuayang
Neumat di keuieng uleh Bangta
Meujan-jan jime ka jigulam
Ulee neuantam neumeuseunda

Neuteupuek-teupuek ulee neutumbok
Neujuruet ok pura-pura
Galak that neuduek nyan bak babo
Neuniet cong kaso leupon raya

Neuduek bak baho mangat neupasang
Miseue guda plang meunan umpama
Neumat bak ok bulee takue
Na tamse grui adat guda

Neuteupuek di mieng seupot di ulee
Kaphe neupeuhee kajak lanja
Ureueng Jabarah jitupeue han
Bangta Sulotan meusuara

Jan ka silap rot teusarok
Neutarek bak ok neupeugisa
Teuma jikheun pakon karintak
Si nyak cabak kuat meuseunda

Teuma neupeugah kon keunan rot
Geutanyoe sisat han meuho ka
Droe cit rot nan neupura kheun kon
Neupura teugon di keupala

Meunan suntok ok neurintak
Mieng neuteupuek pura-pura
Maken neuteupuek maken galak
Keumong tangkurak han jikira

Bangta Sulotan le that lagee
Hee guda hee le neukata
Ureueng Jabarah hana jithee
Kaphe seudee han neupeue basa

Jan teusarok roh rot laen
Bulee ceureumen neutarek lanja
Ho kusuroh jeudeh kajak
Rimueng sipak badeuek seuba

Wahe po ya jakkeu leugat
Rotpi teupat lam blang raya
Lawet lawan teukeudi Allah
Troh u Makah bumoe mulia
Bangta Sulotan tamong leugat
Ubak deelat raja muda
Neuba u dalam dum sinaroe
Neugiduek droe bak bahonya

'Oh sare troh u leuen meuligoe
Neueu le Putroe Baren Miga
Jingeuk rot tingkap neungieng u leuen
Putroe hireuen neueu rupa

Teuma marit Putroe Baren
Peue nyan dalem pane taba
Han tom lon kalon dalem teungku droe
Pane nanggroe taba po ya

Badan raya that hana bagoe
Hitam tuloe ban tungoe bangka
Wahe dalem aduen meutuah
Cuba peugah meungo nyata

Bangta seuot teuma neupeugah
Nanggroe Jabarah gampong po ya
Hobu langkah tab keunoe
Bak geutanyoe he syeedara

Cit nyang hajat teuka di nanggroe
Gata adoe jimeung eu rupa
Ngon teumuda teutapi sajan
Suroh sulotan yue eu rupa

Teuma geupeuduekjih nyan di leuen
Putroe hireuen hana tara
Raja Abdullah yoh masa nyan
Teungeut pasangsang dalam istana

Dudoe nibak nyan teuma na siat
Teuka rakyat agam dara
Mideuen seuleusak subhanallah
Ureueng Jabarah jijak eu rupa
Hireuen tahe rakyat bimbang
Han tom jipandang dilee nang ka
Rakyat 'a-'u sare kiroh
Bunyoe rioh hana tara

Ureueng Jabarah teuduek keudroe
Di leuen meuligoe istana raja
Teuma marit Bangta Sulotan
Wahe tuan bek that kubra

Takalon mantong bek kiroh that
Raja teungeut di istana
Ban jideungo Bangta kheun meunan
Seungap yoh nyan han le subra

Teutap jikalon hireuen laloe
Hana sidroe na suara
Amma bakdu teuma dudoe
Lon kisah proe Baren Miga

Putroe Baren dalam meuligoe
Neujak peugoe raja muda
Ban sare troh bak peuradoe
Neuduek Putroe Baren Miga

Putroe salop tiree keuleumbu
Teumpat beuradu raja muda
Raja teungeut putroe peugoe
Ceupet asoe bauja dada

Neuurot beuteh neuceupet teuot
Teuma teukeujot raja muda
Beudoh laju neuduek rijang
Leumah neupandang putroe muda

Mataneu leubui goh pueh teungeut
Han that jeuet neubleut geuhon mata
Putroe Baren neuhei leugat
Neubeudoh siat po meukuta

Raja marit pakon tapeugoe
Lon goh lom troe teungeut mata
Euntreuk neuh lom beudoh dilee
Neueu lagee di leuen istana

Peue jeuneh buet di leuen meuligoe
Cuba kheun proe lon ngo nyata
Tuanku beudoh rijang-rijang
Neueu lakuan pakri rupa


Ban raja ngo narit meunan
Beudoh yoh nyan sigra-sigra
Teuma neutren Raja Abdullah
Ulon Allah asoe syeuruga

Ban sare troh u bak madat
Neueu teupat u leuen istana
Ban neukalon tahe siat
Pane umat keunoe teuka

Bangta Sulotan sinan di leuen
Leumah meubayeuen raja muda
Neueu teuduek nyan bak madat
Neueu teupat bak ureueng raya

Bangta Sulotan teuma neupeugah
Bak Jabarah ureueng teuka
Nyankeu raja nanggroe Makah
Nyang that meugah sigala donya

Beudoh rijang tajak deelat
Ngadap hadarat raja muda
Ureueng Jabarah jideungo meunan
Beudoh yoh nyan dumjih rata



Deelat tuanku keumala Makah
Ampon meuah po meukuta
Lheueh jideelat Raja Abdullah
Neuyue duek pantah ateueh geuta

Teuma geubri ngon makanan
Peurjamuan nibak raja
'Oh lheueh makeuen dum seuleusoe
Poteu jinoe neumeusabda

Raja tanyong bak ureueng nyan
Pane tuan nanggroe gata
Tohbu nanggroe raja siri
Tapeugah kri lon ngo nyata

Hobu langkah tajak keunoe
Peugah jinoe peuebu haba
Ureueng Jabarah peuek seumbah
Bak khalifah raja raya

Ampon tuanku keumala Makah
Nanggroe Jabarah po meukuta
Suroh tuanku po di kamoe
Neuyue eu putroe nyan indah rupa

Nyankeu sabab kamoe troh keunoe
Bak nanggroe nyoe meupeuteuka
Meugah putroe bak junjongan
Neuyue pandang uleh raja

Neuyue ba sajan bungong jaroe
Nyan keu Putroe Baren Miga
Ban raja ngo meunan peuneugah
Subhanallah le neukata

Teuma marit Raja Abdullah
Putroe neupeugah na dua-dua
Rupa indah hana bagoe
Dua droe putroe sisyeedara

Nyankeu hajat tajak keunoe
Takalon putroe jiyue le raja
Nyo tuanku le jipeugah
Putroe meugah lon jak eu rupa

Teuma marit Raja Abdullah
Keumala Makah nyang mulia
Lheueh takalon pakri hajat
Kheun beuteupat lon ngo nyata

Teuma jiseuot haba sipatah
Tango lon peugah po meukuta
'Oh lheueh meukalon rupa putroe
Meuwoe u nanggroe peugah bak raja

Teuma geujak tueng putroe keunoe
Bak nanggroe nyoe geupeuteuka
Meuka na putroe bit-bit sareh
Teuma jadeh geupeuteuka

Adat han neubri deungon mangat
Geucok ngon saket geuprang kuta
Ban neudeungo meunan peuneugah
Teubah babah raja muda

Wah ka na prang lom di sinoe
Bak nanggroe nyoe haro-hara
Teuma teumanyong Raja Abdullah
Cuba peugah raja gata

Pakri keurajeuen bube na luah
Cuba peugah kungo nyata
Tango lon peugah Raja Jabarah
Keurajeuen limpah sigom donya

Di miup langet di ateueh bumoe
Nyankeu sidroe raja raya
Neumat luah rakyat meubulak
Raja nyang taklok lhee naleh lada

Raja nyang laen han teupeugah
Raja Jabarah nyang that raya
Laen nyang rakyat bukon bubarang
Peunoh lapang bumoe nyang na

Adat tahimpon keunoe lam padang
Han jeuet jidong arat donya
Pat na padang nanggroe Makah
Peunoh meudah-dah bak nyum rasa

Ban neudeungo haba meunan
Kuyut heran sikutika
Lheueh nibak nyan lom neutanyong
Pakri ban ureueng nanggroe gata

Ureueng tuanku miseue kamoe
Dum sinaroe raya-raya
Raja pakri bube na badan
Raya cit tuan miseue gata

Sabe tuanku ban sigala don
Banda duson meunan rupa
Adat meunan tahareutoe
Keupeue putroe ho ci jiba

Putroe sinoe cut-cut badan
Han sipadan deungon gata
Meu'oh jikalon uleh putroe
Geunta asoe yo sang geumpa

Patot nyang sabe Raja Jabarah
Meungon gajahpi han padra
Meungon putroe nanggroe Makah
Sepkeu meugah jingo rupa

Jimeukawen hanapadan
Jih nyan tuan bube raya
Hobu jime adat jijak tueng
Ji'uet lam reukueng hokeu jiba

Putroe Baren deungo haba meunan
Teukheum yoh nyan lam istana
Raja marit teuma sipatah
Putroe geupeugah sinoe bit na
Kayue jak tueng putroe keunoe
Jakleh tawoe jinoe gata
Raja Abdullah meuhei putroe
Taren keunoe sikutika

Deungon teumuda tatren sajan
Geukeumeung pandang rupa gata
Putroe Baren ngon Putroe Sunoe
Lam meuligoe sapat dua

Ban neudeungo narit meunan
Beudoh yoh nyan Baren Miga
Neuk u rumoh buka peutoe
Neucok asoe sianika

Teuma neungui ija pinggang
Daneun meudong kasab Roma
Neusok subang mata intan
Han jeuet tapandang seumilu mata

Neusok bajee meuh intan geutatah
Neungui ngon simplah ikat dada
Neungui ngon peundeng sok ngon ikai
Hireuen akai soe eu rupa

Neuboh bak keuieng kandet intan
Cahya hu ban bintang rusa
Ajimat meuh neusok bak sapai
Bak ok 'oh kai bungong meutia

Teuma neungui euncien malakat
Meukilat-kilat seumeuloh cahya
Nibak teununyok euncien keurawang
Di gitek tuan euncien meutia

Bak inong jaroe meuh nyang mirah
Neusok pantah unggah deureuma
Bandum euncien peukayan putroe
Yum meukatoe siploh bara

Sare lheueh nyan ok neusanggoi
Bungong neusoi intan meutia
Okneu panyang sanggoi lipat lhee
Meudre-dre bee minyeuk ata

Sanggoi timang teungoh ulee
Meuhayak bee gahru jeumpa
Neuboh ngon patam intan teusok
Lam lipat ok neuboh ceumara

Sare cukop patam bak dhoe
Jroh tahat Putroe Baren Miga
Putroe Sunoe sabe padan
'Oh roh peukayan saban bandua

Teumuda ngon parui jroh meupadan
Siulahan aneuk syeuruga
Putroe Baren Putroe Sunoe
Peukayan neungui saban rupa

Han soe tandeng rupa indah
Putroe Asiah sabe padra
Nyankeu sidroe nyang na padan
Tunangan tuan Nabi kita

Hana peutumuen lam donya nyoe
Page dudoe lam syeuruga
Keudeh meukawen uroe akhirat
Nabi Muhammad akan eumpunya

Jinoe neutroh uleh Allah
Putroe Asiah dalam syeuruga
Dalam donya han soe teuntang
Tiwah bintang langet donya

Nyan po judo Nabi Muhammad
Uroe akhirat Tuhan karonya
Rupa indah hana bagoe
Raja ngon putroe dalam syeuruga
Jinoe neutroh jroh meuteuntee
Nak bek reudee ubah rupa
Kareuna rupa sangat indah
Na nyum limpah sigala donya

Tuhan keubah dalam jannah
Syeuruga indah akan teumpatnya
Dilee di donya peurumoh Peura'un
Kaphe majeunun asoe nuraka

Han tom siblet na jap badan
Roh ngon syetan barangjan masa
Jan jipeurab ubak putroe
Tuhan gantoe saboh rupa

Putroe Asiah han tom meuteumeung
Kaphe bajeueng iblih peudaya
Bak jisangka Putroe Asiah
Jieu indah hana tara

Meunan suntok baranggajan
Jieh ngon syetan rok-rok masa
Syetan iblih galakjih that
Kaphe laknat jipeudaya

Putroe Asiah Tuhan peusilee
Nibak sitree apkhe ceulaka
Miseue teuseubot dalam nalam
Neutroh le Tuhan dalam syeuruga

Wa asiatu imraati li fir'awna
Makhsusatun fi l-jannati makana
Putroe Asiah peurumoh Peura'un
Yoh dilee phon dalam donya

Raja Peura'un hana tom toe
Tuhan sidroe nyang peulara
Rupa indah hana seunaba
Peurumoh Nabi dalam syeuruga
Na sidroe treuk peurumoh Yusuf
Nanpi makruh Putroe Zalikha
Putroe Baren rab sipadan
Ngon putroe nyan indah rupa

Sare leungkap dum peukayan
Neutren tuan siseun dua
Sabe-sabe bandua droe
Putroe Sunoe ngon Baren Miga

Neuduek sinan dilee siat
Nibak rambat sapat dua
Raja Abdullah le that lagee
Kaphe neutipee bansineuna

Neucok boh mamplam ngon kruet mameh
Laen jeuneh boh geulangsa
Neubri jindawan saboh sapo
Meunan laku neupeudaya

Sare abeh sikin u jaroe
Neuhei Putroe Baren Miga
Tatren keunoe tuan putroe
Bandua droe deungon teumuda

Putroe Baren beudoh rijang
Teuma neupandang u leuen istana
Neudong bak pinto mata kakap
U leuen neupeunap nyan bandua

Neukilap droe nap ngon likot
Cahya blet-blot ban siseun lingka
Ban meudieueng leumah putroe
Hu meuligoe kilat cahya

Ureueng Jabarah laloe dukhoe
Jikalon putroe indah rupa
Kata sahib po hikayat
Tango sahbat dumteu rata

Falamma raaw imraataini jahilatun awjhuhuma
Faqata'u aidiyahum bi s-sakakin wa lam ya'rifu
Bi l-alami masyghulun qalbuhuma li imraataini
Teumeunung jieu uleh kaphe nyan bansineuna

Akan ureueng binoe rupa indah
Nyang jroh leupah nyan bandua
Teuma jiputong uleh sikalian
Jaroejih tuan bansineuna

Deungon sikin dum sikalian
Han jithee tuan peudeh raya
Kareun abimbang ate sikalian
Bak putroe nyan dua-dua

Teuma ureueng nyan hana ingat
Bandum 'ajab akai liga
Bandum kaphe nyan han tom jipandang
Di ateueh alam meunan nyang ka

Kaphe Jabarah eu bak putroe
Han sibagoe jroh that rupa
Nyankeu sabab teusie jaroe
Teuhing gigoe teublie mata

Ureueng Jabarah jieu putroe
Putoh jaroe han jikira
Meunan ladat beureuhi asoe
Mata laloe hireuen liga

Teutap tahe mata u pinto
Jingieng laju bansineuna
Han jitem troe mata pandang
Leubeh bak bintang langet donya

Ureueng Jabarah han meugrak badan
Pangsang bak dong bansimua
Putroe Baren duek bak pinto
Peukayan hu intan peurmata

Bandua droe meunan saban
Sigeutu tan nyang na bida
Lheueh nyan neuk tuan putroe
Bandua droe sisyeedara

'Oh sare troh lam meuligoe
Meusalen Putroe Baren Miga
Lheueh neutumpok alat peukayan
Neutren tuan nyan bandua

Neujingeuk rot luweuek pinto
Neueu laku di leuen istana
Mantong tahe hireuen laloe
Hana lom troe pandang mata

Nyum-nyum mantong putroe di pinto
Nyankeu tahe bandum liga
Putroe Baren han le sinan
Neuweh yoh nyan sigra-sigra

Teuma neujingeuk rot luweuek sandeng
Neukeureuleng ngon iku mata
Teuma marit Raja Abdullah
Peue lom dahsyah bandum gata

Jaroeteu puntong hireunteu han
Peue ban tuan mata liga
Teuma neuhei bek le laloe
Taeu jaroe bandum ka luka

Mamplam tasie taboh manisan
Laen that macam dumna gata
Abeh taboh dum boh mamplam
Darah meuligan ban sineuna

Han cit puleh mantong bimbang
Neucukeh bak mieng uleh raja
Neudhot kong that neugurantang
Bek le bimbang wahe po ya

Ureueng Jabarah puleh bimbang
Kareuna gurantang raja muda
Yoh nyan teukeujot meubhak ate
Teungoh lale mayen mata

Sare puleh nibak dahsyah
Raja jiseumbah sigra-sigra
Ureueng Jabarah raja jideelat
Mulia that hana tara

Teuma marit Raja Abdullah
Pakri peurintah jinoe gata
Putroe Baren Putroe Sunoe
Bandua droe ka taeu rupa

Pakri napsu gata jinoe
Peugah bak kamoe meungo nyata
Yoh nyan jiseiot raja tanyong
Mameung mantong jimeuhaba

Ampon tuanku di bawah doli
Hana sakri po meukuta
Kamoe kalon bit nyo indah
Lon seubot sah keu syeedara

Jinoe kamoe meutamong Islam
Beuroh bak makam po meukuta
Hukom tuanku dum sinaroe
Neupeurunoe tamong agama

Insya Allah raja seuot
Jinoe taseubot kalimah dua
Asyhadu an la ilaha illa l-lah
Wa asyhadu anna Muhammada r-rasulu l-lah

'Oh lheueh jiucap dua kalimah
Teuma neupeugah nyan ngon makna
Ureueng Jabarah meungucap syahdat
Doli hadarat ate suka

Teutap Islam dum ureueng nyan
Jiduek sinan sajan raja
Bah teuduek nyan hai tuan-tuan
Bangta Sulotan meugisa punca

Bangta Sulotan raja beurani
Sideh di pasi bak kualah
'Oh lheueh neuintat ureueng Jabarah
Neujak u Jeudah sigra-sigra

Ili u laot neujak sidroe
Neuek jinoe dalam bahtra
Troh u kapai raja neuek
Teuma neutarek tihang bahtra

Neubet krah-kruh neutop leugat
Leupah u darat bansineuna
'Oh lheueh abeh tihang neuangk2+
Neutop u darat uleh Bangta

'Oh lheueh abeh dum sileungkap
Meuriam nubat neugeulawa
Raja neugrop leupah tanjak
Sikhan uroe jak bak calitra

Donya meuhayak rasa meuguncang
Teukeujöt urang bansineuna
Meungucap seulaweuë dumna rakyat
Allahumma salli 'ala Muhammad jikheun rata

Jisangka geumpa bumoe meuhayak
Leupah tanjak raja muda
Teuma neuriwang raja u likot
Kapai di laot neuëu rupa

Kapai dua boh nyan ka hanco
Geulumbang eumpu troh bak data
Lam aneo tho leupah meusareueng
Bakat tinteueng nyan bandua

Bangta Sulotan pahlawan that
Tihang neuangkat bansineuna
Neuboh bak baho dum neugulam
Peuwoe bak makam Makah mulia

Dumpeue abeh nyan neugulam
Beude meuriam tihang bahtra
Troh u gampong dum neuangkat
Tango lon seubot ureueng Jabara

Ban jikalon tihang ka geubet
Jimoe 'at-'eut dumjih rata
Kapai han le tihang geubet
Jinoe toh rot ngon tabungka

Pakri tawoe teuma u nanggroe
Mate geutanyoe teuma jisula
Ureueng Jabarah jitanyong proe
Pakri kamoe po meukuta

Raja Abdullah teuma marit
Tawoe keubit dumna gata
Pakri han tadong gata sinoe
Peue buet tawoe lom tagisa

Han jeuet han tuanku lon woe dilee
Lon jak bri thee ubak raja
Dilee geuyue jak eu putroe
Teuma geuyue woe rijang meugisa

Adat meuyue jak poegah kamoe
Sosah dudoe po meukuta
Jeuet meularat sideh di nanggroe
Aneuk ngon binoe abeh binasa

Janji ka abeh tuanku droe
Yoh saboh roe masa bungka
Got na putroe got tan putroe
Gata tawoe nyan beusigra
Sangkira han tawoe keunoe
Aneuk ngon binoe dum kusula
Nyan ban janji tuanku droe
Pakri han meuwoe po meukuta

Lom meubungka dumna kamoe
Bak nanggroe nyoe bumoe mulia
Raja Abdullah ureueng meutuah
Neuidin pantah sigra-sigra

Tapeugah na putroe sinoe
Tayue tueng jinoe ubak raja
Putroe indah hana sakri
Budiadari proe umpama

'Oh lheueh neukheun nyan Raja Abdullah
Ureueng Jabarah teuma bungka
Neubri peuraho kapai guran
Nibak tuan raja mulia

Kapai jiba sideh di nanggroe
Han jeuet le peuwoe tihang hana
Layeue keumudoe abeh simpan
Bangta Sulotan nyang keurija

Kapai nyang jiba abeg king-keueng
Teutiek lam kareueng beukah dua
Ureueng Jabarah teuma meulayeue
Angenpi kheue reumbang pasa

Lawet lawan teuma dudoe
Troh u nanggroe ubak raja
Ban sare troh tamong leugat
Raja jideelat sigra-sigra

Deelat tuanku syahi alam
Seumbah laman kamoe dumna
Trenkeu sabda teuma di manyang
Jitanyong ban sigra-sigra

Pakri laku bit na putroe
Cuba kheun proe kungo nyata
Teuma jiseuot rijang-rijang
Seumbah laman patek nyang hina

Ampon tuanku doli junjongan
Deungo laman lon calitra
Bit na putroe nanggroe Makah
Rupa indah ban meutia

Dua-dua tuan putroe
Lam donya nyoe hana ngon sa
Teutapi deelat han troh napsu
Nyum kamoe eu po meukuta

Ureueng Makah cut-cut badan
That pahlawan dumjih rata
Jikalee taprang nyum han talo
Ureueng Arab le nyang peurkasa

Aduen putroe that pahlawan
Bangta Sulotan geuboh nama
Rupa jroh that ban meuk uroe
Meuangget dhoe bintang raja

Nyan tuanku that analan
Di baroh nyan raja muda
Raja Abdullah nan geulakab
Meukuta Arab raja raya

Nyanpi gagah hana bagoe
Judo Putroe Baren Miga
Adat proe taprang tatueng putroe
Nyum han sampoe hajat meukuta

Ureueng le ceubeueh that pahlawan
Bit cut badan taeu rupa
Tango lon peugah Bangta Sulotan
Syedara tuan Baren Miga

That juhari hana padan
Bangta Sulotan pahlawan raya
Kamoe jisipak han jitakot
Bulee jibet ok jihila

Beude meuriam jisrom lam awan
Jisambot yoh nyan sigra-sigra
Kamoe teumakot bandum pucat
Jitop u darat beude raya

Hana bagoe meunan pahlawan
Bangta Sulotan aneuk miet muda
Teuma kamoe dum jimarrah
Mata mirah miseue keusumba

Kamoe jiba jak eu putroe
Teungoh sinaroe dum bak raja
Ban sare troh kamoe jiintat
Teuma meulihat putroe muda

Lale tahe mata laloe
Dumna kamoe geupeudaya
Geubri jindawan ngon boh kayee
Ka geutipee bansineuna

Teungoh laloe sie boh mamplam
Sikin tajam leupah mata
Teungoh-teungoh sie boh mamplam
Seun rot datang putroe muda

Ban meublet hu meukilap
Gadoh leunyap akai bicara
Hu trang-bandrang cahya meukilat
Siploh lipat nibak meutia

Uroe tarek cahya that hu
Meunan laku indah rupa
Tiwah buleuen deungon bintang
'Oh tapandang mayen mata

Teuka beureuhi ate bimbang
Han tom tapandang ateueh donya
Dua-dua sabe bayek
Cahya jiek sret bak muka

That analan deungon adoe
Putroe Sunoe ngon Baren Miga
Kamoe kalon laloe dukhoe
Han tom puroe taeu nyang ka

Di langet na buleuen ngon uroe
Hana bagoe indah rupa
Hu trang-bandrang peungeuh nanggroe
Cahya uroe limpah donya

Teuma di bumoe buleuen ngon uroe
Putroe Sunoe ngon Baren Miga
Hana miseue bak teuladan
Sidroepi tan na umpama

Rupa indah hana lawan
Tiwah bintang langet donya
Soe nyang kalon laloe bimbang
Nyum tapandang nantiasa

Kamoe tuanku yoh masa nyan
Reubah pangsang bansineuna
Laloe dukhoe mata sapu
Cahya that hu limpah donya

Nyum meujak-jak cahya sang-seng
Gigoe teuheng meublek-blek mata
Putroe Baren geuurohan
Sidroepi tan bandeng rupa

Teutapi tuanku han meuteumeung
Han ek neuprang ureueng mulia
Jikalee taprang Raja Abdullah
Saleh sosah po meukuta

Putroe han geubri geutem meuprang
Barangri sulotan han tilek muka
Bak ujung leumbeng peudeueng tumbak
Sinan geuyue cok putroe muda

Sabab ka meugah jingo putroe
Yue prang keunoe Raja Jabara
Keunoe tayue prang Raja Jabarah
Insya Allah kusalop jungka

Keumeung tueng putroe nanggroé Makah
Sep ka meugah jingo haba
Kamoe tuanku geuyue woe rijang
Jikalee taprang geulawan ngaza

Meunankeu narit Raja Abdullah
Hana uga po meukuta
Geuyue jak peugah bit na putroe
Geuyue tueng jinoe bak boh lila

Raja Jabarah teuma narit
Bit keubit-bit meunan haba
Bit tuanku hana wayang
Jinoe tatueng Baren Miga

Meunan narit Raja Abdullah
Neuyue peugah bak meukuta
Raja Jabarah teuma kheun proe
Kah dum-dumnoe han sakon guna

Dua boh kapa kaba sajan
Han ek kalawan raja muda
Kee jicarot han kasagang
Pakon han kacang kaplah dua

Teuma jiseuot haba sipatah
Ampon meuah po meukuta
Tuanku ampon tango lon kheun proe
Kapai sinoe ka binasa

Sare leupah kamoe u darat
Tamong leugat ubak raja
Lale duek-duek du lhee uroe
Meueu Potroe Baren Miga

Seun rot meukalon dumna kamoe
Tihang bahtra nyoe ka abeh geuba
Tihang geubet geutop u darat
Pahlawan that Bangta muda

Abeh geuangkot dum geugulam
Beude meuriam bansineuna
Raja Jabarah jingo meunan
Jikheun yoh nyan sigra-sigra

Bukon paleh kah dum-dumnoe
Kaweh sinoe he ceulaka
Kayue jak kalon bak kah putroe
Aneuk bisoe sulet raya

Kah kukalon laen macam
Katamong Islam bak ri rupa
Kubri beukai kuyue jak kah
Putroe indah kuyue ngieng rupa

Kuyue kalon Putroe Baren
Di kah buet laen kakeurija
Kapai dua boh kujok u jaroe
Han kapeuwoe he ceulaka

Patot kamasok agama Islam
Preh kuantam kupeusyeksa
Raja Jabarah beungeh han soe
Jiyue boh taloe sigra-sigra

Bandum ureueng nyan jibah taloe
Dum sinaroe tuha muda
Lheueh nyan teuma jiboh lam glap
Abeh jiikat bansimua

Jiboh bak gaki rante beusoe
Teuma bak jaroe jiboh singkla
Hingga teutap teuduek sinan
Lam geudong nyan glap-gulita

Bah teuduek nyan sepkeu dumnoe
Laen jinoe lon calitra
Subhanallah zuljalali
Kuasa Rabbi Po Nyang Esa

Tango lon kisah Raja Jabarah
Keurajeuen limpah sigom donya
Meugah putroe nanggroe Makah
Rupa indah ban meutia

Raja Jabarah jingo putroe
Beureuhi asoe hana tara
Teuma jiuroh dumna rakyat
Raja laknat suka rasa

Tunong baroh timu barat
Jikrah rakyat abeh dumna
Umu lhee buleuen raja keumeurah
Rakyat barollah abeh teuka

Jiba ngon kapai troh meulaksen
Raja Jabaren that angkara
Peudeueng ngon cokma leumbeng kapak
Padum ngon tumbak han ek kira

Sare cukop dum ka simpan
Peulayaran kapai dumna
Kapai le that subhanallah
Laot meudah-dah peunoh simua

Seupot laot meulaksa ribee
Sang on kayee dalam rimba
Raja Jabarah bungka leugat
Angen jroh that reumbang pasa

Teukeudi Allah peurintah Tuhan
Umu nam bulan ka troh jiteuka
Jidong di laot kuala Jeudah
Kapai barollah na tamse rimba

'Oh troh keunan jimeusaoh
Beude jicoh that meutaga
Suara meugap-gop bumoe meuhayak
Miseue umbak teungoh keunong sa

Meugrum-grum su meugeureupoh
Troh u jeuoh geungo suara
Ureueng Jabarah teungoh u darat
Dumna rakyat raya-raya

Teuma jipeurab laju u Makah
Rakyat barollah peunoh donya
Peudeueng ngon beude jiba sajan
Cokma tuan jimat dum rata

Ganja tumbak leumbeng teuliki
Peurise beusi dum raya-raya
Cokma beusoe ban-ban bak u
Panyang sulu peuet ploh deupa

Ureueng Jabarah bandum seuu
Jijak laju jiprang raja
Rakyat le that peunoh padang
Pat na lapang seudot dumna

Di Jeudah kon troh u Makah
Rakyat barollah miseue rimba
Pat na padang nyang luah-luah
Ureueng Jabarah peunoh dum rata

Teuma jisurak subhanallah
Meuguncang Makah bak nyum rasa
Jipeh ngon tambo canang geundrang
Meugeuruncang bunyoe taga

Bunyoe 'a-'u miseue guroh
Nyum ka runtoah alam donya
Deumpek surak that barollah
Kaphe beudeubah raja ceulaka

Ban sare troh Padang Arafah
Rakyat barollah bagoe ie raya
Sare 'am-'um bunyoe kiam
Troh u dalam geungo suara

Bangta Sulotan tango lon kheun proe
Peudeueng di jaroe peuet ploh deupa
Teuma neugiduek guda hekeumat
Pantah ban kilat ngon siklep mata

Teubiet laju neujak u blang
Neueu meureuntang tamse rimba
Lheueh nyan neuriwang woe u likot
Tamong leugat ubak raja

Bangta Sulotan teuma neukheun proe
Ubak adoe raja muda
Raja Abdullah di meuligoe
Sajan Putroe Baren Miga

Bangta Sulotan kheun bak adoe
Udeh geutanyoe musoh ka teuka
Udeh taampeueng jinoo u blang
Bek troh tuan keunoe bak kuta

Ban neudeungo sabda meunan
Neutren yoh nyan raja muda
Neucok peudeueng reugam bak jaroe
Neuteubiet jinoo sajan teumuda

Sibang parui teubiet u blang
Peudeueng meukrang-krang neugeunta-geunta
Bandua droe that bit cakap
Han soe peunap lam blang raya
Ureueng nyang geusuen gadoh teumakot
Beureuhi that raja bandua
Peumangat jaroe nyan ngon peudeueng
Neudieueng-dieueng bube tika

Ate seuu bukon bubarang
Guda neupasang sigra-sigra
Saboh sapo guda neupasang
Jiplueng tajam ban boh lila

Ban sare troh ka meuteuntang
Marit le rijang Bangta muda
Nyan lagoe kah Raja Jabarah
Hobu langkah keunoe kateuka

Peuebu napsu kajak keunoe
Rakyat meukatoe sajan kaba
Ureueng Jabarah teuma kheun proe
Meujak tueng Putroe Baren Miga

Pakon kah tueng keupeue hajat
Putroe but that goh meumbida
Hana padan putroe ubit that
Kah nyan meuhad raya-ray

Patot nyang sabe Raja Jabarah
Deungon gajah badeuek singa
Meukeu putroe sep geungo gah
Raja Jabarah akai hana

Teuma jiseuot ureueng Jabarah
Sireuta juah hu ngon mata
Pakon kah tanyong kamoe meujak
Kreueh tangkurak bube seuma

Kuseupot di ulee han jan kakheun breueh
Ulee that kreueh teueungka-eungka
Bangta Sulotan seuot siseun
Neusuet le peudeueng Si Crekaya

Kadeungo he Raja Jabarah
Sitree Allah kaphe ceulaka
Putroe Baren adoe kamoe
Tuengkeu jinoe meuka cuba

Muka ri asee teuka di nanggroe
Keumeung tueng Putroe Baren Miga
Bekkeu putroe kakheun meuteumee
Kadang meubee han meuhad na

Raja paleh han thee keudroe
Kaphe pindoe asoe nuraka
Bak kahajat meung jak tueng putroe
Meumeuligoe bak kaeu rupa

Na katuri lon nyoe sidroe
Aduen Putroe Baren Miga
Nyoekeu nyang nyoe irmueng Tuhan
Bangta Sulotan geuboh nama

Nyoho putroe ka kuba u blang
Bak ujong cekyang tatueng di gata
Raja Jabarah jideungo meunan
Beungeh yoh nyan hu ngon mata

Bukon jeungkat aneuk bisoe
Jih bube nyoe kreueh keupala
Bek antara Bangta Sulotan
Ek kusimpan jeuet keu sira

Han kuturi baranggasoe
Gigoe beusoepi kungaza
Bangta Sulotan seuot pantah
Insya Allah nyoe kacuba

Nyoe nyang sabe ka roh sipadan
Peurab rijang keunoe sigra
Ngon tulong Allah Poku Ghani
Meunyo cit neubri ban kupinta

Bekkeu dumnoe keunoe kaprang
Tulong Tuhan ek kusangga
Raja paleh kaphe laknat
Han kutakot kusalop jungka

Ban jideungo haba meunan
Jipoh yoh nyan Bangta muda
Jibet cokma jitop jicang
Prang meuguncang hana tara

Suara peudeueng meugeuruncang
Cokma meulayang meuk meuburu
Bangta Sulotan raja kusani
Kaphe neutadi hana tara

Droeneu dua sibang parui
Santeut neului lam blang raya
Jitak jitop sare king-keueng
Cokma peudeueng bube-be raya

Bangta Sulotan Raja Abdullah
Geunaseh Allah dalam donya
Jitak jitop subhanallah
Hana reubah sion ruma

Allah tulong han jap badan
Cokma tuan sret u donya
Raja Jabarah rakyat meukatoe
Bangta jiseudoe hana reuda

Han Allah bri keunong asoe
Muda samlakoe utoh neusangga
Prang meucaphuek miseue umbak
Deumpek surak nyum lham donya

Bangta Sulotan that juhari
Kaphe neutadi han ban peubla
Siseun neukiweue rab troh ribee
Abekh padee kaphe beudeuga

Badan raya that ureueng jabarah
Le tahat patah meuhue-meuhue pha
Bangta Sulotan aneuk agam cut
Peudeueng hat-huet neucang lanja

Kaphe mate bangke meusipak
Sang tanoh cak meukeuba-keuba
Bangke meutamon 'oh peunoh padang
Bangta ceumeucang han ban peubla

Darah ile miseue sungoe
Guda jilangoe lam blang raya
Kaphe mate meuruet-tabuet
Neucang hat-huet peudeueng seuba

Subhanallah prang maken that
Bangta karat neuek lanja
Mata neupet bibi neukap
Ho neupeunap dum seureupha

Rakyat le that teuka laju
Maken seuu Bangta muda
Ureueng Jabarah mate laju
Bangta eundru seun silaksa

Di jih jipoh han ek keunong
Cokma peudeueng sret u donya
Bangta Sulotan geuruleuet that
Neucang rakyat sigala donya

Jan-jan meukarat neuplueng siat
Juhari that Bangta muda
Sira neupioh guda neupacu
Kaphe 'a-'u peucrok lanja

Teuma neuriwang bandua droe
Sibang parui ngon teumuda
Nyanpi utoh that pahlawan
Bangta Sulotan nyang ek padra
Sigo sret peudeueng Raja Abdullah
Kaphe reubah seun silaksa
Meupakhok-pakhok raja meutak
Rasa meuhayak alam donya

Kaphe mate han teupeugah
Rakyat reubah seun silaksa
Raja Jabarah teuma jiplueng
Geutak di rueng meubura-bura

Bangta Sulotan teuma neuampeueng
Kaphe Bajeueng neucang lanja
Ho nyang jiplueng ka meurumpak
Kaphe neutak han ban peubla

Maseng-maseng plueng peulheueh droe
Peudeueng seudoe bak-bak muka
Ladom keunong nibak keuieng
Ladom di rueng ladom bak pha

Ban nyang babat cang lam kawan
Wie ngon uneun meutimpa-timpa
Nap ngon likot peudeueng pajoh
Hana teudoh neucang lanja

Abeh-abesan peudeueng neusayong
Su meudeungong meuk teupanca
Keunong cokma putoh meukhan
Meuk meukarang peungeuh donya

Suara tam-tum bunyoe guroh
Peudeueng pajoh kaphe ceulaka
Kaphe Jabarah han ek dong le
Abeh sare dum jiguda

Bak teungoh plueng neucang bang-beung
Sare king-keueng ban bui buta
Sare kham-khum ureueng Jabarah
Badan ban gajah klik meu'a-a'

Bangta Sulotan Raja Abdullah
Neukiweue pantah lam blang raya
Jiplueng u keue mata u likot
Jieu ho sret ureueng dua

Ban asee plueng rimueng peucrok
Sare lek-lok mata bandua
Bitpi meunan jih geupeucrok
Nyang laen jiek meulaksa-laksa

Lhee naleh lada raja nyang taklok
Peue han laju troh teuka lanja
Urueng Jabarah tamse sidom
Peunoh jijrom lam blang raya

Teuka laju laen di nanggroe
Bantu jinoe po jih raja
Sireutoh mate silaksa meugantoe
Geunap uroe teuka lanja

'Oh meugriet geucang sabe
Sidroe kaphe boh bicara
Tango lon peugah sidroe ureueng
Kaphe bajeueng lhok bicara

Padan utoh rantoh le ban
Jih nyan tuan guree raja
Hekeumat le dum jitupeue
Jiyue jeue ngon drop raja

Jipeugah bak raja laknatillah
Bi'at jipeugah kaphe beudeuga
Tuanku bek le meunoe tamuprang
Abeh jicang geutanyoe dumna

Di jih tapoh han ek keunong
Payah mantong han binasa
Tha tpahlawan aneuk miet nyoe
Bandua droe jeungkat raya

Jinoe bek le prang pioh dilee
Taboh tipee ngon drop Bangta
Jinoe talet ngon jeue beusoe
Bandua droe po meukuta

Bek taprang le deungon alat
Meutuah that raja muda
Matejih han tatak han lut
Geutanyoe mawot mate lanja

Di jih dua that pahlawan
Han sipadan ateueh donya
Nyan sa badan taeu cut tek
'Oh jideumpek nyum karam donya

That pahlawan aneuk bisoe
Peudeueng di jaroe bube raya
Yoh masa nyan jiboh padan
Jiyue jeue tuan Bangta Muda

Aman Jalilu soe boh padan
Le that teunuban kaphe ceulaka
Raja kaphe nyan maleu'un
Jeue jiyue tueng sigra-sigra

Jeue jiyue tueng rante sajan
Bak pahlawan jihak sigra
Ban jideungo haba meunan
Jicok yoh nyan jeue meulila

Jeue ngon rante dua pucok
Kaphe kutok baplueng sigra
Subhanallah zuljalali
Kaphe majusi that guranta

Jikeumeung poh Bangta Sulotan
Jilet tuan dumjih rata
Bangta Sulotan maken seuu
Kaphe meu'u-u teuka lanja
Meuruet-tabuet kaphe neucang
Prang meuguncang that bak nyang ka
Kareuna ka na peurtakian
Ngon jeue tuan jidrop Bangta

Nyan ka jilet that meukarat
Di likot di nap jipeuteuka
Di likot di keue wie ngon uneun
Meulaksa laksin jikeupong lanja

Bangta Sulotan Raja Abdullah
Hana uga meubube seuma
Ateneu kreueh ban batee hitam
Meunan tuan proe umpama

Neudong lam prang sidroe sapat
Beurani that droeneu dua
Neucang kaphe bukon bubarang
Bangke lam blang meukeuba-keuba

Prang meuhubo sangat kiam
Nyum rasa lham Makah mulia
Bunyoe cokma peudeueng tumbak
Deumpek surak peue takira

Jitak jitop han keunong badan
Bangta Sulotan utoh peundiak
Bangta Sulotan miseue kilat
Neucang rakyat seumak donya

Subhanallah 'amma yasifun
That bit hireuen buet Rabbana
Prang meuhubo mate rakyat
Geuruleuet that Bangta muda

Kuweut jaroe peudeueng neuikat
Leugat neutak Si Crekaya
Teuma neukong laju neudrop
Neutop hat-huet lagee raya
'Oh neusumpom patah takue
Badan rudui sang ceumara
Ulee beukah tuleueng hanco
Neusumpom laju uleh Bangta

Ladom neuwiet pha ladom neuglueng
Ladom neulambong dalam hawa
Ladom neusinyok ulee lam tanoh
Kaphe meu'oh-'oh klik meu'a-'a

Bangta jidrop meuteumeung han
Jih neusimpan hana reuda
Bangta Sulotan sangat juhari
Gaseh Rabbi dalam donya

Pahlawan that keubit kusani
Kaphe neutadi han meuhingga
Neutumbok di rueng tampa di mieng
Takue meupaleng meugisa jungka

Neutop u manyang na ban layang
Neugampoh tuan dua-dua
Neutop u laot seun peuet limong
Neusrom meudeungong sang boh lila

Droe nyan dua sibang parui
Meugasui-gasui lam blang raya
Neusumpom ureueng le that mate
Meutindeh bangke lam blang raya

Taeu teudu-du ban bangke gajah
Ureueng Jabarah panyang nam deupa
Kaphe maleu'un hana uga
Rakyat reubah han teukira

MILIK KEPUSTAKAAN
DIREKTORAT TRADISI
DIJEN NBSF DEPBUDPAR

Jilet sabe ngon jeue beusoe
Muda samlakoe lisek that mata
Ban meureunggot jeue jikacak
Droe neutanjak sajan dua

Neupeuse droe bek roh lam jeue
Neuriwang u keue jih neuputa
Ureueng Jabarah meulum-lum jeue
Laju jikiweue Bangta muda

Miseue ureueng jeue eungkot krueng
Preh meudieueng kawan teuka
Jeue bak sapai meuluem-meuluem
'Oh leumah grum jitiek lanja

Eungkotpi lisek jidong lam kareueng
Jieu ureueng ho jahala
Ban meulayang jeue jikacak
Eungkotpi jijak peusiblah nyawa

Jeuepi meugrum eungkot that cidah
Abek leupah lam kualah
Ureueng Jabarah meunan laku
Jiluem laju raja dua

Preh-preh silap han jan neueu
Jitiek laju jeue meulila
Droeneu dua hana tahe
Kapeh neueundru hana reuda

Jan jitiek jeue neugrop bacut
Neutak hat-huet bak-bak muka
Jeue han keunong meusigo had
Pantah neulumpat droeneu dua

Raja Abdullah sibang parui
Jilet ngon jeue siseun dua
Jeue di jaroe jikacak-kacak
Droe neutanjak meu'en peundika

Hana tom roh lam jeue beusoe
Bandua droe Tuhan peulara
Nyang han mate dum geukiloe
Ka jiboh droe hana guna

Ureueng Jabarah le maken that
Kaphe laknat teuka lanja
Kapai meulayue han ek kheun ban
Jak bantu prang po jih raja

Ri nyang teungoh bandum geucang
Bangke lam blang seumak donya
Nyang ka u darat han le jisurot
Teuka di laot hana reuda

Abeh mate kaphe geucang
Prang han reunggang siklep mata
Uroe malam meuprang leugat
Mate rakyat padum-padumna

Teukeudi Allah peurintah Tuhan
Bangta Sulotan leumoh anggeeta
Bandua droe badan leulah
Raja Abdullah Bangta muda

Jeh 'oh lawet meuprang leugat
Hana siatpi na reuda
Han tom neumakeuenpi meusiblet
Lam kaphe let lam blang raya

Han tom neujep ie hek that badan
Neuehpi tan droeneu dua
Badan leumoh leubui asoe
Bandua droe sisyeedara

Bak simalam neumeupioh
Prang na teudoh sikutika
Sapat neuduek sibang parui
Mata leubui teungeut raya

Dang pot reuoh badan hugop
Seun rot teukhop kulet mata
Indra sinan teungeut pangsang
Adué aduén sapat dua

Bak binéh guha bateé megantung
Neusadeu rueng teungeut raya
Han neutujan teungeut mangat
Nafah hat-huet nyan bandua

Teukeudi Allah toe rab mureh
Raja neuéh goh lom jaga
Mantong meusadeu rueng bak bateé
Tumpang ulee nyan bandua

Seun rot teuka kaphe seudee
Ubak bateé binéh guha
Jijingeuk keudeh jiglip keunoe
Leumah jieuh raja dua

Teuma Jipeurab keunan jipeutoe
Deuh jideungo hat-huet raya
Hat-huet nafah teungeut larab
Kaphe peurab seun silaksa

Jikeumiek jeue nyan bak singkee
Kaphe seudee asoe nuraka
Ban jitiek jeue keunong bateé
Meuk meu'ee-ee peungeuh guha

Jeue geuhon that rante beusoe
Teukeujot jinoe raja muda
Ban neubeudoh nibak teungeut
Raja neubeuet la hawla wa la quwwata

Illa bi l-lahi l-'aliyyi l-'azim
Rabbon Rahim Po Nyang Esa
Peue laku nyoe ya Tuhanku
Han le umu kamoe dua

Bandua droe ka roh lam jeue
Neukeumeung 'eue teubiet u lua
Jeuepi geuhon meugriet han le
Gundah ate droeneu dua

Lom neukarat neukeumeung lumpat
Jeue geuhon that rante meulila
Sabab meutamah droeneu leumoh
Sare 'eh-'oh nyan bandua

Ureueng Jabarah ate galak
Dum jisurak bunyoe waba
Meualon-alon tamse geulumbang
Surak meuguncang kaphe ceulaka

Banta Sulotan leumoh asoe
Bandua droe sisyye dara
Teutap meukuien lam jeue beusoe
Han ek grak droe raja dua

Bandua droe meungucap syuko
Han teukabo keu Rabbana
Raja Jabarah kaphe pindoe
Jiikat jinoo raja dua

Jiboh kamam rante beusoe
Kaphe pindoe galak suka
Droeneu dua meuneuiem droe
Peunoh taloe bak anggeeta

Jaroe gaki abeh keurawat
Kong jiikat bansineuna
Bangta Sulotan han meumet le
Leumoh sare jeuep anggeeta

Sibang parui dua sajan
Peunoh badan rante meulila
Teutap teueh lam jeue beusoe
Teuduek 'oh noe siat haba

La ilaha illallah
Kuasa Allah Po Nyang Esa
Subhanallah wabihamdihi
Tuan Siti lon calitra

Putroe Baren jinoe lon peugah
Duek di urmoh ngon teumuda
Laloe galeb beuet Quruan
Pujoe Tuhan droeneu dua

Neuleueng titah ngon syafa'at
Beujeuoh laknat mara bahya
Laloe putroe pujoe Tuhan
Leumah neupandang raja muda

Putroe Baren muda bangsawan
Neumoe tuan droeneu dua
Tangah u langet jaroe neuleueng
Neumohon tulong bak Rabbana

Ya Ilahi wa ya Rabbi
Ya Habibi ya Meelana
Gata Tuhan sidroe Ghani
Keu lon neubri ban kupinta

Lheueh meuinseuen tuan putroe
Neujak jinoe u blang raya
Deungon teumuda dua sajan
Neutren le tuan lam istana

Peudeueng di jaroe bube on pisang
Lanja u blang neujak dua
Ban sare troh putroe u blang
Leumah meureuntang kaphe ceulaka

Leumah meujumboe miseue uteuen
Putroe neukheun bak teumuda
He teumuda jeh leupeue kaphe
Ban ube-be krong limong gunca

Panyang meului-lui badan raya that
Saleh kawom 'Ad asai mula
Putroe neuikat ija puncong
Peudeueng neusayong na bube tika

Teumuda ngon adoe that geuruleuet
Neuek santeut lam blang raya
Ban sare troh ka meuteuntang
Jeuet le meuprang sang geulura

Putroe dua sangat jantan
Neugrop lam kawan kaphe ceulaka
Sigo saho putroe lumpat
Neucang rakyat han teukira

Bandua droe that juhari
Kaphe neutadi seun silaksa
Sigo-go neugrop mate siribee
Kaphe padee lam blang raya

Bandua droe miseue seudong
Peudeueng neusayong su meutaga
Siabeh kuat peudeueng neusayong
Neutak rancong putoh keudua

Wie ngon uneun peudeueng reubah
Ureueng Jabarah tahe lagoina
Yoh nyan jimarit sabe keudroe-droe
Pane lom keunoe pahlawan teuka

Raja dua ka roh lam jeue
Pane keunoe laen teuka
Han jan takalon saleh di gampong
Na lom laen nyang peurkasa

Miseue dilee geutanyoe jicang
Aneuk jalang teuga raya
Panyang 'oh teuot badan ubit that
Ureueng Arab le nyang teuga

Bandua putroe hana laloe
Neuek jinoe santeut dua
Meucron keudeh meucron keunoe
Ri rab putroe dum binasa

Prang meucaphuek miseue umbak
Putroe teumeutak sang geulura
Ureueng Jabarah le that mate
Darah ile sang ie raya

Bangke meuampong dalam darah
Poteue Allah bri kuasa
Salang inong dumnann kuat
Hireuen 'ajab tango calitra

Ureueng Jabarah bube-be gajah
Sangat 'eh-'oh klik meu'a-'a
Bangke meuseupreuek meugule-gule
Le tahat mate sukee raja

Putroe Baren han soe teuntang
Tarek geudubang A''ah kuasa
Deungon teumuda dua sapat
Barangri teumpat han tilek muka

Meuka abeh neubri nasihat
Leumah-leumbot deungon suara
Narit mangat bandua droe
Jeuep-jeuep nanggroe ka neusara

Niphon cut kon troh an rayek
Suntok-suntok dalam bahya
Abah neurasa saket ngon mangat
Sabab jeuoh tahat ka langkah ba

Han peue tapeukrui manok coh pade
Lam suntok asbe guna biasa
Nyankeu sabab le teunuban
Abah neupandang sigala donya

Lakoe binoe banpeuet saban
Bangta Sulotan ngon raja muda
Meunyo ureueng gaseh Tuhan
Cit le tuan meuteumeung bala
Keunong bala sabapi that
Fahla akhirat han teukira
Syeuruga neubri nyang manyang that
Ri nyang kuat saba donya

Raja ngon putroe banpeuet gop nyan
Syeuruga lapan Tuhan karonya
Keuramat leubeh salehpi that
Neuprang syahidpi hana reuda

Bahkeu dumnhan haba nyang keu prang
Jinoe lon riwang lon sambat punca
Subhanallah 'amma yasifun
Nyoe lakuan putroe dua

Han le neumeuprang miseue dilee
Jinoe neubri thee bak kaphe ceulaka
Peuturi droeneu ureueng binoe
Neuhambo jinoe ok bandua

Tangkulok neutiek ok neugeureubang
Bee meukeumang gahru ceundana
Ok neuhayak bee meuhambo
Kaphe tahe le nyang gila

Sireuta neukheun haba meunoe
Deungo kamoe ha syeedara
Peuebu laku nyoe leupeue putroe
Bandua droe nyan ka teuka

Han payah tueng keudeh u gampong
Nyoho tanglong ka bandua
Keumeng han meukri rab roh tapoh
Bukon paleh geutanyoe dumna

Dong meulingka beumeukeupong
Tadrop taseuon peuwoe lam bahtra
Teuma jilet jidrop putroe
Ulee neuseudoe han jikira

Putroe neuplueng pura siat
Jipeucrok leugat lam blang raya
Trep-trep siseun neuhambo gumbak
Kaphe neutak seun silaksa

Ulee putoh sang tanoh cak
Han jeuet tajak peunoh donya
Dumnann neucang abeh mate
Jiteungoh sare hana reuda

Putroe Baren leumoh badan
Neupeueng yoh yan u istana
Han ek cang le kaphe le that
Teuka leugat si ceulaka

Troh u rumoh bandua droe
Kaphe pindoe teuka lanja
Hana jithee leupah neuplueng
Pat na reuhung abeh jimita

Jeup sigala be mita laju
Kaphe meu'u-u lam blang raya
Putroe Baren ngon Putroe Sunoe
Neungadu droe bak Rabbana

Neumeuinseuen mohon tulong
Neuyue peulindong nibak bahya
Tuan putroe leueng jaroe dua blah
Mohon bak Allah nyang sijahtra

Neubeuet do'a bandua droe
Putroe Sunoe ngon Baren Miga
A l-lahumma unsurni 'ala a'daika
Nasran 'azizan, ubak Tuhan neumeupinta

He Tuhanku tulong kamoe
Bak sitree nyoe kaphe ceulaka
Sibagoe tulong nyang sangat that
Neupeutroh hajat ban kupinta
Putroe Baren lheueh neukheun nyan
Tren di manyang jen antara
Dum jen pari biek jen Islam
Jak bantu prang Baren Miga

Jen lam uteuen troh bak putroe
Deelat sinaroe Baren Miga
Deelat tuanku po junjongan
Seumbah laman kamoe dumna

Pakon po cut neupangge kamoe
Neukheun jinoe siri sabda
Saleh po cut geuprang nanggroe
Nyang jeuet kamoe neumeuhei dumna

Putroe Baren khenn hareutoe
Tango lon kheun proe ubak gata
Bit ban haba gata bunoe
Jiprang keunoe kaphe ceulaka

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Nyankeu sabab lon hei keunoe
Kareuna kamoe ka roh lam bahya
Ulon jiprang meugriet sangat
Kaphe le that keunoe teuka

Tulong gaseh bantu siat
Kamoe meukarat jilet lingka
Dumna jen pari peuk seumbah
Insya Allah po cut raja

Pane kaphe teuka keunoe
Siri nanggroe neucalitra
Teuma seuot Putroe Baren
Neupeгах bak jen bansineuna

Ureueng Jabarah teuka keunoe
Jimeung tueng kamoe jiprang raja
Rakyat le that jiba sajan
Lom ngon badan raya-raya

Peuk seumbah Si Raja Kilat
Bek gundah that po cut raja
Insya Allah ngon tulong Tuhan
Bah kamoe prang kaphe ceulaka

Ho nyang jijak kamoe seutot
Kaphe laknat le bicara
Taduek po cut gata keudroe
Lam meuligoe meuseunia

Teuma marit Putroe Baren
Ngon raja jen dalam rimba
Tango kamoe dum he teelan
Keumeung kheun ban sipatah haba

Han peue salah he po cut droe
Neukheun jinoe meungo nyata
Tajak tueng aneukku banlhee droe
Tapeuwoe keunoe deungon sigra

Kamoe meugriet prang lam nanggroe
Haba kamoe tacalitra
Teuma seuot Si Raja Kilat
Aneukneu pat po cut raja

Sidroe keurajeuen di nanggroe Rom
Sulotan Meureudom geuboh nama
Nyang sidroe teuk sideh makam
Bak seubotan nanggroe Cina

Di nanggroe nyan aneuk nyang phon
Keunan taseulem Allah karonya
Aneuk teungoh di Pagarujung
Jakleh tatueng keunoe sigra

Insya Allah po cut junjongan
Kamoe jak tueng bangta muda
Gop nyan banlhee droe kamoe peusapat
Beureukat mukjizat Saiden Anbia

Putroe Baren peugot surat
Lheueh le siat hana jula
Lhee boh keupeng surat kireman
Neupeuet yoh nyan akan aneukda

Ban sare tho lheueh neusurat
Neujok leugat sigra-sigra
Jen jiseumbah surat putroe Ti
Raja Pari teuma bungka

Jilakee idin ubak putroe
Do'a keu kamoe po cut raja
Insya Allah seuot putroe cut
Jipo hat-huet pari raja

Jiba ngon surat limong ploh rakan
Jipo tuan dalam hawa
Ladom u Cina ladom u Rom
Pagaruyung nanggroe keutiga

Lhee pasokan jen teureubang
Po meudeungong lam antara
Teukeudi Allah troh ngon siat
Banlhee teumpat aneuk raja

Jitamong le Si Raja Kilat
Deelat hadarat raja muda
Lheueh jideelat jijok surat
Jikheun peuneuet nibak po ma

Ban sare troh surat u jaroe
Neubeuet jinoe neupeunyata
'Oh sare lheueh neubeuet surat
Ro meudrap-drap ngon ie mata

Raja neumoe surat basah
Ie mata limpah peunoh dada
Weueh neudeungo ma ngon ayah
Nanggroe boh-bah teungoh prang raya

Banlhee bangta saban-saban
Meugeulumbang ro ie mata
Raja muda neukrah rakyat
Timu barat abeh teuka

Keujruen imum uleebalang
Tren bak junjongan raja muda
Dumna rakyat peuek seumbah
Deelat khalifah raja raya

Ampon tuanku syahi alam
Seumbah laman kamoe dumna
Tuanku pakon neupangge kamoe
Neukheun jinoo siri sabda

Trenkeu sabda teuma di manyang
Tango tuan lon peuhaba
Insya Allah po junjongan
Cuba kheun ban meulago nyata

Lon keumeung jak jinoo u Makah
Ma ngon ayah dalam bahya
Teungo neumeuprang jinoo ngon kaphe
Kamoe neupangge bantu ngaza

Surat sipucok ka troh keunoe
Ubak kamoe jen pari ba
Jinoo lon woe keudeh siat
Prang meukarat hana tara

Lon jak bantu doli hadarat
Nyankeu pakat lon peuhaba
Rakyat seuot po junjongan
Pane haba nyan po meukuta

Jen pari me Si Raja Kilat
Nyan leupeue surat taeu rata
Takalon narit lahe di sinan
Dalam kireman haba po ma

Tuan kadi neubeuet surat
Jingo le rakyat dum barangna
Teuma marit dumna rakyat
Rot jeuoh that pajan tabungka

Kamoe neuba laman sajan
Meujak bantu prang po meukuta
Raja seuot teuma sipatah
Hana ilah rot tabungka

Nanggroe jeuoh jarak han ban
Han troh tuan Makah mulia
Adat ek trohpi ngon lambat
Ka meugriet that ayah ngon ma

Bah le lon sidroe bungka jinoe
Do'a keu kamoe dumteu rata
Raja muda neukheun hareutoe
Lon uroe nyoe jadeh kubungka

Nyan leupeue nanggroe takeurajeuen
Dalam ngon mideuen bek binasa
Seulama goh troh lon woe keunoe
Hukom gata nyoe rakyat dumna

Amanat lon bek taubah
Hukom Allah tapeulara
Talakee do'a keu lon bak Allah
Beumeusiblah nibak bahya

Beurijang troh lon woe u Makah
Saweue ayah deungon bunda
Lheueh neukheun nyan dum bak rakyat
Doli hadarat jinoe bungka

Raja meukeumah dum seuleusoe
Neukheun bak putroe asoe istana
Idin tabri lon woe siat
Do'a beule that keu lon tapinta
Lon jak saweue ma di Makah
Sajan ayah dalam bahaya
Teungoh meukarat prang di nanggroë
Neuyue jak kamoe tulong ngaza

Neuyue tueng lon jinoe beurijang
Jak bantu prang ayah ngon ma
Putroe tanyong bak sulotan
Ho rot jalan tuanku bungka

Cit jinoe le sapeuepi tan
Pakri padan po meukuta
Peue-peue hana cuba peugah
Meudeungo sah haba gata

Pangkai bungka neupajoh di rot
Reumok lon peugot peue hade na
Meubu kulah han jan lon taguen
Jeuet neumakeuen di rot raya

Bahle bek reumoh deungon makanan
Soe mepi tan han ho lon ba
Lon han bri jak dumna rakyat
Rot jeuoh that sosah raya

Meudang tajak keudeh u Makah
Meugriet ayah deungon po ma
Nyankeu sabab han lon me ngon
Keusukaran di rot raya

Jinoe lon bungka idin tabri
Jikalee mate han le meugisa
Meuna umu neubri le Tuhan
Bak gata intan rijang lon teuka

Talakee keu lon do'a beulawi
Peutang pagi bek na reuda
Beuseulamat beutroh lon woe
Ubak nanggroe Makah mulia

Abeh narit deungon putroe
Beudoh jinoe raja muda
Teuma meuteumeung ngon asoe meuligoe
Neusujud putroe u gaki raja

Neulakee meuah beubai ngon salah
Sireuta jojah ngon ia mata
Kareuna raja jeuoh langkah
Pakri saleh di rot raya

Raja neutren lam meuligoe
Lheueh meumat jaroe ngon rakyat dumna
Dum abeh moe weueh jipandang
That jisayang keu raja muda

Raja teubiet laju u blang
Rakyat meukeumang meulaksa-laksa
Raja jiintat woe u Makah
Rakyat barollah sajan sireuta

Ban sare troh sama teungoh blang
U yup geulumpang kayee raya
Di yup kayee nyan neumeupioh
Rakyat bah-boh lingka raja

Jak meuteumeung dumna rakyat
Doli hadarat jinoe phon bungka
Jinoe phon meucré deungon rakyat
Raja keuramat fatihah sigra

Raja muda neubeuet fatihah
Keu nabiuyullah dum anbia
Keu eelia Allah di syereb di mugreb
Raja nyang gayeb dum eelia

Abeh keu entu neufatihah
Ma ngon ayah raja raya
Lheueh fatihah do'a neubeuet
Neuleueng paleuet meuseumpeuna

Dumna rakyat abeh leueng jaroe
Poteu sidroe nyang beuet do'a
Abeh neubeuet do'a seulamat
Teuma neusambat tulak bala

Lheueh beuet do'a neurahop jaroe
Raja neumoe ro ie mata
Dumna rakyat beudoh sare
Meuteumeung le deungon raja

Com di teuot seumbah di gaki
Mulia doli raja eelia
Dumna rakyat tueng ijazah
Eelia Allah keumeung bungka

Sare abeh dum meumat jaroe
Raja jinoe leugat bungka
Banlhee raja bungka jinoe
Han meusidroe rakyat neuba

Deungon jen pari biek jen Islam
Banlheepi meunan saban calitra
Teuka jen pari Si Raja Kilat
Jikheun bi'at bak raja muda

Tuanku rijang neubungka jinoe
Bak baho kamoe neuk sigra
Ban raja ngo narit meunan
Neuk yoh nyan bak bahonya

Neuduek bak baho neumeujunte
Marit jen pari peuingat raja
Jen pari kheun neumumat beukong
Sinoe bak reukueng takue hamba

Tuanku neuwa sinan beuthat
Mata neupet nyan bandua
Bek neubleut-bleut meugoh lom troh
Bak peulaboh Makah mulia

Raja muda mata neupet
Nak bek hayut lam antara
Lheueh nibak nyan jipo rijang
Troh lam awan nanggroe antara

Aare hat-huet jipo leugat
Sare le siat raja muda
Di Pagaruyung watee leuho
Asa uroe u Makah mulia

Peuteungohan asa watee pasilat
Troh le siat pari raja
Siseun banlhee aduen adoe
Pari peuwoe bak ayahda

Ban sare troh lam meuligoe
Meuteumeung jinoo le ngon bunda
Putroe Baren ate mangat
Rindu sangat keu aneukda

Aneuk lhee droe sipangkuan
Rupa saban sang meutia
Badan cut-cut muda seudang
Baro meupinggang sisyeedara

Raja lhee droe seumbah po nang
Putroe bimbang galak suka
Putroe Baren that sukaan
Karonya Tuhan troh aneukda

Ate mayoh that bit bimbang
Kuteumee pandang bijeh mata
Ateku mayoh sangat rindu
Trep that teungku tawoe bak ma

Dalam lon cinta geunap uroe
Gata lhee droe cre di mata
Allah he aneuk meutuah kee
Allah peuteumee deungon gata
Adat han cit that mayoh deundam
Uroe malam lon meucinta
Jeh 'oh lawet cre di nanggroe
Muda samlakoe boh ate ma

Jantung ate aneukku teungku
Kuteumeung eu asoe leumueng ma
Allah he aneuk pakon trep tawoe
Tasaweue kamoe ureueng tuha

Neuwa neucom bak-bak takue
Sajan neumoe suka rasa
Aneukku cut jeh 'oh lawet
Han tom siblet kieu rupa

Nyang na neuu meuaneuk di Rom
'Oh lheuuh jameun nibak cicem ba
Nyang dua treuk han tom neuu
'Oh lheuuh jibapo le cicem raya

Untong gadoh mantong teh-teh
Jinoe ka baleh raja muda
Nyandum jameun cre di nanggroe
Nibak Putroe Baren Miga

Dumna ureueng asoe meuligoe
Galak that jieu lhee droe bangta
Teuma marit Si Raja Kilat
Sujud khedeumat bak Baren Miga

Pakri laku po cut kamoe
Cuba kheun proe toh bicara
Jinoe seuot putroe Baren
Bak raja jen neukheun sigra

Tawoe bandum gata siat
Laman meukarat lon hei gata
Ban jideungo narit meunan
Abeh tuan jiwoe u tangga

Jenpi leupah jiwoe u nanggroe
Tuan putroe pakoe aneukda
Geubet ngon bu saboh idang
Makeuen junjongan sisyeedara

Putroe Baren ngon Putroe Sunoe
Makeuen jinoe sama-sama
Saboh idang ureueng limong droe
Dua putroe lhee droe raja

Ma ngon maya Putroe Sunoe
Rupa sambinoe peurumah kuya
Ureueng limong droe ate mangat
Makeuen sapat aneuk ngon bunda

'Oh lheueh makeuen pinah idang
Ranup lam puan geuboh sigra
Ranup masak lheueh neugapu
Bee meudeuru lidan jeumpa

'Oh lheueh neupajoh ranup sigapu
Neukheun laku bak aneukda
Wahe aneuk baoh ate nang
Aneuk jeunulang cahya mata

Kamoe aneuk meugrietmeu that
Kaphe laknat jiprang raja
Ureueng Jabarah raya that badan
Kamoe jiprang aneuk raja

Na sibuleuen sideh di blang
Prang meuguncang hana reuda
Allah hai aneuk duteu han le
Ka lam rante sajan kuya

Jiboh rante gaki jaroe
Ngon jeue beusoe jidrop bandua
Sideh mantong teudu lam jeue
Han ek neu'eue teubit u lua
Meumat han le meugrak han jeuet
Cit meuteubleut aneuk mata
Cit jikeumiet jipreh mate
Dumjih sare lam blang raya

Soe keumeung jak han dapat le
Le that kaphe jiduek lingka
Jeue jikambam jiboh rante
Jipoh mate ayah ngon kuya

Ban bangta ngo narit ibu
Moe meu'u-'u ro ie mata
Moe banlhee droe ie mata.limpah
Allah he ayah ayoh he kuya

Pakri laku ma teungku droe
Kujak cok jinoo du ngon kuya
toh rot ilah taboh taki
Po ma neubri akai biara

Allah hai aneuk beumeutuah
Ma gata sosah reudoh-reudah raya
Silawet hana sinoe ayah
Lon di rumah toe rab gila

Akai lon gadoh budoe lon paneuk
Allah hai aneuk raja muda
Ban gata kheun lon kuikot
Ban nyang patot hana lon dawa

Bicara aneuk bak gata lhee droe
Tabri keu kamoe bijeh mata
Wahe po ma tango kamoe
Udeh jinoo tajak ngaza

Keudeh bandum tajak u balang
Udeh taprang kaphe ceulaka
Tajak tueng ayah taba sajan
Kaphe talawan wahe po ma

Gata po ma dua sapat
Alat beucakap udeh tangaza
Putroe Baren seuot rijang
Nyankeu reumbang bijeh mata

Udeh geutanyoe aneuk teungku droe
Taprang jinoo kaphe ceulaka
Ureueng lam Makah hana lon peugah
Panyang kisah lon calitra

Nibak prang dilee troh bak prang nyoe
Hana sidroe lon peuhaba
Ulon peugah haba nyang paneuk
Dumnoepi glak bak tabaca

Hana meukeusud peugah nyang laen
Nyang leubeh canden tujuh droe raja
Raja Abdullah Bangta Sulotan
Keulhee tuan Baren Miga

Keupeuet teuma Putroe Sunoe
Bangta lhee droe nyang baro teuka
Padan cukop keumah sare
Putroe kheun le udeh aneukda

Peudeueng di jaroe saboh sapo
Neutren laju lam istana
Putroe giduek guda samaran
Dalam peuprangan that biasa

Bandum gop nyan guda geupasang
Teubiet u blang mahajana
Guda neutepok jiplueng leugat
Leumah le rayat miseue rimba

Ureueng nyan lhee droe beureuhi that
Neutajo leugat neupeugrop guda
Troh lam kawan ureuengJabarah
Rakyat barollah abeh subra

Bangta lhee droe that geuruleuet
Neutak hat-huet kaphe beudeuga
Kaphe kiroh sabe keudroe
Pane aneuk nyoe lhee droe teuka

Saleh putroe meungui ban agam
Sare kiam bunyoe taga
Adat putroe pane lhee-lhee
Yoh prang dilee dua saja

Teuma jiseuot kaphe sidroe
Wah si nyak nyoe aneuk raja
Kaphe lale marit sabe droe
Banta sidroe hana tara

Sidroe bangta sabe ceumeucang
Suara peudang sang geulura
Putroe Baren Putroe Sunoe
Sideh neusom droe bineh guha

Neukalon aneukneu banlhee droe
Tha tbit pindoe lam prang raya
Neucang kaphe subhanallah
Banlhee gagah that peurkasa

Wie ngon uneuen abeh teureuban
Bangke meutamon meutimpa-timpa
Darah ile tamse ie krueng
Meupat 'oh reukueng meupat 'oh dada

Sababjih raya nyang jeuet le darah
Meusidroe bicah na sigunca
Bangta lhee droe that juhari
Kaphe neutadi han jan jihei ma

Hana sidroe meutheun kulet
Ban bak peutek kaphe ceulaka
Ban bak pisang kulet lumpok
Neutak pak-puk seun silaksa

Bangta banlhee mangat jaroe
Ban bak keureupoe dalam paya
Putroe Baren mantong neuduek
Neueu aneuk lam prang raya

Meucarueh-carueh pueh that neujak
Bangke meusak-sak bube-be raya
Bangke teugageueng ri nyang neucang
Peunoh ngon blang seumak donya

Prang meukarat Allah nyang thee
Kaphe seudee ban ie raya
Jiteungoh laju sideh di laot
Lam blang seupot tamse rimba

Le nibak sot teuka di laot
Hana jitakot kreueh lagoina
Phon prang dilee troh bak prang nyoe
Meulaksa katoe nyang ak fana

Han cit hireuen maken gagah
Sep that damoh asoe nuraka
Barangdum tacangpi han sudah
Subhanallah bangta kheun sigra

Neueu jiteungoh meutaloe-taloe
Na ban anoe dalam paya
Bangta lhee droe meunyum teumakot
Lam blang seupot arat raya

Kaphe meusak-sak meule leupah
Han ek abeh sabe teuka
Barangri nanggroe raja kaphe
Han ek sabe Raja Jabara

Jih raya tha tlom ngon damoh
Pakri tapoh gadoh bicara
Han ek poh le kuweuet jaroe
Bangta ban lhee droe surot sigra

Ugah ate han ek le cang
Neuplueng rijang ubak bunda
Kaphe peucrok bangta lhee droe
Beudoh putroe siseun dua

Ban meudiyeueng leumah putroe
Kaphe pindoe marit sigra
Jehpat putroe keunoe jijak
Bek katak-tak kadrop kawa

Bandua droe teuka keunoe
Putroe Sunoe Baren Miga
Putroe Baren neujak ampeueng
Neusayong peudeueng sajan teumuda

Ban sare rab u hadapan
Jirumpuet rijang sigra-sigra
Ban meureunggot jikeumeung drop
Putroe neugrop deungon sigra

Han meuteumeung nyan meujimat
Pahlawan that putroe bandua
Meupalot-palot pueh that jimat
Peudeueng hat-huet bak-bak muka

Meusurot-surot meuruet-tabuet
Peutroe neutebuuet tam-tum bak muka
Pakri laku dum geutanyoe
Nyang rab putroe buta mata

Lom jikeupong jipeuradak
Han jeuet tajak peunoh donya
Sangkira kon ureueng ceubeueh
Han meuhad lheueh le u lua

Putroe Sunoe teuma surot
Plueng u likot neugrop u lua
'Oh jipeucrok neuplueng leugat
Neucang rakyat peue takira
Saboh saho putroe neuplueng
Kaphe bajeueng pungo gila
Jitiyeup u wie neugrop u uneun
Peudeueng neutheun ngon neusangga

Meunan sabe neupeulagee
Kaphe seudee bansineuna
Jeuoh that neuplueng putroe bangsawan
Kaphe syetan neupeudaya

Abeh leupah jihumeui putroe
Bangta lhee droe lon calitra
Bangta lhee droe neuplueng pantah
Peurab bak ayah neupeunyata

Kaphe han le ka putroe tipee
Abeh seudee pungo gila
Dawok beureuhi that keu putroe
Dawok laloe seutot lanja

Nyang jeuet neuplueng putroe budiman
Nak jarak sinan bak raja muda
Nak meung jeuet peurab aneuk lhee droe
Putroe dua droe lhok bicara

Sare jarak dumna kaphe
Bangta peutoe le bak ayahda
Subhanallah wabihamdihi
Keunong taki bak Baren Miga

Ban sare troh aneukneu keunan
Moe le yoh nyan lhee sireuta
Ayah neukalon lam jeue beusoe
Peunoh taloe jeuep anggeeta

Bandua droe hana meumot
Jeue geuhon that rante meulila
Teuma neutarek le jeue beusoe
Runtoh sinaroe dum binasa

Neureuet kap-krup putoh sinaroe
Rante beusoe putoh ban nyang na
Neucok ayah neupioh taloe
Bandua droe deungon kuya

Abeh neureuet rante patah
Puleh ayah miseue nyang ka
Bangta Sulotan Raja Abdullah
Neupujoe pantah Allah Ta'ala

Yoh nyan neuseubot alhamdulilah
Syuko keu Allah rahmat teuka
Sabab hireuen tahe keudroe
Aneuk banlhee droe Allah karonya

Miseue saboh roe yoh na Muhammad
Prang raya that ngon Raja Kheba
Panglima prang Saidina Ali
Meulintee Nabi geutanyoe dumna

Tuanteu Ali panglima prang
Kaphe neucang meulaksin laksa
Teukeudi Allah bak siuroe
Ali sidroe sangat lupa

Teuka teukabo dalam ate
Tuhan Kade nyang kuasa
Nyoban neukheun nyang jeuet teukabo
Kaphe kuhanco ban sigom donya

Jinoe kupeulet ban saboh nanggroe
Han meusidroe kutinggai na
Tuwo neukheun insya Allah
Meuteumeung sosah meugriet raya

Idin bak Tuhan hana neubri
Sabab Ali meurasa dore teuga
Kaphe peurab jilet Ali
Jiteumee rante ngon jisingkla

Meureutoh pucok rante bak jaroe
Kaphe pindoe sangat waba
Saidina Ali leumoh badan
Sabab makana han tom neurasa

Troh meubuleuen prang neukarat
Han siat nyang na reuda
Teukeudi Allah peurintah Hadarat
Jiteumeung ikat jiboh singkla

Lheueh jirante jikat bak gajah
Meureutoh kafilah nyang raya-raya
Saidina Ali hana meumot le
Gajah dum sare jihue hila

Ladom jitarek u barat teupat
Ladom meuhad u barat daya
Ladom jihue blah seulitan
Ladom tuan blah teunggara

Siteungoh ri timu teupat
Barat laot blah utara
Saidina Ali han ek meulawan
Geudah yoh nyan hana tara

Teukeudi Allah peurintah Tuhan
Teuingat yoh nyan Ali Murtala
Teuingat Ali teulanjo lidah
Astaghfirullah neukheun le sigra

Lhee go neuucap astaghfirullah
Meuwoe tuboh miseue nyang ka
Ngon syafa'at Nabi Muhammad
Putoh krap-krup rante dumna

Yoh nyan neubeudoh Saidina Ali
Ate beureuhi hana tara
Ali kuat nibak dilee
Siploh sukee jiek ganda
Neucok Durfaka reugam bak jaroe
Neutajo jinoe u dalam tantra
Neudong neusayong wie ngon uneun
Bangke meutamon seumak donya

Kuta Kheba tujuh lapeh
Seungue abeh safan-safa
Ngon Raja Kheba meundapatkan
Jisipak yoh nyan uleh guda

Guda Ali pantah ban kilat
Jisipakpi that nate raja
Na siseun treuk Ali jijrat
Kappe laknat asoe nuraka

Masa neumuprang ngon Raja Khandak
Kappe galak basineuna
Sabab Ali leumoh tuboh
Han tom peunajoh na neurasa

Iepi meunan han tom neujeb
Prang meusaket hana tara
Lhee ploh uroe lhee ploh malam
Prang meuguncang lam blang raya

Ali leumoh yoh masa nyan
Jijrat tuan jiboh singkla
Tuanteu Ali han ek le yo droe
Rante beusoe kong lagoina

Teutap Ali dalam rante
Neungieng bak Nabi meuklep-klep mata
'Oh neukalon le Rasulullah
Neumohon bak Allah sigra-sigra

Tren hidayat nibak Nabi
Po tallah bri dalam dada
Nabi neucok batee cut-cut
Neusrom u likot sigra-sigra
Sireuta neukheun subhanallah
Rante patah bansineuna
Ngon idin Tuhan Alipi lheueh
Meutamah ceubeueh nibak nyang ka

Saidina Ali neubeudoh dong
Kaphe neucang han ban peubla
Abekh ngon raja bandum simpan
Areuta rampasan neucok dumna


Raja Kheba ngon Raja Khandak
Abekh rusak mate bandua
Nanggroe talo areuta geutueng
Neuyue bulueng keu po jeumba

Lheueh nyan neuwoe u nanggroe Makah
Nabiyullah suka rasa
Prang Raja Kheba ngon Raja Khandak
'Oh noe teuduek sikutika

Jinoe haba sot lom meuriwang
Tadeungo tuan dumteu rata
Raja Abdullah Bangta Sulotan
Jirante tuan kaphe ceulaka

Bak Tuanteu Ali lon boh misalan
Peuhaba le tuan dua lhee banja
Jinoe lon sambat haba dilee
Nyoban lagee he syeedara

Yoh nyan teumanyong Raja Abdullah
Pajan troh langkah bijeh mata
Bangta seuot sireuta neuseumbah
Wahe ayah baro meuteuka



He aneuk cut jantung ate
Peutang pagi lon meucinta
Meutuah gata kuteumeung pandang
Boh ate nang cahya mata

He bangta cut beumeutuah
Jak bantu mbah lam prang raya
Bak panyang umu neukku lhee droe
Saweue kamoe ureueng tuha

Jeh 'oh lawet rindu deundam
Uroe malam nyum di mata
Troh meusampe kupeutimang
Meuteumeung pandang keu rupa

Kukira han le kuteumeung kalon
Karonya Tuhan bri bahgia
Allah hai aneuk kukira mate
Sosah ate du di gata

Silawet hana gata lhee droe
Kamoe sinoe cit lam bahya
Raja Abdullah Bangta Sulotan
Galak neupandang bangta muda

Ate meusyen mayoh bimbang
Aneuk neupandang droe ka raya
Saban banlhee santeut badan
Ban geutimang dalam neuraca

Raja Abdullah that sukaan
Aneuk bangsawan mayen mata
Lheueh meumoe-moe limong sajan
Bangta Sulotan raja muda

Aneuk lhee droe nyang peulimong
Meumoe-moe jamong lam blang raya
Bangta Sulotan Raja Abdullah
Neubeudoh pantah sajan dua

Neureutek droe puleh badan
Meuwoe pahlawan miseue nyang ka
Neucok peudeueng regam bak jaroe
Udeh geutanyoe tajak ngaza
Teuma seuot muda samlakoe
Udeh jineo he du raja
Ma ngon maya teungoh neumeuprang
Udeh rijang bantu sigra

Du neubeudoh kuya sajan
Limong gop nyan neujak ngaza
Putroe Baren that pahlawan
Dua sajan ngon teumuda

Bandua droe han soe linteueng
Kaphe bajeueng abeh seureupha
Meusong-abong neucang leugat
Kaphe le that teuka lanja

Miseue sidom teubiet lam umpung
Pat na lapang peunoh rata
Badan raya nam deupa panyang
Bunyoe kiam na ban taga

Deumpek surak meualon-alon
Sang bakat tren ujeuen keunong sa
Ureueng Jabarah teuka laju
Hana kuyu kaphe ceulaka

Dumnán mate meutabu-tabu
Ban leupieng u sret meukeuba
Han cit ngeudehpi meubacut
Hana kuyut bansineuna

Di jih poutroe cit jigalak
Beuthat geutak han jikira
Meuteumeung han jidrop putroe
Kaphe pindoe that bit kubra

Dum meuron-ron han putoh kawan
Ban geulumbang hana tom reuda
Dumna kaphe ate galak
Meu'u-'u surak nyum lham donya

Raya meurtabat Raja Jabarah
Rakyat barollah dum meuseutia
Putroe Baren laju neutak
Kaphe rusak seun silaksa

Deungon adoe sabe rancak
Neugrop tinjak dalam tantra
Peudeueng meutangkeh that meukring-krak
Miseue umbak di ujong raja

Kaphe mate putoh tangkurak
Putroe Baren tak hana tom reuda
Sigo-sigo neucrong mate siribee
Sang on kayee sret u donya

Rakyat mate han ek peugah
That barollah laen lom teuka
Subhanallah that meuhayak
Deumpek surak nyum lham donya

Putroe Baren maken galak
Peudeueng neuhayak meukilat mata
Cahya peudeueng kilat jiplueng-plueng
Kaphe bandum meuklep-klep mata

Ureueng Jabarah jitheun tadah
Han tom jibalah bansineuna
Di jih keu putroe galak bube gle
Soe nyang mate teutap bak fana

Prang meugeucoh uroe malam
Sikeujap tan nyang na reuda
Putroe jipeucrok meusong-abong
Kaphe neucrong han ban peubla

Putroe meugriet hek that badan
Meureuoh tuan nyan bandua
Raja Abdullah Bangta Sulotan
Neukoh kawan kaphe ceulaka
Limong gop nyan aneuk deungon mbah
That bit gagah lam prang raya
Putroe jipeucrok uleh kaphe
Neuampeueng le deungon sigra

Ban jikalon Raja Abdullah
Teuhah babah teukap jungka
Pakri ek lheueh lam jeue beusoe
Rante sinaroe putoh rata

Kaphe tahe jikalon proe
Teukap jaroe bansineuna
Watee han meukri han sapeue roh
Pakri ek putoh rante meulila

That pahlawan aneuk jalang
Dumnan jeue kong lheueh u lua
Bit han sakon dum geutanyoe
Jeh 'oh uroe hana laba

Teuma tawoe dum u nanggroe
Tuan putroe hana taba
Teuka ureueng sigala nanggroe
Jak eu putroe indah rupa

Peue tapeuleumah tapeuwoe tan
Malee tuan geutanyoe dumna
Kaphe meuteuoh sabe keudroe
Jiek jinoe ban bui buta

Jiek kaphe that geuruleuet
Jiek grap-grup jigrop lanja
Meuseureupeh miseue sure
Ladom nari lila-lila

Tadeungo su bandum guransang
Nyang pahlawan teueungka-eungka
Meulinteueng-linteueng jiek u keue
Bangta humeui hana reuda

Raya-raya bube gajah
Meukuah-kuah bulee mata
Ka mate nyan jiek laen
Jih meulaksin nyang peurkasa

Yoh nyan neubeudoh bantujuh droe
Tajo jinoe dalam tantra
Peudeueng di jaroe saboh sapo
Neucang laju kaphe beulaga

Tujuh peudeueng siseuñ neupeusret
Mate rakyat han ek kira
Bangta Sulotan that beureuhi
Peudeueng neugunci meutoto mata

U teungoh blang meukalot-kalot
Neucang hat-huet pantah raya
Ureueng limong droe jipoh han keunong
Cokma meusumpom sret u donya

Meurubee cokma sret u bumoe
Suara bunyoe miseue taga
Cokma beusoe bube-be bak u
Panyang sulu na peuet ploh deupa

Brat cokma na siribee man
Soe nyang keunong lham lam donya
Jinoe geuprang that meuguncang
Rakyat lam blang seupot donya

Ureueng meuprang han leumah le
Asap beude ngon asap lila
Nyang na tango suara peudeueng
Jan meuteumeung deungon cokma

Ureueng tujuh that peungaroe
Dua putroe limong raja
Putroe bandua hana jipoh
Theun-theun tadah jidrop saja

Jipoh bak raja sangga ngon peudeueng
Suara meudeungong meuk teupanca
Ban bungong apui ek u manyang
Meuk teureubang peungeuh donya

'Oh le darah ngon meuk peudeueng
Leumah ureueng meuprang dumna
Teutop abee ngon darah kaphe
Taeu ile ban ie raya

Sigala kaphe yo teumakot
Meusurot-surot lam blang raya
Neureutek peudeueng wie ngon uneun
Kaphe 'am-'um reubah meutimpa

Putoh keuieng dum neurancong
Neusayong-sayong neulila-lila
Ulee meuseupéh ban boh keutupong
Tujuh peudeueng tamse su taga

Subhanallah prang meuhayak
Padum nyang rusak meulaksin laksa
Ureueng tujuh droe badan leulah
Han ek le cah le lagoina

Teuka laju nyan di nanggroe
Siuroe-uroe troh ploéh laksa
Bandum mate neucang rakyat
Mantong ban sot kureuenghana

Kaphe paleh kreueh tangkurak
Laju jijak bansineuna
Han ek poh le kaphe pindoe
Peunoh bumoe miseue rimba

Bandum gop nyan meunan saban
Leumoh badan jeuep anggeeta
Putroe Baren mohon titah
Ubak Allah Tuhan Nyang Esa

Ya Ilahi wa ya Rabbi
Tuhanku neubri ban lon pinta
Kamoe siseun nyoe saleh mate
Le that kaphe teuka lanja

Allah Tuhan gatakeu tulong
Kamoe neulindong nibak bahya
'Oh lheueh putroe neumeuinseuen
Jen lam uteuen abeh teuka

Raja Pari ngon Jen Diu
Teuka laju bak Baren Miga
Jen barollah peunoh bumoe
Troh bak putro junjong sabda

Ban sare troh dum ka keunan
Marit rijang pari raja
Pakon po cut meuhei kamoe
Neukheun jinoe meungo nyata

Putroe Baren seuot rijang
Tabantu prang raja muda
Prang meukarat kamoe ka tiwah
Han ek le geucah na dum rimba

Jih ban sidom teuka leugat
Prang meukarat poteu raja
Pari seuot insya Allah
Bah kamoe plah kaphe ceulaka

Bek neugundah po cut teungku
Kamoe bantu raja muda
Gata tujoh duek bak teutap
Kaphe laknat lon salop jungka

Bek neugundah po cut teungku
Kamoe bantu raja muda
Gata tujuh duek bak teutap
Kaphe laknat lon salop jungka

Kaphe asee han thee keudroe
Kayee apui lam nuraka
Insya Allah beureukat Muhammad
Idin po cut jinoe meungaza

Teuma seuot tuan putroe
Sireuta lakoe neumeusua
Han peue salah Raja Pari
Tuhanku Rabbi peutroh pinta

'Oh lheueh marit deungon putroe
Pari jinoe jak prang ngaza
Beudoh rakayat Raja Pari
Jitet beude that guranta

Ting-tong canang gram-grum geundrang
Meugeuruncang ban geulura
Seurune bangsi suleng hareubab
That meucakap pari raja

Tambo meugrum gong meudong-dong
Peurasan keunong ragam ngaza
Dangdimuri ngon napiri
Sajan keucapi ngon nukara

Hareudammama ngon ceuracap
Ladom jiyup sangkaikala
Suara bunyoe macam-macam
Hana saban laen suara

Ladom meu'i-i suara panyang
Ladom tuan tango meu'a-a
Ban laku droe suara le ban
Han le peurasan that bit eela

Tuloe geulunyueng han deuh tameungo
Nyum-nyum leungo Makah mulia
Pari jiprang rot u manyang
Jak bantu prang raja muda

Raja Abdullah Bangta Sulotan
That sukaan ate lam dada
Neuthee na bantu bak jen pari
Po tallah bri tren u donya

Ureueng tujuh neupioh droe
Bak syeue uroe naung guha
Ate mangat napsu sampoe
Kaphe pindoe jinoo binasa

Geundrang ngon tambo miseue riyeuek
Boh meuseupreuek lam blang raya
Bunyoe beude suara geundrang
Dum peurasan subra donya

Dilee phon-phon peurasan di bumoe
Teuma jinoo lam antara
Ureueng Jabarah hireuen laloe
Jingo bunyoe lam antara

Suara 'am-'um kiam sare
Han soe tukri nyum lam donya
Dum jen pari jitren u bumoe
Jitampa jinoo kaphe ceulaka

Jitrom di ulee reubah teusungko
Meugisa baho reuloh jungka
'Oh jitampa takue meupaleng
Meupuseng-puseng teusuet ngon mata

Sigala kaphe yo teumakot
Pari hat-huet laju teuka
Jidrop han jan leumahpi tan
Nyang na tuan meusuaara

Dum jen pari that geuransang
Jitampa di mieng jitrom di muka
Dumna kaphe abeh gundah
Pari han leumah jieu rupa

Beude jipeulheueh donya meuhayak
Deumpek surak nyum lham donya
Ureueng Jabarah leungo tangkurak
Pari sipak meugisa jungka

Subhanallah meuhayak prang
Pari meutunang ngon manusia
Le that mate kaphe Jabarah
Jen pari plah bansineuna

Ureueng Jabarah han meuho plueng
Jitrom di rueng meusalop muka
Badanjih keumong abeh reudom
Jen pari trom bansineuna

Muka u likot dum meupaleng
Abek teuheng reuloh jungka
Subhanallah prang meukalot
Jen jimeulot ngon manusia

Kaphe jiteupuek teucruep reubah
Ladom patah meugisa pha
Ladom jisrom keudeh u laot
Keu umpeuem eungkot meukeurija

Ureueng Jabarah abek teumakot
Jen pari dhot teubinga-binga
Ureueng Jabarah mata seupot
Jitampa hat-huet bak-bak muka

Muka baso dum ka mirah
Pari rajah bansineuna
Jitak jitop sare mirah
Lam blang darah jeuet ba bahtra

Ureueng Jabarah klik meu'eut-'eut
Jitampa hat-huet meupaleng muka
Jidrop han jeuet leumah jieu tan
Jipohpi meunan hana nyata

Ho jibalah jipoh angen
Sare beurigen kaphe dumna
Meutheun tadah balah han jeuet
Sare kit-kuet pari tampa

Dang peuse droe jiteupuek di mieng
Reubah teugageueng meukeuba-keuba
Jikira jeuet peuse miseue sabe droe
Kaphe sinaroe gadoh bicara

Han meukri-kri han meuban-ban
Soe seumeupoh nyan leumah hana
Dum jen seuot tan deuh jingieng
Leupeung di mieng leupuk di muka

Nyo bit paleh teumeung han meukri
Bek kadong le kaplueng sigra
Ureueng Jabarah teuma jiplueng
Mata ngieng u rueng meugisa-gisa

Jen pari dum u nap jiampeueng
Aneuk bajeueng kakeumeung bungka
Pari carot jidhot gurantang
Kaphe suang ingat binasa

Ureueng Jabarah teumanyong yoh nyan
Soe gata nan kamoe tatampa
Pari jeuneh kah malaikat
Rupa kulihat hana nyata

Pakon kah tanyong kaphe bajeueng
Kamoe ureueng asoe rimba
Pakon cit kapoh kamoe mate
Peue na deungki kamoe keu gata

Pari seuot kaphe laknat'
Kah kiamat han le donya
Kutok Allah kaphe la'in
Kaprang sadikin raja eelia
Jinoe kah kupoh suroh Tuhan
Pakon kalawan Baren Miga
Putroe Baren waliyullah
Gaseh Allah dalam donya

Kaphe bajeueng jinoe kusimpan
Tulong Tuhan Po Nyang Esa
raja Jabarah tanyong Tuhan
Pakri bangon kakheun rupa

Tuhan di kamoe he maleu'un
Kango kukheun hai ceulaka
Hana jaroe hana gaki
Mahasuci Allah Ta'ala

Hana sakri mee cit taboh
Han sapeue roh mee tapeusa
Han neukheundak nyan keu teumpat
Tuhan nyang that amat kaya

Teuma jikheun le kaphe Jabarah
Tuhan tapeugah han meurupa
Pakri kaseumbah di kah Tuhan
Rupa kakheun tan leumah hana

Bukon le pungo peue kaseumbah
Han tom peurintah dilee nyang ka
Kah nyang pungo kaphe bajeueng
Kaseumbah patong asoe nuraka

Pari beungeh jitampa le
Dumna kaphe ka binasa
Jitop u laot bandum sare
Sigala kaphe nak eungkot seuba

Yee ngon pawoh dum troe butun
Kaphe maleu'un pari geulawa
Meutindan-tindan jitop leugat
Kaphe laknat gundah raya

Ho nyang jiplueng peusiblah droe
Leupeung jiseudoe bak-bak muka
Jitrom king-keueng sigala rakyat
Reubah teucruep klik meu'a-'a

Jitampa di mieng ka teupaleng
Babah teuheng gigoe hana
Bak jiteupuek gigoe runtoh
Meugusi ueh tinggai nyang na

Suara meuloe-loe gigoe rumpang
Kaphe suang kiam subra
Jen pari dum that guransang
Kaphe jicang ngon jitampa

Salang ngon jen han teujinoh
Sabab damoh lom ngon raya
Raja Pari suroh rakyat
Bek lale that kapoh lanja

Ureueng tujuh droe eu peurasan
That analan pari raja
Subhanallah prang meugeucoh
Surak rioh sang lham donya

Ban saboh blang jeuep-jeuep sagoe
Kaphe sinaroe mate fana
Sidroe-droe pari ngon sijameung
Mate peuet limong kaphe jitampa

Kaphe mate naha teudoh
Reubah-reuboh klik meu'a-'a
Jitop u manyang su meudeungong
Teubiet nyawong lam antara

Jisumpom bak tanoh sare bam-bum
Han soe tudum mate meulaksa
Ho nyang jiplueng u nap jitham
Dum Jen Islam that guranta

Raja Jabarah han meuho plueng
Meuteutilueng jilet lingka
Ho meureunggot jikeumeung plueng
Pari linteueung pak jitampa

Pari seupot ulee beukah
Teubiet darah utak teupanca
Taeu bangke meutindeh-tindeh
Meupat meulapeh meupat-pat dua

Ladom kaphe nyang teumakot
Jilangue laot ji'eue bak bahtra
Ri nyang tungang mantong di darat
Abeh meusapat dum bak raja

Pari peurab bak raja Jabarah
Rakyat barollah ban siseun lingka
Rakyat di lingka raja di teungoh
Rakyat jipoh jitinggai raja

Jipeucet ate Raja Jabarah
Pat meugah kah rakyat ka fana
Insya Allah ngon tulong Tuhan
Dum kusimpan peue kasangka

Raja Jabarah yo meugep-gep
Jen pari let ban siseun lingka
Sare meu'i-i klik ka mundo
Pari eumpu hana reuda

Ho meureunggot jikeumeung jak
Puk jisipak teuglong mata
Sigala kaphe dum gadoh ah
Pari rajah bansineuna

Badan baso keumong sare
Sigala kaphe gadoh bicara
Ladom kaphe pha meugilieng
Ladom keuieng jiwiet dua

Ladom jitampa meunan nyang le
Meugisa baho mieng meuputa
Mata teusuet babah teuheng
Jitampa le jen pari rimba

Han ek jitheun le angkatan pari
Kaphe majusi jinoo jiguda
Raja Jabarah jinoo ka talo
Pari eundru han tom reuda

Rakyat mate meulak-kapak
Sang tanoh cak meukeuba-keuba
Nyang tinggai abeh jiwoe
Kaphe pindoe hana laba

Raja Jabarah jilangue laot
Yo teumakot laju lam bahtra
Ban sare troh dalam kapai
Jimeulayeue sigra-sigra

Jibet saoh laju jiwoe
Raja pindoe han le guranta
Na jibungka baro sikhon rot
Pari seutot si ceulaka

Pari tanyong pakon kawoe
Aneuk bisoe ho kaguda
Baranggaho kaplueng kuseutot laju
Kah keueumpu kusalop jungka

Kaphe Jabarah teumakot kuyu
'Oh jingo su pari raja
Jen pari kheun wahe kaphe
Kupoh mate bansineuna

Meusidroe kah han kukeubah
Sitree Allah asoe nuraka
Raja Jabarah jipleueng laju
Pari eundru hana reuda

Jiek u laot han pawoh na yee
Kaphe seudee pawoh seuba
Dumna bahtra abeh jen lungkop
Kaphe kirop klik meu'a—'a

Pari seutot troh u nanggroe
Rakyat sinaroe jipoh lanja
Raja Jabarah jiplueng u darat
Pari aseutot di likot raja

Pari di likot jigeudam tanoh
Sare meh-moh raja ceulaka
Jiplueng deh-doh sangat pantah
Siploh seun reubah jibeudoh sigra

Raja jen pari hana seutot le
Bandum sare jiwoe u rimba
Jiwoe bak teupat maseng-maseng
Sigala jen bansimua

Prang ka teudoh buet raja jen
Putroe Baren sajan ngon raja
Teutap keurajeuen di nanggroe Makah
Han le sosah ate lam dada

Raja Abdullah ngon Putroe Baren
Bintang canden sajan ngon Bangta
Maseng-maseng teutap bak teupat
Han le lon surat ka abeh haba

PENUTUP

Ngon tulong Tuhan kuasa kudrat
Deungon beureukat Makah mulia
Deungon mukjizat Nabi Muhammad
Tuhan Hadarat nyang peutroh pinta

Napsu lon rindu ate lam badan
Uroe dan malam teurcinta-cinta
Tuhan nyang peutroh ban napsu deundam
Nibak lon tuan ekhtieue saja

Putroe Baren han le lon seubot
Keu Teungku Akob jinoe phon punca
Ureueng seumurat jinoe lon seubot
Cit that meukeusud bek gadoh nama

Dua thon sabe han tom tren u yup
Sang ureueng khaluet di dalam rimba
Badan ka reugeh tuboh ka pijuet
Sabab hana buet ureueng ka tuha

Ate lam badan napsu that keu buet
Han troh meukeusud leumoh anggeeta
Pihak buet jaroe jeuet bacut-bacut
'Oh glah keu ranup bakong peunuta

Meu'oh glah keudroe peunajoh makanan
Adat kori meunan inong seurapa
Ka meunoe bagi neubri le Tuhan
'Oh tuha badan teugapi hana

Raya that napsu ate lam badan
Akan makanan dan rukon ija
Napsu mantong han ek dapatkan
Saboh krak pinggang na yum sibara

'Oh talo kaphe jiprang le Jeupang
Sigala barang meuhai hareuga
Breueh ngon pade cit ak maklumkan
Siare tuan sireutoh rupia

Barang lam nanggroe teubee ngon pisang
Sikai meunisan lomong ploh rupia
Boh ubi sabohpi troh nam suku
Saboh boh u lhee ploh rupia

Ranup siikatpi troh lhee tahe
Saboh gambe siploh rupia
Kon ban jameun donya ka akhe
Hana gaseh le ate lam data

Barangpat nanggroe dum sigala be
Hana enseueh le keu ureueng tuha
Nyanpat tanda nanggroe ka akhe
Ban hadih Nabi hana meutuka

Gasehpi kureueng sayang hana le
Jitem meupake sabe syeedara
Saboh boh pineung jitem meutak-tak
Bak bak u sibak jitem meudawa

Sibak meuria jitem meuhukom
Bah gadoh kawom meuna areuta
Nanggroe jinoe Aceh geunggam
Ikot turotan nibak Beulanda

Hana geupateh ban kheun Tuhan
Ayat Quruan tinggai di lua
Ureueng le malem haloh teumuban
Nyang suroh Tuhan tinggai simua

Lon surat bacut he tuan-tuan
Jampang na jan tameukeurija
Kadang meunapsu keu Putroe Baren
Tadeungo cut lem haba kakanda

Meunyo han idin ureueng binoe
Nibak kamoe han jeuet meudawa
Masa awai phon ka glak kamoe
Ureueng binoe nyang that meuhawa

Jitem meupayah ngon jimeurugoe
Jitem jak bloe buku bak Cina
Lon tuan surat siuroe sion
Sampoe troh sithon nyan baro leungka
Nyang jeuet keu meunan lon tuan peugah
Cit meuhad sah ulon keurija
Meunyo talakee bek trep tapulang
Lon takot jeuet prang kamoe meudawa

Nyankeu lon peugah he tuan-tuan
Bek ngon sabab nyan lon tuan bungka
Bak raya gaseh deungon neusayang
'Oh troh lhee malam neupulang sigra

Leubeh nibak nyan bek tameunapsu
Hana sisuku na roh beulanja
Ka lon bri ingat he teungku-teungku
Mameh ban madu gula di Rawa

Muka bek poucat ate bek beungeh
Narit lon mameh ban saka gula
Bukon keu ujob deungon sumeu'ah
Ban nyang lon peugah hana meutuka

Sabab hana roh sion keureutah
Dawuet sibicah hana bak gata
Bek takeumeung kheun tamse atra droe
Malam dan uroe baca han reuda

Narit mameh leumak ban santan
Siakan-akan ie madu nira
Jeuetkeu 'oh nan lon tuan surat
Han jeuet panyang that wahe syeedara

Bitpi lon peugah ban haba sinoe
Meukon meusoe-soe han jeuet poeucaya
Donya jinoe kon ban dilee
Ureuingjipeudee gli-gli mata

Pat-pat nyang keunong jigunteng sion
Le that meuteumeung bube nyang ka-ka
Lon tadeungo he tuan-tuan
Kumula kalam deungon sijahtira

Hareuga le intan malakat
Tatimang brat on nyang ada
Barangsoe lakee pulang beurijang
Han jeuet le malam wahe syeedara

Bek takeumeung lakee atra dore
Lon takot paloe rugoe meubara
Reutoh ngon ribee han lon tueng keu yum
Han ek maklum taboh hareuga

Sithon sabe lon tuan surat
Badan hana wat lon eh lam tika
Bak pihak ate lon lam jasad
Lon tuan surat seun-seun sibanja

Neubri kuasa Tuhan Hadarat
Lon pioh siat 'oh troh kutika
'Oh troh watee lon seumbahyang
'Oh lheueh makan kalam lon mula

Lon cok daweuuet deungon keureutah
Kuasa Allah lon surat lanja
Hana lon ingat akan keu payah
Bak dahsyah ate lam data

Bak rindu ate lon dahsyah
Rugoe ngon payah hana lon kira
Keudeh lon jak cok u Babah Nipah
Ngon moto bagah lon tuan siwa

Bak Teungku Dawod lon cok naseukah
Di Babah Nipah teumpatkan Daya
Gaseh teungku ke ulon tuan
Jarak that jalan jak bak gata

Ate lon rindu uroe dan malam
Tabri lon pinjam surat adekda
Ate lon that di dalam badan
Gaseh dan sayang teungku keu hamba

Neubri keu lon Putroe Baren
Napsu lon salen wahe adekda
Fateuhon Kafi lon bri laen
'Oh lheueh lon salen keumbali pula

Rijang meukabui ngon tulong Tuhan
Ate lam badan puteh safa
Lon dom bak keubon teuma simalam
Beungoh uroe nyan lon tuan gisa

Lon jak sidroe seutot jalan
Meungonpi tan sidroe saja
Troh Jeunamprong uroe ka malam
Troh u Subang ka leupah 'isya

Bak Geusyik Beurahim lon lakee dom
'Oh beungoh lom lon tuan gisa
'Oh troh bak nanggroee Kuala Unga
Ka saket limpa ka doe lam dada

Lon dom sinan bak rakan sahbat
Nyang meusyeuhu that Isma'ila
'Oh beungoh uroe lon jak laju
'Oh troh u Gle U ka rab poh dua

Insya Allah tulong Tuhanku
Troh ban napsu ban hajat pinta
'Oh troh lon woe lon surat laju
Kareuna rindu ate lam dada

Narit lon miseue lon tamah bacut
Deungo adek cut kakanda cutda
Keu Putroe Baren that tameukeusud
Keu Teungku Akob han tameuhawa

Jakarta, 10 Februari 1984

Dialih aksarakan oleh:
Drs. Ramli Harun dari
Naskah "Hikayat Putroe Baren".



PN BALAI PUSTAKA — JAKARTA

